

妙法蓮華經文句卷第一上 定一

隋天台智者大師說

門人灌頂記

序品第一一傳出世難佛說是難傳譯此難日

十七於金陵聽受六十九於丹

在添制留贈後賢共期佛慧

委釋經題已如上說序者訓序謂階位賓主問答悉序也經家從義謂次由述也如是等五事冠於經首次序也放光六瑞起發之端由序也問答釋疑正說弄引叙述也具此三義故稱為序品者中阿含云跋渠此翻為品品者義類同者聚在一段故名品也或佛自唱品如梵網或結集所置如大論或譯人添足如羅什今藥王本事是佛唱妙音觀音等是經家譯人未聞諸品之始故言第一佛赴緣作散華貫華兩說結集者按說傳之論者依經中之皆不節目古講師但敷弘義理不分章段若純用此意後生殆不識起盡又佛說貫散集者隨義立品增一云契經一分律一分阿毗曇一分契經更開四謂增一長中雜增一阿含明人天因果長阿含破邪

見中阿含明深義雜阿含明禪定律開五部及八十誦阿毗曇開六足八捷度等阿含謂施戒慧六度皆足也謂根性道定等八種聚也天親作論以七功德力序品五示現分方便品其餘品各有處分音河西德江東瑤取此意節目經文末代尤煩光宅轉細重旁翳於太清三光為之載耀問津者所不貴雲鬻云細科煙颺雜礪塵飛蓋若過若不及也廬山龍師分文為序正流通二十七品統唯兩種從序至法師言方便言真實理一說三故寶塔下身方便身真實實遠唱近故又從方便至安樂行是因門從踊出下是果門齊中興印小山瑤從龍受經分文同玄暢從序至多寶為因分從勸持至神力為果分從囑累盡經為護持分又有師云從序至學無學人記是法華從法師至囑累明受持功德從藥王盡經美諸菩薩本願有師作四段初品為序段從方便至安樂行開三顯一段從踊出訖分別功德開近顯遠段後去餘勢流通段光宅雲從印受經初三段次各開二謂通

序列序正謂因門果門流通謂化他自行二序各五二正各四二流通各三合二十四段云夫分節經文悉是入情蘭菊各擅其美後生不應是非諍競無三益喪一道三益者世界等三悉檀也一道者第一義悉檀也天台智者分文為三初品為序方便品訖分別功德十九行偈凡十五品半名正從偈後盡經凡十一品半名流通又一時分為二從序至安樂行十四品約迹開權顯實從踊出訖經十四品約本開權顯實本迹各序正流通初品為序方便訖授學無學人記品為正法師訖安樂行為流通踊出訖彌勒已問斯事佛今答之半品名序從佛告阿逸多下訖分別功德品偈名為正此後盡經為流通今記從前三段消文也問一經云何二序答華嚴處處集眾阿含篇篇如是品前後付囑皆不乖一部兩序何妨今不安五義者本門非次首故也迹門但單流通者說法未竟也有無之意云爾今帖文為四一列數二所以三引證四示相列數者一因緣二約教三本迹四

觀心始從如是終于而退皆以四意消文而今略書或三二一貴在得意不煩筆墨二所以者問若略則一若廣匪四所以云何答廣則令智退略則意不周我今處中說令義易明了因緣亦名感應衆生無機雖近不見慈善根力遠而自通感應道交故用因緣釋也夫衆生求脫此機衆矣聖人起應應亦衆矣此義更廣處中在何然大經云慈善根力有無量門略則神通若十方機感曠若虛空今論娑婆國土音聲佛事則甘露門開依教釋者中說明矣若應機設教有權實淺深不同須置指存月亡迹尋本故肇師云非本無以垂迹非迹無以顯本故用本迹釋也若尋迹迹廣徒自疲勞若尋本本高高不可極日夜數他實自無半錢分但觀已心之高廣扣無窮之聖應機成致感速得已利故用觀心釋也三引證方便品云十方諸佛爲一大事因緣故出現於世若人天小乘非一非大又非佛事不成機感實相名一廣博名大佛指此爲事出現於世是名一大事因緣也又云

以種種法門宣示於佛道當知種種聲教若微若著若權若實皆爲佛道而作筌第大經云麤言及軟語皆歸第一義此之謂也壽量品云今天人阿脩羅皆謂我少出家出釋氏宮去伽耶城不遠得三菩提然我實成佛已來無量無邊阿僧祇劫以斯方便導利衆生方便品又云我本立誓願普令一切衆亦同得此道如我等無異又五百受記品云內秘菩薩行外現是聲聞實自淨佛土示衆有三妻又現邪見相我弟子如是方便度衆生此則師弟皆明本迹云譬喻品云若人信汝所說即爲見我亦見於汝及比丘僧并諸菩薩當知隨有所聞諦心觀察於信心中得見三寶聞說是法寶見我是佛寶見汝等是僧寶云四示相者且約三段示因緣相衆生久遠蒙佛善巧令種佛道因緣中間相值更以異方便助顯第一義而成熟之今日雨華動地以如來滅度而滅度之復次久遠爲種過去爲熱近世爲脫地涌等是也復次中間爲種四味爲熱王城爲脫今之開示悟入者也復

次今世爲種次世爲熟後世爲脫未來得度者是也雖未是本門取意說耳其間節節作三世九世爲種爲熟爲脫亦應無妨何以故如來自在神通之力師子奮迅大勢威猛之力自在說也以如是等故有序分也衆見希有瑞顯顯欽渴欲聞具足道佛乘機設化開示悟入佛之知見故有正說分也非但當時獲大利益後五百歲遠沾妙道故有流通分也又示教相者此序非爲人天清升作序非爲二乘小道作序不爲即空通三作序不爲獨菩薩法作序乃爲正直捨方便但說無上佛道作序耳此正不指世間爲正不指螢光析智爲正不指燈炬體法智爲正不指星月道種智爲正乃指日光一切種智爲正此流通非爲楊葉木牛馬而作流通非流通半字非流通共字非流通別字純是流通圓滿修多羅滿字法也次示本迹者久遠行菩薩道時宣揚先佛法華經亦有三分上中下語亦有本迹但佛佛相望是則無窮別取最初成佛時所說法華三分上中下語專名爲上

名之為本何以故最初成佛初說法故為上為本此意可知中間行化助大通智勝然燈等佛宣揚法華三分者但名為中但名為迹何以故前有上故前有本故今日王城所說三分但名為下但名為迹乃至師子奮迅之力未來未永所說三分亦指最初為上為本譬如大樹雖有千枝萬葉論其根本不得傳傳相指同宗一根此喻可解云次示觀心相者當約已心論戒定慧為三分修行以戒初定中慧後若法門以慧為本定戒為迹又戒定慧各各作三分前方便白四羯磨結竟為戒三分二十五方便正觀歷緣又善入住百千三昧等為定三分因緣所生法即空即假即中為慧三分已約三分示四種相當用此義從如是去至作禮而退已還悉作四意消文但準望此義比知則易分別顯示其辭則難行者善思量之語異意同千車共轍萬流鹹會者也。序有通別從如是去至却坐一面通序也從爾時世尊去至品別序也通序通諸教別序別一經通序為五或六或七

云如是者舉所聞之法體我聞者能持之人也一時者聞持和合非異時也佛者時從佛聞也王城者山聞持之所也與大比丘者是聞持之伴也此皆因緣和合次第相生又如是者三世佛經初皆安如是諸佛道同不與世等世界悉檀也大論云舉時方令人生信者為人悉檀也又對破外道阿毘二字不如不是對治悉檀也又如是者信順之辭信則所聞之理會順則師資之道成即第一義悉檀也因緣釋甚廣不能具載云約教釋者經稱三世佛法初皆如是先佛有漸頓秘密不定等經漸又三藏通別圓今佛亦爾諸經不同如是亦異不應一匙開於衆戶又佛阿難二文不異為如能詮詮所詮為是今阿難傳佛何等文詮何等是不可以漸文傳頓是以偏文詮圓是傳詮若謬則文不如文不如則理不是此義難明須加意詳審且依漸教分別佛明俗有文字真無文字阿難傳佛俗諦文字與佛說不異故名如此俗文會真諦理故名為是此則三藏經初明如是也佛明

即色是空空即是色色空空色無二無別空色不異為如即事而真為是阿難傳佛文不異為如能詮即所詮為是此則通教經初如是也佛明生死是有邊涅槃是無邊出生死有邊入涅槃無邊出涅槃無邊入於中道阿難傳此出有人無入中與佛說無異為如從淺至深無非曰是此則別教經初如是也佛明生死即涅槃亦即中道況復涅槃非中道真如法界實性實際徧一切處無非佛法阿難傳此與佛說無異故名為如如如不動故名為是是則圓經初如是也若動俗入如三藏義耳不動俗即是如通教義耳動如入如別教義耳不動如而是如圓教義也云若頓如是與圓同不定如是前後更互秘密者隱而不傳數八教網巨法界海懼其有漏況羅之一目若為獨張又一時接四箭不令墮地未敢稱捷策鈍驢驅蹶尚不得一何況四耶云云約本迹釋如是者三世十方橫豎皆爾過去遠遠現在漫漫未來未永皆悉如是何處是本何處是迹且約釋尊最初成

道經初如是者是本也中間作佛說經今日所說經初如是者皆迹也又阿難所傳如是者迹也佛所說如是者本也又師弟通達如是非始今日亦非中間者本也而中間而今日者迹也觀心釋者觀前悉檀教迹等諸如是義悉是因緣生法即通觀也因緣即空即假者別觀也二觀為方便道得入中道第一義雙照二諦者亦通亦別觀也上來悉是中道者非通非別觀也下文云若人信汝所說即得見我亦見於汝及比丘僧并諸菩薩即觀行之明文也信則論機見則是應即因緣也又信有淺深見有權實種種分別不同者即分別教又信法華之文則見實相之本若見身子之化則見龍陀之本若見始成釋尊亦見久成先佛若見千二百比丘八萬菩薩者亦見其本也又聞經心信無疑覺此信心明淨即是見佛慧數分明是見身子諸數分明是衆比丘慈悲心淨是見諸菩薩約心為四帖釋轉明若釋他經但用三意為未發本顯迹故當知今經三釋與他同一釋與彼異

四番釋如是竟云我聞者或問如是蓋經本不同前後互舉耳今例為四釋大論云耳根不壞聲在可聞處作心欲聞衆緣和合故言我聞問應言耳聞那云我聞答我是耳主舉我攝衆緣此世界釋也阿難登高稱我聞大衆應悲號適見如來今稱我聞無學飛騰說偈佛話經明文殊結集先唱題次稱如是我聞時衆悲號此為人釋也阿難登高稱我聞遣衆疑阿難身與佛相似短佛三指衆疑釋尊重出或他方佛來或阿難成佛若唱我聞三疑即遣此對治釋也阿難學人隨俗稱我聞第一義中無我無聞古來衆釋同是因緣一意耳約教解釋者釋論云凡夫三種我謂見慢名字學人二種無學一種阿難是學人無邪我能伏慢我隨世名字稱我無咎此用三藏意釋我也十住毗婆沙云四句稱我皆隨邪見佛正法中無我誰聞此用通教意也大經云阿難多聞士知我無我而不二雙分別我無我此用別教意也又阿難知我無我而不二方便為侍者傳持如來無礙智慧以

自在音聲傳權傳實有何不可此用圓教釋我也又正法念經明三阿難阿難陀此云歡喜持小乘藏阿難跋陀此云歡喜賢受持雜藏阿難婆伽此云歡喜海持佛藏阿舍經有典藏阿難持菩薩藏蓋指一人具於四德傳持四法門其義自顯云本迹釋者若未會入可言阿難隨世名我若發迹顯本空王佛所同時發心方便示為傳法之人何所不能觀心釋者觀因緣所生法即空即假即中即空者我無我也即假者分別我也即中者真妙我也云釋聞者阿難佛得道夜生侍佛二十餘年未侍佛時應是不聞大論云阿難集法時自云佛初轉法輪我爾時不見如是展轉聞當知不悉聞也舊解云阿難得佛覺三昧力自能聞報恩經云阿難求四願所未聞經願佛重說又云佛口密為說也胎經云佛從金棺出金臂重為阿難現入胎之相諸經皆聞況餘處說耶此文云阿難得記即憶本願持先佛法皆如今也此因緣釋也若約教者歡喜阿難面如淨滿月眼若青蓮華親承佛

旨如仰完器傳以化人如瀉異瓶此傳聞聞法也歡喜賢住學地得空無相顧眼耳鼻舌諸根不漏傳持聞不聞法也典藏阿難多所舍受如大雲持雨此傳持不聞聞法也阿難海是多聞士自然能解了是常與無常若知如來常不說法是名菩薩具足多聞佛法大海水流入阿難心此傳持不聞不聞法也今經是海阿難持不聞不聞之妙法也本迹解者如上四聞皆迹引而本地不可思議云觀心釋者觀因緣法是觀聞聞觀空是觀聞不

聞觀假是觀不聞聞觀中是觀不聞不聞云一念觀者妙觀也云一時者肇師云法王啓運嘉會之時者世界也論云迦羅是實時示內弟子時食時著衣者為人也三摩耶是假時破外道邪見者對治也若時與道合者第一義也云若見諦已上無學已下名下一時若三人同入第一義名中一時若登地已上名上一時若初住已上名上一時今經是上上一時此約教分別也本迹者前諸一時迹也久遠實得之一時本也觀心釋者觀心

先空次假後中次第觀心也觀心即空即假即中者圓妙觀心也佛者劫初無病劫盡多病長壽時樂短壽時苦東天下富而壽西天下多珠寶多牛羊比天下無我無臣屬如此時處不感佛出八萬歲時百年時南天下未見果而修因故佛出其地離車子云摩竭提國如大池佛出其國如大蓮華無勝云佛於衆生平等無二汝等耽荒五欲不見佛耳非佛棄汝出摩竭提此皆世界釋也日若不出池中未生生已等華翳死無疑佛若出世則有利利婆羅門居士四天王乃至有頂此就為人釋也三乘根性感佛出世餘不能感善斷有頂種永度生死流此就對治說也佛於法性無動無出能令衆生感見動出而於如來實無動出此就第一義說也皆因緣釋耳佛名覺者知者於道場樹下知覺世間出世間總相別相覺世即苦集覺出世即道滅亦能覺他身長丈六壽八十老比丘像菩提樹下三十四心正習俱盡者即三藏佛自覺覺他帶比丘像現尊特身樹下一念相應斷餘

殘習者即通佛自覺覺他單現尊特相坐蓮華臺受佛職者即別佛自覺覺他隱前三相唯示不可思議如虛空相即圓佛自覺覺他故經云或見如來丈六之身或見小身大身或見坐華臺為百千釋迦說心地法門或見身同虛空徧於法界無有分別即此義也是為約教分別也本迹釋者一佛為本三佛為迹中間示現數數唱生數數唱滅皆是迹也唯本地四佛皆是本也觀心釋者觀因緣所生心先空次假後中皆偏覺也觀心即空即假即中是圓覺也云住者能住住所住即是忍土王城能住即是四威儀住世未滅此則世界因緣釋住也又住者住十善道住四禪中此即為人因緣釋住也又住者住三昧對治因緣釋住又住者住首楞嚴即是第一義因緣釋住云約教者三藏佛從折門發真無漏住有餘無餘涅槃通佛從體門發真住有餘無餘涅槃別佛從次第門入住秘密藏圓佛從不次第門入住秘密藏前三佛住能所皆羸後一佛住能所俱妙今經則是

圓佛住於妙住也本迹解者三藏佛應涅槃慈悲垂迹生身住世通佛普願慈悲扶餘習度衆生作佛事別圓佛皆慈悲熏法性愍衆生故垂應法界當知四佛住本佛住以慈悲故住於忍土王城威儀住世是名迹住觀解者觀住於境或住無常境即空即假即中等境以無住法住於境中故名爲住王舍城者天竺稱羅閱祇伽羅羅閱祇此云王舍伽羅此云城國名摩伽陀此云不害無刑殺法也亦云摩竭提此云天羅天羅者王名也以王名國此王即駸足之父昔久遠劫此王主千小國王巡山值特師子衆人迸散仍共王交後月滿來殿上生王知是已子訛言我既無兒此乃天賜養爲太子足上斑駸時人號爲駸足後紹王位喜噉肉勅廚人無令肉少一時遽闕乃取城西新死小兒爲膳王言大美勅之常辦此肉廚人日捕一人舉國愁恐千小國興兵廢王置着闍山中諸羅刹輔之爲鬼王因與山神誓誓取千王祭山捕得九百九十九唯少普明王後時伺執得之大啼哭

恨生來實語而今乖信駸足放之還國作大施立太子仍就死形悅心安駸足問之答得聞聖法因令說之廣讚慈心毀昔殺害仍說四非常偈云駸足聞法得空平等地即初地也千王各取一滯血三條髮賽山神願駸足與千王共立舍城都五山中爲大國各以千小國付子胤千王更迭知大國事又百姓在五山內七遍作舍七度被燒百姓議云由我薄福致致煨燼王有福力其舍不燒自今已後皆排我屋爲王舍由是免燒故稱王舍城又駸足共千王立舍於其地故稱王舍又駸足得道放赦千王千王被赦於其地故名地爲王赦而經家借音爲屋舍字耳因緣出入論及諸經云約教者像法決疑經云一切大衆所見不同或見娑羅林地悉是土砂草木石壁或見七寶清淨莊嚴或見此林是三世諸佛所遊行處或見此林即是不可思議諸佛境界真實法體例知此義四見不同所住既然能住亦爾此則約教分別也本迹觀心在後說者闍嶺山者此翻靈鷲亦云鷲頭亦

云狼跡梁武云王賜引詩人所詠闍雖是也爾雅云似鴉又解山峯似鷲將峯名山又云山南有尸陀林鷲食尸竟棲其山時人呼爲鷲山又解前佛今佛皆居此山若佛滅後羅漢住法滅支佛住無支佛鬼神住既是聖靈所居總有三事因呼爲靈鷲山有五精舍鞞婆羅跋耆此云天主穴薩多般那求訶此云七葉穴因陀世羅求訶此云蛇神山薩跋耆魂直迦鉢婆羅此云少獨力山五是耆闍嶺山間劫火洞然天地廓清云何前佛後佛同居此山答後劫立本相還現得神通人知昔名以名今耳例如先劫姓瞿曇將本姓以姓今也約教釋山例如城義說云觀釋者王即心王舍即五陰心王造此舍若析五陰舍空空爲涅槃城此觀既淺如見土木若體五陰舍即空空爲涅槃城即通教也若觀五陰舍因滅是色獲得常色受想行識亦復如是此之四德常爲諸佛之所遊處若觀五陰即法性法性無受想行識一切衆生即是涅槃不可復滅畢竟空寂合如是涅槃即是真如實

體云云觀心山者若觀色陰無知如山識陰如
靈三陰如驚觀此靈驚無常即析觀也觀此
靈驚即空體觀也觀靈即智性了因智慧莊
嚴也驚即聚集緣因福德莊嚴也山即法性
正因不動三法名秘密藏自住其中亦用度
人下文云佛自住大乘即別圓二觀云云中者
佛好中道升中天中日降中國中夜滅皆表
中道今處山中說中道也釋同聞衆為三初
聲聞次菩薩後雜衆諸經多爾舊云有事有
義事者逐形迹親踈聲聞形出俗網迹近如
來證經為親故前列也天人形乖服異迹非
侍奉證經為踈故後列也菩薩形不檢節迹
無定處既不同俗復異於僧處季孟之間故
居中仲也有義者聲聞欣涅槃天人著生死
各有所偏菩薩不訢不著居中求宗故在兩
間釋論意亦爾此一解似兩釋事解似因緣
義解似約教云云本迹解者聲聞內秘外現何
嘗保證涅槃天人皆大薩埵豈復耽染生死
皆是迹引二邊而本常中道也觀心釋者從
假入空觀即偏破生死從空入假觀即偏破

涅槃中道正觀無復前後云云列聲聞為二先
比丘次比丘尼比丘又二先列多知識次列
少知識舊呼為大名聞小名聞雖然無據今
依文判如此就多知識衆為六一類二數三
位四歎五列名六結一類者皆是大比丘氣
類也譬羣方貴賤各有班輩今諸比丘皆衆
所知識高譽大德也釋論明與者共義舉七
一解共謂一時一處一戒一心一見一道一
解脫也若歷教應各明七一三藏一七一通
教二七一別教無量七一圓教一七一若未
發迹正是三藏通教中七一直明兩意幾異
時處戒解脫是同心見道三種則異若至開
三顯一即得入圓教七一也法華論四種聲
聞今開住果者為兩析法住果是三藏聲聞
體法住果是通教聲聞開應化者為兩登地
應化別教聲聞登住應化圓教聲聞開佛道
聲聞亦為兩令他次第聞佛道是別教聲聞
令他次第聞佛道即圓聲聞聲聞義浩然
云何以證涅槃者判之云云大者釋論明大者
亦言多亦言勝器量尊重為天王等大人所

敬故言大升出九十五種道外故言勝偏知
內外經書故言多又數至一萬二千故言多
今明有大道故有大用故有大知故言大
勝者道勝用勝知勝故言勝多者道多用多
知多故言多道即性念處大於一切智外道
用即共念處勝神通外道知即緣念處多四
韋陀外道也約教釋大多勝者大人所敬等
是三藏中釋耳大者大力羅漢所敬也多者
偏知生滅即無生滅法也勝者勝三藏四門
也此通教釋也又大者體法大力羅漢所敬
也多者恒沙佛法皆知也勝者勝二乘人此
別教釋也又大者諸大菩薩所敬也多者法
界不可量法悉知也勝者勝諸菩薩也此圓
教釋也本迹者此諸大德久為諸佛之所咨
嗟本得勝幢三昧超諸外道先已成就種智
偏知迹來輔佛行化示作愛見中大多勝欲
引乳入酪又作三藏中大多勝欲引酪入生
酥示方等中大多勝欲引生酥入熟酥示轉
教作般若中大多勝欲引熟酥入醍醐故作
法華中大多勝也然其本地大多勝久矣云云

觀心者空觀為大假觀為多中觀為勝又直就中觀心性廣博猶若虛空故名大雙遮二邊入寂滅海故名勝雙照二諦多所舍容一心一切心故名多也比丘者摩訶師云秦言淨命乞食破煩惱能持戒怖覓等天竺一名舍此四義秦無以翻故存本稱什師云始出妻子家應以乞食自資清淨活命終出三界家必須破煩惱持戒自守具此二義天魔怖其出境也釋論云怖魔破惡乞士魔樂生死其既出家復化餘人俱離三界乘於魔意魔用力制翻被五繫但恐懼而已故名怖魔出家人必破身口七惡故言破惡夫在家三種如法一田二商三仕用養身命出家人佛不許此唯乞自濟身安道存福利檀越三義相成即比丘義也涅槃寶梁皆舉破惡名比丘者不具說也今明此三義應通初後如初出家時白四羯磨無作戒力徧一切境翻無作惡初修禪定發定共戒防伏意地貪瞋不起初修觀慧發相似道共戒能伏煩惱初心亦稱破惡何獨後心耶怖魔者初剃髮稟戒已令

魔愁修定欲伏煩惱修慧欲破煩惱初心亦令魔怖何獨後心耶乞士者初離邪命以乞自活修禪歷境求定修慧緣理求無漏皆是乞士何況相應而非乞士具此義故通名比丘依經家皆歎後心比丘耳此皆三藏意若歷緣求真名乞士破障理之惑名破惡修此行怖四魔即通教義若歷三諦求理名乞士除通別惑名破惡怖八魔十魔者即別義若即生死求實相味名乞士達煩惱即菩提名破惡魔界即佛界者是圓教義若未發迹但明前二義若已顯本具後意也本迹者本登涅槃山頂與無明癡愛父母結業妻子別出分段變易家久除五住何惡不破獲真法喜如食乳糜更無所須持中道道共尸波羅蜜攝衆生戒度魔界降伏即佛界如堪任乘御本地功德久已成就為調衆生迹示五味比丘傳引衆生例如前釋觀心者觀一念心淨若虛空不為二邊桎梏所礙平等大慧無住無著即名出家以中觀自資活法身慧命名為乞士觀五住煩惱即是菩提是名破惡一

切諸邊顛倒無非中道即是怖魔云衆者天竺云僧伽此翻和合衆一人不名和合四人已上乃名和合事和無別衆法和無別理佛常與千二百五十人俱三迦葉千人身子目連二百五十又云耶舍五十雜阿含四十五云五百比丘中九十人三明九十人俱解脫餘但慧解脫釋論明四種僧不依淨命名破戒僧不解法律名愚癡僧五方便名慙愧僧苦法忍去名真實僧此中非三種但是真實僧若依四教者此僧歷偏圓五味座作同聞人今正是圓教中證信也本迹釋者本與實相理和又與法界衆生機緣和而迹為半字事理之僧歷五味中引諸衆生云觀解者初學中觀入相似觀既未發真慙第一義天愧諸聖人即是有羞僧觀慧若發即真實僧若異此者即前兩僧不依觀行名破戒僧不解觀相名愚癡僧舉類義竟二明數者即是一萬二十人也本迹者本是一萬二千菩薩迹為萬二千聲聞也觀者觀十二入一入具十法界一界又十界界界各十如是即是一千

一入既一千十二入即是萬二千法門也三
明位者皆是阿羅漢也阿羅經云應真瑞應
云真人悉是無生釋羅漢也依舊翻云無著
不生應供或言無翻名合三義無明糠脫後
世田中不受生死果報故云不生九十八使
煩惱盡故名殺賊具智斷功德堪為人天福
田故言應供合此三義釋阿羅漢也或言初
始學無生生未無生初雖怖魔未大怖初
雖乞士未是灼然應供今獲無生忍破煩惱
賊盡是好良田以果對因釋羅漢三義若論
成就應取果三義若通於初亦取因三義如
此釋者皆三藏通中意耳若別圓者義則不
然非但殺賊亦殺不賊不賊者涅槃是是亦
須破故是殺賊義不生於生亦不生不生無
漏是不生非但應供亦是供應一切眾生是
供應皆歎初地初地德也本迹者本得不受
三昧於二邊無所著故名不生斷五住惑故
名殺賊能福九道饒益眾生故有應供本義
也方便度眾生歷五味傳傳作不生迹也又
本是法身迹示已利本是般若迹示不生本

是解脫迹示殺賊云觀心者空觀是般若假
觀是解脫中觀是法身又觀心者從假入空
觀亦有三義乃至中道觀殺無明賊不生二
乘心供養此人如供養世尊方等云供佛及
文殊不如施行方等者一食充軀下文云毀
讚佛罪福輕毀讚持經者罪福重何者佛無
食想久離八風不為損益施持經者全肉身
續報命生法身增慧命故有益毀之憂惱退
悔若失好時則不可救故大損云四歎德文
有五句歎上三德法華論云初句總後句別
當知諸句皆歎羅漢句耳諸漏已盡無復煩
惱此兩句歎上殺賊漏者三漏也成論云失
道故名漏律云癡人造業開諸漏門毗曇云
漏落生死論語異而同明漏義良由賊誑
失於理實貧窮孤露造諸惡業致生死亡
法身失慧命喪重寶皆是賊我不應謂是不
生義歎德也煩惱者即九十八使流扼纏蓋
等偏惱行人煩惱是能潤漏業是所潤能所
既盡正是殺賊義那得作不生歎耶逮得已
利一句是歎應供三界因果皆名為他智斷

功德皆名已利已利具足故成應供盡諸有
結心得自在兩句是歎不生諸有即二十五
有生處也結即二十五有生因也因盡眾亡
歎不生明矣不應作殺賊歎也羅漢但應結
盡未應有盡有盡者因中說果又盡在不久
也心得自在者定具足名心自在慧具足名
慧自在慧自在未必心自在心自在必慧自
在今言心自在即是定慧具足俱解脫人俱
解脫人生決定盡驗知歎不生德也若依法
華論者呼為上上起門則是以後釋前也論
云以諸漏盡故名羅漢以心得自在故名有
結盡如是傳傳釋上也本迹者不生不生名
大涅槃煩惱漏流其源久竭不復墮落二乘
及凡夫地即本不生法身智斷實相功德名
本已利得王三昧破二十五有顯出我性具
八自在我名本殺賊迹示二乘功德耳觀心
者中道正觀不漏落空假二邊二邊煩惱滅
也能觀心性名為上定衣珠祕藏是已之物
即已利也正觀中道結賊則斷無結故有亦
斷二邊不能縛心故名自在雖有煩惱如無

煩惱不斷煩惱而入涅槃即其義也五列名略舉二十一尊者佛諸弟子皆備衆行而隱其圓能各從一德標名者欲引偏好故增一阿含云憍陳如比丘皆共上座名者有德大人相隨舍利弗共智慧深利者相隨目連共神通大力者相隨皆掌一法引諸偏好意也若欲消名須識其行從德立號無往不通也一一羅漢例作四釋云憍陳如姓也此翻火器婆羅門種其先事火從此命族火有二義照也燒也照則聞不生燒則物不生此以不生爲姓阿若者名也此翻已知或言無知無知者非無所知也乃是知無耳若依二諦即是知真以無生智爲名也無量壽文殊問阿毗曇婆沙皆稱爲了本際知本際若依四諦即是知滅而諸經多名爲無知或翻爲得道增一阿含云我佛法中寬仁傳識初受法味者拘鄰如比丘第一故以阿若爲名也願者佛昔於飢世化爲赤目大魚閉氣不喘示爲死相木工五人先斫魚肉佛時誓言於當來世先度此等先願與其無生故云阿若又

迦葉佛時九人學道五人未得果誓於釋迦法中最早開悟本願所牽前得無生故名阿若行者智生惑滅智斷行也夫巨夜長寢無人能覺日光未出明星前現憍陳如比丘初得無生智譬若明星在衆明之始一切人智明無前陳如故名阿若最先破闇莫過明星陳如亦爾一切人闇滅無前陳如故名阿若前者太子棄國捐王入山學道父王思念遣五人追侍所謂拘鄰頰鞞亦云濕鞞亦阿說示亦馬星跋提亦摩訶男十力迦葉拘利太子二是母親三是父親二人以欲爲淨三人以苦行爲淨太子勤行苦行二人便捨之去二人猶侍太子捨苦行還受飲食酥油煖水三人又捨去太子得道先爲五人說四諦初教二人拘鄰法眼淨四人未得三人乞食六人共散次教三人三人法眼淨二人乞食六人共散第三說法時拘鄰五人八萬諸天遠塵離垢五人得無生佛三問知法未即三答云已知地神唱空神傳乃至梵世咸稱已知拘鄰最前初見佛道相初聞法鼓初服道香

初嘗甘露初入法流初登真諦聞淨提得道最在一切人一切天一切羅漢前故十二遊經云佛成道第一年度五人第二年度三迦葉第五年度身子目連當知阿若在前明矣此因緣釋也三藏教者皆譬無生智鏡譬無生境陰入界也頭等六分譬現在因也像譬未來果也若開眼取鏡形對像生愚故不斷絕若閉眼如盲則無所見不見六分是因不生不見鏡像是果不生故阿含經云若謂有色色是淨淨即生非不生若謂有受想行識識是淨淨即生非不生若謂有受是樂樂即生非不生乃至色色是樂樂是生非不生若計有想行是我我是生非不生乃至色色是我我是生非不生若計有識識是常常是生非不生乃至色色是常常是生非不生譬如執鏡見面面是生非不生若謂有五陰悉是生非不生若能知色非淨乃至識非常又能知色無常苦空不淨乃至識無常苦無我不淨者是爲不生非是生如盲執鏡不見像生是爲不生非是生既知不生寧復於中

計我是色計我異色我在色中色在我中乃至識亦如是如是觀者現因來果俱皆不生如盲對鏡不見形像是名觀陰無生觀智也觀入界者凡言海者雖復深廣亦有此彼岸蓋小水耳若眼見色已愛念染著貪樂起身口意業者是為大海沉沒一切世間天人脩羅當知眼是大海色是濤波愛此色故是洄瀆於中起不善覺是惡魚龍起妬害是男羅刹起染愛是女鬼起身口意是飲鹹自沒是為眼色無知而生無明愛愛生故名為行行生故名為業業縛識入中陰是為識生所受胞胎五疱未成是為名色生五疱成已名六入生六入未能別苦樂名為觸生別苦樂名受生於塵起染名愛生四方馳求名取生造身口意名有生應受未來五陰名生生未來陰變名老生未來陰壞名死生心中內熱名憂生發聲大喚名悲生身心顛悖名苦惱生是名眼見色時即有三世十二因緣大苦聚生非不生耳鼻舌身意眼界乃至法界亦如是是為入界生非不生云何不生觀眼色時

不種苦種不生苦芽不漏臭汁不集蛆蠅若種不生則芽不生則臭汁不生則蛆蠅不生故名不生云何苦種眼見色時起貪恚覺是為苦種念於五欲法是生苦芽六根取六塵是名臭汁流出於六塵中善惡競起是名蛆蠅若知眼色無常苦空無我則貪恚不生念欲不生取境不生善惡行不生是為不生耳鼻舌身意亦如是是眼界乃至法界亦如是阿若最初得此三藏不生智故名阿若憍陳如通教無生觀譬如幻人執幻鏡以幻六分臨幻鏡觀幻像非鏡生非面生非鏡面合生非離鏡面生既不從四句生則非內外中間不常有亦無滅處去不至東西南北方性本無生非滅生無生性本無滅非滅滅無滅無生無滅故曰無生受想行識亦復如是又觀幻色如幻鏡像觀受如泡觀想如炎觀行如芭蕉觀識如幻幻不從幻物生不從幻師生非物師合生非離物師生四句求幻生無從來四方求幻滅滅無去處性本無生非滅生無生性本無滅非滅滅無滅無生無

滅故曰無生觀根塵村落結賊所止從本已來一一不實妄想故起業力機關假為空聚無明體性本自不有妄想因緣和合而有有本自無因緣成諸煩惱業苦如旋火輪觀其本無皆如上說此通意云

妙法蓮華經文句卷第一上

妙法蓮華經文句卷第一上

校勘記

一 底本，明永樂北藏本。金藏廣勝寺本現僅存卷二、卷三、卷五三卷（不分上下），不宜作底本，茲附錄於後，以資參考。

一 一頁上二行首字「隋」，南、徑無。以下各卷同。

一 一頁上三行記者，南、徑無。以下各卷同。

一 一頁中四行第一〇字「力」，南、清作「分」。

一 一頁中五行第一〇字「音」，南、徑、清作「昔」。

一 五頁中八行第九字「耽」，清作「取」。

一 七頁中一八行第一〇字「圓」，清作「圓教」。

一 八頁上三行第一五字「舍」，南、徑、清作「舍」。五行末字同。

一 八頁中八行第一六字「義」，清作

「教義」。

一 九頁上一六行第八字「地」，南、徑作「住」。

一 一〇頁上一六行第一二字「傳」，南、清作「博」。

妙法蓮華經文句卷第一下 寔二

隋天台智者大師說

門人灌頂記

別觀無生智者鏡譬法界眼譬觀智青黃赤白小大長短譬十法界青譬地獄因果黃譬餓鬼因果赤譬畜生因果白譬人天因果小色像譬二乘因果大色像譬通菩薩因果短色像譬別菩薩因果長色像譬佛因果皆於鏡中分別無謬若欲自正令九因果不生一因果生若欲正他令他九因果不生一因果生依於法界行善提行次第用折體觀智斷四住生令不生次用恒沙佛法斷客塵煩惱令無知不生後用實相智慧斷無明令根本不生若無四住則分段不生若無無知則方便不生若無無明則實報不生亦不生不生亦不生故名不生是名別教無生智也約圓教觀無生智者觀鏡團圓不觀背面不觀形像非背非閤非面非明不取種種形容不取種種榮像但觀團圓無際畔無始終無明闇無一異差別者譬於圓觀不取十法界相

貌無善惡無邪正無小大等一切皆泯但緣諸法實相法性佛法若色若香無非實相觀煩惱業生即無生無生不生故曰無生陰入界苦即是法身非顯現故名為法身障即法身貪恚癡即般若非能明故名為般若無所可照性自明了業行繫縛皆名解脫非斷縛得脫亦無體可繫亦無能繫故稱解脫解脫即業不生般若即煩惱不生法身即苦不生是三不生即一不生是一不生即三不生非三非一故言不生況變易煩惱業苦而非不生此即圓無生觀智云本迹者是憍陳如本自不生非始不生欲引乳為酪故迹為初教不生引酪為生酥故迹為通不生引生為熟故迹為別不生引熟為醍醐故迹為圓不生而其本地住阿字門謂一切法初不生故若聞阿字門則解一切義皆非生非不生垂迹引化能為生不生眾生若能會圓不生則同阿若非本非迹非生非不生大事因緣於茲畢矣故下文云富樓那種種變化事我若具足說眾生聞是者心則懷疑惑即其義也阿

舍云阿難持傘蓋燈隨佛後大梵王持傘蓋燈隨陳如後斯皆示迹而欲顯本也觀心不生者約三觀不生可知不煩更說摩訶迦葉此翻大龜氏其先代學道靈龜負仙圖而應從德命族故言龜氏真諦三藏翻光波古仙人身光炎踊能映餘光使不現故言光波亦云飲光迦葉身光亦能映物名畢鉢羅或畢鉢波羅延或梯毗犁畢鉢羅樹也父母禱樹神求得此子以樹名之跋耆子生此聚落人以為號其家大富增一阿舍云羅閱祇大富長者名迦毗羅婦名檀那子名畢鉢羅子婦名婆陀其家千倍勝瓶沙王十六大國無以為鄰付法藏言毗婆尸佛滅後塔像金色缺壞時有貧女丐得金珠倩匠為薄金師歡喜治瑩佛畢立誓為夫婦九十一劫人中天上身恒金色心恒受樂最後託摩竭提國尼拘律陀婆羅門家生畏勝王得罪滅一耕犁但用九百九十九雙牛金犁又經云其家有甃最下品者直百千兩金以釘釘入地七尺甃不穿破如本不異六十庫金粟一庫容三百

四十斛庫倉類也又經云以麥飯供養支佛
但越忉利各千反受樂身有三十相直論金
色剎浮那陀金在濁水底光徹水上在閻閻
滅迦葉身光勝於此金身光照一由旬關二
相應是無白毫肉髻也故諸天請結集時讚
言者年欲恚慢已除其形譬如紫金柱上下
端嚴妙無比目明清淨如蓮華捨此家業又
納金色婦送卧無欲捨而出家身披無價寶
衣截為僧伽黎四疊奉佛為座如是三捨世
無倫匹是為捨大於跋耆聚落值佛奉寶衣
佛授糞掃大衣此衣是大聖大衣又大羸重
故迦葉云我受佛衣師想塔想未曾頭枕况
以覆卧如此大衣大進我行故言受大佛弟
子中多名迦葉如十力三迦葉等皆是大人
於諸同名中最長故標大迦葉也於跋耆聚
落初從佛聞增上戒定慧即得無漏受乞食
法行十二頭陀逾老不捨後時佛語汝年高
可捨乞食歸衆受食可捨麤重糞掃衣受壞
色居士輕衣迦葉白佛佛不出世我當為辟
支佛終身行頭陀我今不敢故所習更學餘

者又為當來世作明未來世言上座迦葉為
佛所歎我亦當學難行苦行佛言善哉是為
行大增一阿舍佛法中行十二頭陀難行苦
行大迦葉第一頭陀既久鬚髮長衣服弊來
詣佛所諸比丘起慢佛命令就佛半座共坐
迦葉不肯佛言第二吾有四禪禪定息心從始至
終無有耗損迦葉亦然吾有大慈仁覆一切
汝亦如此體性亦慈吾有大悲濟度衆生汝
亦如是吾有四神三昧一無形二無量意三
清淨積四不退轉汝亦如是吾有六通汝亦
如是吾有四定一禪定二智定三慧定四戒
定汝亦如是增一阿舍云一婆羅門白佛昨
有婆羅門至我家何者是佛指迦葉又問此
沙門非婆羅門佛言沙門法律婆羅門法律
我皆知迦葉亦爾迦葉功德與我不異何故
不坐諸比丘聞佛所讚心驚毛豎佛引本因
緣昔有聖王號文陀竭高才絕倫天帝欽德
遣千馬車造闕迎王天帝出候與王同坐相
娛樂已送王還宮昔迦葉以生死座命吾同
坐吾今成佛以正法座報其往勲對佛坐時

天人咸謂佛師又迦葉共阿難為比丘尼說
法有一比丘尼不喜云販針兒在針師前賣
針迦葉語阿難言此比丘尼以汝為針師我
為販針兒迦葉語尼言佛說月喻經日日增
長常如新學者唯大迦葉汝聞不於大眾中
分半座汝聞不於大眾中讚同佛廣大功德
汝聞不云何此人是販針兒如此等是被佛
印可大也位大者於大眾中為大於千二百
五十中為大於五百中為大於四大弟子中
為大為五山寺主作閻浮提知事上座故言
位大佛燒身後灰場生四鉢多羅樹此表迦
葉集三僧祇劫法為三藏四阿舍僧肇序云
宗極絕於稱謂賢聖以之沖默玄旨非言不
傳釋迦以之致教約身口防之以禁律明善
惡則導之以契經演幽微辨之以法相此即
明戒定慧三藏也增一明人天因果長破邪
見中明深義雜明禪定皆大迦葉之功也若
別論集者阿難誦出修多羅優波離誦出毗
尼迦葉誦出阿毗曇故言結集大也如來去
後法付迦葉能為一切而作依止猶如如來

何者若有頭陀苦行人我法則存若無此人我法則不存迦葉能荷負佛法令得久住至未來佛付法授衣竟然後入滅故言持法大而迦葉將隱密上天禮佛髮為諸天說法云為善生天為惡入淵五欲無常如華上露見陽則晞於是別去諸天泣歎曰里巷窮酸若厄羸劣貧窮孤露彼恒矜愍今捨滅度誰復覆護云云約教明抖擻抖擻十二種過謂好衣求時苦得時多怖畏失時生悞惱糞掃衣無水火盜賊王難五怖若多畜者縫治浣負其勞亦多故但三衣若僧中食則營佐僧事故乞食若受殘食小食擾動喪時故一坐食多食難消生睡懈怠少食飢懸乏力故節量食多器洗持多妨故一鉢食須漿勞動故不飲漿房舍生著故樹下樹下又著故冢間冢間憂悲妨故露地若卧消功增懶故常坐二是衣法六是食法四是住處法且約乞食明抖擻者乞易得生喜難得生瞋得好則愛得惡則憂憂喜依色而起即色陰受此憂喜即受陰取憂喜相即想陰憂喜即是行陰分別憂

喜即識陰憂喜即意法二入三界界入陰即苦諦我能乞食計有我無我以乞為道以乞為實如是諦當讚喜毀瞋我能被呵即疑不了為疑是為十使歷三界四諦即八十八使名集諦若識乞食中四倒相似相續覆故謂常適意謂樂動轉所作覆故謂我薄皮覆故謂淨識四覆無四倒勤遮二惡生二善修四定根力覺道是為道諦於乞食中不計我則癡滅癡滅故愛滅愛滅故瞋滅瞋滅故不自舉則慢滅慢滅故被呵則無疑無我故我見滅我見滅故邊見滅不執是道則戒取滅不計為實故見取滅不邪執故邪見滅此十滅故則八十八滅八十八滅故子縛滅子縛滅故果縛滅果縛滅故二十五有滅是為滅諦若於乞食中不見四真諦是故久流轉生死大苦海若能見四諦則得斷生死生死既盡已更不受諸有是為乞食中抖擻觀慧衣法住處法亦復如是是三藏頭陀也通教抖擻者緣真證寂則是住處空慧為食空心行諸行為衣常性空無不性空時空慧抖擻皆如

幻化妄想諸惡寂滅不起心心數法不行故以不可得故諸相應中空相應最為第一諸苦行中空行第一諸抖擻中空慧抖擻最為第一略說竟別教抖擻者依於法身以為住處般若智慧以為食一切諸行莊嚴遮覆遮覆抖擻惡業之惡般若抖擻煩惱之惡法身抖擻生死苦惡前抖擻分段煩惱業苦次抖擻變易煩惱業苦是為中道正觀頭陀出過二乘所行苦行云云圓教抖擻者住處即衣即食但是一法分別說三一抖擻一切抖擻一切抖擻一抖擻非一非一切於一切抖擻無非實相諸佛所行是如來行過諸菩薩所行清淨云云本迹者本與如來同坐畢竟空理同得廣大法身同得無礙智慧同得無量功德內捨法受外無垢染內外科擻本已清淨欲引乳味事中抖擻次引酪味空中抖擻次引生酥別中抖擻次引熟酥圓中抖擻觀心者即空抖擻取相即假抖擻塵沙即中抖擻無明一心中抖擻五住云云三迦葉迦葉如前釋優樓頻蠢亦優樓毗亦優為此翻木瓜林那

提此翻河亦江伽耶亦竭夷亦象此翻城家
 在王舍城南七由旬毗婆尸佛時共樹刹柱
 緣是為兄弟兄為瓶沙王師五百弟子兩弟
 各二百五十行兄法佛作十種變謂龍毒不
 中龍火不燒恒水不溺三方取果比取粳糧
 勿利甘露知嫌隱去知念現來火滅不然芥
 舉不下廣出瑞應雖觀衆變邪執未改故言
 瞿曇雖神不如我道真佛即語云汝非羅漢
 亦不得道霍然開悟師徒皆伏二弟見相亦
 隨歸佛是則一千比丘約教者如增一阿含
 云優留毗能將護四衆供給四事令無所乏
 最為第一那提比丘心意寂然降伏諸結精
 進最第一伽耶比丘觀了諸法都無所著善
 能教化為最第一是為略教中意若轉入生
 酥即應取小慕大例則可知若轉入熟酥即
 應委業領教若轉入醍醐如此經中得記作
 佛也本迹者住於三德林即般若城即法身
 水即解脫是為祕密本藏而迹依林城水以
 度衆生也觀心者正觀心性中道不動如城
 防敵不動而動如水淨諸邊顛倒雙照枯榮

如林翁鬱三法相資即是連枝兄弟也貪利
 弗具存應言舍利弗羅此翻身子又翻舍利
 為珠其母於女人中聰明聰明相在眼珠珠
 之所生故是珠子又翻身此女好形身身之
 所生故言身子時人以子顯母為作此號也
 父為作名名優波提舍或優波替此翻論義
 論義得妻因論名子標父德也釋論云我名
 提舍逐我作字字優波提舍優波此言逐提
 舍者星名也又舍標父利標母雙顯父母故
 言舍利弗弗子也姓拘栗陀婆羅門種增一
 云我佛法中智慧無窮決了諸疑者舍利弗
 第一昔者生經云過去舅甥俱為織師知王
 寶藏因穿土盜之大獲珍寶寶監白王王云
 勿揚彼盜尋來伺而執之甥因令舅入被
 執甥恐人識即殺舅頭王令以屍置四交道
 引取其親後因買客羣集猥鬧甥載兩車薪
 覆之王又伺取又因童兒舞戲投火燒之又
 行置酒伺者大醉酒瓶成骨而去王憂狡猶
 出女嚴防在水邊先誡其女來者執喚其浮
 株於水防者謂人視之乃株連日不備因是

得來通女女執其衣其即授死人手而去女
 大喚視之乃死手耳因是有身生男端正王
 令乳母抱出有鳴者執之連日飢渴至煮餅
 爐下餅師與餅而鳴王更令出因酤醇酒伺
 人大醉抱兒而去出過他國他國賢其謀以
 大臣女妻之不用因字之為兒聘本國王女
 許之疑是前盜其人以五百騎鞍馬衣服一
 種相似往迎婦時本王見之問是前盜歎其
 姦詐以女婦之理者舍利弗是舅者調達是
 云胎者父名優波提舍學通典籍鐵鐔其腹
 頭戴火冠獨步王舍打論議鼓圍師陀羅自
 知陳故兼則相不祥義屈奪封以女妻之妻
 夢見人身被甲冑手執金剛杵碎一切山後
 立一山邊夢覺體重以問其夫夫云汝所懷
 者破一切論師唯不勝一人當為弟子舅名
 拘締羅論常勝姊既懷智人論則勝弟弟自
 念言此非姊力必懷智人寄辭母口在胎尚
 爾何況出生耶委家更廣遊學不暇剪爪時
 人呼為長爪梵志云難陀跋難陀二龍護王
 舍城兩澤以時國無饑年王及臣民歲設大

會置三高座王太子論師身子以八歲之年
身到會所問人三座人具答之即越衆登論
林羣儒皆恥不肯論議勝此小兒無足顯譽
脫其不如屈辱大矣皆遣侍者傳語問之答
過問表盡墮諸幢無敢當者王及臣民稱慶
無極國將太平智人出世及年十六究盡閻
浮典籍無事不閱博古覽今演暢幽奧十六
大國論議無雙五天竺地最為第一師事沙
然梵志梵志道術身子皆得師有二百五十
弟子悉付身子而成就之沙然臨死欣然而
笑身子問故答世俗無眼為恩愛所親我見
金地國王死夫人投火聚願同生一處言已
命終後見金地商人問之果然身子追悔我
未盡師術而不授此法為我非其人師秘乎
自知未達更求勝法而無師可事雖不逮此
一法餘法皆通於外道衆中最高第一於道
見頰頰威儀庠序因問師法頰頰答云諸法
從緣生是故說因緣是法緣及盡我師如是
說一聞即得須陀洹果來至佛所七日徧達
佛法淵海又云十五日後得阿羅漢為羅云

和尚憍梵作師聲聞衆中右面弟子調達破
僧引五百比丘去身子往化五百人歸云勞
度差捕力度差為華池身子為象拔華蹋池
度差為夜叉鬼身子為毗沙門王種種皆勝
度差降伏中阿舍云身子是四衆所生母目
連是所養母云云中阿舍第二云生處安居比
丘稱歎滿慈子少欲知足精進閑居一心正
念智慧無漏勸發亦稱說此等法時身子聞
念我何時得見此人此人何時到佛所他示
云白暫降鼻鸚鵡鳴者是其形相後於安陀
林此云勝林相見身子問賢者於瞿曇所修
梵行耶答如是又問為戒淨修梵行耶答不
也為心淨見淨度疑淨知道非道淨道迹知
見淨道迹智斷淨修梵行耶答不也又問向
言如是今言不也此義云何答為無餘涅槃
故修梵行又問以戒淨故設無餘涅槃答不
也乃至道迹智斷淨故設無餘涅槃答不也
又問此義云何答若以戒淨設無餘者此以
有餘稱無餘乃至道迹智斷淨設無餘者亦
是有餘稱無餘若離此七者凡夫人當般涅

槃凡夫離七故以不離故從戒淨至心淨乃
至道迹智斷淨仁者聽我說喻如波斯匿王
欲從拘薩羅至婆羅帝中間布七車捨初乘
二乃至捨六乘七婆羅帝人問為乘初車答
不也乃至乘第七車答不也問離此七車答
不也此喻問可知身子問賢名何等梵行人
云何稱汝答我父名滿我母名慈梵行人稱
我為滿慈子身子稱善哉善哉賢者滿慈子為
如來弟子智辯聰明決定安隱無畏速大辯
才得甘露幢於甘露自作證值汝者得大饒
益諸梵行人應繫衣頂戴滿慈子問賢者何
名梵行人云何稱答我父字優波提舍我母
名舍利故稱我為舍利子滿慈子嗟曰今與
世尊等弟子共論而不知與第二世尊共論
而不知與法將共論而不知與轉法輪復轉
弟子共論而不知若我知尊者不能答一句
况復深論善哉善哉為如來弟子乃至繫衣
頂戴心佛說一句身子以一句為本七日七
夜作師子吼更出異句異味使無窮盡況佛
多說而身子智辯寧可盡耶中阿舍第二十

云佛在阿耨達池龍王云此眾不見舍利弗願佛召之佛命目連往祇洹呼身子正縫五納衣答云汝但前去我在後來目連云我為佛使人云何前去目連以手摩衣即成身子念目連弄試我亦試之即以衣繩擲地汝能舉此耶目連念身子弄試我即盡力舉不起身子于時以繩繫閻浮樹一天下動繫二三四天下亦不立又繫小千中千大千亦不立又繫他方佛座脚十方佛世界皆鎮鎮不動目連自念我神力第一今不能動將不失神力因催促令去答汝前去目連還佛所已見身子在佛前龍王見地動問佛佛答二人之力龍王及五百比丘於目連生輕心佛言舍利弗於四神力得自在目連亦自在而不能拔者佛力耳語目連云現汝神力目連以鉢絡盛五百比丘舉著梵宮一足躡須彌一足至梵宮身在彼方而說偈滿大千國五百心伏云約教者若三藏智慧即是無學十智斷結證真輔佛揚化釋論四十攝為右面大將即其義也通教智慧者如般若中自

說所以為摩訶薩謂我見眾生見佛見菩提見轉法輪見破如此等見故名摩訶薩諸賢聖自說已法不如即今人妄有所說當知身子非但破生死見亦破佛見菩提法輪涅槃等見此慧異初教也別教智慧者當約五味分別若從元初但聞乳酪不聞餘味發心修行但行乳酪者此是初教智慧也若但聞酪酪不由乳善惡之性本自空不由修善破惡滅色取空但修即空者是通教智慧若從元初得聞醍醐為醍醐故擊牛求乳烹乳為酪轉酪為生酥轉生為熟酥方得醍醐修如此行者即是別教智慧也若從元初但聞牛食忍草即出醍醐若能服者眾病皆除一切諸藥悉入其中為此修行即是圓教智慧也本迹者本住實相智度為母從境生智慧境即是身智慧即是子悲愍眾生迹為五味身子欲轉煩惱惡血令成善乳示為外道智慧作大論師欲烹乳為酪示三藏智慧為第二世尊欲引酪為生酥訥大現小受淨名之屈欲引生酥為熟酥安慰饒益同梵行者於般

若領教欲引熟酥為醍醐於法華初悟斯皆迹中外現而本地內秘其實久矣觀心者一心三觀攝得一切智慧觀心即空故攝得酪智慧觀心即假故攝得兩酥智慧及世智慧觀心即中故攝得醍醐智慧是名觀心中一慧一切慧一切慧一慧非一慧非一切慧云大目捷連姓也翻讚誦文殊問經翻萊菔根真諦云勿伽羅此翻胡豆二物古仙所嗜因以命族釋論云吉占師子父也名拘律陀拘律陀樹名橋樹神得子因以名焉又目伽略兮度未來因果經云大連羅夜夜那同名者多故舉大也釋論云舍弗才明明見貴目連豪爽取重智藝相比德互同增增一阿舍云我弟子中神通輕舉飛到十方者大目連第一釋論四十一稱左面弟子外道師徒五百用呪移山經一月日斃峨已動目連念言此山若移多所損害即於山頂虛空中結跏山還不動外道相謂我法山動計日必移云何安固還若於初必是沙門使爾自知力弱歸心佛道令無量人正法出家也難陀跋難陀

兄弟居須彌邊海佛常飛空上切利宮是龍
瞋恨云何禿人從我上過後時佛欲上天是
龍吐黑雲闇霧隱翳三光諸比丘咸欲降之
佛不聽目連云我能降是龍龍以身繞須彌
七布尾挑海水頭枕山頂目連倍現其身遶
山十四布尾出海外頭枕梵宮是龍瞋感兩
金剛砂目連變砂為寶華輕軟可愛猶瞋不
已目連化為細身入龍身內從眼入耳出耳
入鼻出鑽齧其身即受苦痛其心乃伏目連
攝巨細身示沙門像將是二龍來至佛所調
達引五百比丘為已徒眾目連厭之令眠大
熟鼾吼雷鳴下風出聲瞿伽離以脚踏之猶
故不寤身子說法迴五百人心目連手擎將
還僧得和合雜阿舍二十九佛在舍衛十五
日說戒佛默然不言阿難四請佛言眾不清
淨吾今不復說戒汝可令上座若持律者誦
戒者唱目連尋入定觀誰不清淨見馬師滿
宿二比丘即手執牽出閉門更請佛說佛言
吾無二言今不復自說戒目連云眾不清淨
我亦不復為維那也耆域此翻固活生切利

天日連弟子病乘通往問值諸天出園遊戲
耆域乘車不下但合掌而已目連駐之域即
云諸天受樂息遠不暇相看尊者欲何所求
具說來意答云斷食為要自連放之車乃得
前帝釋與修羅戰勝造得勝堂七寶樓觀莊
嚴奇特梁柱支節皆容一綆不相著而能相
持天福之妙力能如此目連飛往帝釋將目
連看堂諸天女皆羞目連悉隱迹不出目連
念帝釋著樂不修道本即變化燒得勝堂赫
然崩壞仍為帝釋廣說無常帝釋歡喜後堂
儼然無灰煙色又紹囊盛五百羅漢如前說
如來梵聲深遠遠聽如佛邊不異目連欲知
佛聲遠近極去遠遠猶如近聞仍用神力飛
過西方恒河沙土聞釋師子聲如本不異去
去不已神力盡身疲正值他方大眾共食仍
息鉢緣上經行彼人驚怪此人頭蟲從何處
來彼佛言此是東方無量佛土有佛名釋尊
神足第一弟子尋聲極此非蟲也涅槃云佛
求侍者心在阿難如東日照西壁云約教論
神通者依四禪十四變化依觀練熏修十一

切無漏事禪能作十八變此即初教中神通
依空起慧以空慧心修諸神通即通教中神
通次第依三諦習得神通展轉深入過於二
乘即別教神通依於實相所得神通不以二
相見諸佛土從真起應不動真際徧十法界
是則圓教神通云往昔曾助辟支佛剃頭浣
染縫袈裟發願得神通云本迹者本住真際
首楞嚴定能於一念徧應十方種種示現施
作佛事以慈悲故迹為五味神通引令入極
云觀心者觀於一心歎有一切心觀一切心
條無諸心心無有無通至實相即神通觀也
摩訶迦梅延此翻為文飾亦有乘人云字悞
應言扇繩亦好看亦名柯羅柯羅此翻思勝
皆從姓為名增一阿舍云善分別義敷演道
教者迦梅延最第一如長阿舍云有外道執
斷見謂無他世凡有十番問答外道言無有
他世答言今之日月為天為人為此世他世
耶若無他世則無明日又問我見人死不還
云何說其受苦故知無他世答云如罪人被
駐寧得歸不又問若生天何故不歸故知無

他世答云如人墮廁得出寧肯更入廁不又
天上一日當此百年生彼三五日未遑歸心
設有歸者而汝已化寧得知之又問我鑊煮
罪人密蓋其上伺之不見神出故知無他世
答云汝晝眠時傍人在邊見汝神出不又問
我剝死人皮齧肉碎骨求神不得故知無他
世答云如小兒析薪寸寸分裂求火寧有可
得不又問我秤死人更重若神去應輕若無
神去則無他世答云如火與鐵合鐵則輕鐵
失火則重人生有神則輕死失神則重又問
我見臨死人反轉求神不得故知無他世答
云如人反轉求於日聲寧得聲耶又問汝雖
種種破我執此甚久而不能捨答云如人採
糴初見麻取麻次捨麻取麻皮次捨麻皮取
縷次捨縷取布次捨布取絹次捨絹取銀次
捨銀取金捨劣取勝云何不能捨又問非但
我如是說諸人亦如是說云何謂我為非答
云兩商人逢鬼鬼為人像語言前路豐米足
草載之何為一商人便棄前路牛皆飢遂
為鬼所敵一商人云若得新米草可棄故米

草人牛皆不為鬼所食諸人妄說如鬼誑言
汝不納我言如棄故米草今既得新何不棄
故又問我不能捨勸我則瞋答曰汝如養豬
人路上遇糞頭等將還在路逢雨汁下汗頭
傍人令棄倒更瞋他謂汝不養豬故令我棄
反瞋勸者如是番番析破廣演諸義外道便
伏而讚歎言尊者前說日月而我已解欲聞
智辯故番番執難善哉妙說迦梅延善論義
相亦復如是律中云善能教化歸戒令屠受
夜戒姪者受晝戒後受報時各於晝夜見前
樂相云又世典婆羅門語五百釋能與我論
不五百釋言有瞿密釋國中無黠無聞言語
醜拙有周利槃特於出家中亦為下者汝能
與此二人論勝者我與汝能名世典思惟勝
此二人無足可尚脫不如者甚為屈辱後時
於路遇槃特問何名答汝當問義何勞問名
又問汝能與我論義耶答我能與梵王論況
汝盲無目者乎又問盲即無目無目即盲豈
非煩重周利作十八變即云此人但能飛變
更不解義迦梅延天耳遙聞即隱槃特示身

如彼從空而下問汝字何等答字男丈夫又
問男即丈夫丈夫即男豈非煩重世典答止
止置此雜論可論深義問頗不依法得涅槃
耶答不依五陰法能得涅槃又問五陰依何
生答因愛生又問云何斷愛答依八正道即
能斷愛世典聞此遠塵離垢皆如此約教
論義者依無常苦空無我破斷常見等是初
教論義依空無所有不可得破斷常見者
通教論義故天女云我無所得故辯如此依
總持四辯觀機照假以藥逗病破斷常見者
是別教論義相依實相畢竟不有不無破斷
常見者是圓教論義約本迹者本住福德智
慧二種莊嚴能問能答為愍眾生迹為五味
論義師耳觀心者觀智研境發於智智境
往復即觀心論義也阿菟樓駄亦云阿那律
亦阿泥盧豆皆梵音奢切耳此翻無貧亦如
意亦無獨名也昔於飢世贈辟支佛餅飯獲
九十一劫果報充足故名無貧姓者劫初大
水風吹結構以成世界光音天命盡化生為
人身有光飛而行歡喜為食無男女尊卑眾

共生中呼為衆生自然地味如醍醐色如生酥甜如蜜多食失光憔悴不能飛少食者猶光澤便有勝負遂相是非致失地味食自然地皮轉相輕慢失皮食地膚轉生諸惡失膚食自然杭米食米則男女根生遂為夫婦羞故造舍多儲取米後米生糠糶刈已不生枯株現更相盜奪遂立一平能者為田主理諍訟是為民主民主有子名珍寶珍寶有子名好味始自民主草創之後金輪相繼迄至善思從懿摩至淨飯四世是鐵輪合有八萬四千二百一十五十二遊經云久遠劫有王早失父母以國付弟事一婆羅門婆羅門言汝當解王衣體瞿曇姓因而從之時人號為小瞿曇住甘蔗園賊盜他物從園過捕賊尋迹執小瞿曇木貫射之血流汗地大瞿曇悲哀收血土遂圍器盛置左右呪之此瞿曇若誠心天神變血為人還十月左為男右為女從是姓瞿曇瞿曇此言純淑亦名舍夷舍夷者貴姓也仁賢劫初當寶如來出世時瞿曇識神始託生若尋此意民主已來即姓瞿曇

從懿摩王四子一面光二象食三路指四莊嚴被猜徙雪山北直樹林中國人樂從者如市鬱為強國父王歎曰我子有能四子因此為姓又其地釋迦樹甚茂此翻直林既於林立國即以林為姓外國語多舍釋迦亦直亦能今淨飯所承承莊嚴王後莊嚴即是烏頭烏頭生烏頭羅烏頭羅生尼求羅尼求羅生尸休羅尸休羅即師子頰師子頰生三飯斛飯二子長名摩訶男季阿那律乃是淨飯王之姪兒斛飯王之次子世尊之堂弟阿難之從兄羅云之叔非聊爾人也故周公歎曰我是文王之子武王之弟成王之叔於天下非賤人也而沐三握餐三吐禮賢尚爾況餘人乎賢愚經云弗沙佛末法時世飢饉有支佛名利叱行乞空鉢無獲有一貧人見而悲悼白言勝士能受禪不即以所噉奉之食已作十八變後更採稗有兔跳抱其背變為死人無伴得脫待閣還家委地即成金人拔指隨生用脚更出取之無盡惡人惡王欲來奪之但見死尸而其所觀純是金寶九十一劫果

報充足故號無貧其生已後家業豐溢日夜增益父母欲試之蓋空器皿往送發看百味具足而其門下日日常有一萬二千人六千取債六千還直出家已後隨所至處人見歡喜欲有所須如已家無異阿那律精進七日七夜眼睫不交眼是眼食既七日不眠眼則喪睛失肉眼已佛令求天眼繫念在緣四大淨色半頭而發徹障內外明闇悉觀對梵王曰吾見釋迦大千世界如觀掌果增一云我佛法中天眼徹視者阿那律比丘第一那律既失肉眼佛與諸比丘恒為我縫佛在舍衛拘薩羅窟佛與八百比丘集為阿那律作三衣佛自為舒張諸比丘裁者縫者一日即成佛廣為說出家受衣進止共俱無量人得道約教者依禪定發天眼凡夫外道也依無漏事件發天眼三藏義依體法無漏慧發諸行依諸行發天眼通教意依散善發肉眼依定發天眼依真發慧眼依俗發法眼依中發佛眼別教意依實相發天眼天眼即佛眼圓教意又依散善修肉眼依定修天眼三藏意依

空修肉眼天眼是通意次第修五眼是別意
 不次第修五眼是圓意本迹者本住實相真
 天眼不以二相見諸佛國迹示半頭天眼觀
 心者觀因緣生善心即肉眼觀因緣生心空
 即天眼觀因緣生心假即法眼即中即佛眼
 云劫賓那者此翻房宿音秀父母禱房星感子
 故用房星以名生身也是比丘初出家未見
 佛始向佛所夜值雨寄宿陶師房中以草為
 座晚又一比丘亦寄宿隨後而來前比丘即
 推草與之在地而坐中夜相問欲何所之答
 覓佛後比丘即為說法辭在阿舍可檢取豁
 然得道後比丘即是佛也共佛房宿音得得見
 法身從得道處為名故言劫賓那毗沙門持
 蓋隨賓那後毗沙門是宿主主既侍奉星宿
 亦然此比丘善占星宿明識圖像從解得名
 名劫賓那增一阿舍云我佛法中善知星宿
 日月者劫賓那比丘第一約教者析破根塵
 之舍同佛棲真諦之房是三藏意體達根塵
 即共如來同宿真諦之房是通教意分別十
 法界根塵房舍悉得見佛是別教意於一根

塵房舍即見一切房舍見一切佛即圓教意
 約本迹者本與如來同棲實相迹示諸房宿
 耳觀心者觀五陰舍析空即空與化佛同宿
 觀五陰舍即假與報佛同宿觀五陰舍即中
 與法佛同宿云

妙法蓮華經文句卷第一下

妙法蓮華經文句卷第一下

校勘記

- 一 底本，明永樂北藏本。
- 一 一四頁下一二行「阿舍」，南、徑、清作「阿舍」。
- 一 一五頁下一〇行第一二字「敬」，
徑、清作「撒」。
- 一 一六頁中一行第一六字「貪」，南、
徑、清作「舍」。
- 一 一七頁中五行「阿舍」，清作「阿
舍」。本頁下末行同。

- 一 一八頁下一一行「大連」，南、徑、
清作「大目連」。又「夜夜」，南、徑、
清作「夜」。
- 一 一八頁下一二行「舍弗」，南、清
作「舍利弗」。又「明明」，南、徑、
清作「明」。
- 一 一八頁下一三行「德互同增增一」，
南、徑、清作「德行互同增一」。又
「阿舍」，南、清作「阿舍」，次頁上
一四行同。
- 一 一九頁中四行「自連」，南、清作
「目連」。
- 一 二〇頁上末行第四字「敢」，南、
徑、清作「敢」。
- 一 二二頁中五行第一二字「舍」，
清作「舍」。
- 一 二二頁下一六行第二字「件」，南、
徑、清作「禪」。
- 一 二二頁上七行「房星」，南作「房
宿」。
- 一 二二頁中五行小字「云云」，
「云云終」。

妙法蓮華經文句卷第二上 寔三

隋天台智者大師說

門人灌頂記

憍梵波提此翻牛伺無量壽稱牛王增一云
牛跡昔五百世曾為牛王牛若食後恒事虛
哨餘報未夷唵常嚼時人稱為牛伺昔五
百鴈一鴈常得華果供於鴈王佛一夏受阿
耆達王請五百比丘皆散馬麥而憍梵獨在
天上尸利沙園受天王供養增一云樂在天
上不樂人間者牛跡比丘第一樂在天上者
是隨樂欲世界悉檀也供鴈王福所致者為
人也避人笑者對治也天不笑者第一義也
又云人但觀形不知有德若笑羅漢即得
罪避人笑故常居天上天知有德不笑其形
故居天也佛滅度後迦葉集千大羅漢遣下
座僧使追憍梵憍梵問佛及和尚答言皆滅
即言佛出我出佛住我住佛滅我滅四道流
注大迦葉所水說偈云大象既去象子隨世
尊和尚既滅度我今在此復何為斯亦第一
義也約教者住天園是示善有牛嚼是示惡

三藏意也以牛嚼身得道此示惡非惡也居
天園而嚼示善非善通教意示界內外善惡
者別教意示善惡實相者圓教意本跡者本
住四無所畏安住聖主如牛王第一義天迹
示牛伺樂居天上也觀心者觀於心性中道
之理安步平正其疾如風即牛王觀也離婆
多亦云離越此翻星宿或室宿或假和合文
殊問經稱常作聲父母從星辰乞子既其感
獲因星作名雖得出家猶隨本字假和合者
有人引釋論空亭中宿見二鬼爭屍告其分
判設依理枉理俱不免害故隨實而答大鬼
拔其手足小鬼取屍補之食竟拭口而去其
因煩惱不測誰身故言假和合常作聲者其
疑此事若我本身眼見拔去若是他身復隨
我行住疑感猶豫逢人即問汝見我身不故
言常作聲眾僧云此人易度語云汝身本是
他遺體非己有也即得道也云增一云坐禪
入定心不倒亂者離越比丘第一約教言析
破五陰非我所有三藏意體達五陰本非我
有通意分別十法界五陰皆非己有別意達

五陰非我有非他有見陰實相即圓意本迹
若本住日星宿三昧迹示此名觀心者觀心
念佛見十方佛多如夜觀星云畢陵伽婆蹉
此翻餘習五百世為婆羅門餘氣猶高過恒
水咄小婢駐流恒神為之兩派神往訴佛佛
令懺謝即合手小婢莫瞋大眾笑之懺而更
罵佛言本習如此實無高心增一云樹下苦
坐不避風雨者婆蹉比丘第一約教者滅慢
無慢三藏意也即慢無慢通意也分別十法
界高下別意也八自在我具足佛法圓意也
本迹者本住常樂我淨八自在我微妙梵聲
迹示慢心惡口耳觀心者觀麤言輕語皆歸
第一義云薄拘羅者此翻善容或偉形或大
肥盛或豚囊或楞鄧或膏性然而色貌端正
故言善容也年一百六十歲無病無夭有五
不死報後母置熬槃釜中水中魚食刀破皆
不死昔持不殺戒故九十一劫命不中夭昔
施僧一訶黎勒果故身常無病能持一戒四
戒莊嚴堅持不犯不避火水餘人雖持五戒
多毀犯也云身樂寂靜常處閑居不樂眾中

眼不樂玄黃等色耳不樂聞世間之聲鼻不
 嗅世間香臭舌不曾為人說一兩句語意常
 在禪定不散亂乃至舍利塔亦樂閉靜阿育
 王禮諸羅漢塔次至其塔而說偈言雖自練
 無明於世少利益供二十貝子增一云施一
 錢而貝子從塔飛出來著王足諸臣驚怪閉
 靜少欲乃至其塔猶有是力故增一云壽命
 極長終不中天常樂閑居不處眾中薄拘羅
 第一約教者滅喧入真三藏寂靜即宣而真
 通寂靜離二邊入中別寂靜即邊而中圓寂
 靜本者本住大寂滅定長壽是常無病是樂
 不天是我寂靜是淨居此四德之本迹示六
 根寂靜耳觀心者心性中道即空即假即中
 常樂我淨觀也摩訶拘締羅此翻大膝舍利
 弗舅由來論勝姊姊孕論則不勝知所懷者
 智寄辯尚爾何況出胎云云即棄家往南天竺
 讀十八經時人笑之累世難通一生非莫唱
 然歎曰在家為姊所勝出路為他所輕誓讀
 不休無暇翦爪時人呼為長爪梵志學訖還
 家問甥所在人云為佛弟子即大憍慢我甥

八歲聲震五竺彼沙門者有何道術誘我姊
 子徃往佛所思惟良久不得一法入心語佛
 言一切法不忍忍即安義此言一切法我皆
 能破使不得安故言一切法不忍佛問汝見
 是忍不此墮兩負處若我見忍前已云一切
 不忍若我見不忍無以勝佛即低頭得法眼
 淨身子扇佛聞舅論得阿羅漢果增一云得
 四辯才觸難能答拘締羅第一南方天王毗
 留匄又常來隨侍約教者外通四韋陀內通
 三藏三藏四辯也我無所得辯乃如是通教
 辯也若名若義徧十法界別教辯也依於實
 相徧一切辯圓教辯也本者本住口密口輪
 不思議化大定大慧迹示大膝也觀心者觀
 心即空即定即假即慧以嚴其心云云難陀亦
 云放牛難陀此翻善歡喜亦翻欣樂淨飯王
 偈十萬釋出家即一人也有師言是律中跋
 難陀約教者事歡喜理無歡喜三藏意也即
 事歡喜是理歡喜是通教意也歡喜地即別
 教也歡喜住即圓教意也本者本住實際非
 喜非不喜迹名歡喜觀心者觀心與理相似

相應故名歡喜觀也孫陀羅難陀孫陀羅此
 翻好愛亦端正難陀如前種種姓如那律中說
 四月九日生短佛四指容儀挺特與世殊異
 若入眾中不識者謂言佛來彌沙塞律云
 摩竭有裸形外道大聰明國人號為智者見
 者共身子論議結舌善心生欲於佛法出家
 見難陀色貌殊偉歎云短小比丘智慧難禁
 況堂堂者乎難陀即度出家婦即孫陀利極
 端正食息不相離佛與阿難途行乞食到其
 門正共婦在高樓食即起迎佛婦言須君還
 乃共食耳白佛言轉輪王種云何自辱持佛
 鉢取飯佛即還尼俱類園語阿難令難陀送
 食來阿難宣佛旨令其送飯奉佛佛令剃頭
 握拳語剃者勿持刀臨閻浮提王頂佛偏不
 得止乃剃頭明日佛與五百比丘應請求住
 守寺意欲逃去佛令關房掃地關南北開掃
 此彼汗復懼佛歸即逃走歸去於路值佛屏
 身隱樹樹迴升空佛見即喚將還問何故去
 即答昨與婦別待還乃食憶婦去耳佛將遊
 天堂地獄云云故以婦字標之約教者俗諦有

法喜真諦無喜三藏教也即俗喜是真喜通
教也從通法喜有俗法喜中法喜別教也即
通喜具一切法喜圓教也本迹觀心如前云
富樓那翻滿願彌多羅翻慈尼女也父於滿
江禱梵天求子正值江滿又夢七寶器盛滿
中寶入母懷母懷子父願獲滿從諸遂願故
言滿願母名彌多羅尼此翻慈行亦云知識
四韋陀有此品其母誦之以此為名尼者女
也通稱女為尼通稱男為那既是慈之所生
故言慈子增一云我父名滿我母名慈諸梵
行人呼我為滿慈子此從父母兩緣得名故
云滿慈子是人善知內外經書靡所不知就
知滿故復名滿增一云善能廣說分別義理
滿願子最第一下文云於說法人中最為第
一第一者說滿字也欲還本國利益佛言彼
國弊惡汝云何答我當修忍若毀辱我我當
自幸不得拳歐拳歐時自幸不得木杖木杖
時自幸不得刀刃刀刃時自幸離五陰毒器
是為行忍滿故名滿七車喻經中說為大智
舍利弗所稱歎一切梵行人皆當蒙衣頂戴

於汝若見汝者得大利益是為歎滿故名滿
約教者殷勤析法所作已辦三藏願滿體達
即空於空法得證通教願滿法眼具足別教
願滿住秘密藏圓教願滿本迹者本願久滿
迹為說法第一示眾生知識也觀心者如止
觀中人行理等善知識觀也須善提此翻空
生生時家中倉庫篋篋器皿一切皆空問占
者占者言吉因空而生字曰空生從依報器
血瑞空以名正報依正俱吉故言空生也常
修空行故言善業若供養者得現報故故言
善吉常樂遊止閑林石窟寂靜之處所修行
業以空為本常入空定住無諍三昧喜說空
法有所宣辯皆分別空將護眾生不令起礙
嫌行即住嫌住即行佛初利下率土輻湊爭
前頂禮端坐石室念諸法空色非佛乃至識
非佛眼非佛乃至意非佛豁然悟道佛告蓮
華比丘尼非汝前禮汝禮色身須菩提前見
法身約教者自有滅色空智生體色空智生
從有智生空智從空智生俗智從俗智生中
智空生即有智是圓空智生而今是圓空智

生也本者本住實相法身迹示見空而生也
觀心者不在內外中間非自有是為觀心法
身也阿難此云歡喜或無染淨飯王冀太子
為金輪霸其宗杜忽棄國捐王憂惱殆絕魔
來誑之汝子已死王哭云阿夷語既虛瑞相
亦無驗復有天來云汝子成佛王疑未決須
史信報昨夜天地大動太子成佛王大歡喜
白飯王奏云生兒舉國欣欣因名歡喜是為
父母作字阿難端正人見皆悅佛使著覆肩
衣有一女人將兒詣井見阿難目視不胸不
覺以綆繫其兒頸中阿含云四眾若聞阿難
所說若多若少無不歡喜欲發問時先為聲
咳大眾皆歡喜四眾若觀其默行住坐卧指
搗處分進止動轉皆歡喜阿難四月八日佛
成道日生侍佛得二十五年推此佛年五十
五阿難年二十五佛時求侍五百請為如前
說眾勸阿難阿難順從五百皆歡喜目連騰
阿難三願佛言預知識嫌求不受故衣食欲
自利益求出入無時佛印而許佛言阿難勝
過去侍過去侍聞說乃解今佛未發言阿難

已解如來意須是不須是皆悉能知故以法付阿難如來歡喜四天王各奉佛鉢佛累而按之合成一鉢四緣宛然而此鉢大重阿難歡喜荷持無倦中阿含第七云阿難侍佛二十五年所聞八十千捷度皆誦不遺不重問一句念力歡喜阿難隨佛入天人龍宮見天人龍女心無染著雖未盡殘思而能不染一切天人龍神無不歡喜佛滅度後在師子牀迦葉大衆讚曰面如淨滿月眼若青蓮華佛法大海水流入阿難心自誓坐入涅槃住恐離車有怨進恐闍王有怨於恒河中入風奮迅三昧分身為四分一與天一與龍一毗舍離一阿闍世阿育王禮阿難塔奉千萬兩金偈歎曰能攝持法身法燈故法住念盛佛智海故設上供養念持多所聞口出微妙語世尊所讚歎天人之所愛增一云知時明物所至無疑所憶不忘多聞廣達堪任奉持阿難第一約教者歡喜阿難三藏也賢阿難通也典藏阿難別也海阿難圓也本迹者本住非歡喜非不歡喜法身如虛空智慧如雲雨能

持能受迹為歡喜也觀心與相似即空即假即中相應是觀心歡喜乃至真觀相應云羅睺羅此言覆障往昔塞鼠穴又不看婆羅門六日由是緣故故言覆障太子求出家父王不許殷勤不已王言若汝有子聽汝出家菩薩指指妃腹却後六年汝當生男在胎六年故言覆障真諦三藏云羅睺本名脩羅能手障日月翻此應言障月佛言我法如月此兒障我不即出家世世障我我世世能捨故言覆障佛出家後耶輸有娠諸釋咸瞋何因有此欲治欲殺惡聲盈路寶女幼毗羅證之小差因焚火坑發大誓願我若為非子母俱滅若真遺體天當為證因抱子投坑坑變為池蓮華捧體王及國人始復不疑後佛還國耶輸令羅睺奉佛歡喜九羅云以幼稚之年於大眾中徑持上佛耶輸以此息謗謗由有子故言覆障祖王歡喜雖失其父而獲其子孫為金輪吾亦何恨想其長大莫神寶至而佛索令出家父王不許耶輸將上高樓目連飛空來取佛度出家付舍利弗為弟子既出家

已王位亦失故言覆障羅睺以沙彌之年喜多安語國王大臣婆羅門居士來求見佛羅云答云不在令無量人不得見佛是為障他由是妄語佛即訶責行還使羅云洗足脚挑澡盆三覆三仰然後覆地命令注水羅睺云盆覆注水不立佛言汝如覆盆於佛法中法水不立今當實語勿妄語也後時修道殷勤不獲以問佛佛言汝為人說五陰未答言未當為他說說竟又問汝說十二入未說十八界未說法是得道之門若欲得道當為他說法因廣說法竟然後得道是為覆障既已得道見愛皆除三界生盡故言覆障三界生盡願不能牽故言覆障佛勅四大羅漢不得滅度待我法滅盡由是住持于今未得入無餘涅槃故言覆障云約教者析法道諦障四住三藏意也體法道諦障四住通教也次第三智障五住別教也一心三智障五住圓教也本迹者本住中道障塞二邊八種障障涅槃邊一種障障生死邊一種非障生死非障涅槃障無餘也觀心例前可解云六結如是等

衆所知識或言知祇是識或言聞名為知見形為識見形為知見心為識本者本為衆生作滿字知識迹為半字知識云觀行知識如止觀多知識衆竟次列少知識衆者復有學無學二十人俱但舉位明數而不歎德呼此為少知識衆耳聖與凡絕交亦不分別多識少識特以希高慕遠者以多識引之藏名隱德退讓者以少識引之隨順衆生故有若干不可以多少之迹失其本學無學者三藏中十八種學人九種無學人通教五地皆名學六地名無學又通教九地名為學佛地為無學別圓中或就功用無功用或就具足未具足明學無學阿含云外道問佛羅漢更學不佛言羅漢不作惡法住於善法學其無學即名為學若爾學人亦稱無學學人齊其所斷不復更斷即是無學是為四句就五方便非學非無學便是五句約四教中例亦應爾四五二十句本迹者本法身大士居滿字學無學位衆生應以半字學無學人莊嚴雙樹也觀者正觀中道不緣二邊中間即是無學能

如是觀是名為學若就觀門明數者觀色心具十法界十如界如互論即具二千舉迹故標本法迹即是本迹也次列尼衆者舊以此例前為二衆今不用若例前為多識少識二衆者又復無文義亦不可但是舉兩衆主何須苦名為大小多少耶先列波闍波提此翻大愛道亦云憍曇彌此翻衆主尼者天竺女人通名也本住智度法門迹為千佛之女生育導師觀釋者中觀廣博名大無緣慈名愛中理虛通名道大即自行愛即化他如以愛故受生慈故涉有道即通自行化他也六千者數也觀門者觀六根清淨具千功德雖眼有八百耳千二百以多足少數滿六千表本法門亦是觀行意也羅睺羅母耶輸陀羅者以子標母此翻華色亦曰名聞或云無翻温良恭儉德齊太子然在家為菩薩之妻天人知識出家為尼衆之主位居無學豈是無名聞衆耶十二遊經出三夫人第一瞿夷二耶輸三鹿野未曾有及瑞應皆云羅睺是瞿夷子涅槃及法華皆云是耶輸子二義云何通

或可彼經舉大母此處舉所生釋論瞿毗陀是寶女不孕即是瞿夷此翻明女故知定是耶輸子也本迹者妻則齊也豈有博地為太子妻故知本住寂定微妙法喜迹為佛妻悲華云寶藏佛所誓願為妻耳觀空無漏法喜即鹿野表妻觀假道種智法喜即以耶輸表妻觀中法喜即以瞿夷表妻上當分明本迹觀心今更總論顯善權曲巧明觀行精微夫首楞嚴種種示現稱適根性靡所不為今且近論託迹王宮降神聖后法身菩薩皆備佛行化散影餘家若三十二瑞金姿誕應諸大士各各出生或空室雨寶寄辯通夢若皇太子捨國捐王踰城學道諸大士悉從師請業才藝兼通為彼宗匠若法輪初啓甘露門開聞諸大士化緣未熟示同不受分庭抗禮崇我道真能化所化全生如乳若所化緣熟則素絲易染池華早開華凡成聖轉乳成酪師宗為佛上首弟子或智慧神通辯才三昧各各第一共輔法王更度未度重熟已熟於方等座席聞菩薩不可思議功德恥小慕

大恥小則嗚呼自責失於如來無量知見慕
大則不知當云何得佛無上慧如轉酪為生
酥次聞般若摩訶衍門初歷色心終于種智
含挾小大出內取與或共或別或偏或圓奉
命領知而無希取雖未頓捨已漸通泰如轉
生酥為熟酥次聞法華會天性定父子授記
前付大乘廢三歸一如餘四味同一醍醐不
令一人獨得滅度皆以如來滅度而滅度之
法王法臣大事出世巧用方便初用半字法
破二十五有之繁務成四枯雙樹利益眾生
次用半滿法破二乘之獨善成菩薩之廣大
成四榮雙樹利益聖人後用常住滿字破二
邊之前後成非枯非榮佛祕密藏究竟利益
主將之功畢大誓之願滿故身子目連於法
華而息化聖主贖命斯亦不久文云如我本
誓願今者已滿足如來不久當入涅槃唱滅
之言起自於此二萬燈明迦葉佛等皆於法
華究竟今以師弟皆於此經發迹內祕菩薩
道外現作聲聞我實成佛已來無量億劫以
此推之諸大羅漢從法身地俯影隨緣迹臨

萬水為學無學作男作女示道示俗首楞嚴
力靡所不現方便善權為若此云總明觀者
上師弟施化法身所為若不作觀方便於行
人無益如貧數寶似有執燭然心數甚多且
約善數如弟子者衆但舉十人耳十善數者
謂信進念定慧喜捨覺戒此十數輔心王
能改惡就善華凡成聖辦一切法門但以十
心為本如十弟子輔佛行化共熟眾生立于
佛法也信數對那律天眼第一眼是五根首
如諸方以東為上信於諸數初入佛法也進
數對迦葉頭陀第一抖擻勤苦對進數也念
數對波離持律第一念力牢強憶持不忘也
定數對目連神通第一慧數對身子智慧第
一皆可解喜數對阿難多聞第一多聞分別
樂樂即喜數也猗數對梅延論體窮微盡理
除邪顯正如猗離惡得善放苦入樂也捨數
對善吉解空第一若住空平等與捨數相應
覺數對富樓那說法第一覺是語本本立則
辨說無窮戒數對羅云持戒第一可解十數
扶心王能成觀行於一念中深入善法三寶

具足王即佛寶數即僧寶所緣實際無王無
數即法寶若入實際王數之功力用足矣又
取通大地十數與心王俱起入善入惡偏通
一切謂想欲觸慧念思解脫憶定受也想對
富樓那想得假名其人善達假名辯才無滯
欲對迦葉迦葉無世間欲而欲於無為觸對
梅延觸入二事更相涉入梅延善論義能窮
往復慧即身子可解念對波離念持律之上
也思對羅云思是行陰此人實行持戒也解
脫對善吉脫名無累此人解空於有得脫憶
對那律憶動發取境修天眼易三摩提定數
對目連可解受對阿難多聞領持無謬也十
人各備衆德為引專門宣示佛道隨衆生欲
欲慧者師身子乃至欲多聞者師阿難共輔
法王各掌一職今觀心亦如是一一心中皆
具王數為成觀故王數相扶而取開悟或於
想數入道或於欲數入道隨所宜者心王心
數而共攻之化取塵勞諸心而作佛事作此
觀未悟觀行如乳若發無漏觀行如酪若破
塵沙如生熟酥若破無明觀如醍醐至醍醐

時王數皆畢心心法數不行故名行般若波羅密賢觀云觀心無心法不住法我心自空罪福無主即是無心無數名為正觀是心數塵勞若不盡者觀則不訖故經言無生不度我不成正覺即此意也云第二列菩薩眾者釋論云菩薩為出家在家四眾攝何故別列答有菩薩墮四眾中有四眾不墮菩薩中為其不發心作佛故今別列同發心求作佛者名菩薩眾文為六一氣類二大數三階位四歎德五列名六結句一氣類者即是菩薩摩訶薩也若具存應言菩提薩埵摩訶薩埵什師嫌煩略提埵二字菩提此言道薩埵此言心摩訶此言大此諸人等皆求廣博大道又成熟眾生成道心大道心之氣類也菩薩多種謂偏通別圓如釋論引迦旃延子明六度齊限而滿者此欲調血眾生為乳也若大品明有菩薩發心與薩婆若相應者此欲調乳入酪也若大品明有菩薩發心遊戲神通淨佛國土又如淨名中得不思議解脫者皆能變身登座而復受屈被訶者此欲調酪為

生熟酥也若大品明有菩薩發心即坐道樹成正覺轉法輪度眾生者此是調酥為醍醐也故下文云菩薩聞是法疑網皆已除又云若菩薩不聞法華非善行菩薩道若聞此經即善行菩薩道又涅槃云菩薩不聞涅槃常有希望若聞涅槃希望都息故略有四種也大迹者本地難測或居等覺或齊法王如善財入法界見文殊色像無邊法門深遠本鄰諸佛迹輔釋迦為菩薩普現色身三昧力散影垂容以口輪不可思議化隨宜廣說可以意知不可以言辯也所以迹引四味歸乎一實譬如鏈碓器諸淳璞成醍醐已一期化息然其本地究竟成就豈是今日始入大乘亦非寂滅道場高山先照若頓若漸皆迹所為耳觀解者中道觀心雙照二諦名大通至菩提果名道破五位塵勞名成眾生云八萬人者數也餘經集眾甚多此經何少或是語其大數或譬王論密事不可率土同謀云約觀心者觀一善心具十法界十界交互具百法界十性相等十善即萬法約八正道即八萬

法門也云皆於阿耨三菩提不退轉者明位也阿耨此云無上道如境妙中說位如位妙中說不退轉者約位行念論不退應四種分別不生三惡道位不退不生邊地諸根完具不受女身即行不退常識宿命即念不退具此名阿鞞跋致地三藏義也若六心已前輕毛菩薩信根未立其位猶退七心已上從初地至六地不退為凡夫二乘名位不退雖正使已盡而未能徧修萬行其行猶退至七地名行不退而猶起二乘念故有念退至八地道觀雙流入法流水名念不退此名阿鞞跋致地此乃三乘共十地之義耳地師云十住是證不退十行是位不退十迴向是行不退十地是念不退此是別教義不會此經今所不用瓔珞云初地三觀現前心心寂滅自然流入此亦別教不退今亦不用若華嚴明初住得如來一身無量身具三不退此圓教不退此是一實事今用此判位也本迹者本地寂滅尚非十地況是初住尚非初住不退況復別通別通之位宜釋餘經列眾圓教之位

正在今經諸經論師既不識迹安能知本所
歎既謬毀在其中還成增減兩謬何謂歎德
觀心者三觀即三不退又一心三觀即一心
三不退云云舊云皆得陀羅尼去始是歎德今
取不退轉即具兩意成上屬明位起後屬歎
德舊云歎德作十二句分爲四意初三句歎
現德次三句歎往行次四句歎內體後兩句
歎外名四意不同而德居於初故稱歎德歎
現又兩初一句歎自行後二句歎化他歎行
爲三初句歎行本本從諸佛得般若次句歎
本行行福德也既有福德能資於慧次句爲
佛所歎體又三初慈悲歎應身中間兩句歎
心慧報身後一句歎法身歎名爲二初句歎
名普聞次句歎能度衆生此之分文極有眉
眼覈論宗體殊無趣向若歎通教通教無三
身又非入佛慧名不普聞種種義不成若歎
別教別教初地已過二乘云何七地更起聲
聞文佛之念若歎圓教不應言七地已下無
不退之德進退無當竟知歎誰是所不用今
以十三句作橫豎消文一豎約十地義便二

橫約初住義便不退轉者成前即是明位起
後即是歎德以對初地初地名歡喜喜其不
退墮二邊入中道獲三不退故知歎初歡喜
地也皆得陀羅尼歎二地二地名離垢亦名
離達離遮諸惡達持衆善即陀羅尼義故知
歎離垢地也樂說辯才歎三地三地名明地
內智明外說辯欲知智在說說有種種樂說
最勝故故知歎第三明地也轉不退轉法輪
歎四地四地名發能破闇又能焦炷轉法
輪自害已惑如焦炷破他迷如除闇故知歎
第四發地也供養百千諸佛歎五地五地名
難勝地此地得深禪定用神通力難勝難及
於一念頃徧至十方供養諸佛故知歎第五
地也於諸佛所植衆德本歎六地六地名現
前由得禪能供養諸佛福資種種智現前
智是德本如植種於地故知歎第六地也常
爲諸佛之所稱歎歎第七遠行地此地二智
方便出過一切廣修利益稱會佛心故知歎
第七地以慈修身歎第八不動地正智不動
不出三界但以慈薰身應入五道薰口爲說

法薰心爲設方便正法華具薰三業故知歎
第八地也善入佛慧歎第九地九地名善慧
深入實際妙徹本源此名義最合故知歎第
九地通達大智歎第十地十地名法雲法身
如虛空禪定如大雲智慧如大雨善入佛法
名慧巧用佛法名智互舉耳到於彼岸歎十
地內德到三諦之彼岸因中說果又到在不
久也名稱普聞歎十地外德由內德深廣致
令聲名普聞內外相稱若開等覺位者此二
句擬之能度百千衆生者餘地度人或一界
至九界不名能度十地勝前故稱能度諸地
悉具衆功德而今出沒釋者爲人情好異故
依十地名便故又豎義易解故作此一途消
文耳次橫歎者直約初住說之餘位位例可
解初發心住一發一切發出過二邊華凡超
聖入中道其心寂滅念念流入薩婆若海故
言得不退轉初住遮離取相無知無明等障
持達般若解脫法身等德故言得陀羅尼十
信似解尚能以妙音徧滿三千界何況初住
真解口密功德故言樂說辯才初住能分身

百世界作佛論其實處無量無邊以能作佛
說法教化故言能轉不退法輪初住得不思
議神力徧能承事法界諸佛故言供養百千
諸佛初住得實相本能植眾德也初住開佛
知見知見已法與諸佛同故為佛之所稱歎

初住無緣慈普現色身徧應法界故言以慈
修身初住入秘密藏故言善入佛慧初住一
心三智無能障礙故云通達大智初住事理
分究竟故言到於彼岸初住圓德真實與名
相稱故言名稱普聞諸佛世界初住能為十
法界而作依止安立救護故言能度百千眾
生初住更有無量無邊不可思議種種功德
略言十三句耳二住去乃至等覺亦復如是
故大品云初阿字門具四十一字功德後茶
亦具諸字功德中間亦爾字等語等功德亦
等問此中歎斷惑德三藏不斷惑可不被歎
聲聞尚被歎迹為通別何不歎德答通歎於
迹乃有此義今經正明圓人不歎方便耳問
云何諸句功德皆歎初住耶答曰餘位亦如
是何獨初住舊云八地有諸功德不以為疑

今圓歎初住何德不攝初住尚爾何況後位
耶法華論云上支下支門總相別相應知初
得不退轉一句是總此不退有十種示現聞
法不退轉即是陀羅尼樂說不退轉即是樂
說辯才說不退轉即是轉不退法輪依善知

識不退轉即是供養百千諸佛植眾德本斷
疑不退轉即是為諸佛稱歎入事不退轉即
是以慈修身入一切智如實境不退轉即是
善入佛慧依我空法空不退轉即是通達大
智入如實境不退轉即是到於彼岸應作所
作不退轉即是度百千眾生故初總句即是
上支次諸別句即是下支記中橫歎初住德
即與此意同也論云二者攝取事門者示現
諸善薩住何等清淨地中因何等方便何等
境界何等應作所作故若從此義作豎歎善
薩德亦無妨觀心解歎德者不退轉如前說
陀羅尼者空觀是旋陀羅尼假觀是百千旋
陀羅尼中觀是法音方便陀羅尼又空觀觀
心但有名字即聞持陀羅尼假觀觀心無量
心心數法皆是法門即行持陀羅尼中觀

觀心心即實相即是義持陀羅尼假觀觀心
具十法界法即法無礙辯中觀觀心十法界
皆入實相即義無礙辯空觀觀心十法界但
有名字語言即辭無礙辯觀一心即三心三
心即一心一界一切界旋轉無礙即樂說無

礙辯空觀是轉位不退法輪假觀是轉行不
退法輪中觀是轉念不退法輪供養佛者祇
是隨順佛語今順佛教修三觀心即是供養
佛為破五住得解脫故即供養法三諦理和
即供養僧又衆行心資觀智心即供養佛觀
智心開發境界即供養法境智心和即供養
僧實相心是觀智心本觀智心是衆行心本
得本種植則立故言植眾德本觀智心冥於
境界境界印於觀智智有所照常與境合即
是為佛所歎空觀為法緣慈所熏假觀為眾
生緣慈所熏中觀為無緣慈所熏空觀入通
佛慧假觀入別佛慧中觀入圓佛慧空觀到
一切智彼岸假觀到道種智彼岸中觀到一
切種智彼岸空觀聞於真諦假觀聞於俗諦
中觀普聞中道第一義諦亦普聞三諦空觀

度四住百千衆生假觀度塵沙百千衆生中
 觀度無明百千衆生一心三觀有無量德歎
 不能盡止略說耳五列名者大士大名或從
 法門或從行德或從本願雖是一名備無量
 義今依經依觀銷十八菩薩名文殊師利此
 云妙德大經云了了見佛性猶如妙德等無
 行經云滿殊尸利普超云濡首思益云雖說
 諸法而不起法相不起非法相故名妙德悲
 華云願我行菩薩道所化衆生皆於十方先
 成正覺令我天眼悉皆見之我之國土皆一
 生菩薩悉令我勸發道心我行菩薩道無
 有齊限寶藏佛言汝作功德甚深甚深願取
 妙土今故號汝名文殊師利在北方歡喜世
 界作佛號歡喜藏摩尼寶積佛今猶現在聞
 名滅四重罪為菩薩像影響釋迦耳觀心性
 理三德秘密不縱不橫故名妙德觀世音者
 天竺云婆婁吉低稅思益云若衆生見者即
 時畢定得於菩提稱名者得免衆苦故名觀
 音悲華云若有衆生受苦稱我名者念我者
 為我天耳天眼所見聞不得免苦不取正覺

寶藏佛云汝觀一切衆生生大悲心今當字
 汝為觀世音此下文自釋名云

妙法蓮華經文句卷第二上

妙法蓮華經文句卷第二上

校勘記

- 一 底本，明永樂北藏本。
- 一 二九頁中一八行「約觀」，南作「曰觀」。
- 一 三〇頁上一二行「所歎體」，清作「所稱歎歎體」。

妙法蓮華經文句卷第二下 寔四

隋天台智者大師說

門人灌頂記

觀心釋者三智名觀三諦名世三觀是語本故名音得大勢者思益云我投足之處震動三千大千世界及魔宮殿故名大勢至悲華云願我世界如觀世音等無有異寶藏佛言由汝願取大千世界故今當字汝為大勢至觀心釋者三止為足投三諦地動十法界一切見愛所住之處皆悉傾動云不休息者思益云恒河沙劫為一日夜是三十日為月十二月為歲過百千萬億劫得值一佛如是值恒河沙佛行諸梵行修習功德然後受記心不休息故名不休息觀心者觀空不住空出假不住假而入中不住中雙照二諦名不休息寶掌者普超云被上德鎧乃至佛無能沮敗今釋大乘若於夢中不志二乘常以實心諸通慧心為人講宣於珍寶心無所貪借故名寶掌觀心者不思議三諦名之為實一心三觀名之為掌以此觀掌執此諦寶自利

他故云寶掌藥王者悲華云願賢劫一千四佛初成道我皆供養諸佛入滅我皆起塔劫盡若惱我皆救護刀兵疾疫作大醫王然後作佛寶藏佛言今當字汝為火淨藥王在後作佛即樓至如來觀心釋云此下久釋七菩薩跋陀婆羅者此言善守亦云賢守思益云若眾生聞名者畢定得三菩提故名善守觀解者中道正觀於諸善中最為上首故言善守彌勒者此云慈氏思益云若眾生見者即得慈心三昧故名慈氏賢愚云國王見象師調象即慈心生從是得名慈氏悲華云發願於刀火劫中擁護眾生今觀解者中道正觀即是無緣大慈慈善根力今諸心數皆入同體大慈法中離諸不善故稱慈氏又云慈乃姓也名阿逸多此翻無勝下文云此下久釋寶積導師者思益云於隨邪道眾生大慈心令入正道不求恩報故名導師觀解者三觀妙智導一切行不墜二邊皆入正觀故名導師未釋者俟後追註云六如是下是結句也第三列雜眾者舊云凡夫眾此中有聖舊

云俗眾此中有道舊云天人眾此中有龍鬼皆不便今呼為雜眾意則兼矣所謂五道二界八番是故言雜方等經亦列地獄中陰經亦化無色此皆隨機適現不可一例作並復不可定其次第舊云人是土主讓諸客在前無量義經祇與此經同席明國王國臣國士國女不論賓主相讓出經家趣列在文或有別意未詳今觀此文有八番先標帝釋次列四王前龍後鳥鬼神重出為此義故呼為雜眾不可言其次第又雜眾者此中有得道未得道者雜果報與形服雜故言雜其中得二乘道者無漏智與無明煩惱雜故言雜其中得菩薩道者漚和與眾機雜故言雜其中得佛道者一法具一切法故言雜雜義如是豈可以凡夫形俗判之復不可以五道人天等判之故言雜也此是約教釋云釋提桓因因陀羅或云旃提羅此翻能作作忉利天主忉利此翻三十三四面各八城就喜見城合三十三共居須彌頂須彌此翻安明四寶所成高廣三百三十六萬里此是欲天之主故前

列雜阿含四十云有一比丘問佛何故名釋提桓因答本為人時行於頓施堪能作主故名釋提桓因何故名富蘭陀羅為人時數數行施故何故名摩伽婆本為人時名故何故名娑婆羅本為人時此衣布施故何故名憍尸迦本為人時姓故何故名舍脂鉢低舍脂是婦鉢低是夫何故名千眼本為人時聰明於一時坐思千種義觀察稱量故名千眼何故名因提利為三十二天主瓔珞第三云天帝名拘翼教門者阿舍中帝釋是阿那舍般若明十方難問般若者皆名釋提桓因別圓中明釋提桓因得首楞嚴三昧內證不同過賢劫二千二十四劫作佛號無著世尊云本迹者十住行向即三十地為一等覺為三妙覺為主同樓第一義天共服實相甘露即本也居須彌頂迹也觀心解者自行十善勸他隨喜此三十善皆空皆假皆中即是三十三觀門也名月等三天子是內臣如卿相或云是三光天子耳名月是寶吉祥月天子大勢至應作普香是明星天子虛空藏應作寶

光是寶意日天子觀世音應作此即本迹釋也觀解者三觀即三智三智即三光從三諦生三智諦即天智即子云四大天王者帝釋外臣如武將也居四寶山高半須彌廣二十四萬里東提頭賴叱此云持國亦言安民居黃金山領二鬼捷闍婆富單那南毗留勒义此云增長亦云免離居琉璃山領二鬼薜荔多鳩槃荼西毗留博义此云非好報亦云惡眼亦云雜語居白銀山領二鬼毒龍毗舍闍毗沙門此云種種聞亦云多聞居水精山領二鬼羅刹夜叉各領二鬼不令惱人故稱護世本迹者本為常樂我淨四王護持佛法不令外人取其枝葉斫截破壞常王護東方常無常健樹樂王護南方樂無樂雙樹我王護西方我無我雙樹淨王護北方淨不淨雙樹枝幹喻常華喻於我果喻於樂茂葉喻淨護此華果常能利益一切眾生故迹為四王而護世也觀解者觀四諦智即是四王一諦下除愛見二惑即是護八愛見也次切利上有談摩此翻善時大論云妙善去切利三百

三十六萬里善時上有兜率陀此翻妙足去談摩如地遠而不列者略耳何者下天鉢上天著樂尚知來集况不著不鉢而不來耶自在即第五大自在即第六自化五欲他化五欲云有人言是色界頂大自在此不應超至彼也本迹者此兩天本住自在自在王等定迹為兩天耳觀心者入空是自在觀入中是大自在觀云次列色界天娑婆此翻忍其土眾生安於十惡不肯出離從人名土故稱為忍悲華經云云何名娑婆是諸眾生忍受三毒及諸煩惱故名忍土亦名雜雜九道共居云梵者此翻離欲除下地繫上升色界故名離欲亦稱高淨尸棄者此翻為頂髻又外國喚火為樹提尸棄此王本修火光定破欲界惑從德立名然經標梵王復舉尸棄似如兩人依釋論正以尸棄為王今經舉位顯名恐目一人耳住禪中間內有覺觀外有言說得主領為王單修禪為梵民加四無量心為王也初禪有梵眾梵輔大梵今舉王攝諸也光明者二禪也此有少光無量光光音三禪有

少淨無量淨徧淨四禪有密身亦無挂礙無量密亦受福密果亦廣果無想密亦無想又有五那含不煩不熱善見善現色究竟亦大自在即摩醯首羅經文存略不具出但等等此諸天也例有教門本迹觀心自思之次列八龍者難陀名歡喜跋名善兄弟常護摩竭提雨澤以時國無饑年瓶沙王年為一會百姓聞皆歡喜從此得名即目連所降者也居海中本迹解者本住歡喜地迹居海間觀解者三觀即中道生法喜也娑伽羅從居海受名華嚴所稱舊云因國得名本住智度大海迹處滄溟和修吉此云多頭亦云寶稱居於水中本住普現色身三昧迹示多頭也觀者入假之觀分別無量法門也云德义迹此云現毒亦云多舌或云兩舌本住樂說無礙辯法門迹示多舌阿那婆達多從池得名此云無熱無熱池長阿舍十八云雪山頂有池名阿耨達池中有五柱堂從池為名龍王常處其中閻浮提諸龍有三惠一熱風熱沙著身燒皮肉及骨髓以為苦惱二惡風暴起吹其

宮殿失寶飾衣等龍身自現以為苦惱三諸龍娛樂時金翅鳥入宮搏撮始生龍子食之怖懼熱惱此池無三惠若鳥起心欲往即便命終故名無熱惱池也本住清涼常樂我淨迹處涼池觀者三觀妙慧淨五住之煩嗟免二死之熱沙云摩那斯此云大身或大意大力等修羅排海淹喜見城此龍縈身以遏海水本住無邊身法門迹為大體觀者中道正觀其性廣博云漚鉢羅此云黛色蓮華池龍依住從池得名本住法華三昧迹居此池觀者三觀即是修因因即蓮華也正法念經云龍為諸天保境修羅與兵前與龍鬪故知為天所管也次列四緊那羅亦云真陀羅此云疑神似人而有一角故號人非人天帝法樂神居十寶山身有異相即上奏樂佛時說法諸天弦歌般遮于慈而頌法門舊云法緊奏四諦妙緊奏十二因緣大緊奏六度持緊總奏前三今言奏四教法門也本住不可思議不起滅定安禪合掌以千萬偈讚諸法王迹寄弦管歌詠十力觀者觀音聲即空即假即

中隨順三諦即是讚佛也四乾闥婆此云嗅香以香為食亦云香陰其身出香此是天帝俗樂之神也樂者幢倒伎也樂音者鼓節弦管也美者幢倒中勝品者美音者弦管中勝者也阿修羅者此云無酒四天下採華醞於大海魚龍業力其味不變瞋妬誓斷故言無酒神亦云不端彌天安師云質諒質諒直信也此神詭曲不與名相稱有二種鬼道攝者居大海邊畜生道攝者居大海底婆稚者此云被縛或云五處被縛或云五惡物繫頸不得脫故云被縛亦云有縛為帝釋所縛本能五繫繫魔外道迹為此像身正法華云最勝觀者以三觀智縛五住惑入實際中佉羅寫馱此云廣肩胛亦云惡陰涌海水者正本云寶錦本住權實二智慈荷衆生故迹為廣肩胛觀者三觀能鼓覆五住生死大海也毗摩質多此云淨心亦云種種疑波海水出聲名毗摩質多即舍脂父也觀佛三昧云光音天生此地地使有欲入海洗不淨墮泥變為卵八千歲生一女千頭少一二十四手此女戲

于水水精入身八千歲生一男二十四頭千
手少一海水波音名爲毗摩質多索乾闥婆
女生舍脂帝釋業力令其父居七寶殿納爲
妻後讒其父遂交兵脚波海水手攻喜見帝
釋以般若呪力不能爲害正本云燕居本者
色心本淨迹爲此名觀者正觀中道即是淨
心羅睺羅此云障持障持日月者也是畜生
種身長八萬四千由旬口廣千由旬寶珠嚴
身觀天女天園林若四天下人孝養父母供
養沙門者諸天有威力上空兩刀若不爾諸
天入宮不出又日放光照其眼不能得見舉
手掌障日世人咸言日蝕怪險種種邪說掩
月亦如是或作大聲世人言天獸吼險亂王
衰種種邪說怖日月時倍大其身氣呵日月
日月失光來訴佛佛告羅睺莫吞日月羅睺
支節戰動身流白汗即放日月日月力衆生
力佛力衆因緣故不能爲害昔有婆羅門聰
明廣施四千車載食於曠野施有一佛塔惡
人所燒即以四千車載水滅火救塔歡喜發
願願得大身欲界第一既無正信好鬪愛戰

喜施放生光明城作羅睺羅修羅主也正本
云吸氣本觀云次列四迦樓羅此云金翅翅
翻金色居四天下大樹上兩翅相去三百三
十六萬里有人言莊子呼爲鵬鵬行衆鳥翼
之亦稱爲鳳皇私謂鳳不踐生草噉竹實棲
乳桐金翅噉龍云何是類大威德者威勝群
輩又威攝諸龍也正本云具足大身者大群
輩也大滿者龍恒充滿已意也如意者頸有
此珠也正本云不可動迦樓鳥有神力雄化
爲天子雌變爲天女化已住處有寶宮亦有
百味而報須食龍胎能噉胎不能噉三卵能
噉二濕能噉三化能噉四觀佛三昧經云正
音迦樓一日山東噉一龍玉五百小龍三方
亦爾周而復始壽八千年臨終失勢欲噉龍
子龍母噉之不得食即噉從金剛山透海
穿地輪過不能過風輪風彈之從故孔湧到
金剛山如是七返還山頂命終肉裂火起將
燒寶山難陀兩兩滅之內爛心衝風輪亦七
返墮山上成如意珠龍得之即爲王人王亦
感此珠者也次列人者韋提希母也翻思惟

頻婆娑羅此翻樸實父也阿闍世者未生怨
或呼爲婆留支此云無指內人將護呼爲善
見善見之名本也無指之稱表迹大經云阿
闍名不生世者名怨以不生佛性故則煩惱
怨生煩惱怨生故不見佛性不生煩惱即見
佛性又阿闍者名不生世名世法以世八法
所不汙故故名阿闍世此是本義也普超經
云阿闍世從文殊懺悔得柔順忍命終入賓
吒羅地獄即入即出生上方佛土得無生忍
彌勒出時復來此界名不動菩薩後當作佛
號淨界如來其迹既爾本豈可量說法華時
預清淨衆至涅槃時引逆罪者何異迦葉於
法華受記於涅槃不堪付囑不可迷迹而惑
其本也觀解者貪愛母無明父害此故稱逆
逆即順也行於非道通達佛道問佛在人中
說法列人衆何少答文略不載人實不少文
云及諸小王轉輪聖王等無量義中列四輪
王國王國臣國民士女其衆則廣問天人龍
鬼皆見佛聞法地獄一道無色一界何意不
列答此義今當辯夫諸道升沉由戒有持毀

見佛不見佛由乘有緩急然持戒有麤細故報有優劣持乘有小大見佛有權實且略判戒乘各為三品依涅槃一句開為四句釋之其義則顯一戒乘俱急二戒緩乘急三戒急乘緩四戒乘俱緩若通論戒乘一切善法一切觀慧皆得稱戒亦皆是乘人天五乘即是其義道共等戒悉是通意也今就別判三歸五戒十善八齋出家律儀乃至定共能防身口遮惡道果得人天報者名之為戒若聞經生解觀智推尋四諦十二緣六度生滅無生滅等智能破煩惱運出三界者名之為乘故小品云有相之善不動不出無相之善能動能出即此義也若戒乘俱急者持下品戒戒急報在人中持小乘乘急以人中身於三藏教時見佛聞法持中乘乘急以人報身於通教大乘乃至帶方便諸大乘經時見佛聞法持上乘乘急以人報身於華嚴法華等教及諸教中圓見佛聞法預列為同聞眾者是也若持中品戒急報在欲界天持小乘乘急以欲界天身於三藏時見佛聞法餘如上說若

持上品戒急加修禪定報在色無色天等持小乘乘急以色無色天身於三藏中見佛聞法餘如上說釋第一句竟若戒緩乘急者三品戒皆緩報墮三途持小乘乘急以三途身於三藏中見佛聞法餘如上說釋第二句竟若戒急乘緩者三戒急故受欲界人天及色無色天身三乘緩故佛雖出世說三乘法愛著樂報耽荒五欲不見佛不聞法舍衛三億家及諸不見聞者三界著樂諸天等是也釋第三句竟若戒乘俱緩者受三途報不見佛不聞法也釋第四句竟此文不列地獄者以其戒緩苦重報隔上乘又緩不能於法華見佛聞法餘經有列者餘乘急耳又不列無色天者上戒急故受天身著定味上乘緩故不能於法華見佛聞法餘經有列者有餘乘急耳若得此意一一勘天龍八部皆識本緣緩急來不來義悉可解廣釋如淨名疏又識權者引實本迹義轉明將此勘已觀行三世因果朗然可識各禮佛足者總結眾集也爾時世尊下訖品名別序文為五一眾集二現

瑞三疑念四發問五答問光宅逆順生起由眾集故現瑞乃至由問故答各由於問乃至瑞由眾集此乃翻覆緣起鈎鎖相連序於正意竟自未顯直是因緣一釋尚目不明況二三四緣了無趣向今明五序序正中四一集眾叙人一現瑞叙理一疑念叙行一問答叙教一此則因緣釋也約教者此序序正非三藏非通非別乃是序於圓正耳約本迹者若以序序壽量中本地四一者此義自可知不復記觀心可解云就眾集又二初眾集威儀次眾集供養法華論目此為威儀如法住四眾者舊云出家在家各二合為四眾此名局意不周今約一眾更開為四謂發起眾當機眾影嚮眾結緣眾發起者權謀智鑒知機知時擊揚發動成辦利益如大象躡樹使象子得飽所謂發起今集發起瑞相乃至發起問答等皆名發起眾當機者宿植德本緣合時熟如癩欲潰不起于座聞即得道此名當機眾影嚮者古往諸佛法身菩薩隱其圓極匡輔法王如眾星繞月雖無為作而有巨益此

名影網衆結緣者力無引道擊動之能德非伏物鎮嚴之用而過去根淺覆漏汙雜三慧不生現世雖見佛聞法無四悉檀益但作未來得度因緣此名結緣衆比丘衆既爾餘三衆亦然合十六衆類如大通智勝佛時王子覆講即彼時發起衆聞法得道即彼時當機衆聞法未度而世世相值于今有住聲聞地者即彼時結緣衆彼佛世時尚有四四十六衆今佛道同寧得無耶此是圓教十六衆約三教亦例可知本迹可解觀心者研境作觀在名字觀行位中即成結緣衆入相似位即成當機衆入分真位即成發起影網衆云圓遶者佛初出世人未知法淨居天下化為人像到已右旋旋已敬禮禮已卻坐聽法因於天教人以為楷此因緣解也圓遶者行旋威儀也表四門機動俱見圓理以圓對偏例有四義即教門解也又佛身周而相好莊嚴四旋瞻仰增念佛定即觀心解也若觀佛色身得見法身即本迹解供養者通三業皆是供養別論卑謹虔禮名恭敬至念專注名尊重

發言稱美名讚歎施其依報名供養此中文略具辯應如無量義經廣說天厨天香天鉢器等即是供養大莊嚴菩薩及八萬大士合掌叉手即是恭敬一心瞻仰即是尊重說七言偈即是讚歎今論衆集指彼文者彼經衆集說法竟儼然不散即彼座席仍說法華故知三業供養不得有異用彼廣釋此略於義無咎從為諸菩薩說大乘經下訖以佛舍利起七寶塔是現相序瑤師明七瑞此土開六他土總一光宅此彼各六瑞此六者動則說法度人靜則入定觀理動靜為一雙上天雨四華下地六種動上下為一雙大衆內懷歡喜如來外放光明內外為一雙今謂尋文起盡如光宅若取名義便易表報之意並自未彰今明智定因果感應為三雙智則指一說多定則諦緣義處因則四位天華果則六處地動感則大乘機發應則圓毫照之此六皆稱瑞相者文云今相如本瑞瑞祇是相耳人情分別以密報為瑞奇異為相相何所報妙理玄曠說之至難人情悠悠不能尊重先以

異相駭變常情常情既變而生欽渴故以異釋相以報釋瑞略明六瑞表報十妙感應妙中已說今更道說法瑞表報說法妙智妙入定瑞表報行妙雨華瑞表報位妙地動瑞表報境妙乘妙衆喜瑞表報眷屬妙利益妙放光瑞表報感應妙神通妙是故六種俱名現相序說大乘經者善戒經有七大一法大謂十二部毗佛略也二心大謂求於菩提也三解大謂解菩薩藏也四淨大謂見道淨心云五莊嚴大謂福德智慧也六時大謂三僧祇行行也七具足大謂以相好自嚴得菩提也六是因大七是果大大因大果合為大乘經也今將十妙義揀經應可解生師云無相空理大乘之本封三來久頓說無三不能取信故說無相為法華序觀師意同若爾般若淨名皆應是序何獨無量義耶彼釋云如此由五時故後教得起更問若爾無量義與諸經皆通途相生非關別序基師云空理無形故云無量序意同前難亦如是印師云無相善有成佛義故言無量又云彼經不說有三無

三有異大品非法華所指指者不來秦地今謂此經是宋元嘉三年慧表比丘於南海郡朝廷寺遇曇摩耶舍受此本還武當山永明三年始傳於世經既已來豈可送還天竺光宅云無量義以萬善同歸能成佛道法華正明無二無三破三與一為異故即為序若言萬善同歸二三何不同歸二三若歸序正不異若言破二破三何不破萬破二破三則無二無三既其破萬是則無序取經互舉意為異者不成異也異意不顯序義亦不成也劉虬注云無相為本無相一法含義不背若舍義不背即是有相何謂無相尋諸師各偏一種若言有相之善有成佛義此三藏意耳若言無相之善有成佛義此通教意耳若言含法不背此別教意耳並他經所明皆非序法華意耳若法華論列十七種皆法華之異名無量義者即法華之一名也今申論意佛直說此名而入此定故得為序大品金光明涅槃皆先唱名於序無妨今經文殊引古佛亦名無量義又云當說大乘經名妙法蓮華此

亦序中唱名與論意同也今按彼經釋無量義者從一法生其一法者所謂無相無不相名為實相從此實相生無量法所謂二法三道四果今釋此文無相者無生死相也不相者不涅槃相也涅槃亦無故言不相無相指中道為實相也二法即頓漸頓謂華嚴頓中一切法也漸謂三藏方等般若一切法也三道即三乘四果即羅漢支佛菩薩佛此等諸法名為無量實相為義處從一義處出無量法得為無量法入一義處作序譬如算師從一算下諸算除諸算歸一算由下故除下為除序從一派諸收諸歸一開為合序亦復如是如此消釋不違彼經論亦與此經合云復次無量義讚偈明法身百非洞遣應為文六紫金輝普賢觀明常樂我淨四波羅蜜住處前後兩文皆明常豈有中開壽量而是無常耶他難云序已說常正何所道今反難之涅槃以純陀是序已開常宗正何所道他又例淨名序金剛無為無數而正說不明常法華亦應爾今還反難之純陀序常涅槃正應

無常今論序常正常何疑也教菩薩法者無量義處用教菩薩也義處即諦理也下文普令一切眾亦同得此道又云若我遇眾生盡教以佛道即此意焉佛所護念者無量義處是佛自所證得是故如來之所護念下文云佛自住大乘也雖欲開示眾生根鈍久默斯要不務速說故言護念佛說經已入無量義處三昧者慧定相成非禪不智須先入定非智不禪故先說法即智而定即定而智先後出入無有隔礙疑者云若未說無量義可入斯定說此經已何故入定釋言先入此定後說此經可解說此經竟而更入者是為法華作序耳何者若不先開則後無所合先入開定為合定作序稱為瑞相即此義焉若作次第者先入無量義三昧已應入法華三昧若明文彰顯時眾則知何俟彌勒殷勤文殊靳固故知作序其義轉明身心不動者與所緣之處相應也身之本源湛若虛空心之理性畢竟常寂大通智勝身體及手足寂然安不動其心常憺怕未曾有散亂身若金剛不可

動轉心若虛空無有分別無量義處三昧法持於身心故不動也稱為無量者此定寂而常照能知世間從此一法出無量法也若作序義身法體動運今令不動運心法體分別今令不分別序義明矣問瑞相本論奇異說法入定佛之恒儀何得為瑞答說法雖竟時衆不散肅有所待故知前之說法舉衆來集待於後聞此事奇特與常說異何意非瑞雖入闍定意在合定與常入定有異何意非瑞相耶又文殊引古佛六瑞皆有此事若昔非瑞相何以證今今古同然豈可以凡情而非之耶天雨四華者舊云小大白小大赤正法華云意華大意華浦嚮華大浦嚮華釋論九十九云天華妙者名曼陀羅又七十九云八百比丘成佛國土常雨五色曼陀羅華舊雨小大白表在家二衆小大赤表出家二衆表其昔來因而未果今謂此解狹而不當直論四衆收三藏中十六衆尚不盡況復四十八衆是故為狹夫華相密報其因四衆昔來已是因何俟華報若報其果天應雨實何故雨

華故云不當今言雨華明其昔因非佛因三藏中因是二乘因通中因是共因別中是菩薩因皆非佛因今天雨華報其當獲佛因佛因者即四輪因也小白表銅輪習種性開佛知見也大白表銀輪性種性十行示佛知見也小赤表金輪道種性十迴向悟佛知見也大赤表琉璃輪聖種性十地入佛知見也四輪皆同是因是因由中而生故從天而雨由是因位故以華表之但因有趣果之義故而散佛上如此因果誰當感剋祇是此會時衆故言及諸大衆也下文殊釋疑吹大法蠶等四句又正說中開示悟入又與大車中遊於四方節節相承皆是位義故知華表因位也問四輪是別位義那得釋圓位耶答名通義圓尚無所失況名別義圓而不得用耶問別義賢聖圓亦有耶答已如玄義若言四華俱從天雨未四衆當同成一因如此釋者出三藏義未出通義若言四衆同是菩薩因者此釋出通義未出別義並非佛因皆非法華意也法華意如前說普佛世界地六種動者舊

云動三乘人因果決定六執者此破三藏家三乘六執未破通教三乘六執通教約法三人因果同若約人三人因果異此之同異俱被破而舊家破意不破此也別教無三乘名則無六執舊所不破今明別家因時三法縱橫果時三法亦縱橫此則須破今釋地六種動表圓家六番破無明無明繫縛未曾侵毀方將破壞故動地以表之無明若轉即變為明故普佛世界六種震動也六種表住行向地等妙六番也優婆塞清淨行經云菩薩生時動地示此生已盡無復煩惱一切衆生應得道者煩惱將滅故動即此義也本述解者如文殊釋疑引古佛為答密得此意即是識本非謂他佛昔現斯瑞而我世尊本亦斯瑞非今一反也云觀行者動六根也地相堅固如六根冰執未會入大乘之道動難動之地表淨未淨之根東涌西沒者東方青主肝肝主眼西方白主肺肺主鼻此表眼根功德生鼻根煩惱互滅鼻根功德生眼中煩惱互滅餘方涌沒表餘根生滅亦復如是六動者動

起涌震吼覺一中又有三謂動徧動等徧動直動為動四天下動為徧動大千動為等徧動餘五亦如是合十八種動此即表淨十八界也云次明大眾心喜瑞者眾見雨華地動知甘露將降欣躍內充表大機當發感於

定四

二十

勝應問喜怒人之常情何得為瑞答天華悅眼地動震心大經云動時能令眾生心動華地是外瑞心喜是內瑞非常之喜昔雖曾有而不為喜所動而能一心觀佛何得非瑞若言歡喜動陰心者人天義也若喜動真諦無漏心者藏通義也若喜動即假心者別義也喜動實相心者圓義也次明佛放光瑞即表應機設教破惑除疑白毫具種種功德觀佛海三昧經云佛初生時牽長五尺苦行時長一丈四尺得佛時長一丈五尺其毫中表俱空如白琉璃筒內外清淨從初發心中間行種種相貌乃至入涅槃一切功德皆現毫中毫在二眉之間即表中道常也其相柔輒表樂卷舒自在表我白即表淨放光破闇表中道生智慧光照此土他土表自覺覺他復

次二乘雖達二諦不知中道如有二眉而無白毫別教雖知三諦不能毫中具一切法當知從初至後法界中事悉現毫內者即表圓教之意復次眾經明放光不同大品從足下千輻輪相乃至頂髻一一各放六萬億光明

定四

十一

如彼廣說大經面門放光此經白毫放光緣宜不同耳又收光不同育王經云收從背入欲記過去事收從前入欲記未來事而不見記現在事私謂脅入應記現在事也足入記地獄蹠入記畜生脚指入記鬼膝入記人左掌入記鐵輪王右掌入記金輪王及記諸天臍入記聲聞口入記緣覺白毫入記菩薩肉髻入記佛而今經放白毫光而未見收光之文者略耳又解云放光照現在事收光明將來事此經正論此土他土諸佛道同故正論放光若解諸佛道同即開示悟入任運獲記則放光為正收光是傍故略而不說耳若丈六佛放光者三藏義也若尊特佛與丈六佛共放光者通義也若尊特佛獨放光者別義也若丈六佛即毗盧遮那法身放光者圓義

也舊云此土六瑞訖至膩吒天今尋文從照東方萬八千土下即是他土六瑞之文蓋斟酌由人耳舊云實照十方照東方者表一乘因果是諸因果之上萬是數圓表果位滿八千數缺表因果未足若照東方義已足更照

九方復何所表今明東是方始表十住是位始迹門說法生身菩薩朗然見理入於十住開佛知見舉初即知中後故云靡不周徧者當知諸方亦然諸位亦然若就本門說法四方佛集即表本門說法法身菩薩增道損生四位增長也觀解萬八千者約十八界論百法界千性相即有一萬八千此等境界佛慧未開今應當開故以數表之耳文云從阿鼻獄上至有頂即六法界也又見諸佛菩薩比丘等十界具足故文云靡不周徧即此意也若分文屬此土第六相若屬他土即是總相照他土文次明光照他土六瑞者一見六趣二見諸佛即是上聖下凡為一雙三聞佛說法四見四眾得道即是人法一雙五見菩薩行行六見佛涅槃即是始終一雙既有可化

衆生即有能化之佛有佛即有說法說法即有弟子弟子即是行始行始必致終也若此土六瑞總報衆生當獲自覺彼土六瑞總報衆生當獲覺他又此彼六瑞表此彼諸佛道同從盡見彼土六趣衆生下至行菩薩道者是現彼土已與此同從復見諸佛下至七寶塔者是現此土當與彼同略說竟更廣說者從又見六趣衆生是現彼佛爲五濁故出現於世此佛亦然二土出世意同也及聞諸佛所說經者是現彼佛初從無相一法非頓而頓與此土初說華嚴意同也從并見諸比丘下是現彼佛非漸而漸與此土佛次說三藏意同也從復見諸菩薩下是彼佛三藏之後說方等般若衆經與此土佛三藏之後意同也從復見諸佛下至起七寶塔是現彼佛般若之後開權顯實收無量法還入一法唱入涅槃息化起塔光照彼土始終究竟炳然在目當知此土從一出無量非頓而頓非漸而漸其事已竟必當收無量法還入一法開權顯實息化歸真與彼土同也復次種種因緣

者昔善爲因今教爲緣又別說者正是三藏之後明共不共般若爲因助道戒定慧等爲緣約三人即有種種因緣又就共不共人種種因緣種種相貌者共不共各四門一一門復有無量相貌五百比丘各說身因即其義也不共四門亦如是故知因緣相貌種別無量皆是彼與此同彼明此相因緣相貌還入一因一緣一相一貌當知此土亦與彼同爾時彌勒作是念訖今當問誰是疑念序文爲兩一彌勒疑念二大衆疑念彌勒有三念一正念六瑞二念問誰三念文殊文殊念起第二念除唯初念在但成一疑也神變者神內也變外也神名天心即是天然內慧變名變動即是六瑞外彰首楞嚴云佛住不二法能作神通法王法力超蓋一切彌勒不測外變亦不知內慧故與念至此若夫庸人不知術者散人不知定者凡人不知聖者小聖不知身子身子不知菩薩菩薩不知補處補處不知尊極此就極處亦不知也又彌勒值佛植善既多何容不髣髴知應須隱明示聞權言

不知也大衆有兩念一正念六瑞二念問誰若將下偈望此亦得有三念偈云四衆欣仰瞻仁及我無第三念何事瞻仁而此中無者欲推補處居先也舊解先有三意一是補處二有三念三能發問爲此義故大衆關一念也問文殊彌勒德位相亞何故一問一答答夫機有在無位雖齊等賓主異宜聖人承機非問者不能答也又法門有權實權補處須問實者須答又迹有久近近問久答又各有便易彌勒名慈慈爲衆生應須問文殊名妙德德應須答此即四種消文意妙法蓮華經文句卷第二下

妙法蓮華經文句卷第二下

校勘記

- 一 底本，明永樂北藏本。
- 一 三三頁上一行全行，經作「第二下始」。
- 一 三四頁下一八行第一一字「加」，南作「如」。
- 一 三八頁下六行「俱名」，清作「俱各」。

妙法蓮華經文句卷第三上 寔五

隋天台智者大師說

門人灌頂記

從爾時彌勒欲自決疑下訖偈即是發問序文為二長行偈頌長行中經家述自疑他疑發問問中此土他土如文何意有偈頌耶龍樹毗婆沙云一隨國土天竺有散華貫華之說如此問序後銘也二隨樂欲不同有樂散說或樂章句三隨生解不同或於散說得解或於章句得解四隨利鈍利者一聞即悟鈍者再說方悟又表佛殷勤重說又為眾集前後故有偈也偈有六十二行文為兩初五十四行頌上問後八行請答就問為兩前四行問此土後五十行問他土長行總問此土六瑞偈中長有香風地淨無說法入定觀文謂言盈縮尋義不然說法是慧性入定是天心由天心慧性能作動地放光舉末即能知本故縮非縮也他不見此意謂彌勒不問兩事便不以為瑞今反難之若彌勒不問文殊何故而答又問指何處為問今指長行總問是

也若更顯其別問祇導師兩字是也良以說法入定能導於人既稱導師即是問說法入定也是故非縮他云風由檀林故香地加之嚴淨盈長兩事今謂非盈風本無香而香為奇特故以成瑞夫天華至妙豈有色而無香此表因運至果如華有香風華既集地則嚴淨因若趣果果則嚴淨金光明云聚集功德莊嚴佛身故以二事顯成四華盈非盈也眉間光下次有五十行頌問他土六瑞舊云頌中不問三乘四眾不問佛涅槃今教廢三那忽問三方說壽量那問滅度於義不便故不問也嗚呼不解消文抑經就情今明頌中具問他土六瑞文為六初三行問六趣眾生二四行問見彼佛及說法三三行問他土四眾次一行半結前開後次三十一行半問他土修菩薩行次七行問供養舍利即是問佛涅槃也初三行問六趣驗此頌知上文光照東方是總照他土意也此頌頌上總問六趣眾生是能趣之人生死是所趣之處善惡業緣是趣因好醜是趣果也從又觀諸佛下第

二四行問見彼佛土直見佛說法此廣明說法之相謂說頓教逗大根性聖主師子即如此土現盧舍那像也演說經法微妙第一者即如此土先照高山演華嚴教也教諸菩薩者即如此土七處等會無聲聞人也照明佛法開悟眾生者即如此土始見佛身入如來慧也若人遭苦下第三三行問彼土四眾即是頓說之後次明三藏教也若人遭苦者聞聲聞乘也此頌具明四諦在文分明若人遭苦而造惡業苦不得盡底下眾生是也若人遭苦而造善業苦亦不盡歇下攀上如難陀為欲故持戒等是也若人遭苦於外道法中求解脫增見長非者苦亦不盡若人遭苦欲集復欲依果感佛說涅槃者此人能盡諸苦際也他土亦開此乘也若人有福下一行是開中乘也若供養佛少遭苦致惱若供佛多雖遭苦而福故云聲聞三生種福支佛百劫種福形彼聲聞故言有福志求勝法者聲聞歡若而修行支佛求道故修行深求緣起勝妙之理即是他土開中乘也若有佛子下

是開六度大乘也真慈悲能紹佛種故言佛子修於六度故言種種行志求故言無上慧六度中無六蔽如藥中無病故言淨道非畢竟淨也又聲聞苦諦為觀門緣覺集諦為門六度菩薩道諦為門故言淨道文殊我住下

第四有一行半結前開後見聞若斯即是結前如是衆多即是開後我見彼土下第五有三十一行半問他土菩薩種種修行就此為三初一行總問次十五行次第問次十五行半雜問初總問可解或有行施下第二有十五行次第問中為六初六行問檀二二行問尸三一行問忍四一行問進五二行問禪六三行問慧就問檀有三意初四行問捨財一行問捨身一行問捨命珍寶奴婢貴賤共能比施駟馬寶車豪俠者新婦妻子等是外身身肉等是內身捨頭目即捨命而不言法施者讓後般若也又約身命財與生死後際等得不壞常住即是法施故不別說也文殊師利見王下第二二行問戒約比丘論持戒者在家居易戒難出家施難戒易故約比丘明

戒此中引五王經_云或見菩薩下第三一行問忍忍有三種閑林遠谷惡人惡獸忍耐無瞋即生忍自節守志即苦行忍為求佛道即第一義忍又而作比丘即苦行忍獨處閑靜即生忍樂誦經典即第一義忍又見菩薩勇

下第四一行問精進者夫深山可畏非欲怯者所居勇進者能安之傍若無物思修實相念念不休進求佛道也又見離下第五兩行問禪前一行問修根本禪後一行問修出世上上禪通途_得有根本之修也離欲者若離欲得五通教定也又根本本離欲背捨亦修不淨等離欲別教兼離二乘欲中道又離順道法愛欲_不深修禪定者發初禪一品此定未深乃至九品傳傳為深又背捨九定八勝十一切入等傳傳為深此定轉變自在能發諸通凡夫但五通二乘具六別教菩薩讓佛分有無漏亦但稱五通也圓教初後皆具六通安禪萬偈下第二一行明上上禪此是別圓之禪靜散不相妨不起滅定現諸威儀如修羅琴不拊而韻無緣無念有感則形

故能_禪讚佛也復見智深下第六三行問般若為二初一行是目行智深者慧窮理本也志固者誓願廣大也此即二種莊嚴能問能持也又見佛子定慧下次兩行是化他也未到慧多無色定多四禪等又背捨慧多九

定定多十一切中等又二乘定多菩薩慧多佛則等又空觀定多假觀慧多中觀則等無量喻即是種種方便諸教之中引無量譬類助顯第一義也破魔兵者空觀破四魔假觀次第破八魔中觀圓破八魔十魔一切魔擊鼓者初發心住便成正覺百佛世界作佛圓擊梵輪法鼓從又見菩薩寂然冥然下第三有十五行半不復次第隨見而問問上六度自收得為行何須更問大煩雜耶答上問次第者自漸一途非次第者不定一途既言種種相貌何啻兩途而言是煩耶此次第雜亂兩番六度擬他土開三藏後說方等十二部經辯六度相貌具如此問不異就雜問中文為七意初二行問禪又二前一行問入捨禪即是自行次又見菩薩放光下第二一行問

入悲禪即是化他菩薩入定放光種種利益具出華嚴思益云次又見佛子未嘗下第二一行問精進即是般舟念佛等法門也次又見具戒下第三一行問戒威儀無缺即是初不缺戒淨如寶珠即是第十究竟戒中間可解十戒如玄義中說次又見佛子住忍下第四一行半問忍即生法二忍次又見菩薩離戲下第五兩行更問禪離戲是却掉悔蓋離癡眷屬即除瞋蓋近智者除疑蓋一心除亂是却貪蓋攝念山林除睡蓋次從或見菩薩至飲食下第六五行問檀為二前四行明四事施如是下第二一行結成次或有菩薩說下第七有三行問般若初一行不可說而說般若二一行不可觀而觀般若三一行言語道斷心行處滅即是說不可說觀不可觀而論般若也或可用此三番般若成上見他土說方等中六度或可別擬他土說方等後明大品教盛譚般若寂滅無二清淨不著此彼同也或可說寂滅法是方等中意觀諸法性猶如虛空是般若意正是歷法作觀法相

無二此義實與大品相會若作彼土見法華意者以此妙慧求無上道一行是也但見修妙慧人不見法華妙慧座席若見座席即知此如彼何事須疑但見人不見座闡眾疑問耳或可三番般若與此間般若相同未知此後次何所說是故疑問此兩意從人用之耳上長行文連但舉六意偈頌既廣顯義泠然云文殊師利又有菩薩下第六有七行明佛滅後以舍利起塔者正頌上他土佛出五濁從無相一法開漸頓教故有二法三道種種行類相貌不同如上所見也今見他土佛般涅槃佛子慕德為樹墳塔即表無量悉歸入一一出無量前相已表無量歸一正是入於涅槃云何畏妨壽量作起塔為佛事耶痛哉痛哉就文為六初一行總標佛滅起塔次又見佛子造下第二一行明塔數次寶塔高妙下第三一行明塔量次一一塔下第四一行明塔相次諸天龍神下第五一行明供養次文殊下第六兩行結塔婆此云方墳方墳如此土塚墓大灌頂翻為塚也殿堂如此土靈

宇崇臺峻階承露干雲長表淨域歸心上聖耳樹王者即波利質多正供舍利傍嚴佛國土云從佛放下第二有八行請答為二初三行舉疑事述請後五行釋伏難初三行為三初一行舉見此土事白毫為本故先舉及諸事故言種種次諸佛下第二一行舉見他土事諸佛為本即總攝餘五也我等下第三一行請答第二就釋伏難為二初四行正釋伏難次一行結請言伏難者文殊內心構難不肯特答其意有三一此瑞希奇不可倉卒輕爾有判二智眾如海謙光推高三斬固前却生眾渴仰故以伏難潛而拒之彌勒彰灼釋難意亦有三一瑞大疑大若不為釋憂兒在懷妨聞正說二眾海乃多機在仁者三闡眾瞻仁故知法誠殷重所以彰言釋難請令時答初伏難者因正請生請云佛子文殊願決眾疑文殊仍此起初伏難汝云眾疑眾未會疑若疑應問眾既不疑我何所決彌勒即以第一偈釋云四眾欣仰瞻仁及我及我欲令我問瞻仁欲得仁答文殊因此起第二難眾

同有疑不易可答待佛出定然後決疑彌勒即用第二偈釋若有疑在懷憂兒不泰應以時答復知如來何時起定故言佛子時答決疑今喜文殊因此起第三難我與仁者同居學地欲測佛意微共籌量獨令我答於理不可彌勒即以第三偈釋我亦微心下思踟躕兩楹為說妙法為當授記故言佛坐道場所得妙法為欲說此為當授記文殊因此起第四難若如汝說即是釋疑何煩我答彌勒即以第四偈釋安得以我猶豫之心而判大事故言示諸佛土此非小緣文殊伏難既窮謙光亦止後一偈結請答也此四伏難光宅受於次師次師受於江北剎師既是先賢文外巧思今用之從是時文殊師利語彌勒下訖偈名答問序有長行偈頌長行文為四一從語彌勒下名惟付答二從善男子我於過去下名略曾見答三從諸善男子如過去下名廣曾見答四從今見此瑞與本無異下名分明判答夫以下測上止可罔像卜度惟昔儔今不可頓決所以初從髮鬚次引略見略見

未周更引廣見以多證一爾乃分判惟付答答上此土問略曾見答答上他土問廣曾見答雙答此土他土問判當答雙判此土他土問也惟付答為二初標章次正惟付惟者思惟也付者付量惟今如昔付昔如今然文殊古佛豈應不知迹示思惟也光宅以初後兩句是法說表因果廣略中間三句是譬說欲說大法是略開三顯一略開近顯遠演大法義是廣開三顯一廣開近顯遠大法兩者譬得記作佛昔因果定執不得作佛是枯涸義今皆作佛是被雨潤義吹蠶是改三乘之號嚴鼓誠兵譬破無明今明其法說不用何者迹本兩門由籍各異迹由籍起彌勒生疑文殊為釋本由籍未起彌勒何所疑文殊何所釋若於此中已是釋於開近顯遠之疑者後地裂眾涌彌勒何故更疑更疑則浪疑浪釋釋後既虛釋前亦謬此大有所妨故不用也今明彌勒但問迹中此彼二土等瑞文殊以惟付答答迹中事不關壽量本中事也欲說大法者答說法瑞兩大法雨答兩華瑞吹大

法蠶答大眾心喜瑞擊大法鼓答地動瑞演大法義答放光瑞欲說大法者惟昔諸佛說無量義後則開權顯實收無量歸一付於今佛既說法已亦應開權顯實會無量以歸一者即大法也兩大法雨者惟昔諸佛天雨四華之後普入圓因住行向地付於今佛兩華之後皆成佛因住行向地故言兩大法雨也吹大法蠶者惟昔四眾見瑞歡喜得未曾有障除機動即改人教行理付今眾喜亦應障除機動改人教行理所改既深故言吹大法蠶也擊大法鼓者惟昔地動已後即有六番破無明賊付於今佛地動已後亦應六番破無明惑聲教極少故言擊大法鼓演大法義者惟昔諸佛放白毫光後說法華彼此道同付於今佛放光已後廣明五佛道同既是佛道故言演大法義如是五句悉是惟昔判今付今類昔會文附義唯少入定一瑞而兩華動地放光等皆由入定故爾意則兼具無勞疑也闕此一節故稱略答耳今更別解初一句總後四句別總者大法是也別者雨吹

擊演開示悟入是也如天非小大非赤白而
兩赤白之華如第一義非開示悟入見此理時
即證開示悟入譬如種子得雨萌開今聞大
法兩潤法性種破無明棘開於十住佛知見
也譬如吹蠶知是改號今之與先已得十住
今從十住開法更改入十行示佛知見也譬
如擊鼓知是誡兵今之與先已在十行今從
十行開法誠入迴向佛知見也演之言布
橫闊豎深乃是演義今之與先已在十向今
從十迴向入於十地入佛知見窮源盡邊深
廣備足也惟昔六瑞已後即開示悟入付今
瑞後亦應如是橫豎釋惟付答竟從我於過
去下第二引略曾見答者初以已智惟付今
以略曾小分明於前舉此答他土問也此土
五瑞不通他土唯放光一瑞徧照東方略曾
見答專答放光故知是答他土之問也今見
如昔昔秋如今欲令衆生咸得聞知者即聞
思兩慧亦信法兩行收無量歸一改三乘教
理六番破無明等諸佛道同開示悟入佛之
知見故言一切世間難信之法也如過去下

三引廣曾見答更分明於略此廣答此土他
土之問彌勒因光橫見東方以為問文殊引
昔豎見而為答橫豎顯諸佛道同也文為三
初引一佛同次引二萬佛同後引最後一佛
同就前一佛又為三一明時節二標名三說
法時節如文有佛號日月標名同者通號與
今佛可同別名云何同此當以名別義同為
釋何者日是慧月是定定慧是自行德燈明
是化他德能仁能定慧能自他又日月燈是
三智今佛亦三智隨緣稱別義則不殊故言
各同演說法下第三說法同者昔佛先後後
漸與今佛初頓後漸同也演說正法初中後
善者即是頓教也夫七善之語乃通大小尋
文是大乘七善初中後善者即是頓教序正
流通名為時節善其善深遠即是頓教了義
之理二乘不測其邊底故言深遠是名義善
其語巧妙即是頓教八音所吐會理直說悅
善薩心即頓教之文名為語善統一無雜不
與二乘共即是頓教獨一善具足者具明界
內界外滿字之法即是頓教圓滿善清白無

二邊瑕穢即是頓教調柔善師云行善梵行
之相者梵即頓教無緣慈善又初中後善解
者不同今且依一途若小乘以戒定慧為三
善大乘以初中後心為三善金光明云前心
如來不可思議中心如來種種莊嚴後心如
來不可破壞此亦三善之意也文殊引古佛
頓教七善與今佛頓說七善同亦與他土初
頓說同所以用此為答者剛上彌勒據光橫
問他土佛云聖主師子演說經法微妙第一
文殊豎引昔舉此為答即是初佛說頓法同
也為求聲聞人說應四諦法者即是古佛次
頓之後開漸教法同也上問若人遭苦為說
涅槃今引古佛亦開此漸以答斯問也為求
辟支佛說應十二因緣法答上若人有福志
求勝法之問也為諸菩薩說應六波羅蜜答
上佛子修種種行之問也皆引古佛開漸教
同也廣引曾見佛答他土之問也今得三善
提成一切種智者此明古佛開頓漸後即顯
實之說始終究竟此答彌勒見他土佛般涅
槃涅槃後起塔之問也若引古佛說法至六

波羅寧者即今佛已與昔同從今得三菩提
去明今佛當與昔同云次引二萬佛名號說
法皆同初引一佛倫舉頓漸說法同中舉二
萬佛但舉說頓同故言初中後善也後引一
佛但舉開漸同所以然者互舉耳指前可知
而不引二萬之前佛者正為名字說法皆同
據義為便耳姓頗羅墮者此翻捷疾亦云利
根亦云滿語也其最後下第三引一佛同文
為三一明曾見事與今已同二明曾見事與
今今同三明曾見事與今當同曾與昔之所
更已謂謝在過去曾之與已俱謝俱更今取
久遠者為曾小近者謂已取六瑞等為今取
佛出定去為當也第一從其最後佛有八子
者是曾與已同昔佛八子今佛一子數雖不
等並出同居之土土有見息俱示有子有事
同一八赴緣別有所表生一子總表一道清
淨生八子表八正道數異義同今取有子義
同也又昔佛子出家發大乘意今佛子住小
乘果此云何同昔化道已竟顯本事彰故言
發大乘意今未發迹猶言羅漢至下文發本

即是菩薩其義則同從是時日月燈佛說大
乘經下第二明曾與今同昔佛自土六瑞悉
與今同次第如文昔佛他土六瑞總云如今
所見則知昔佛他土六瑞亦與今同昔明別
序既有現相懷疑二序同而無集眾發問答
問三序者義推則有既言說法知必集眾既
道懷疑知應有問若問必答例二必兼得三
序同也又若述昔答則不俟文殊費辭既不
言答亦不出問其義可解從時有菩薩名曰
妙光下第三明曾與當同此文為六一從時
有菩薩者是因人同二從爾時日月燈明佛
從三昧起者是說法名同三從六十小劫者
是時節同四從說是經已於梵魔沙門者是
唱滅同五從時有菩薩名曰德藏者是授記
同六從便於中夜者明滅後通經同今初云
何因人同昔佛定起因妙光菩薩說經今佛
定起因身子聲聞說經此云何同瑤師云因
者因託付傳一乘之經非直對告之人也彼
佛對告何必是妙光如今對告身子身子未
必能有宣通因託宣通莫若妙光如今因委

莫若文殊今佛不歎者往佛何必歎也文殊
引往佛歎妙光者正明可因託耳又舊以樂
王為所引人者亦可爾但引往證今小不類
耳或言因文殊釋疑得起定說經此對不便
今明不爾經文自云因妙光正說而作因託
流通之解又取樂王為例此乃公抗佛語何
關釋經昔因妙光今因身子正是所因人同
昔佛八子師於妙光如來起定對告妙光又
付託妙光今佛子羅云亦師身子佛從定起
亦對告身子師竟又付託身子今古釋齋
更若為勝此而近棄身子遠取樂王疑者言
妙光是菩薩身子是聲聞云何是同昔事已
彰譚為菩薩今事未發道是聲聞比及發迹
身子是大菩薩非同何謂昔妙光垂迹何必
不作聲聞特是文殊巧說方便隱顯耳從是
時日月下第二說法名同者如文上彌勒見
他上初頓頓後見漸漸後見種種行行後無
境後見佛涅槃今文殊答曾見佛初頓頓後
漸後云種種行即見法華此彼六瑞之後已
說法華法華後即入涅槃此分明定答他土

之問也從六十小下第三時節同者如下文云五十小劫謂如半日即是同也從日月燈明下第四唱滅同者昔說法華即唱入滅亦如迦葉佛云今佛說寶塔品中明如來不久當入涅槃化道已足唱滅事齊也時有菩薩下第五授記同者昔授德藏菩薩記今經授學問記豈得是同昔事已成故言授菩薩記然正是會三歸一聲聞得記也若說昔授聲聞記者佛從定起更何所論文殊巧譚故不發迹耳若說授菩薩記諸經皆爾執教者未驚也如從佛授記已下第六通經同文為五

燈然燈是定光妙光是釋迦九世祖師孫今成佛師祖為弟子師弟無定將密顯生非生滅非滅之意問彌勒昔見諸佛曾聞法華何故疑問答時眾機宜應須扣發耳第四從今見此瑞下各分明判答今昔六瑞既同惟付決定不謬略會廣曾皆決定也當說大乘決定前說法瑞也名妙法蓮華決定前兩華瑞也教菩薩法決定前眾喜瑞也佛所護念決定前地動瑞也兼總入定悉在其中有人作已同當同不作今同尋文云今見此瑞與本無異此正語於今云何喚六瑞作已據此文為今故作三同之釋也頌有四十五行偈不頌上惟付略曾見答於廣曾見中但頌前後不頌中間也初有兩行頌廣曾見中時節各號說法等同也從佛未出家下第二有三十九行偈頌最後佛三同次有四行頌決定答就第二三同中有三初有一行偈頌曾與已同次第二有十五行半頌曾與今同第三次有二十二行半頌曾與當同從佛說大下第二就今同中又二初十四行頌此彼六瑞第

二從爾時四部眾下一行半頌四眾懷疑初又二初有四行偈頌此土六瑞同而長出天鼓自鳴表無問自說也現諸希有事者即總頌諸瑞也從此光照下第二次十行頌他土六瑞同長行但云如今所見是諸佛土其文則略此頌廣也文為五初三行頌見六趣眾生同次又見諸如來下第二一行兩句頌見佛同次世尊在下第三兩句頌聞佛說頓教七善法同也次一一諸佛下第四三行頌見聲聞等三乘即是昔佛開漸教法同也次又見諸菩薩下第五二行頌見菩薩種種因緣即是頌開方等般若教同初三行如文第二一行半釋自然成佛道者方便道則加心修習發真道即是自然任運與理合也約四教可知法問發真自然者何須諸佛說法答如船順流若遇風加棹助疾有所至風喻見佛聞法棹喻修行例如初果任運七生若值佛加修或一生二生得至無學云自然成佛道是報身琉璃是法身本淨金像應物現形世尊在大眾敷演深法義下第三半行此則

持法約人法既深玄當知必運大機開頓教也此頌上純一無雜七善之文一一諸佛土聲聞衆下第四三行此即將人約法人既二乘必知開三藏說也即頌上爲聲聞人說應四諦等也雖不頌出緣覺兼攝在中行施忍辱等等於四度耳此一行頌上六度大乘也又見菩薩深入諸禪定下第五兩行頌上見他土菩薩種種因緣信解相貌也略不答上起塔也上不見他土法華相故次此見起塔今答出法華相故起塔入滅事在後答也次爾時四部衆下第二一行半追頌昔佛四衆疑念如文從天人所奉尊下二十二行半頌曾與今當同文爲六初兩行二句頌因人同次說是法下第二一句頌上說法同次滿六十小劫下第三一行一句頌時節同約不思議總促劫智也妙光皆悉受持昔佛法也亦如身子受佛付囑也次佛說是法華下第四五行頌上唱滅同即是答上他土入滅之意也就此文有唱滅有屬累屬累如遺教有悲泣如涅槃有慰喻亦如遺教其得度者悉皆

得度未度者作得度因緣例如今佛將付彌勒云次是德藏下第五有一行半頌上授記次佛此夜第六有十二行頌上通經通經又爲五初有兩行頌上佛滅後時節四衆得益如薪盡火滅者小乘佛以果報身爲新智慧爲火慧依報身身滅智亡大乘佛以機爲新逗應爲火衆生機盡應形亦滅倍加精進者應以滅度度者也次是妙光下第二有兩句頌上能弘經之人次八十小劫下第三有兩句頌上行經時節次是諸八王下第四有八行頌上所益弟子又爲二初三行頌已成弟子次是妙光下第二五行頌當成弟子次彼佛滅下第五有一行頌上結會古今後四偈舊云是結成今物慕仰今釋不爾上長行有分明判答此文頌之文爲三初我見燈下初有一行頌上當說大乘經次今相如本下第二兩行頌上教菩薩法次諸求三乘人下第三一行頌上佛所護念在文可解又前彌勒釋四伏難令文殊必定有答此中是文殊斷四伏疑使彌勒莫復更問初第一疑因文殊

廣引先佛曾說法華故彌勒潛疑欲問諸佛起緣人時各異古佛雖名法華今佛何必如此文殊即以第一偈斷云我見燈明佛本光瑞如此以是知今佛欲說法華經此斷其疑名之問也彌勒因此又疑自有名同義同自有名同義異此名何所顯召文殊即以第二偈斷云今相如本瑞是諸佛方便今佛放光明助發實相義此是斷其疑體之問彌勒因此又疑實相無相何人會之文殊即以第三偈斷云諸人今當知合掌一心待佛當雨法雨充足求道者此斷其疑宗之問彌勒因此又疑佛雨法雨止洽菩薩亦潤二乘文殊即以第四偈斷云諸求三乘人若有疑悔者佛當爲除斷今盡無有餘此即斷其疑用之問彌勒聯翩構疑文殊頻頻爲斷既事窮理盡即得之於懷可謂善於問答具二莊嚴光宅但知述於劍師釋四種伏難使文殊必答顯彌勒之美不見文殊釋四伏疑令彌勒不問抑妙德之能此義出自天台非傳他疏寄語後賢勿過人長也自劍師已後數百年中講

法華者溢路頗有見斯意不非長何謂也
釋方便品

釋此有略廣略為二先略次料簡方者法也
便者用也法有方圓用有差會三權是矩是
方一實是規是圓若智詣於矩則善用偏法
逗會衆生若智詣於規則善用圓法逗會衆
生譬如偏舉指以目偏處是舉偏法以目智
宜用法以釋方將用以釋便若總舉指以目
圓處宜將秘以釋方妙以釋便也舉偏法釋
方便蓋隨衆生欲非佛本懷如經今離諸著
出三界苦是故如來殷勤稱歎方便此義可
釋他經非今品意又方便者門也門名能通
通於所通方便權略皆是弄引為真實作門
真實得顯功由方便從能顯得名故以門釋
方便如經開方便門示真實相此義可釋他
經非今品意又方者秘也便者妙也妙達於
方即是真秘點內衣裏無價之珠與王頂上
唯有一珠無二無別指客作人是長者子亦
無二無別如斯之言是秘是妙如經唯我知
是相十方佛亦然止止不須說我法妙難思

故以秘釋方以妙釋便正是今品之意故言
方便品也料簡者初番釋者是體外方便化
物之權隨他意語次釋亦是體外方便自行
化他之權亦是隨自他意語後釋是同體方
便即是自行權隨自意語初釋方便非能入
非所入次釋方便是能入非所入後釋方便
是所入非能入故知名同其義大異世人多
不見此意浪釋方便品云問方便與權云何
答四句分別自有方便破權權破方便方便
修權權修方便方便即權權即方便方便破
權者四種皆是秘妙之方便此方便破隨他
意權也權破方便者權是同體之權破於體
外之方便也相修者亦可解相即者亦可解
云三句可釋他經第四句今品意也故正法
華名善權品權即方便無二無別低頭舉手
皆成佛道方便善權皆真實也廣釋者先出
舊解五時權實十二年前照無常事為權照
無常理為實指阿毗曇今謂釋論破無常是
對治法皆屬三悉檀云何有實耶非今所用
十二年後般若照假有為權照假有即空為

實釋論亦破此義念想觀已除言語法皆滅
照假有即空者猶是觀想耳非今所用次淨
名思益內靜鑒空有二境為實智外變動應
用為權智今謂內鑒外用為二非入不二門
非今所用次法華照三三為權照四一為實
今謂三權一向不會實一實不關三權非今
所用次涅槃金剛前無常為權金剛後常為
實今謂道前真如亦是常道後如量智亦是
權此五時權實非今所用乃至半滿四宗所
明權實二智亦非今所用復有人解方便是
權爾實是審實又方便是權巧實是智慧又
方便是權假假三車於門外又方便是權宜
宜說三乘故又權是譬名譬如秤錘前之則
重卻之則輕處中則平合於佛智照察稱量
如是等釋各取一途權爾權假約處所權宜
約法門權巧秤錘約智能各不包含義不融
妙不可用此釋今品又有人以四種二慧初
一是權一是實次空有二智觀空不證離二
乘涉有無染出凡夫次空有內靜為實外用
為權次金剛前後常無常為權實初二慧今

生信次二慧令生解次二慧令化他後二慧是思此諸二慧凡有三轉初以有為俗空為真次空有為俗非空非有為真次空有為二非空非有為不二不二皆為俗非二非不為真教智亦然何故爾為人悉檀故自有入聞前不悟聞後即悟是故二諦不同又如平常依二諦說法故二諦有三門又佛教雖不出三門又漸引眾生故凡夫計心形是實非實也法性空乃真耳凡夫即捨有取空故說空有皆是俗非空非有乃是真或者捨二邊復值中道故第三遠離二邊不著中道乃是真此為五乘人初引凡夫生信出有次引二乘令入中次引菩薩令中偏俱捨又為學中者謂三假為世三假空為真此但得初意次非三假空有皆俗非空非有為真云云今詳被釋乃是傍五時顯已意却漸次梯階之非耳可釋他經非今品意經云咸令眾生皆得親見何時前後開悟不同又云正直捨方便那用漸次會於圓妙又初引生信解化果等何關今經悟入之意耶如天親列十七

名第十三名大巧方便又大乘方便經明方便十種第九名善巧移二乘令入大乘方便波羅密當知今品乃是如來方便攝一切法如空包色若海納流豈可以諸師一枝一派釋法界之大都耶今明權實者先作四句謂一切法皆權一切法皆實一切法亦權亦實一切法非權非實一切法權者如文云諸法如是性相體力本末等介爾有言皆是權也一切法實者如文如來巧說諸法悅可眾心眾心以入實為悅又諸法從本來常自寂滅相又云如來所說皆悉到於一切智地又云皆實不虛又大經四句皆不可說也一切法亦權亦實者如文所謂諸法如實相是雙明一切亦權亦實例如不淨觀亦實亦虛云云妙法蓮華經文句卷第三上

妙法蓮華經文句卷第三上

校勘記

- 一 底本，明永樂北藏本。
- 一 四六頁下一二行「故以伏」，南作「以故」。
- 一 四六頁下一三行「瑞大」，南作「瑞大故」。
- 一 四七頁上一四行「是時」，清作「爾時」。
- 一 四九頁上一行第一三字「令」，南作「今」。
- 一 四九頁上一〇行第一四字「與」，南、經作「謂」。
- 一 四九頁中六行第一四字「必」，南作「序」。
- 一 五〇頁下二行「此土」，清作「他土」。
- 一 五〇頁下三行第九字「也」，清作「頓」。
- 一 五二頁上一三行「弄引」，南作「弄引」。

一 五二頁中一〇行「方便方便即權
權即方便」，南作「權一便方便即
權即方便」。

一 五二頁下末行末字「令」，南作
「令」。

一 五三頁上一一行第五字「值」，南、
徑作「滯」。

妙法蓮華經文句卷第三下

寔六

隋天台智者大師說

門人灌頂記

一切法非權非實者文云非如非異又云亦復不行上中下法有為無為實不實法非虛非實如實相也若一切法皆權何所不破縱令百千種師一一師作百千種說無不是權如來有所說尚復是權況復人師寧得非權如前所出悉皆權也若一切法皆實者何所不破唯此一事實餘二則非真但一究竟道寧得衆多究竟道耶如前所出諸師皆破入實寧復保其權窟耶若一切法亦權亦實復何所不破一切悉有權實那得自是一途非他異併一一法中皆有權實不得一向權一向實也若一切法非權非實復何所不破何復紛紜強生建立直列名尚自如此遙觀玄覽曠蕩高明為若此況論旨趣耶今就有權有實句更開十法就十法中為八番解釋一列十名二生起三解釋四引證五結十為三種權實六分別三種權實照三種二諦七

約諸經判權實八約本迹判權實一列名者謂諸理及教行縛脫因果體用漸頓開合通別悉檀即是十種名也二生起者從無住本立一切法無住者理也一切法者事也理事故有教由教故有行由行故有縛脫由脫故成因果由果故體顯能用故有漸頓之化由開漸頓故有於開合開合故有通別之益分別之益故有四悉檀是為十章次第云三解釋者理是真如真如本淨有佛無佛常不變易故名理為實事是心意識等起淨不淨業改動不定故名事為權若非理無以立事非事不能顯理事有顯理之功是故殷勤稱歎方便理教者總前理事皆名為理例如真俗俱稱為諦諸佛體之而成聖聖者正實也欲以已法下被衆生因理而設教教即權也非教無以顯理顯理由教是故如來稱歎方便教行若依教求理則生正行行有進趣深淺之殊故行名權也教無進趣深淺之異故教名實也非教無以立行非行無以會教會教由行是故如來稱歎方便云縛脫者

為行遠理則縛縛是虛妄故稱權為行順理則生解解實於理故稱實非縛無由求脫得脫由縛如因屍渡海屍有濟岸之力故稱歎方便因果者因有進趣暫用故名權果有尅終永證故為實無果因無所望無因果不自顯是以二觀為方便道斷惑成因得入中道解脫之果若非二觀豈契中道果由因尅故稱歎方便體用者前方便為因正觀入住為果住出為體用體即實相無有分別用即立一切法差降不同如大地一生種種芽非地無以生非生無以顯尋流得源推月識體用有顯體之功故稱歎方便漸頓者修因證果從體起用俱有漸頓今明起用漸為權用頓為實若非漸引無由入頓從漸得實故稱歎方便開合者從頓開漸漸自不合亦不合頓故名為權漸今究竟還合於頓故名為實由開故合開有合力從開受名故稱歎方便通別益者通則半字無常之益別即滿字常住之益然常益道長喜生退沒故以化城接引生安隱想然後息化引至寶所若無半益

不得會常半有顯滿之功故稱歎方便四悉
檀者三是世間是故為權第一義是出世是
故為實非世不得出世由三悉檀得第一義
是故如來稱歎方便當用四句釋十番權實
三番是他經意一番是此品意云四引證者
此十義通大小教亘一切法且引今經不如
三界見於三界三界者是事不如三界見者
理也諸法寂滅不可言宣是理方便力為五
比丘說是教若聞此經是善行菩薩道證教
行也又汝等所行是善薩道佛子行道已來
世得作佛又種種因緣而未佛道但離虛妄
名為解脫未得一切解脫盡行諸佛所有道
法道場得成果云我以佛眼觀見六道眾生
始見我身聞我所說即皆信受入如來慧除
先修習學小乘者云窮子初逃中間客棧後
則付財初息化城後引寶所種種欲種種性
相憶念等此通引一部為證今別引一品雖
不次第十文具足諸佛智慧甚深無量其智
慧門難解難入者一切事理境智等悉名為
實施設詮辯阿舍言教悉是智慧門此證理

教論權實難解難入一切聲聞支佛不能知
者即是縛脫論權實所以者何佛曾親近至
名稱普聞即是教行論權實成就甚深至意
趣難解即是體用論權實吾從成佛已來者
成佛即是果果必有因即是因果論權實種
種因緣譬喻至今離諸著即是漸頓論權實
所以者何如來方便知見皆已具足即是開
合論權實諸佛為大事因緣故出現於世為
今眾生開示悟入佛之知見故者是為利益
論權實取要言之佛悉成就即是三悉檀成
就也止不須說即是第一義悉檀是為四
悉檀論權實所以者何佛悉成就第一希有
至諸法實相即是理所謂諸法如是相者即
是事是為理事論權實此一段長行明五佛
權實佛佛皆爾然法華論解諸佛智慧甚深
為證甚深甚深有五謂義甚深實體甚深內
證甚深依止甚深無上甚深無上甚深謂證
大善提也名智慧門為說阿舍義甚深此與
理教權實意同論解佛曾親近百千佛為修
行甚深勇猛精進名稱普聞為增長功德甚

深此與教行權實意同論解成就甚深未曾
有法為微妙事甚深意趣難解等為無上甚
深入甚深此與體用權實意同論解吾從成
佛已來為說如來功德成就法此與因果權
實意同論解無數方便者即是教化成就說
法成就此與漸頓權實意同論解如來方便
知見乃至深入無際等是自身成就不可思
議境勝餘一切菩薩此是明利也論解能種
種分別悅可眾心等是言語成就此是益也
與利益權實意同論解取要言之止不須說
等為可化眾生成就此與四悉檀分別可化
不可化意同論解唯佛與佛乃能究竟盡為無
量福成就諸佛能知謂如來法身之體不變
故覺能自證成就隨順眾生成一切諸法
相等此與理事權實意同彼論解佛經今疏
冥符二聖可謂與修多羅優波提舍皆合也
五結權實者此十種通四教合四十權實若
三藏中自證十法名自行權實說已十法利
益眾生名化他權實化他之十皆合為權自
行之十皆合為實名為自他權實餘三教十

法束為三種權實亦如是又當教各以事理
教行縛脫因果四種為自行權實各以理教
開合二種是化他權實各以體用漸頓通別
悉檀四種為自他權實其名雖同其義各異
也別結者三教若通若別當分皆是化他權
實隨他意語故圓教若通若別當分皆是自
行權實隨自意語故化他之三皆名為權自
行皆名為實次結成四句隨他意語者即一
切法權隨自意語者即一切法實雙取即一
切法亦權亦實雙非即一切法非權非實次
結成三番釋品者若自行自意者此文稱道
場所得法大經云修道得故攝大乘稱如理
如量智皆是圓教自行權實隨自意語佛雖
能於此不可說法方便能說而眾生不堪若
發軔單說此法取眾生者即不能得也故言
不可說不可說也復置此事以自行權實共
別教權實共取眾生者大機利者直得鈍者
曲得小機利鈍俱不得蓋華嚴意也復置此
事單用三藏權實取眾生者大機利鈍者密
得顯不得小機利鈍者但保於證取亦不得

蓋三藏意也復置是事合用四種權實共取
眾生者大機利鈍者曲直俱得小機利鈍者
保證俱不得蓋方等意也復置是事捨三藏
權實用三種權實共取眾生者大機利鈍俱
得小機利鈍保證俱不得蓋般若意也復置
是事捨三種權實單用圓教自行權實取眾
生者大小機利鈍俱得蓋法華意也如來智
慧靡所不達明照時宜用與可否故釋品云
方者諸方法也便者善巧用也巧用方法取
眾生得是故殷勤稱歎方便復次如來自證
權實俱不可說愍念眾生說自證之權為門
於物非宜眾生不能得入故自證亦不可說
說別權實為門利者得入鈍者不入於物非
宜別權實亦不可說說三藏權實為門利者
密入鈍者亦不入於物非宜亦不可說說三
種化他權實為門利者得入鈍亦不入於物
非宜亦不可說說二種化他權實為門於利
者得入鈍亦不入亦不可說於物非宜捨三
種化他權實但說自行之權於利者鈍者俱
得入從始至終以方便為門是故如來稱歎

方便釋品云方便為入實之門即此意也前
一番明如來能知方便能用方便此一番明
行者能隨順方便復次如來自證修道所
得於一切方便即是真實而此真實不可得
說雖能說之眾生不能即實以方便力帶不
即說一即利者能即鈍不能即又純說一不
即利者密即鈍者不即又帶三不即說一即
利者能即鈍者不即又帶二不即說一即利
者能即鈍者不即又廢三不即純說一切即
利鈍者俱能即於方便得見真實上兩意用
方便從方便此一意即方便即真實真實即
圓因圓因即自行之方便如此自行方便今
始證入上釋品云方便者即是真實從自行
方便得名故言方便品六分別照諦者前既
通別當分結束權實今還約此智照義則易
見若通以十種明自行二智者即照隨智二
諦也通用十法逗緣者即照隨情二諦也若
東四為二者即照隨情智二諦也若當分照
諦者事理教行縛脫因果悉是自證即照隨
智二諦也理教開合此兩屬化他即照隨情

二諦也體用漸頓通別悉檀四通自他即照隨情智二諦也三教照諦準此可解又三藏三十種二智是化他二智皆照隨情二諦若通別六十種是自他二智即照隨情智二諦也通教或時與前三藏共為隨情二諦若圓教三十種權實是自行二智照隨智二諦又三教若通若別皆是逗緣悉是化他二智照隨情二諦圓教若通若別皆是自行二智即照隨智二諦若束三教之實為權束圓教之權為實即自他二智照隨情智二諦也七約諸經者華嚴論教但是滿字論時但是乳論法是一自行一化他若對人但是菩薩二乘聲啞生身菩薩亦未能發自行之權隨智之實若依今經文未會向人說如此事約三藏者若論教唯是半字若論法是一種化他若論時即是略若依今文住立門外著弊垢衣執除糞器二乘人耳約方等教若論教對半論滿若論時並略明酥若論法有三種化他一種自行若依今文心相體信入出無難約般若若論教帶半論滿若依時挾生而熟若

依法則有二種化他一種自行若依今文出內取與皆使今知約法華論教廢半論滿若論時純是醍醐若論法唯有自行若依今文開權顯實此實我子我之所生我實是交付以家業授記作佛前教不說者今皆發之正直捨方便但說無上道故是自行之權故言方便品自餘或是自他二智或化他二智復次華嚴對二菩薩說一自一他不擬二乘不聞不解三藏對二乘說一化他不擬菩薩故無自行方等具對小大對二乘說兩化他對菩薩說一自一他般若亦對三說一自二他對二乘說一他對菩薩說一自一他法華普對機執者但明一自不復論他文云菩薩聞是法疑網皆已除千二百羅漢悉亦當作佛一切眾生悉入自行之方便故言方便品云入本迹者如來本地久已證得一切權實名為自行中間垂迹亦作兼帶等說今日垂迹寂滅道場帶別化他說自行次說一化他次說三次說二次說廢三等皆名化他權實束本權名實束迹實名權即是自他權實也結

此則有四句一切實一切權一切亦權亦實一切非權非實云身子本證一切權實即自行迹在鹿苑單受化他在方等受一被三折在般若帶二轉一至法華廢三悟一皆是化他權實束本權為實束迹實為權即自他權實亦具四句云若從佛迹說亦是化他之權實亦稱方便品若從引入圓因自行亦是方便品若從身子迹權亦是方便品若從身子迹入實亦是方便品為此諸義故稱方便品也。從此品下訖分別功德品十九行偈或至偈後現在四信弟子文盡名為正說分若作兩正說從此下訖授學無學人記品是迹門正說今且逐近就迹門正說更為兩一從此下是略開三顯一二從告舍利弗汝已殷勤下是廣開三顯一二略更為二初從爾時世尊下是略開三顯一二從爾時大眾下是動執生疑略開三顯一有長行偈頌長行為二一寄言歎二智二絕言歎二智若不措言則無能知者雖復稱揚言不能盡諸佛二智如前說云寄言為二一明諸佛權實二明釋

迦權實諸佛道同是故俱歎上光照他土彌勒橫問文殊引古大眾豎聞正表於此故發於定起即明諸佛道同也就歎諸佛文為三一雙歎二雙釋三雙結就雙歎中先經家提起次正歎爾時者當爾之時也佛常在定何故言起此有所示往古諸佛說此經時必前入無量義即入法華今佛亦爾此示世界悉檀哀從定起履歷法緣二俱審諦說必不謬增長物信此示為人悉檀哀從定起佛寂而常照尚須入定方乃說法況復散心妄有所說此是對治悉檀哀從定起入定緣理安心實相出定令他安心實相此是第一義悉檀哀從定起安此四法故言安詳而起也告舍利弗者小乘中智慧第一將欲因其破小智顯大智廢會開覆凡十種如玄義中說此乃經家提起之文法華論云佛入甚深三昧正念不動如實智觀從三昧而起現如來得自在力故如來入定無能驚忤故論與今義相應第一義悉檀出過世間故無能驚忤四悉檀無障礙故得自在云加趺坐者古往微塵

恒沙諸佛及弟子盡行此法故又加趺起惡覺尚生他敬心況入深境界而不適悅天人耶又非世受用法不與外道共能破魔軍煩惱故又能生三種善提道故私謂此是四悉檀意也問餘經云繫念在前者云何答背色想生死煩惱境界在後故觀寂滅涅槃所緣在前故應作四解云問云何在面答凡人於面起欲能生荷樂然後徧身又九處流穢面有七孔以不淨治欲故繫緣在面一其又六識在面心多上緣表一切賢聖尚空與空相應故繫緣在面二其又若觀於面則能分別六識為分別故故繫緣在面三其又身有六分頭面為勝表諸法中實相第一第一法故繫緣在面四其就雙歎二智先歎實次歎權實者諸佛智慧也非三種化他權實故言諸佛顯自行之實故言智慧此智慧體即一心三智甚深無量者即稱歎之辭也明佛實智豎徹如理之底故言甚深橫窮法界之邊故言無量無量甚深深高橫廣譬如根深則條茂源遠則流長實智既然權智例爾云其智慧門即是

歎權智也蓋是自行道前方便有進趣之力故名為門從門入到道中道中稱實道前謂權也難解難入者歎權之辭也不謀而了無方大用七種方便不能測度十住始解十地為入舉初與後中間難示難悟可知而別舉聲聞緣覺所不能知者執重故別破之耳法身本意元以自行權實擬之無機逃走故言不知華嚴頓照聲啞瞽贖故言不知方等彈斥保住草庵故言不知般若轉教無心怖取一殮之意故言不知今大機啓發放光動地彼此今古諸佛道同由懷疑惑故言不知利根菩薩節節能知鈍同二乘是亦不知也門者尤宅取二乘方便為今經智慧門此須與奪若爾即是得門云何如來破言不知不知者則非門也與者此是最淺之能永不識所云今解自有方便智慧為門得入佛智慧如璣珞云二觀為方便道得入中道第一義諦亦是三教各各有四門為方便得入中道光宅之解於二觀中祇是一觀於十二門祇是一門云又方便智慧為門得入方便智即是

三教各各四門齊教入證也自有佛智為門
得入佛智慧如上說圓因稱方便品即是自
行觀智為門即是今經所歎其智慧兩圓教
四門即其一也自有實為門入方便智雙照
二諦即其義也如此釋者豐富開闢何如光
宅區區一種耶若依論以阿舍為門此須開
拓諸教準觀可知云從所以者何下光宅云
歎釋迦章今推文意是雙釋諸佛二智也佛
曾親近至盡行道法是釋諸佛實智良由外
值佛多稟承至要故實智甚深良由內行純
厚盡行道法故實智無量無量則釋橫廣甚
深則釋豎高也勇猛精進名稱普聞是釋諸
佛權智其智慧門難解難入良由勇猛精進
能入難入之門既入門已澤被無疆物欽勝
德故名稱普聞亦可分句勇猛精進能入法
門即釋權智深名稱普聞即釋權智廣觀權
文無深廣之語例實智此義則成云從成就
甚深下雙結諸佛二智稱理究竟故言成就
到彼岸底故言甚深此結成實智也稱機適
會故言隨宜非七方便所知故言難解此結

成權智也隨情則翳理故言難解了義故意
顯故言易知攝大乘云了義經依文判義不
了義經依義判文即斯義也有時解成就甚
深未曾有法結自行權實隨宜所說意趣難
解結化他權實云從吾從成佛已來者是歎
釋迦權實舊云釋迦權實各各歎謂吾從成
佛下是歎權所以者何是釋權如來知見廣
大下是歎實從無量無礙下是釋實從如來
能種種分別下是結歎實文舊料揀前後有
三意一合歎諸佛二智者明二智體同開歎
釋迦二智者明二智功用有異二明垂迹之
本故諸佛先歎實明顯本之能故釋迦先歎
權三諸佛顯自行先須得實釋迦明化他先
以權引童蒙而互現出沒者將明體圓不可
偏存存則失旨也今謂不爾但依文次第於
義易解不須曲辯又汝云諸佛道同云何異
解如人善讚孝順而打擲父母云就釋迦文
亦為三初雙歎次雙釋後雙結吾從成佛已
來歎實智若實智不圓佛道不成既云成佛
一成一切成即是歎實智也種種因緣下是

歎權智四十餘年以三種化他權實逗會眾
生故言種種因緣也譬喻者小乘中以芭蕉
水沫為譬大乘中以乾城鏡幻等譬依諸論
者以小乘譬乳大乘譬醍醐也廣演者能於
一法出無量義也無數方便者即七種方便
也引導眾生令離諸著者說散十善離三途
著說淨十善離欲界著說三藏離見思著說
菩薩法離涅槃著說佛法離順道法愛著從
所以者何是雙釋二智也如來半句即是釋
實智從真如實相中來而得成佛道故名如
來即釋成實智也方便即是釋權智由於方
便善巧故能種種因緣知見波羅蜜者即是
雙舉權實知見也一切種智名實知佛眼名
實見道種智名權知法眼名權見悉到事理
邊故悉名波羅蜜皆已具足者權實悉究竟
也若不作雙釋之意那忽言皆已皆已者雙
釋意顯也從如來知見廣大深遠即是雙結
釋迦二智也如來知見如前說廣大明橫深
遠明豎如此實智非橫非豎寄言往歎論其
橫豎照無限極如函大蓋大也無量無礙下

即是結權智也自行之權道前方便約諸法門故知是結權智明矣實智無若干也先宅以此釋實智非但先宅不識實智梁代皆不知其無礙慧無若干也云云無量即佛地四等也無礙即佛地四辯也能於一辭一義旋出無量樂說不窮比於別通菩薩如甲上土方地力即十力畏即四無所畏禪盡禪之實相定即首楞嚴定三昧即王三昧深入無際者結成豎深成就一切未曾有法結成橫廣從舍利弗如來能種種分別下舊將結成前權實今用起後將欲絕言更舉權實為絕歎之由文為二初舉絕歎之由次指絕言之境鄭重者表殷勤也如來能善分別巧說諸法者即舉權也言辭柔軟悅可眾心者舉實也何以得知上見他土說頓云其聲清淨出柔軟音下身子領解云聞佛柔軟音深遠甚微妙據前後兩文知是舉實智也前歎中前實後權今何意前權後實明前欲寄言故從實而舒權今欲絕言須卷權歸實耳從取要言之是指實境要者莫過于實也無量無邊未曾

有法是指權境又舉要是創指之端無量無邊是指權未曾有法是指實言此二法佛悉成就修道得故此那可說若單明一事不應言悉既雙指權實其意明矣止者下第二即絕言歎也印師云欲因止生其疑請之心也十六觀師云實法難知故先抑止驚其常情今明此法深寂言語道斷體不可說故止而歎之設慈悲為說聞不能解傷其善根是故止也從所以者何下是釋止歎之意意為兩一就佛是最上人成就修得最上法故不可說次明甚深境界不可思議故不可說就佛成就下明上人權實橫滿不可說從唯佛與佛下明上人權實豎深不可說成就對不成就乃至難解對不難解即是橫明成就修道得故故不可說唯佛與佛乃能究盡者初中分獲未盡其源如十四日月光用未普獨佛與佛究竟邊底如十五日之月體無不圓光無不徧如此豎深修道得故故不可說從諸法實相下即是甚深境界不可思議故不可說光宅云初一句標二智章諸法標權智境三三

非一故言諸法三法之中其教最顯教必逗機仍有其人故知三三是權也實相者是實智境一理非虛故言實相四一之中徧舉一理理是本故故是實也中有九句還釋上兩章耳前五句釋權章如是相者三乘言教攬而可別也如是性者三乘教性分不可移易也如是體者三乘之教八音章句各各有體菩薩教以六度為體云如是力者三乘教用訓導之力也如是作者三乘教被前人有造作也廣實智境略不牒章實境有四一以四廣其一理如是因者境生具解為因萬善望果也如是緣者境發實智為緣以因所望處為果果起酬因為報後二句雙結初句結權本即舉相末即舉作次句結實究竟即結因等即結報也北地師云三乘法皆有相性果報本末也理師云如是相性此釋智慧照用三乘萌異為相必爾成三為性發心為體隨心所堪為力力有所造為作行招果為因因者語其已分所由為緣緣者語其外力遂刻為果酬因為報相為本報為末終同一致

爲究竟等也如是者其事不差也暢師但約佛上作相者十力各有相貌也性者從根各有所習所習不改謂之爲性是性力境也體者根性不同所欲亦異言其心用縛著故以體爲名此欲力境也力者定別名也神通變動非定不運鎮心靜亂非定不寂故力爲禪定境也作者是業即業力境也因者道爲因能至涅槃即至處道力境也緣者緣宿命力境也果者緣今因所召果在未來是天眼力境也報者今報以望往因據即漏盡力境也故語報是漏盡也本者是相末是報總而望之都是處非處力境也上來諸釋非不一途然於理不通於文不允文不允者經云諸法何法不收豈止三乘耶理不通者經云實相何所不在而在因果體若實獨在於佛佛則不權權獨在三乘三乘則亦無實若三乘但爲五則權法不足復全無實若四句但在佛佛全無權實亦不足義不涉於凡夫則諸法之文便是無用實相不偏實相外別更有法如此等過故皆不用也釋論三十一明一

一法各有九種一各有體二各有法如眼耳雖同四大造而眼有見用耳無見功如火以熱爲法而不能潤也三各有力如火以燒爲力水以潤爲力四各有因五各有緣六各有果七各有性八各有限礙九各有開通方便連磨鬱多將此九種會法華中十如各有法者即是法華中如是作各有限礙者即是法華中如是相各有果者即是法華中如是果如是報也各有開通方便者即是法華中如是本末究竟等餘者名向可解今明此境爲二初一句略標權實章如文次十句廣釋權實相今作四番釋一約十法界二約佛法界三約離合四約位經云諸法故用十法界釋也經云佛所成就第一希有之法故用佛法界釋也經云止止不須說我法妙難思故用離合釋也經云唯佛與佛乃能究竟故用位釋也約十法界者謂六道四聖是爲十法也法雖無量數不出十一一界中雖復多派不出十如地獄界當地自具相性本末亦具畜生界相性本末乃至具佛法界相性本末

無有缺減故毗曇毗婆沙第七云地獄道成就他化天法即是其例餘九法界亦如是當知一一界皆有九界十如若照自位九界十如皆名爲權照其自位佛界十如名之爲實一中具無量無量中具一所以名不可思議若照六道三聖五如爲權若照佛界四如爲實當分歷歷此則可說可示何候止止絕言歎也所以一中無量凡夫雖具絕理情迷二乘雖具捨離求脫善薩雖具照則不周名不了如來洞覽橫豎具足唯獨自明了餘人所不見不可宣示止止絕言其在此耳上玄義中已說今不具記云二約佛法界釋者佛法界非相非不相而名如是相指萬善緣因故下文云衆寶莊校即其義也佛界非性非不性而名如是性指智慧了因故下文云有六白牛也佛界非體非不體而名如是體指實相正因故下文云其車高廣也佛界非力非不力而名爲力指善提道心慈善根力等故下文云又於其上張設憶蓋也佛界非作非不作而名如是作指任運無功用道故下文

云其疾如風也佛界非因非不因而名如是
因指四十一位故下文乘是寶乘遊於四方
也佛界非緣非不緣而名如是緣指一切助
善提道故下文又多僕從而侍衛之佛界非
果非不果而名如是果指妙覺朗然圓因所
剋故下文直至道場也佛界非報非不報而
名如是報指大般涅槃故下文得無量無漏
清淨之果報也佛界非本非末而言本末本
即佛相末即佛報是自行權也佛界非等非
不等而言究竟等指於實相故標章云實相
也是自行之實也即實而權故言本末即權
而實故言為等此是如來自行權實最為無
上無上相乃至無上果報橫廣豎深而無有
上故標章云諸法實相也例亦應言諸法實
性實體實力乃至應言實究竟等但略舉一
而蔽諸耳如來徧照橫豎悉周如觀掌果祇
為凡夫如雙盲二乘如眇目善薩夜視朦朧
不曉不可得說止止絕言其意在此耳三約
離合者若佛心中所觀十界十如皆無上相
乃至無上果報唯是一佛法界如海總萬流

若千車共一轍此即自行權實若隨他意則
有九法界十如相性等即是化他權實化他
雖復有實皆束為權自行雖復有權皆束為
實此即自行化他權實隨他則開隨自則合
橫豎周照開合自在雖開無量無量而一雖
合為一一而無量雖無量一而非一非無量
雖非一非無量而一而無量唯佛與佛乃能
究盡凡夫則誹謗不信二乘則迷悶不受善
薩則塵杌未明為此義故止止絕言云四約
位者如是相者一切眾生皆有實相本自有
之乃是如來藏之相貌也如是性即是性德
智慧第一義空也如是體即是中道法性之
理也是為三德通十法界位皆有若研此
三德入於十信位則名如是力如是作入四
十一地名如是因如是緣若至佛地名如是
果如是報初三名本後三名末初後同是三
德故言究竟等初位三德通惡通善通賢通
聖通小通大通始通極雖在惡而不沈雖在
善而不升雖在賢而不下雖在聖而不高雖
在小而不窄雖在大而不寬雖在始而非新

雖在極而非故故是不可思議不可得說止
止絕言耳復次三德究竟等者十界相性權
實開合差別若干以平等大慧如實觀之究
竟皆等若迷此境即有六界相性名為世諦
若解此境即有二乘相性名為真諦達此非
迷非解即有菩薩佛界性相中道第一義諦
若以此慧等於俗諦俗諦非迷等於真諦真
諦非解非解非迷雙非迷解但各平等若雙
照者權即是實實即是權雖二而不二亦名
究竟等也又權實不二之境七種方便不能
以不二智等不二之境唯有諸佛以不二智
等不二境故言究竟等又今大乘機動不明
九界性相直說一切性相悉入佛界性相昔
教不說謂昔不與念等今教說之知昔與今
等故言究竟等初約惑解等次約人等後約
教等說此甚廣記者不能委悉耳若就絕言
絕思明不可思議釋論七十九云不可思議
名不決定出一切心心數法出一切言語道
不能行不能到故名不可思議若就譬喻明
不可思議如釋論十四不以敗壞色得趣平

等道觀色不異乃能等於大乘如明與暗共
合而汝不見謂明暗異欲知其義如彼月光
又日出時暗不向十方暗常在無所歸趣明
亦如是與暗共合生死與道合道即是生死
佛之所盡已盡所度已度皆不可思議諸經
諸論此例甚多若就事中不可思議者如阿
舍經明四不可思議謂眾生世界龍佛眾生
從何處來向何處去為底而生為底而死世
界為有邊無邊為可斷不可斷為天龍人鬼
誰所造耶阿舍云一士夫於王舍城拘締羅
池側思惟世間邊無邊見四兵入藕絲孔自
驚我狂耶世無此狂問佛佛言非狂是修羅
為諸天所逐退入藕絲孔藏此乃世間思惟
非涅槃道無義饒益無法饒益無梵行饒益
云龍雨為從龍口耳眼鼻舌出耶實不從爾
許出但從其念出念善念惡皆能出雨由前
本行今得是力須彌腹有天名大力亦能作
雨又經出五道各一不可思議地獄有斷續
畜生能飛鬼能變少為多人能令火燒新天
能自然致果報皆是果報法事不可思議云

此是約因緣事釋不可思議況甚深境界寧
非不可思議耶偈有二十一行為兩初十七
行半頌長行後三行半略開三顯一動執生
疑前又二初四行頌寄言歎後十三行半頌
絕言歎夫偈頌長行互有廣略者令義易顯
耳長行二佛權實各歎表化緣異故頌中二
佛合歎示二智理同故初寄言中又二初兩
行合頌二佛二智後二行合頌二佛釋歎結
歎等也初又二今初一句世雄者頌上諸佛
智慧也不可量者頌上甚深無量此頌諸佛
實智也次三句頌上諸佛權智此有三異一
上舉人又標法故云諸佛智慧今頌但頌人
將人以美法故云世雄二者上開歎今合歎
以法別故須開以人總故須合三者上云一
切二乘不知今言一切眾生類不知佛力下
後一行頌歎釋迦二智也佛者頌吾從成佛
也正頌實智力無畏等頌諸功德是頌權智
餘法者即指化他之權是實智之餘助耳正
頌上種種因緣云本從下後二行合頌二佛
釋歎結歎之意也本從無數佛具足行諸道

頌上諸佛釋歎佛會親近百千諸佛盡行道
法之文也甚深微妙法頌上結歎實成就甚
深未會有法也難見難可了頌上結歎權意
趣難解也於無量億劫行此諸道已頌上釋
釋迦知見波羅蜜皆已得具足上二句舉因
具足次下一句舉果具足我已悉知見一句
頌上結釋迦二智如來知見廣大之文也或
時用四偈合頌上二佛權實文為六初世雄
一句總頌二佛二智二諸天及世人三句頌
揀人三佛力下一行頌釋迦中釋權實四本
從下一行頌諸佛釋權實五於無量下半行
頌上行因六道場得成下二句頌上得果從
如是大果報去第二有十三行半頌上絕言
也文為五初半行如是大果報即頌不思議
境但舉初後中間略可知義字兼頌究竟等
也大與種種如玄義中說我及十方佛下第
二半行追頌取要言之佛悉成就也不可示
下第三半行追頌上止不須說也實相非方
所故不可示非言語道故言辭相寂滅從諸
餘眾生類下第四頌舉不知之人故上長行

明無有知者故止而不說頌中十行半頌出不知之人文為八初半偈總揀不入者即七方便也除諸下第二二句揀能入者即圓教十信故言信力堅固者也長行明究竟佛知頌中明初信知互舉耳諸佛子下第三有一行半揀二乘不知假使滿下第四有一行舉身子不知正使滿下第五一行半舉諸大弟子辟支佛下第六二行舉支佛新發意下第七二行半舉發心菩薩不入發心語通或可六度菩薩三僧祇未斷惑名為發心或可指上人天中自攝得六度而發心之語別擬通別等發心也不退菩薩下第八有一行揀不退菩薩亦不知也通教不退斷界內惑是故不知別理別教地前亦有證位不退行不退等亦所不知也次又告舍利弗無漏下第五一行半頌上難解法佛能知實相境無漏不思議者頌上結要舉權實所止之境也甚深微妙法一句頌上第一希有難解之法我今已具得三句頌上唯佛與佛乃能究盡也明諸佛道同同皆究竟故云唯我知是相十方

佛亦然釋不思議者如如意珠無毫釐之有能兩眾寶實相不生能生般若也無漏不思議一行半為本生出四種解釋已如上說從無漏半句為十法界釋作本十法界十如收諸凡聖理性無漏失也收三諦無漏失權實智無漏失約不思議為開合釋作本即權而實即實而權故不可思議也約甚深微妙法為佛法界釋作本此可知約唯我知是相為約位釋作本此亦可知云從舍利弗當知諸佛語無異下略開三顯一動執生疑就開顯為二初明諸佛顯實次明釋迦開三互明一邊耳諸佛語無異者此論諸佛化道是同次兩句勸信後兩句正顯實世尊法久後要當說真實即顯真動昔之執生今之疑將非魔作佛正由聞此語也佛既如實語勸信何事翻疑為防因疑起謗者故須勸信耳從告諸聲聞眾下明釋迦開三文為三初一行正明開三將明二乘之非故言速得涅槃者又解我今脫苦縛速得涅槃即擬六度菩薩乘何以知之修六度行即免四趣縛未能入滅度

三僧祇百劫乃得涅槃速之言速乃及耳又六度行前度他故言我今脫苦縛後取無漏故言速得涅槃此義推之知是六度乘也又以數推之下句云佛以方便力示以三乘教若不指此將何為三不應重數二乘為三乘也次半行正斥三乘皆是虛偽次兩句出立三之意是權引離諸苦故非為真實但是方便門耳從爾時大眾下是騰疑致請由聞三偽一真故執動疑生文為二一叙疑二正請決叙疑又二一經家叙二正生疑先叙千二百疑次叙四眾上斥三乘皆是方便叙疑但在二乘者以其執重疑深偏舉若至下陳疑中即云求佛諸菩薩大數有八萬亦皆有疑故知三乘僉疑偏舉二乘耳從各作是念下是正疑又為二一疑佛二智二疑已所得從何故殷勤稱歎方便即是總疑權實二智從而作是言佛所得法甚深者是疑實智有所言說意趣難知下是疑權智以聞諸佛語無異要當說真實從此生疑何者佛昔說三乘智慧同證不差但餘習有盡不盡耳今

忽稱歎如來二智非我所及是故疑佛二智也從佛說一解脫義我等亦得此法下此是自疑所得三乘聖道是真出要我修此理亦到涅槃而今忽言皆是方便未知何者真實故言不知是義所趣此從上斥三為偽而生是疑爾時舍利下第二正請文有三請二止就前為三止瑤師龍師云初止為理深難解初請為自他求決次止為驚疑不信次請為久殖必解後止為必謗墮惡後請為利根得益今師或時云佛豫知三周得益前後不俱故三抑候其三請也就初請為二一長行二偈頌長行為二一陳疑二陳情陳疑疑二智陳請已請眾請頌中有十一行偈文為六初二句頌疑實智自說得下第二三行頌疑權智無漏諸下第三有三行明三乘四眾有疑上句明羅漢後二行明緣覺中間稱及求涅槃者即是明六度菩薩何以得知上云逮得涅槃者此中稱及及者此菩薩自求涅槃又以及他故異二乘知是菩薩也於諸下第四有一行半明身子疑佛口所生下第五有一

行明佛子疑諸天龍下第六二行總明同疑請也夫偈頌長行可以意推如其非頌即是長出於義非急者不能煩文分摩故略耳從爾時佛告下是二止更懸疑為請悉如文云妙法蓮華經文句卷第三下

妙法蓮華經文句卷第三下

校勘記

- 一 底本，明永樂北藏本。
- 一 五六頁上一七行第一二字「今」，南作「令」。
- 一 五六頁上末行「阿舍」，南、經、清作「阿舍」。
- 一 五八頁中一六行「入本迹者」，南、經、清作「八本迹者」。
- 一 五八頁下一五行第九字「二」，南、經、清無。

- 一 五九頁下一一行「今古」，南作「今故」。
- 一 五九頁下一五行第一一字「淺」，清作「深」。
- 一 六二頁中三至四行「火以燒為力」，南作「火以為燒力」。
- 一 六二頁中一〇行第一〇字「向」，南、經、清作「同」。
- 一 六三頁下一四行第八字「念」，南、經作「今」。
- 一 六四頁下一八行第八字「上」，清作「止」。
- 一 六五頁下五行「二乘」，清作「三乘」。
- 一 六六頁上一二行「陳情」，南作「陳請」。

隋天台智者大師說

門人灌頂記

從爾時世尊告舍利弗汝已殷勤三請豈得不說下廣明開三顯一凡七品半文為三一

為上根人法說二為中根人譬說三為下根人宿世因緣說亦各理事行例如大品亦為三根云今以十義料揀一有通有別二有聲聞無聲聞三感有厚薄四根轉不轉五根有悟不悟六領解無領解七得記不得記八悟有淺深九益有權實十待時不待時一明通別者初周別名法說通則具三如優曇華時一現耳即譬說若我遇眾生盡教以佛道即因緣說也中周別名譬說通則亦三我先不言皆為化菩薩故又合譬於一佛乘分別說三即是法說於二萬億佛所常教化汝即因緣說若謂此文屬法說者可取長者聞已驚入火宅方宜救濟即因緣說下周別名宿世因緣通亦具三涅槃時到眾又清淨令入佛慧是法說有一導師是譬說而作三周者從

多從正從略從傍欲令名字不濫各據一意耳問三周為三根人一周通有三說者一說應具三根答法說非止逗上中之上又有中下從正略傍故言逗上根人耳餘二周亦如是二明有聲聞無聲聞者尤宅定有實行聲

聞若言無實行權何所應開善解無實行聲聞引勝鬘三乘初業不愚於法外凡已知一乘寧有二乘猶執小果經明有者權也此二家偏執乘經失義若定有者經那言無聲聞弟子但化諸菩薩若定無者誰入化城亦無三可會權何所引若言實有為權所引者亦應實有三藏佛復為權三藏佛所引若實無此佛但有權佛者何意不許但有權聲聞無實聲聞耶此義不例實有斷界內惑者呼此為實而權者應之何處有斷界內惑佛而有權佛應此佛今明有無不可偏執若從長者實智往觀則無客作人若就窮子根性則便自謂作人法華論有四種聲聞一決定二上慢三退大四應化前二未熟不與授記後二與記若依今經應有五久習小今世道熟聞

小教證果如論是決定聲聞二本善善積劫修道中間疲厭生死退大取小大品稱為別異善根佛且成其小道為說小教齊教斷結取果是退大未久習小來近理應易悟如論是退善提聲聞三以此二故諸佛菩薩內秘外現成就引接令入大道如論是應化聲聞四若見權實兩種能出生死欣樂涅槃修戒定慧微有觀慧未入似位薄有所得謂是證果此名未得謂得未證謂證如論即是增上慢聲聞五者大乘聲聞以佛道聲令一切

聞若從決定退善提兩種即有聲聞若從大乘理無灰斷永住化城終歸寶所實者既爾則無有權故無聲聞若增上慢者既未入位則非實又非應化則非權若得此意有無冷然何須苦諍復次執就大乘聲聞復論有無若權作應化外現小迹內隱大德則謂無大乘聲聞若從自行發迹顯本則言有大乘聲聞今開三顯一正意為決定退大聲聞令成大乘聲聞自行既立即能化應聲聞若得此意則達有無也第三惑有厚薄者理師云三

根得果已後遊觀無生無生之理是一及其出觀緣三教則異將必異之三教惑於無生之一理謂教既三理豈容一又將一理惑於三教理既是一教寧得三踟躕理教之間迴遑得失以理惑教此有得義以教惑理此有失義上根以理惑教情多初聞法說順情即悟下根以教惑理情多聞法說無三逆其計謂故三聞乃解中根處二極之際法說不悟譬說便了今謂此釋三根未必應爾三人踟躕何等理教若迴遑小乘理教則疑惑未盡尚非初果斷結之人若迴遑大乘理教大乘條然永異何曾與小乘相濫而言踟躕耶若以小惑大以大惑小爾前未斥方便那忽遊觀出入預有踟躕既預踟躕即已疑生執動非始今日若先動執生疑聞開三顯一即應領解那忽猶有驚疑進退無據故不用此解今明根有利鈍者皆論大乘根性惑有厚薄者約別惑為言耳即為四句一惑輕根利二惑重根利三惑輕根鈍四惑重根鈍若別惑輕大根利初聞即悟若惑重根利再聞方曉

若惑輕根鈍三聞乃決第四句雖復三聞不能得悟止為結緣眾耳或可初兩句根利同為上根或可中間兩句為中下根云復次約初品無明三重覆初住中道若初法說上根之人三重無明一時俱盡開佛知見入菩薩位得菩提記中根斷二重無明下根斷一重次譬說時中根斷第三重盡開佛知見入菩薩位得授記下根進斷二重次聞因緣說下根斷三重盡開佛知見入菩薩位也例如小乘十六心未滿不得名初果十六心滿名須陀洹也四明轉根不轉根者舊云上根初聞法說即悟而中根轉同上根下根進同中根若譬說時中根前已成上即能得悟下根成上次因緣說時下根已同於上故即得悟若爾轉下成上因緣說時皆悉是上為利則均那得猶稱鈍者待因緣說耶若轉成上即同上悟若其未悟猶受鈍名則無轉根之義例如身子一聞目連再聽同得初果若二皆利則無復優劣若猶稱利鈍轉根義不成夫眾生心神不定遇惡緣轉利為鈍遇善緣轉

鈍為利先世值佛聞法自有轉下中為上俱於法說得悟自有轉下為中聞譬說得解下者不轉三周乃了如此轉根不同舊釋譬三刀斫木利一中二鈍者三下利鈍之名不失木斷之處是同問三根入初住位猶有利鈍不答真修體顯則無差降問若爾初住已上更起緣修有優劣不答此同位人無復勝負真修體融寧得有異耶五明有悟不悟者經中多明菩薩為上根緣覺中根聲聞下根若言菩薩上根應併在法說中得悟緣覺併在譬說中得解聲聞併在於因緣中得悟耶然經中一往判出三根至於悟解義未必然今經但見聲聞得解不見支佛者支佛是中根既值佛出世入聲聞數隨根得悟故不別標緣覺耳故身子請偈云其求緣覺者比丘比丘尼依此文即知緣覺入四眾中攝也又法師品云比丘比丘尼優婆塞優婆夷求聲聞者求支佛者豈無緣覺得解耶舊云菩薩是上根不必皆利從多為上而執心易轉原其域懷求佛但執過三百已即求近果此疑易

悟三根菩薩同在法說得解上者或在略說中者或在廣說之初下者與身子齊今明菩薩語通但使發大心悉是菩薩何必併是利根及身子尚少豈得初周之前已併得悟若爾流通壽量何意有諸菩薩節節得悟無生忍者發善損心者舊云壽量中悟皆是法身增道損生今言不爾有六百八十萬億那由他恒河沙人得無生法忍此人始得此忍當知壽量之前未是法身故知菩薩得悟不可局在初周之初也問菩薩得悟通於始終二乘得悟亦應至後答三周定父子天性已竟則皆名菩薩設在後悟同名菩薩悟也六明有領解無領解者若三乘同悟何意但見聲聞領解其二則無今明無佛出世名獨覺聞佛說十二因緣法名緣覺既入聲聞數中得悟領解皆不別出大意可見身子迦葉等悉是中乘根性故聲聞領解兼得緣覺無勞別出也又四眾中有發緣覺心者其人得悟即不一也信解品云密遣二人追捉將還即是其義菩薩不領解者聲聞之教不明得佛今

經開其歸大之路自恐解謬故對佛述解菩薩不爾故無領解又其意有三一菩薩本意求佛設有異執而執輕終歸取佛無有不得之慮今聞三周之說但是正其觀慧故不須領解二菩薩悟大處處有文二乘作佛始自今教逐要流傳故略菩薩領解胡文或有漢略不書耳三菩薩位行深絕諸新小菩薩不敢領解說壽量竟彌勒總都領解初從無生法忍終訖餘有一生在則是具足領解更求何物云七得記不得記者若同皆領解何故聲聞得記不見緣覺菩薩受記此亦三意一者昔明二乘入正位不能發心何由得記今既悟大欣斯別決故為記劫國也菩薩發心求佛行成自滿故不欣急求佛亦不促授又前教處處授菩薩記此是恒說逐要傳譯如前云二菩薩亦有別記調達龍女豈非記耶又法師品云求聲聞者求辟支佛者求佛道者如是等類咸於佛前聞法華經我皆與授記當得三菩提此豈非皆記耶三二乘昔來未曾得八相記故記其劫國菩薩先已曾記

故不重明耳淺近之記初住已得非菩薩所欣菩薩所欣乃是圓極妙覺遠記耳故壽量品中始從發心訖一生得妙因斯滿極果頓圓此乃授法身記初何謂無記耶問若小悟大應同授法身記那得授八相記耶答八相是應記既得應記知必有本欲使物知聞共結來緣故與應記耳又此二乘若聞壽量即同損生得法身記也八明悟有淺深者一往同破無明入證初住細尋必應明晦初聞法說尚入佛慧更聞譬說豈不重明又聞因緣理自增進更聞壽量彌復深如聽法人重聞勝前單復厚薄方之可知也九明權實得益不同者一云實行得益權行正為接引影響不論其益今明不爾若至壽量權實悉得益增道彌高損生彌盡隣圓際極唯一生在豈非權者益耶所以初為影響共熟實行後說極果則自道明文云出入息利乃徧他國息利在他即是已利實行得益由於權引化功歸已權亦得益故一音演說法眾隨類各得解何必須待壽量耶云又我自欲得此

真淨大法即是自益也十明待時不待時爾前不悟必待法華悟者名為待時法華前教已解者名不待時何故爾佛有顯密二說若顯說為論法華之前二乘未悟大道要須五味調熟會在法華故云說時未至故今正是其時決定說大乘此即待時也若密教為論未必具待五味在法華方會爾前密有入者故名不待時此乃大判時不時若就三周亦是待時不待時迹本二門亦是待時不待時致有前後悟入即此意也問有一種根性非密非顯二時不攝者應是失時永不得悟耶答餘經或謂此為失時今經不爾此人雖於密顯兩時不悟雖生滅度之想而於彼土得聞是經故無失時乃是待彼土之時耳問五千起去應是失時答此等應以如來滅度後弘經人受益也問身子初周為四眾三根請譬周為中下請云何言佛各為三根人三周說法耶答此語不便請則普請說亦普說但上根智利聞法得悟中根處中聞譬得悟下根居下聞三得悟汝當隨義云何隨語云問

宿世是過去事法譬是當現事不答經無文義推應爾引三歸一三望一一則是當舉事為譬譬即是現準後望前應如所問問舊以五濁障大四句料揀如前說有人斷見與無明合共為障指法華論云無煩惱人有滌慢不知一乘法身常住者是也若博地不執涅槃而不聞法者即是無明獨為障若爾為當三周聞法已破無明為當未聞法破無明若聞法已破則無明非是障若未聞法而能破無明者都虛無有障是義云何答是他人立義今為其通譬如燈生闇滅不可定其前後雖不前後闇定是障云問勝鬘云三乘初業不愚於法自知當覺優婆塞戒經第十四云二乘自知得善提且取小乘果又十三云知之者易行之者難雖知一乘而取羅漢彼兩經皆言知今經云何三根之後猶自不知初疑後悟此義云何答此經亦云知文云若實得羅漢不信此法無有是處除佛滅後現前無佛此人雖生滅度之想若遇餘佛便得決了凡有三意前明知次明不知後會歸知非

永不知又身子云今於佛前皆隨疑惑我今不知是義所趣又大通佛時聲聞多生疑惑彼見佛聞法尚疑不知況不見聞那忽得知若執二文更相矛盾祇增諍競於道何益論者止可論餘事聲聞成聖能知不能知唯佛境界非爾所語今試融之三乘初業初業為二若久遠為初業曾聞於大則不愚於法若取中忘今日學小始修念處為初業者是則不知其義如此若得此悲權為初業者是則知實是初業則不能知有人言利者能知鈍者不能知此應四句權為利鈍示俱不能知權為利鈍示俱能知權為利鈍則能知不聞不知權為利鈍俱示非知非不知今不取此判但取權者內心了了久知實行者未得入大是故不知於義自顯云問緣覺出無佛世云何三周得有緣覺答釋論云緣覺獨覺獨覺出無佛世緣覺願生佛世華嚴云菩薩下兜率放光照之覺即捨身不覺徙之大經云慧星中論云支佛出世佛法已滅此是獨覺人也願生佛世者先得初果十四生未滿

值佛即成羅漢不值佛即成獨覺其既值佛亦不捨壽亦不被移願見佛故二果三果例然又有部行緣覺在無佛世師徒訓化也此應有二種佛去世後無文字衆生根鈍故支佛不說法此非部行也部行者能說法也又有變化緣覺宜應見者現緣覺身今三周之座有緣覺者其義可解。初周法說文爲五一從殷勤三請豈得不說下訖卷正是法說二從第二卷初訖偈頌是身子領解三從吾今於天人下訖佛所護念是佛述成四從汝

於來世訖宜應自欣慶是與授記五從四衆訖盡回向佛道是四衆歡喜初有長行偈頌長行爲三一許二受旨三正說許文爲三一順許二誠許三揀許汝已三請是順許汝今諦聽是誠許諦聽是聞慧善思是思慧念之是修慧大經明四善法爲大涅槃因一善知識如來也餘者可解說是語時是揀衆許五千在座故如來三止今將許說威神遣去故名揀衆五濁障多名罪重執小翳大名根深未得謂得名上慢未得三果未證無學有如

此失者謂彰執慢三種之失也而不制止者上聞開三顯一言略義隱猶未生誘足作繫珠因緣去則有益若聞廣開三顯一事情起誘佳則有損是故不制止也此衆無復枝葉者枝葉細未不任器用此等執方便之方便

於大非器大品云攀附枝葉棄於根本是人爲不點即是此義也退亦佳矣者既以小自翳復妨他大光今退無謗法之愆復無障他之過故云佳矣上枝葉未去如來三止真實願聞故身子四請師弟鑒機非徒鞫固也問

佛大慈悲何不神力使其住而不聞如華嚴中龔啞何不增狀毒鼓如喜根勝意答各有所以華嚴未席始開於漸未破小執故在座而隔今諸佛法久後要當說真實正欲滅化破庵宜須揀遣若去住俱謗宜如喜根強說

今去則有益那忽令住住則有損那忽不遣喜根以慈故強說如來以悲故發遣問五千在座即不蒙益去有何益答此非當機是結緣人耳已如上說昔大通佛時亦有無量衆生心生疑惑世世與師俱生今皆得度此人

亦爾說大經時萬五千億人於是經中不生信心是人於未來亦當得信例此益在不久金光明中時閻浮提有二種人亦是斯例意汝今善聽即結許也受旨如文從如是妙法下是正廣說文爲二一明四佛章廣上諸佛

權實二明釋迦章廣上釋迦權實上句逗少是文略總云諸佛是人略但開三顯一是義略此中章句多是文廣明五佛是人廣明六者是義廣六者一歎法希有二說無虛妄三開方便四示真實五舉五濁釋權六揀偽敦實歎法今生尊重說無虛謬止其誹謗開方便使莫執小示真實使其悟大舉五濁示必施三揀偽要必真實於五章中一一應備六義而前後互出不具足者蓋如來巧說使略而無闕詣而不煩文耳又六義前後亦復無在云四佛章爲兩初總明諸佛次列三世總章應具六今但四一歎法二無虛妄三開方便四示真實闕二義者指後文也歎法中法譬雙歎時乃說之者諸佛同出五濁必前開三如今世尊四十餘年始顯真實久久稀跡

故言時乃說之久不說者為人不堪故時未至故五千未遭故今人已堪時已至五千已去決定說大乘故言時乃說之優曇華者此言靈瑞三千年一現現則金輪王出表三乘調熟已後方說妙法授法王記又隔跨酪生酥熟酥三味已後乃說醍醐云觀心觀心即中名為瑞此觀通一切法至實相名為靈云汝等當信者勸信無虛妄法也此理至深理與昔異此言至妙言與昔反此行至普行與昔乖此人至勝勝於昔劣還指客作四種之麤而今皆妙恐物生謗故勸信也信無虛妄人說無虛妄法也從隨宜所說下是開方便也文為三謂開釋結初明佛道隨三種機宜說方便故言隨宜而佛意在實物莫能解故言意趣難解也所以者何釋也舉今佛之權能釋諸佛之方便巧慧同故借此釋彼如我以無數方便者諸佛開權亦如我也法非思量者此有兩義或作結開權或正作顯實結開權者佛意難知唯佛與佛能了稟教者謂三諸佛知一耳作顯實者即屬後文文為

五一標勝人法二標出世意三重示四正釋五結成標人法者舉無分別法唯是佛所知佛以無分別智解知無分別法即是顯實法也所以者何下二標出世意者為兩初總次分字總者諸佛覺如實之相乘此實道出應於世祇今眾生得此實相唯為此事出現於世曾無他事除諸法實相餘皆名魔事分字釋者一則一實相也非五非三非七非九故言一也其性廣博博五三七九故名大諸佛出世之儀式故名為事眾生有此機感佛故名為因佛乘機而應故名為緣是為出世之本意而今開三者為一弄引耳如人欲取先當與之雖說種種通其實為一乘即此義也舍利弗云何下三重標者將欲分別更重提起為解釋之端又此大事佛所尊重如釋論中明父王欲多聞太子名數數說之無有馱足云諸佛世尊下第四正釋者先出諸解舊云四一謂果一人一教一因一果一者初兩句據說者後兩句據受者就說者一往於前因門略說果理先開佛知見卒終於後果

門廣顯果理示佛知見約受者先因門略開始得悟解後果門廣得深入理趣今不用此解何者經明四句皆云為令眾生語意悉主前機得益非關化主應作所化人開悟那即分兩句作能化者開示耶又正是因門說法開三顯一之時那得分出兩句為果門中說耶果門因緣未會那得預說若爾六瑞初興佛未起定應是略說五千未去應是廣說二處既其不然果門安得如此下方未出身未集那得以因門二句為果門耶次光宅云初一句是開除開出昔方便說三令除五濁開出大乘覺悟知見道理先雖為人開說此理不說所以更示況此理今生聞慧雖聞未悟所以更廣分別開悟思慧既信悟得意即令發心學佛知見今得修慧入佛知見道理今亦不用何者汝同舊命章云是果一四句皆應作果義云何用三慧消文因果者有前後相違又三慧多種此經正破二乘決定不用三藏中三慧菩薩方便與二乘同者蓋是通意又不可用若作別三慧是菩薩法都非

佛法若作圓三慧圓三慧未開佛知見消經不可若作餘三慧去經逾遠若作圓三慧果一義不成都不可用云次地論師云第五恒沙得八分解即三十心位為開從初地至六地見思盡解轉分明如示七地至八地空有並觀無礙如悟十地為入引經十地名為眼見今亦不用何者此經明開佛知見佛以一切種智知佛以佛眼見開此智眼乃名佛知見云何取第五恒沙生八分解猶未入地稱之為開如此論開非開佛眼如此之知非一切種智知不與經會故不用云有人解初句是理後三句是略解謂八苦五濁障當果是閉今教除五濁佛果知見顯故名開穢累除而理顯名清淨後三句是聞思修難此同前有人言三乘別教為開三乘通教為示抑揚為悟法華為入又人解三乘通為開抑揚為示無量義為悟法華為入此二解摩三句向他經裂一句置法華譬裂穿鑿傷害誣調其過大矣有人言三十心是開初地至六地為示七地至九地為悟十地為入此人傍通挾

別作如此語未見法華奇異何俟稱歎耶有人引華嚴經珞仁王攝大乘十七地論五凡夫等皆有五十二位地前有四十心何不用之此人謬引華嚴華嚴不明十信縱使諸部明地前四十心位者皆非斷道何因用此解開佛知見皆漫語耳有人引釋論四智總別一時而得不應用此解開示悟入開示悟入似有淺深又四智位高開示通淺深此應非例此人但見釋論四智之一時不見開示之一時有人言非空非有是開能空能有是示空有不二是悟了空有不二而是入此人約二諦作解尚不能拔出二乘寧是法華一意有人言達三諦理為開三諦分明為示不見三諦一異為悟任運順流為入也此人約遷迤三諦作義尚不出菩薩法寧是佛法有人解佛知見者一切智總相為知一切種智別相為見此亦不然釋論明一切智是聲聞智道種智是菩薩智一切種智是佛智此是歷別一切種智非三智在一心中何以二乘之知別佛之見釋圓佛知見耶有人解盡智

煩惱清淨名知無生智因累累畢竟無生名見此人取通家佛名教解究竟佛都不相應如上諸師漫取諸經中語都不見法華大意法華論云一無上義除一切智更無餘事如經開佛知見為今眾生得清淨故出現於世二同義聲聞辟支佛佛法身平等故如經欲示眾生佛知見故出現於世佛法身更無差別故三不知義謂二乘人不知究竟唯一佛乘故如經欲悟佛知見出現於世四為今證不退轉地現與無量智業故如經欲令眾生入佛知見故論言次第初開佛知見為無上次示三乘同有佛性法身雖明佛智無上但恐佛獨有故第二明三乘同有雖三乘同有而二乘不悟示其令知雖知而不得不退故第四令得不退又一番約菩薩開如前示者諸菩薩有疑者今知如實修行故悟者未發菩提心令發心故入者已發菩提心令入法故第三番約凡夫開如前示者示其有法身佛性故悟者令外道眾生覺悟故入者令入大菩提故今師作四解不乖論論句

句釋今一句作四釋論明證不退轉地今作四位釋論知如來能證實今作四智釋論明同義今作觀心釋論明不知究竟處今作四門釋云今釋顯實無量法皆一也如玄義中十妙則是十種一也若和舊解且作四一若無量一者一色一香無非中道此義可知若作十一者帖文整足雖不次第十義無減所以者何我以無數方便種種因緣演說諸法此自是開權之文耳從是法非思量分別之所能解顯理一唯有諸佛乃能知之顯智一唯以一大事者小須分別一則是理大則是智事則是行理發智智導行逐此義便是顯行一知見者智知於理眼見諦法諦法無為則無分別以無為故而有差別約此知見論開示悟入以略擬廣則有四十位是顯位一又取結四句文明一一即法身大即般若事即解脫是秘密藏即顯三法一出現於世顯感應一但教化菩薩顯眷屬一諸有所作顯神通一唯以佛之知見示悟眾生顯利益一但以一佛乘故為眾生說法顯說法一經文

印義信如符契若略和舊作四一者數同義異舊云果一今言理一依義依文依義者若無理一眾事顛倒悉是魔說非復佛經故須理一依文者文稱佛知見今取所知見所見即諦所知即境境諦即實相之理故名理一舊云因一今云行一因語單義別行一語通收得因果故言行一人一教一與彼同今且從略說以四一消文先釋理一復為四意一約四位二約四智三約四門四約觀心一約四位者諦境不可知見約於智眼乃能知見二智四眼不能知見唯一切種智佛眼則能知見經云為令眾生開佛知見不論佛果自知自見若偏語佛果即失眾生若語眾生則無佛知見故不可偏取三教行人雖是眾生未有佛眼佛智故不能知見實相圓教四位亦是眾生又分得佛眼佛智則眾生義成知見義亦成故寄此四位以釋理一如瑞相中天兩四華表萬善同歸得入四位乘四位華以趣佛果故約位顯理也開者即是十住初破無明開如來藏見實相理何者性德之理

而為通別兩感之所染著難可了知初心能圓信圓受圓伏而未能斷不名為開內加觀行外藉法兩助破通別惑藏顯出真修性知見朗然開發如日出開滅眼目有用故名為開緣修破惑故名使得清淨仁王云入理般若名為住住於十住小白華位也示者惑障既除知見體顯體備萬德法界眾德顯示分明故名為示即是十行大白位也悟者障除體顯法界行明事理融通更無二趣攝大乘師云如理智如量智今理量不二故名為悟即十迴向小亦位也入者事理既融自在無礙自在流注任運從阿到荼入薩婆若海如攝大乘師云如理如量通達自在如量知見能持衆德如理知見能遮諸惑即是十地大亦位也然圓道妙位一位之中即具四十一地功德祇開即具示悟入等更非異心但如理知見無有分別淺深之相欲顯如量知見故分別四位耳發心畢竟二不別如是二心前心難既云難易即知初心與畢竟心應有明晦淺深之別猶如月體初後俱圓而有朔

望之殊四位知見皆明照實相而說開入之
異耳^二約四智者今欲以圓教四智對於
四位不如般若中通教釋也一道慧見道實
性實性中得開佛知見也二道種慧知十法
界諸道種別解感之相一皆示佛知見也
三一切智知一切法一相寂滅寂滅即悟佛
知見也四一切種智知一切法一相寂滅相
種種行類相貌皆識即入佛知見也又道慧
如理名開道種慧如量名示一切智理量不
二稱悟一切種智理量雙照為入此亦約實
理無淺深中而淺深分別也三約圓教四門
橫釋四句者空門一空一切空即開佛知見
有門一有一切有即示佛知見也亦空亦有
門一切亦空亦有即悟佛知見也非空非有
門一切非空非有即入佛知見能通則四所
通則一開示悟入是能通之門所知所見是
所通之理也四約觀心釋者觀於心性三諦
之理不可思議此觀明淨名為開雖不可思
議而能分別空假中心宛然無濫名為示空
假中心即三而一即一而三名為悟空假中

心非空假中而齊照空假中名為入是為一
心三觀而分開示悟入之殊也所以四種釋
者見理由位位立由智智發由門門通由觀
觀故則門通門通故智成智成故位立位立
故見理見理故名為理一也從舍利弗是為
諸佛以一大事下即是結成理一義也昔方
便教亦得義論開示悟入而非佛知見故是
權今明佛知見故是實實即理一也從告舍
利弗如來但教化菩薩是明人一就昔方便
謂教化三乘理實而言但化菩薩如彼窮子
自謂客作賤人長者所觀實為己子即是人
一也從諸有所作常為一事光宅稱教一今
言行一諸三乘衆行名之為諸為圓故諸即
是一事此行何所至到唯趣佛之知見即是
行一意也亦可持此為教一若就教主為言
諸有所作唯以教化為事此教一為便若就
行人為語所作之事事作即是行今取此便
呼為行一也然四句皆二義至如理一中若
取能知見即位一為便所知見理一為便人
一句中若取教化教一為便若取菩薩人一

為便教一句中若取以一佛乘而為衆生說
法此教一為便若取乘運之義行一為便四
句通然逐便釋耳從但以一佛乘者光宅為
因一今言教一圓頓之教名一佛乘故序品
云說大乘經即是教義也自別教已去皆名
有餘之說即不了義非佛一乘光宅云無緣
覺聲聞之二無偏行菩薩之三又有人云無
菩薩緣覺為無二無聲聞為無三若作此解
祇是無三藏諸乘存於通乘何關一佛乘耶
有人言無緣覺為無二無聲聞為無三存於
菩薩大乘若爾祇無三藏中二乘不無三藏
中菩薩此存有餘何關佛乘何處經論以聲
聞為第三既無此次第都是妄說若依汝解
無二是無緣覺無三是無菩薩第一是聲聞
應不被無若如此者則大倒亂今言但以一
佛乘者純說佛法之圓教乘也無餘乘者無
別教帶方便有餘之說無二者無般若中之
帶二無三者無方等中所對之三也如此二
三皆無況三藏中三耶從舍利弗一切十方
諸佛法亦如是即是第五總結三世佛章各

明教一行一後總論人一理一在文可見若當章自作四一者亦得而不及總文顯也善薩瓔珞經第十三明九世佛過去三世佛現未亦爾未來三世佛者古佛慈悲入未來作種種形度衆生者是未來現在佛者當受未來記者是未來未來佛者當佛轉次受記者是過去準此可知云現在現在佛者當化主者是現在未來佛次補者是現在過去佛古佛垂迹者是從過去諸佛章此中應具六義但出二種一開方便二顯真實兩則指上兩則指下以無量無數方便者明開權也是法皆爲一佛乘故明顯實也例上一佛乘即是教一從諸佛聞法是雖聞於法法被衆生兼得人一究竟皆得一切種智種智所知即是理一能知即是行一雖不次第四一兼足也從未來佛章亦有二義指上指下兼即具六云從現在佛門正是化主初標佛出之意如諸佛章中唯以大事因緣出現於世此亦如是唯爲饒益安樂衆生而出於世也次開權次顯實又具四一也

妙法蓮華經文句卷第四上

妙法蓮華經文句卷第四上
校勘記

- 一 底本，明永樂北藏本。
- 一 七〇頁上八行第一六字「周」，清作「用」。
- 一 七〇頁下九行第一〇字「悲」，南、徑、清作「意」。
- 一 七一頁中一行第五字「彰」，南、清作「障」。
- 一 七一頁中五行第五字「未」，南、清作「末」。
- 一 七三頁上一行第一一字「未」，南、徑作「來」。
- 一 七三頁下一六行第一〇字「今」，南、清作「令」。
- 一 七四頁下一六行末字「如」，南作「知」。
- 一 七六頁上一一行「無數」，南作「無故」。

妙法蓮華經文句卷第四下 寔八

隋天台智者大師說

門人灌頂記

第二廣釋迦章於六義中無數法希有初開權次顯實三舉五濁釋方便四揀偽敦信一

實五無虛妄我今亦如是我即釋迦現在先三後一如四佛不異故言亦復如是知諸眾生有種種欲者即是五乘根性欲也過去名根現在名欲未來名性深心所著者即是根也方便者即是隨宜開三乘權法也如此皆

為得一佛乘者即是顯實也佛乘是教一切是行一種智所知是理一從十方尚無二乘何況有三者是第三舉五濁釋開權也將舉五濁先標其意上已說諸佛開權顯實未明隱實施權其法清淨湛一如空尚無帶二帶三之權況有單三單五之權祇為五濁障重實不得宣須施單五單三之權亦施帶二帶三之權故言於一佛乘分別說三分別說於若帶二帶三之三若單五單三之三也五濁者自有四別初唱數二列各三體相四釋

結唱數列名如文如是者明體相也劫濁無別體劫是長時劫那是短時但約四濁立此假名文云劫濁亂時即此義也眾生濁亦無別體攬見慢果報上立此假名文云眾生垢重即此義也煩惱濁指五鈍使為體見濁指

五利使為體命濁指連持色心為體云相者四濁增劇聚在此時瞋恚增劇刀兵起貪欲增劇飢餓起愚癡增劇疾疫起三灾起故煩惱倍隆諸見轉熾羸弊色心惡名穢稱摧年減壽眾濁交湊如水奔昏風波鼓勢魚龍攬

撓無一倖賴時使之然如劫初光音天墮地地使有欲如初利天入羸澀園圍生鬪心是名劫濁相煩惱濁者貪海納流未曾飽足曠地吸毒撓諸世間癡闇頑嚚過於漆墨慢高下視陵忽無度疑網無信不可告實是為煩惱濁相見濁者無人謂有人有道謂無道十

六知見六十二等猶如羅網又似稠林纏縛屈曲不能得出是見濁相眾生濁者攬於色心立一主宰譬如鷓鴣無物不著流宕六道處處受生如貧如短名長名富是為眾生濁

相命濁者朝生暮殞晝出夕沒波轉煙迴瞬息不住是命濁相濁相眾多不能具說次第者煩惱見為根本從此二濁成於眾生從眾生有連持命此四經時謂為劫濁也料揀者問五濁若障大華嚴中未除濁而聞法者何

也答此應四句分別一大乘根利障重以根利故重障不能障此土華嚴初聞大乘者是也二根利障輕三根鈍障輕他方淨土聞大乘者是也四根鈍障重如此土身子流輩除濁方聞大乘者是也問五濁障小不答此就

小乘應四句分別小乘根利障輕障不能障身子是也根利障重障亦不能障夾搥是也根鈍障輕亦不為障繫持是也根鈍障重此則成障不聞小乘不得度者是問自有不在華嚴不在三藏而得聞大聞小乘者何也答

此就四教教中作四門分別根利障輕者聞非空非有門入也根利障重者聞亦空亦有門入也根鈍障輕者聞空門入也根鈍障重者聞有門入也兩教四門約小乘分別兩教四門約大乘分別細推可解云問五濁一

往何故障大而不障小答衆生濁重妄計五陰爲四德若聞常我即執非爲是舊醫頑駭不知乳之好惡不知病起根源不知藥餌開遮無所知曉故濁障大也文云我若讚佛衆生沒在苦即此義也若聞無常苦空即歇生死欣涅槃破其邪計執故五濁不障小文云作是思惟時十方佛皆現梵音慰諭我即此義也約五濁論四悉檀者劫命是世界衆生見是爲人煩惱是對治用三悉檀除其五濁後爲說大第一義悉檀也若論因果則二因三果一人四法四法一時二報障二煩惱障業在其間衆生是因成假命是相續假相待假可知衆生是受假四是法假名假通兩處煩惱見在凡夫餘二通凡聖命短劫長餘三通長短劫但是時命帶法論時劫通內外命但在內三小害人不害物三大害物不害人小劫但在人大劫通色界命通五道三界劫是共濁四各各濁小劫是劫濁大劫通濁不濁從八萬至十歲爲小劫八十反爲大劫也問既言五濁何者是五清答準例邪正三

毒邪是五濁正是五清他方淨土無邪三毒則五濁障輕此義可知云從若我弟子自謂下是第四揀偽教真若佛弟子自能信解若不信解非真弟子亦非羅漢教逼時衆今信受解就文爲二初揀真偽二開除釋疑揀又爲二初若不聞不知非真弟子次聞不信受成增上慢如世弟子隨順師法繼嗣傳燈若不聞不知則無法可順何謂弟子如來昔說五濁開三汝隨順得涅槃得聞得名爲弟子今五濁既除爲汝說一何意不聞不知不聞者即不聞教一不知者即不知行一非真即非理一非弟子即非人一也次又舍利下第二明不信成增上慢者此教其使信何者汝自謂是後身身尚無量實非後身汝自謂究竟猶餘二百由旬實非究竟未得謂得豈非增上慢耶真羅漢者濁除根利知非究竟信真是法未是後身不起上慢知非究竟信於究竟即信理一無增上慢即成行一信則信教是爲教一是佛弟子則人一也除佛滅下第二開除釋疑者先開除佛滅後不成

增上慢次所以者何佛滅下明好人難得深經難解亦不成上慢若佛在世正說此經不信不受非真羅漢成增上慢若佛滅後方得羅漢者偏執權經不信圓法聽許非增上慢又佛雖入滅此經尚在不信不受應是上慢耶即得開除佛滅後雖有此經解其文義者此人難遇致令羅漢不信不解亦聽許非增上慢次釋疑若佛滅後解經人難遇得羅漢者即未入涅槃耶即釋云是人雖生滅度之想捨命已後使生界外有餘之國值遇餘佛得聞此經即使決了釋論第九十三釋畢定品云羅漢受先世身身必應滅住在何處而具足佛道答羅漢三界漏因緣盡更不復生三界出三界外有淨佛土無煩惱名於是國土佛所聞法華經具足佛道即引法華云有羅漢若不聞法華自謂得滅度我於餘國爲說是事汝皆作佛論既引經爲證今釋經運將論解南嶽師云餘佛者四依也羅漢過之聞經決了又羅漢修念佛定見十方佛爲說此經便得決了又凡夫行人苦到懺悔見

十方佛為說亦得決了瑤師云實羅漢必自知法華志求於大利根則自知中下根須聞而知故言聞知何容於佛滅後不聞法華或聞而不信遇餘佛方解耶末法凡夫猶尚能信況聖人乎除佛滅後者指凡夫也有人言

凡夫未證法相所見不明執心不固所以易信羅漢證法相所見分明執心牢固忽聞異說未便信受故云不信其義必然故身子云將非魔作佛惱亂我心耶若從此義指羅漢不指凡夫云此直異解不用此義也舍利弗

下第五明無虛妄者止物謗心此為三初勸信釋迦實說故云汝等當一心信解受持佛語次勸信諸佛故云諸佛言無虛妄諸佛道同彌加信受後結成不虛故云無有餘乘唯一佛乘也第二偈頌有一百二十一行為二初有四行一句頌上許答後有一百十六行三句頌上正答上許答有三謂順誠揀今不頌順但頌揀誠揀眾為兩初三行半頌上五千退次二句頌上眾已清淨次一句頌誠聽上慢我慢不信四眾通有但出家二眾多

修道得禪謂聖果偏起上慢在俗於高多起我慢女人智淺多生邪僻不自見其過者三失覆心藏玳揚德不能自省是無慚人也若自見過是有羞僧也於戒有缺漏者律儀有失名缺定共道共有失名漏無道定等故

內起惡覺如玉含瑕無律儀故外動身口如玉露瑕覆罪自得故名護惜小智者不得學無學智而有世間小智妄謂有漏以為無漏小中之小故言小智也糟糠者無無漏禪定潤故如糟無理慧故如糠是五千等有世間

禪如糟有文字解如糠封文失詮如糠無米又糟糠譬其無大機枝葉譬其非好器悉不任用故須遣之舍利弗善聽者即訟上誠許誠令善聽也從諸佛所得法下有一百十六行三句頌上正答也又為二初從諸佛所得法下有七十三行一句頌四佛章門從今我亦如是下有四十三行半頌上釋迦章門就初又為四初諸佛所得下三十四行三句頌上諸佛門從過去無數劫下第二有二十七行半頌過去佛門從未來諸世尊下第三有

六行半頌未來佛門從天人所供養下第四有四行半頌現在佛門今就初頌諸佛門中與長行凡有三異一彼此互無二前後間出三開合不同上有歎法希有而無五濁頌有五濁而無歎法上先歎法次明不虛開權顯

實今先開權顯實後明不虛上勸信與不虛合說今分勸信隔於不虛也私謂上以釋迦方便釋成諸佛之權偈中以釋迦之實釋成諸佛顯一是四異也此初頌文為五初從諸佛所得法下五行三句頌諸佛施權二從我

設是方便下十三行頌諸佛顯實三從若人信歸佛下四行半頌諸佛章勸信四從若我遇眾生下九行半長頌五濁五我有方便下兩行頌上不虛今初釋開權文為二初四行一句頌正施權次一行半頌結施權意今初諸佛所得法者修道得於諸權法也無量方便力下頌上無數方便種種因緣演說諸法也眾生心念者頌上隨宜說法也頌中廣出隨宜之相即是照九法界機說七方便總言九七不可定判故言若干隨欲之宜應用世

界悉檀隨性之宜應用為人悉檀隨惡業宜應用對治悉檀現起希望名念法門不同名種種過去所習名性現在欣樂名欲或可習欲成性成性生習欲云善惡業者七方便傳傳為善惡云佛以權智照諸方便性欲然後以諸因緣譬喻隨其所宜說九部經十二部如玄義中說鈍根樂小法者一行半結施權之意前世根鈍今世無機不堪聞大故言不行深妙道前世貪著障重今世眾苦所惱唯可聞小故言為是說涅槃也從我說是方便下第二十三行頌諸佛顯實文為四初三行頌理一令得入佛慧頌上一大事因緣也決定說大乘總頌開示悟佛知見也入大乘為本頌上入佛知見也從佛子心淨下第二四行半頌上諸佛如來但教化菩薩以明人一行上直云教化菩薩頌中廣出諸方便人皆成實人有佛子心淨即別教之人為此佛子說大乘經得記心喜即成圓教真實之人聲聞若菩薩者聲聞兼得緣覺若菩薩兼得六度通教等諸菩薩皆成佛無疑者是七種方

便無非佛子即是頌人一也從十方佛土中下第三一行三句頌上如來但以一佛乘為眾生說法無有餘乘若二若三若十方佛唯說一法即是教一假名引導即方便教也牒假名三教顯佛慧一教其文分明無有餘乘者無別教中圓入別之餘也無二者無通教中半滿相對之二也無三者無三藏中之三如此等二三皆是假名字引導諸眾生今但一佛圓教乘也從諸佛出於世唯此一事實下第四有三行三句頌上諸有所作常為一事行一文也事即是行終不以小乘濟度於眾生即是頌上常為一大事之意也佛自住大乘以此度眾生頌上唯以佛之知見示悟眾生後一行釋不以小度之意從若人信歸佛下第三四行半頌上勸信上云汝等當信佛之所說頌中有二初有二行半舉果勸信二舍利弗下二行舉因勸信舉果中初一行半舉內心若人信歸佛如來不欺誑者明佛心清淨無明慳垢眾惡已斷淨心中說故是可信我以相嚴身下一行明外色身相炳著

光色端嚴內無間惑外有光明則口無欺誑為眾所尊說大乘印則可信受我本立誓願下二行是舉因勸信此亦為二初我本立誓願下一行舉昔誓二如我昔下一行明願滿我昔誓願非但自誓善提亦誓眾生同入佛慧今酬誓故說是亦可信今善提既滿眾生亦入汝既自證佛慧亦驗我誓不虛結成舉因勸信也問本誓既善今眾生尚多願云何滿答佛三世益物人明現在論願滿也若我遇眾生下第四九行半舉五濁上明五濁在釋迦章後今頌文在總佛門末釋迦門中又見重出此明諸佛同出五濁皆先三後一也此文為四初一行總明五濁障大次六行別明五濁障三三一行明為五濁故方便說小四一行半明為大說小小治五濁大願得與若我遇眾生者中阿含十二云劫初光音天下生世間無男女尊卑早眾共坐世故言眾生此據最初也若攬眾陰而有假名眾生此據一期受報也若言處處受生故名眾生者此據業力五道流轉也正法念云十種眾生謂長

短方圓三角青黃赤白紫云何衆生生死長
在地獄時身受不可思議苦心念無量無邊
惡在畜生時身迭相吞噉心迭相逼惱在於
鬼時身若燒山心如佛鑊邪見熾盛觝突癡
兇在人時身口意常作不饒益事以自勞苦
身口意常念不饒益事以自牽纏在天時耽
染六塵縱逸嬉戲不聞正法杜塞福源是名
衆生生死長云何衆生生死短在地獄時能
一念寂靜心取戒在畜生時能一念靜心依
三寶在餓鬼時能一念靜心靜諸根在人時
能修六度養父母敬三寶以善嚴身口意在
天時捨天樂持戒樂禪教化讀誦梵行少語
是爲衆生生死短云何衆生方生死如鬱單
越於一切物無我所捨身必上天從天上又
上天唯向升善處是名生死方楞云何衆生
圓生死唯在三途四趣中團轉圓轉如旋火
煙迴是也云何三角生死謂善業不善業無
記等是也云何衆生青生死恒入閻地獄常
怖怕是也云何衆生黃生死餓鬼飢羸萎黃
是也云何衆生赤生死畜生迭相食噉流血

赫然是也云何衆生白生死謂人中天中白
業善道如諸天臨死時餘天語言汝生人道
去若人臨死知識語言汝向天中去當知兩
處是白生死又第五云心畫地獄黑色鬼鴿
色畜生黃人赤天白此義云何答上說五道
果報今說五道造業故其不同耳云如是等
衆生若爲與佛相遇衆生以苦惱自煎諸佛
以大悲濟物悲與苦相對故言相遇又佛如
衆生如一如無二如天性相關故言相遇夫
大悲恒愍衆生若以人天教我則墮聞感止
免青黃赤紫方圓楞角等生死非教佛道若
遇衆生令修小乘我則墮墜貪此事爲不可
祇出二十五有若遇衆生教令通別我則墮
偏僻失佛知見今皆令衆生得實相妙慧體
達一切皆是佛法無非正道此則盡教以佛
道生死苦永盡我常如是說但衆生根鈍罪
重不可如願過去有佛號住無住發願使已
國衆生同日同時成佛即日滅度又賢劫前
有佛號平等亦願已國及十方衆生亦同一
日成佛即日滅度今日有佛復有衆生云何

耶佛言止止我前所言得人身者耳頗有發
願令五道同日成佛不佛言不可以非器之
身成無上道要先化三趣令得人天然後乃
可如願三趣非善道何能成佛如人求寶聚
不於空中求我知此衆生下第二六行別明
五濁爲五初二行明衆生濁善本者真如實
相也不依此種善根故不感大也堅者五欲
者即諸惡之本從癡有愛則我病生從受胎
之微形下第二一行別明命濁觀心釋者一
念心起即爲未來作業業即胎胎業無窮世
世不斷不斷即是增長也受胎之微形形即
五陰陰名世壽命連持諸陰入世初從薄酪
已至老死故名世世增長是命濁受陰身經
說凡夫受身初七未轉異二七有生相如薄
酪三七如厚酪四七如凝酥五七如坏六七
如肉搏七七於肉搏生五疱頭手脚等八七
又五疱一頭兩膊兩腕九七續生二十四疱
四疱作眼耳鼻舌二十疱爲二十指十七轉
現腹相漸漸皮骨分解作諸異相生七百筋
七千脉隨所須相用一風淙之須白相白風

滌乃至餘風亦如是香風故安隱端正真風故不安隱則醜陋邪戾後出胎食五穀則生八萬戶蟲也入邪見稠林下第三一行是見濁五見交加如稠林密茂若有是常見若無是斷見因此二見生六十二或云外道計我有四句色即是我離色是我色大我小我住色中我大色小色住我中四陰亦爾是為二十三世為六十并根本為六十二或如大品中所說次深著虛妄下第四一行煩煩惱濁如文於千萬億下第五一行煩劫濁長時無佛法即是劫濁又上來四濁集在時中故名劫濁如是人難度者五濁障故不信一乘則不可度也觀解者念念惡覺永無正觀自覺即不見佛心無八正即不聞法此心難度是故舍利弗下第三一行即權為說小如文我雖說涅槃下第四一行半即是終令入大析三界妄盡滅色取空則非真滅若體達無明本無常寂即是真滅本無雖寂若不修道無由契會故言佛子行道已來世得作佛也我有方便力下第五兩行頌上不虛上云汝等

當信佛之所說言不虛妄勸信前已頌訖不虛今更頌初二句先明釋迦先開三次兩句明諸佛後顯實互現耳後一行正明不虛前權後實誠言不虛勿生疑也從過去無數劫下第二二十七行半頌上過去佛章文為二初二行頌開三如文是諸世尊下第一有二十五行半頌顯一上文顯實兼有四一今偈具頌於中又二初一行略頌上三一皆說一乘法即是頌教一化無量衆生頌人一令入於佛道即頌理一兼得行一次又諸大聖主下第二有二十四行半約五乘廣頌顯一就文為二初一行半總約五乘以顯一天人群生類是舉諸乘以明人一更以異方便舉諸行以顯行一兼得教一第一義即是理一異方便下正因佛性即第一義理若用圓妙正觀此即實相方便不名為異若用七方便觀助顯第一義者名異方便次若有衆生下第二有二十三行別約五乘以顯真實者即為三初二行開菩薩乘次第二一行開二乘第三二十行開天人乘今初若有衆生類下二

行開菩薩乘若作五乘釋者但是六度菩薩乘若作七方便釋者兼得通別菩薩乘何者三教大乘皆行六度而蓮心有異相心行六度即三藏菩薩無相即通教非相無相次第行六度即別教今但列六度未知定判屬誰尋上文云更以異方便者非獨六度菩薩即三教菩薩方便皆聞法皆已成教一昔六度行皆已成行一如是諸人等皆已成人一皆已成佛道皆已成理一也從諸佛滅度已若人善輒心一行開聲聞緣覺皆入一乘何以得知大品歎阿羅漢心調柔輒又淨名云住調伏心是賢聖行是以知之昔善輒心皆成行一諸人等是人一成佛道是理一供養舍利下第三二十行開人天乘不彰是人天乘但明造像起塔專至散亂故知是天人業地師解云童子是童真地無二乘凡夫二邊欲心聚砂為塔砂是無著塔是衆行積集舍藏正覺之心彼謂義會無生以為深詣今謂乖文豎狹何者登地自應成佛如修羅度海何足為奇今以童稚戲砂亂心歌詠指微即著

如凡夫度海不可思議佛分明廣會五乘毫善不漏而棄收羅之廣意徑取無生若如向釋始不攝二乘況凡夫乎論深但是一致定廣則乖經文問人天小善應住果報云何皆言已成佛道答此應明三佛性義大經言復有佛性善根人有聞提人無者即是人天小善低頭舉手為山始簣合抱初毫昔方便未開謂住果報今開方便行即是緣因佛性能趣菩提成顯實之義也就此為二前十九行約天人小善成緣因種子以明顯實後一行約了因種子以明顯實尋文可解前十九行為十初三行半約造塔明天乘因時至心傾財捨寶果時任運自然受樂故是天乘也木檣者長安有木名檣亦任造像金光明云以佛舍利如芥粟許置小塔中三十三天已有自然果報即其義也次乃至童子下第二一行童子戲砂作塔即是人業因時汎汎悠然作善果時作意勤求得樂故是人業次若人為佛故下第三四行約志心造像明天業優婆塞戒經不許用膠得失意罪而此經用者

古師云外國用樹膠耳光宅言或有處必須於像聽許用牛皮膠若有他物即不得用也有言大豆汁可代膠清然牛皮終是不淨物後得不淨果報不淨錢不任造像可換取如法淨錢造像地持不用雌黃臭物戒經不許造半身像得失意罪善相不起隨落生死中然造像各有所擬若當堂佛必須坐消息佛或坐或卧行動佛必應立而弟子於塔殿立像前不得坐此處定屬佛故若白衣舍餘處坐像前不能久立乞坐者得立像前即不得坐也云次乃至童子下第四一行明人業次如是諸人下第五一行半結成顯實諸人皆成人一漸漸積功德具足大悲心即成行一佛道即成理一既已成佛復能四一但化菩薩即是教一云次若人於塔廟下第六三行半約諸塵供養明天業銅鉢者長安人呼露盤為銅鉢在彼翻經故用彼名之耳次若人散亂下第七一行約散心用塵供養明人業次或有人禮下第八一行約身業供養明天業禮拜一白五體著地是上禮即天業合

掌低頭是中禮是人業次以此供養下第九一行半結成非但顯實自成佛道亦能開權新盡涅槃也云次若人散下第十有一行約口業例上應具天人業今但出人業云南無大有義或言度我度我可施眾生若佛答諸佛度我義不便五戒經稱驚怖驚怖者正可施佛也生死險難實可驚怖以大救之不得今同諸佛以小濟之驚怖施佛可也故文云喜稱南無佛喜者喜得救物儀也五戒經又云歸命悉施眾生耳調達臨終稱南無未得稱佛便墮地獄佛記其從地獄出當作辟支佛字曰南無外國事天像者以金為像頭賊來盜之取不能得即稱南無佛便得頭明日眾聚云天像失頭便是無天來著耳著者云何失頭天即降一人云賊來取頭即稱南無佛諸天皆驚動是故得我便是故失頭眾人云天不如佛耶既不如者今何不事佛賊稱南無佛尚得天頭況賢者稱南無佛十方尊神不敢當但精進勿懈怠那先經云人臨死稱南無佛得免泥黎者云何如人持一石置

水石必沒無疑若能持白石子置船上者必不沒若直爾死必入泥黎如石置水若臨死稱南無佛力故令不入泥黎船力故使石不沒也云胎經報恩經云華林園第三大會九十二億人者是釋尊遺法中一稱南無佛人得見彌勒也次於諸過去佛下第二有一行明了因種子若例上皆有相無相非有相非無相至心散心等五乘種子今皆開入一實云至心聞一句是天業散心聞一句是人業云問何意約過去佛門廣明五乘耶答三世佛皆有開權但未來未起現在始行於證義弱過去開權已久受化之人皆成四一並於十方施權顯實證義事強構之虛言不如驗之以實故於過去佛廣說五乘也從未來諸世尊下第三有六行半頌上未來佛章文第十八為二初一行半頌開三後五行頌顯一度脫諸衆生者一行頌人一諸佛本誓願一行頌行一佛所行道誓令得此道豈非行一未來世諸佛兩行頌教一知法常無性者實相常住無自性乃至無無因性無性亦無性是名

無性佛種從緣起者中道無性即是佛種迷此理者由無明為緣則有衆生起解此理者由教行為緣則有正覺起欲起佛種須一乘教此即頌教一也又無性者即正因佛性也佛種從緣起者即是緣了以緣資了正種得起一起一切起如此三性名為一乘也是法住法位一行頌理一也衆生正覺一如無二悉不出如皆如法為位也世間相常住者出世正覺以如為位亦以如為相位相常住世間衆生亦以如為位亦以如為相豈不常住世間相既常住豈非理一又釋世間者即是陰界入也常住者即正因也然此正因不即六法緣了不離六法正因常故緣了亦常故言世間相常住也於道場知已此舉果釋成開權顯實道場朗然斯理久暢物情障重方便施三云從天人所供養下第四有四行半第十九頌現在佛章上文有四今頌三不頌後結初一行半頌為化之意正為安隱衆生次知第一寂滅下一行頌上顯實知第一寂滅即頌理一其實為佛乘或頌教一或頌行一後知

衆生諸行下二行頌開權如文從今我亦如是下第二有四十三行半頌釋迦章上文無歎法希有頌中具六但舊解釋迦章點出譬本指上本下文義文加尋疏則目眩聽說則心亂鈍者致惑私記者先撰置前至文更帖庶以自鏡耳然釋迦章偈凡兩意一頌上二本下上根已悟中根未了故須作論還譬上法譬不孤起承躡有由故言譬本也古舊為五譬一長者譬二思濟譬三權誘譬四平等譬五不虛譬然初是總譬非獨長者思濟是教子不得義耳猶少見火譬故不用瑤師云方便品中從諸佛隨宜所說竟長行正顯一乘真實凡有四章一者開昔四三成今四一二以五濁故不得說一乘三從若我弟子自謂下明不得者四從汝當一心信解下明不虛妄始末言異以意求之皆實也下火宅中但譬方便品內三章從譬如下竟願時賜與是第一譬五濁章從各賜諸子等一大車竟得未曾有是第二譬真實章從是長者等賜諸子竟寧有虛妄不是第三譬不虛妄章玄

暢師云六譬一宅中衆災之相二覺者唯佛起一乘念三衆生不受爲說怖畏之事四說三乘樂五還說一乘救六結不虛妄也龍師云六譬一舍宅父子譬佛王三界化衆生也二長者見火譬我以佛眼觀見六道衆生也三長者救火譬佛三七欲度衆生不得用大也四長者方便誘以三車譬佛設三乘教也五長者賜一大車譬說妙法華六不虛妄譬也光宅十譬一今我亦如是二行總頌上權實爲下總譬作本二舍利弗當知四行頌上五濁爲下見火譬本三我始坐道場六行半明大乘化不得爲下救子不得譬本四尋念過去佛十一行明三乘化得爲下救子得譬本五我見佛子等一行明大機發爲下見子免難譬本六咸以恭敬心一行明三乘索果爲下諸子索車譬本七我即作是念二行一句明如來歡喜爲下長者歡喜譬本八於諸菩薩前三句明爲說大乘爲下等賜大車譬本九菩薩聞是法一行明衆生歡喜爲下諸子得車歡喜譬本十汝等勿有疑一行半明

佛無虛妄爲下長者不虛譬本也有人評之若以句判應有十九句若以義判則有六義一總二見火三一乘化不得四三乘化得五還說一乘六不虛自餘攝入六義之內又十譬則法譬參差法說中索車在前父喜在後譬說中父喜在前索車在後雖欲會通終成迂迴又大小相違法說見大機動故喜譬說見小緣免難故喜法說明大因譬說叙小果法說大障將傾譬說小難已離義勢車各又有無異故法說中叙上根易悟故無索車譬說明中根猶惑故有索車若引恭敬爲索車者殊不體文意今無此四失然有無者長行有五一開三二顯一三五濁四真偽五不虛偈亦五但長行有真偽偈則無偈有歎法長行則無互現耳次第者長行先開三後顯一偈先顯一後開三開合者開三顯一爲總譬本二偈合而不開次離五濁文爲四譬之本開而不合不虛爲不虛譬本不合不開明取捨四段經文爲六譬之本取而不捨歎法一章非六譬故捨而不取論總別初開三顯一

總叙釋迦一化教門從五濁去皆屬別譬也次本迹者總叙佛教總舍本迹從五濁去別明本迹五濁一章正明居法身本見衆生苦起大悲從一乘化不得者垂迹云今謂迹門大意正是開三顯一前直法說上根即悟解中下未悟更爲作譬譬於三一今得曉了前法說中既略廣開三顯一後譬說中亦應略廣許三賜一因緣中亦應引三入一若作三譬六譬十譬於三周之文不合於四人信解乖離是所不用今明頌釋迦章中大分爲兩初從今我亦如是下兩行偈略頌上權實爲下總譬作本第二從我以佛眼觀見下有四十一行半偈廣頌上六義爲下別譬作本今約總頌中即有六意得爲總譬六義作本偈云今我亦如是我即釋迦是一化之主爲下有大長者譬作本安隱者即大涅槃常樂住處此處寂靜無五濁障故名安隱安隱即對不安隱不安隱即三界生死行化之所有五濁障名不安隱即爲下火宅譬作本衆生即是五道受化之徒爲下五百人譬作本又安

隱者即是安隱法還對不安隱法不安隱法即五濁法也為下火起譬作本種種法門即對不種種為下唯有一門譬作本知眾生性欲者即是五道根性有三乘差別為下三十子譬作本向上即是略頌向下即是總譬本本末相承文義整足譬中當更引上證下從廣頌上六義中分文為四作下別譬本初從我以佛眼觀下四行廣頌上五濁為下見火譬本二從我始坐道場下十七行半廣頌上於一開三為下寢大施小譬作本三從我見佛子等六行廣頌上顯實為下等賜大車譬作本四從如三世諸佛下有五行半廣頌上歎法希有次有二行半正頌上不虛次有六行頌上敦信此三意合為下不虛譬作本而正用二行半頌不虛為下不虛譬作本大樂如此細派更開初頌五濁中有三意初有半行一字明佛眼觀見為後長者能見譬作本次六道眾生下有二行三句四字明所見五濁為後所見火譬作本次為是眾生下第三有半行明起大悲為後長者驚入火宅譬

作本二我始坐下若頌開三者更開二意初有六行半念用大乘化不得為下身手有力而不用之寢大譬作本次尋念過去下有十行念同諸佛三乘化為後設三車施小譬作本三頌上顯實中更開四意初舍利弗當知我見佛子下二行明大乘機動為後索車譬作本次我即作下第二有兩行一句明佛歡喜為後見子免難譬作本次於諸菩薩下第三三句正顯實為後等賜一大車譬作本次菩薩聞是下第四一行明受行悟入為後諸子得一大車歡喜譬作本頌上不虛直為下不虛譬作本不論開也又一時大開為三譬初今我亦如是兩行合而不離為下總譬作本二從我以佛眼觀下離而不合為下別譬作本三不虛譬不離不合為不虛譬作本若承上本下略廣二頌則通三周及信解中文之與義悉皆不關若約廣頌更開四意頌上四義為下四譬作本此亦通三周及信解中文義不關若更子汰開頌五濁中為三開頌方便中為二開頌顯實中為四不虛中但

一合成十意作下十譬之本此之十意但在法譬兩周信解及因緣中其文則闕故作三節開章承上本下非是無趣漫作頌略中初一行頌上顯實後一行頌上開權此文雖窄具頌四一今我亦如是如於諸佛之是同以一實教化眾生此是總頌顯實也安隱者涅槃秘藏是安隱處佛自住其中亦安置眾生入秘密藏安隱處即頌理一眾生即頌人一種種法門入於佛道即頌行一宣示即教一智慧力者即權智力也知眾生性欲者鑒小機也方便說諸法者正施權也皆令得歡喜者隨宜稱機也二偈雖略收佛一化開權顯實原始要終罄無不盡故稱略頌為下總譬本也二從我以佛眼觀下四十一行半廣頌上六義舊以最後七行是法說流通今不用頌歎法敦信耳初四行頌上五濁開三次第二十七行半頌施方便化次第三六行頌上顯實次第四五行半頌上歎法希有釋迦章雖無指諸佛章中也次第五二行半頌上不虛次第六六行頌上敦信初四行頌五濁

上文有四唱數列名出體結釋今但頌數名體三也上云爲五濁故說三今云爲五濁故出世出世本應說大障不獲已故前說小此又爲三初十一字明佛有能見之眼次第二六道下二行三句四字明所見五濁次第三爲是衆生下第六有半行明起大悲應赴初十一字我以佛眼觀見者下文云長者在門外立舉下證上知佛在法身之地以常寂佛眼圓照群機若根利濁輕則以盧舍那像說一乘法若根鈍濁重則脫瓔珞以老比丘像驚入火宅方便開三祇是于時鑿機故言我以佛眼觀見也若觀色法應用天眼若分別根機應用法眼云何言以佛眼見耶佛眼圓通舉勝兼劣又四眼入佛眼皆名佛眼云六道衆生下第二有二行三句四字明所見五濁貧窮無福慧半行頌衆生濁入生死險道相續苦不斷此頌命濁深著於五欲一行頌煩惱濁不求大勢佛及與斷苦法此頌劫濁深入諸邪見以苦欲捨苦此頌見濁或云五熱炙身欲望捨苦反得苦報或云諸見即是受受

即是苦行此苦因望欲捨苦豈可得耶普曜曰五道源來五戒爲人十善生天慳貪隨餓鬼飢突隨畜生十惡墮地獄無五趣五陰六衰則是泥洹不處生死不住泥洹便受菩提決吐曇毗婆沙第七云地獄中人初生時念云昔聞沙門說貪欲是地獄過惡大可畏處我昔不斷貪欲今受此劇惱此舉貪欲是地獄因也又云五道各有自爾法地獄色斷還續畜生能飛虛空餓鬼施搏食時能來到人中入中有勇健念力梵行勇健者不見果而廣能修因念力者久遠所作而能憶梵行者能得解脫達分得正決定天中有自然隨意所須即得云地獄中成就他化自在天煩惱業及善而不現前行他化自在成就地獄煩惱業及不善而不現前行舉上舉下中間可知地獄此方名胡稱泥犁者秦言無有無有喜樂無氣味無歡無利故云無有或言卑下或言墮落中陰倒懸諸根皆毀壞故或言無者更無救處獄卒是變化今見非衆生數初將罪人縛至閻王所者是衆生數若受苦時

非衆生數如此解者初皆正語若受苦痛聲不復可分別畜生者形傍行傍故名畜生又畜生者名徧有徧有五道中四天三十三天悉有而上天所乘象馬等是福業化作非衆生數也又畜生者名盲冥盲冥者無明多故名畜生劫初時皆解聖語後飲食異論心而語皆變或不復能語鬼者胡言闍黎嚙秦言祖父衆生最初生彼道名祖父後生者亦名祖父又慳貪墮此趣此趣多飢渴故名餓鬼亦被諸天驅使亦希望飲食故名餓鬼人者胡言摩菟奢此云意昔頂生王初化諸有所作當善思惟善籌量善憶念即如王教諸有所作先思量憶念故名人為意又人能息意能修道得達分又云人名慢五道中多慢者稱人趣也阿修羅者修羅名天阿言非非天故稱阿修羅又修羅名端正彼不端正故言阿修羅修羅名酒阿之言無彼無酒故言阿修羅也天者天然自然勝樂勝身勝故天名勝衆事悉勝餘趣常以光自照故名爲天又天者天然自然阿含云衆生是假名界是法

五趣衆生與法界和合若衆生行不善心時與不善界俱行善心時與善界俱行勝心時與勝界俱行鄙心時與鄙界俱是故比丘當作是學善種種界前是因緣釋六趣後似觀心釋六趣也為是衆生故下第三有半行明起大悲而起大悲心者上舉能見次明所見今明大悲熏心應入三界施設方便引趣佛慧也

妙法蓮華經文句卷第四下

妙法蓮華經文句卷第四下

校勘記

- 一 底本，明永樂北藏本。
- 一 七八頁上一四行第九字「二」，南、
經、清作「三」。
- 一 八〇頁下一一行末字「見」，南、
經、清作「更」。
- 一 八〇頁下一六行「中阿舍」，南、
經、清作「中阿舍」。
- 一 八〇頁下一七行第八字「早」，南、
經、清作「早」。
- 一 八一頁上四行第九字「佛」，南、
清作「沸」。
- 一 八二頁中六行第一五字「一」，清
作「二」。
- 一 八二頁下一七行第一六字「舍」，南、
經、清作「舍」。
- 一 八四頁下一七行第六字「肉」，南、
經、清作「肉」。
- 一 八五頁中一〇行「異故」，南作
「異」。
- 一 八五頁中一七行第一四字「四」，南、
清作「三」。
- 一 八五頁下二行第一〇字「舍」，南、
經、清作「舍」。
- 一 八五頁下五行第八字「一」，南、
經作「二」。

妙法蓮華經文句卷第五上 定九

隋天台智者大師說

門人灌頂記

從我始坐道場下第二十七行半頌施方便化就此為二初有六行半明念用大乘擬不得次尋念下第二十一行明念同諸佛用三乘化稱宜可得就初念用大化又為三初一行半明用大擬宜次衆生下第二三行明衆生無機次我即下第三二行明念息大化也始坐道場者至理無時假時化物為化之初故言始也事釋者初在此處修治得道故言道場坐此樹下得三菩提故名道樹感樹恩故觀祭念地德故經行道成賽澤之時欲以大法擬宜衆生也觀心釋者樹即十二因緣之大樹也深觀緣起自成菩提欲以無漏法林樹蔭益衆生故言觀樹經行者大乘三十七品是行道法自以道品履一切地得成佛道欲以此法化度衆生是故起行樹地無有分別豈須報恩未會有經云祇以通化傳法名報恩耳過去因果經云佛成道初一七日

思惟我法妙無能受者二七日思衆生上中下根三七日思惟誰應先聞法即至波羅奈為五人說四諦陳如得法眼淨類轉拔提十力迦葉摩訶男拘利未得道佛重說四諦四人得法眼淨佛又說五陰無常苦空非我五人得阿羅漢佛為佛寶四諦為法寶五人及佛是六阿羅漢即是僧寶小雲疏云初三七日時已是說法華下文宿王華智佛在七寶菩提樹下說法華經當知今佛在菩提樹亦說法華而鈍根衆生不堪允同諸佛開三教化後於王城說一乘耳若推智者意是則先在菩提樹下說於佛慧後在餘處說佛慧例如今佛先說華嚴後說法華故文云始見我身聞我所說入如來慧與此義同也五比丘者而今亦令人如來慧與此義同也五比丘者諸女聽仙人說法惡生王瞋割兩臂耳鼻等血變為乳惡生王者拘鄰是仙人者佛是佛誓令得甘露令初聞法音也問何故初為五人轉法輪答人先見諦故人是現見故人為證故佛所行事業與人同故諸天從人中得

善利故人中有四衆故輪王出世聲至他化自在憍陳如得道聲至梵天佛得道聲至首陀會何故爾答善業名譽業稱讚父母師長業有上中下故爾也若使有頂有耳識者佛聲亦至彼輪王行十善善生欲天欲天喜我眷屬增多故陳如離欲故徹梵佛最勝至尼叱若依大乘佛得道聲徧至百億尼叱又徧十方無量無邊世界尼叱云初轉法輪處菩提樹處初利下處大神變處此四處諸佛皆定餘處不定又除轉法輪一處其三處決定三七日者舊云思理教等又云勸誡等理師云事之至深至聖猶思而後行一七思佛智微妙二七思衆生根性不同三七思法藥萬品即舉偈證之我所得智慧微妙最第一衆生諸根鈍云何而可度今明佛在法身之地寂而常照恒以佛眼洞覽無遺豈始至道場淹留三七方思此事言三七者明有所表也表佛初欲三周說法故假言三七耳初七思法說次七思譬說後七思因緣說皆無機不得是故息大施小也此徧就圓教大乘

為釋耳若通途約大乘釋者初七思惟欲說圓教大乘次七思惟欲說別教後七思惟欲說通教大乘皆無機不得是故息大說三藏三乘為方便之化也觀心釋者初欲觀中道中道妙難觀不得次欲觀即假即假觀分別智難生不得後欲觀即空即空巧度又不得方觀方便析法小觀也從眾生諸根鈍下第二三行明無機又為三初半行明障重次如斯下第二半行明不堪聞爾時梵王者下第三有二行明諸梵雖請說大佛知無機所以不說我即自思惟下第二有二行明念欲息化又二初一行半明無機強說聞則有損後半行正明息化從尋念過去佛下第二有十一行頌上於一佛乘方便說三也就此為二初十行正明化得後一行釋疑就前十行者四初一行明三乘擬宜次作是思下第二六行半明有機次思惟是下第三一行半明施化次是名下第四一行明受行尋念者念彼雖無大機不容承捨要以方便而誘濟之非都不知開三欲引同諸佛故云尋念也作是

思惟下第二六行半明有小機此又為二初四行半明諸佛歎後二行明釋迦酬順上欲大化於彼無機故諸佛不歎今欲說小曲會根緣則始終得度所以佛歎也就初佛歎為五初三句釋迦自叙諸佛現佛現者由念佛方便力故現現由擬法會機二義故佛現善哉下第二一行一句明諸佛正歎釋迦能隱實設權故云善哉為一施三引入佛慧即是第一導師得是無上法者即是得實智微妙第一也而用方便力者隨諸一切佛隱實用權也我等亦皆得下第三一行明諸佛亦隱實用權如文從少智樂小法下第四一行雙釋二義為眾生少智不堪聞大所以隱實而復樂小所以施權雖復說三下第五半行雙結二義雖復說三終為顯實也舍利弗當知下第二有二行明釋迦酬順既聞諸佛歎對曰南無南無此云敬從又二初一行發言酬順後一行念順物機從思惟是事下第三一行半正明施教也諸法寂滅相不可以言宣下即是前說中道無性佛種之理此理非教

又不可說今以方便作三乘說又非生非滅而以方便作生滅說又偏真之理亦非示說以方便故作四門說初為五人說無常有門也是名轉法輪下第四一行明受行悟入也轉佛心中化他之法度入他心名轉法輪陳如初得見諦即斷見惑分證滅諦亦是分得有餘涅槃涅槃之音起自於此由此得成無學便有羅漢之名能說三乘法者名佛所說三乘即法見諦羅漢等名僧三寶於是現世間從久遠劫來下第二一行是釋疑疑師云佛初未能鑒機尋念諸佛始知根性即釋云非我不知用於方便特欲引同故念諸佛非始念方知從久遠劫來見其樂小已為讚示令盡眾苦所以聞小即得解脫也疑弟子云云何眾生一世暫聞即證羅漢即釋云從久遠劫來為其讚示稱於本習故速得道舊云此偈懸指壽量義今明論秘密意或當如此明顯露意是則不然何者將明壽量彌勒尚自不知云何此中一偈懸指今以釋疑消文從我見佛子等下第三有六行頌上顯實文

具四一初我見佛子下二行頌人一三乘行人皆是佛子上文兼有其意也我即作是念下第二一行頌理一為說佛慧即是上一切種智佛知見也舍利弗當知下第三二行頌教一但說無上道即教一也菩薩聞是法者第四一行頌行一悉亦當作佛故是行一也更就此文為四意初二行明大乘機發亦云索果次兩行一句明佛歡喜衆生得大乘益故次三句正明顯實次一行受行悟入也明由機發故索果索果由於機發此應有四句自有障除機未發如諸羅漢在三藏時以樂小故濁障雖除大根鈍故妙機未發自有大機發障未除如法華中諸凡夫人等雖未斷結以大根利故機發自有障即除機即發如說無量義時證二乘果即於此座大機即發自有障未除大機未發即五千等是也志求佛道者即是索大非求小果也索有三意一大機有感果之義機中論索二情中密求為符為不得即此意三發言索即是殷勤三請也昔教之中已有二求但未發言至於今日

具此三索問昔出宅索三是機情索者文云如先所許此乃求三何關求一答出外不見必有異途將昔許三以求異意耳亦得是索一也咸以恭敬心皆來至我所者一云恥小慕大大機感佛故云至佛所今明非但機至佛所亦乃身到如無量義中四眾圍繞合掌敬心欲聞具足道也曾從諸佛聞方便所說法者此中初味調伏受行三藏六度通別等三教方便由此調熟故使障除機發而求大也從我即作是念下二行一句明障除佛喜佛為佛慧故出昔障重無機不得即說佛慧中間雖障除又未得說今機發正是說時昔衆生根鈍智小恐其謗法隨惡故未是說時今根利志大聞必信解故佛歡喜無畏者不畏執小謗大起罪隨惡故言無畏於菩薩中下三句正顯實也五乘是曲而非直通別偏傍而非正今皆捨彼偏曲但說正直一道也菩薩聞是法下一行明受行悟入六度通二菩薩初聞略說動舊執致新疑今悉已除非獨菩薩二乘亦爾而云聲聞皆當作佛者昔

教不說二乘作佛今行與授記授記豈獨二乘除疑豈獨菩薩互存則兩備問菩薩何疑答三藏說三僧祇未斷惑一斷即入真通教說菩薩斷正留習習盡即成佛初聞略說悉云方便昔真昔成竟知安在又三乘同學一道何意有別今聞法華掃蕩諸疑無復遺芥從如三世諸佛下第四五行半頌上歎法希有非正為下不虛譬本就此為二初一行頌上如是妙法妙法者權實也如三世者引同諸佛用權權是引物之儀式也說無分別法引同諸佛顯實實則言語道斷豈存儀式又權實本無分別為鈍根小智分別權實今還悟入一三不二即知佛說三一無分別也諸佛皆爾何獨我耶諸佛興出世下四行半頌上時乃說之上亦舉曇華頌中還說諸佛興出世兩句久久懸遠時有佛出此舉人難正使出於世兩句此舉法難如今佛出世四十餘年始顯真實云無量無數劫兩句此舉聞法難如五千之流梵音盈耳越席而去聞豈不難手能聽是法者兩句舉信受者難普衆

唯身子前達中下雖聽猶未能了舉曇華偈上四難但合聞者難餘例可解從汝等勿有疑下第五二行半頌至不虛又二初一行半勿於可信人生疑次汝等舍利下一行勿於可信法起疑法王者夫為人王言則不二佛為法王豈容虛說夫方便可是權假真實寧應是妄聞法王說法勿生疑也舊從汝等舍利弗下七行不頌敦信但是釋迦章中勸信弘經之意耳其文為兩初五行半今弘經使其行因次一行半略為受記初一行令其慕累行因必須弘經四十餘年蘊在佛心他無知者名為秘一乘直道總攝萬途故言要也以五濁惡世下一行釋秘要明障重之人終不能解故使如來秘不妄宣當來世下二行明弘經體初一行明不善人勿為說後明善人當為說舍利弗去一行半雙結二義初行結秘要明此法如是先以萬億方便然後乃示真實後半行結弘經體其不習學不能曉了此正結不善者勿為說也兼對習學者則能曉了此乃可為說也汝等既已知下一行

半略為授記上明三句論其有解中一句明其無惑下半偈明其得記既有解無惑正應歡喜作佛此中受記開下身子等得記作本此中弘經開下命身子流通作本也舊意如此今明從五濁下第六六行頌上揀眾敦信上幸有此文近而不頌耶又二初三行頌揀眾次三行頌敦信五濁者一行頌上揀非佛弟子何者若樂諸欲是行魔業故須揀之上文著涅槃尚非佛弟子此文著生死那是佛弟子互揀非耳終不求佛道者頌上揀增上慢上慢者未得上法謂得上法是故其人不求佛道也當來世惡人一行頌上如來滅後解義者是人難得也有慚愧清淨一行頌上若遇餘佛便得決了次三行頌上敦信若不信此法無有是處初一行半敦信於權吹一行半敦信於實實權無疑自知作佛云釋譬喻品

智無邊更動樹訓風舉扇翕月使其悟解故言譬喻別釋者以世法比出世法因於曾有聞未曾有踊躍歡喜如經世間子父譬出世師弟又以世法比出世法使蒙佛音教不失大乘如經父知諸子先心各有所好珍玩之具又以世滅比出世滅雖得無漏聞亦除憂惱如經我為其父應拔其苦難令免燒煮又以世不生不滅比出世不生不滅令其安住實智中我定當作佛如經乘是寶乘直至道場當知佛以一音說於譬喻巧令中下得四悉檀益故言譬喻品也約教解者佛意本讚佛乘為物不堪尋念先佛大悲方便趣於鹿苑稱讚三車二乘以下中自濟恩不及人菩薩駕牛運他出火故名摩訶薩此三藏教中譬喻也又三人同畏燒煮聲聞如鷹直去不迴緣覺如鹿毋並馳並顧菩薩如大象身扞刀箭全群而出涅槃云兔馬此通教中譬喻也又三乘發心近緣理淺智慧弱斷通惑不能盡邊到底非波羅蜜菩薩發心久遠理深智彊斷別惑窮源盡性大品云二乘如

螢火菩薩如日光此別教中譬喻也又始見
我身聞我所說即皆信受入如來慧如斯之
人易可化度不令如來生於疲苦如華嚴中
即事而具不須譬喻為未入者四十餘年更
以異方便助顯第一義今日王城決定說大
乘普令一切開示悟入佛之智慧不令一人
獨得滅度如今如始如始如今無二無異上
根利智聞即能解不令如來生於疲苦亦不
須譬喻祇為中下動執生疑踟躕歧道故須
今日大車譬喻而得利益是名圓教中譬喻
也本迹觀心例可解不復記云法說有五段
經文其一始竟四猶未了此品應在諸天說
偈之後火宅譬喻之前出經者謂卷置領解
之初耳又人云發起中根置第二卷初如六
瑞問答為法說作序領解得記為譬說作序
此人情耳置法說之後中根可不悟耶此領
解段領其所聞述其所解長行領與解合說
偈中領與解各陳故言領解段也文有二一
經家叙二身子自陳叙為二謂內解外儀內
解在心名喜喜動於形名踊躍從妙人聞妙

法得妙解若值一幸尚復欣抃况三喜具足
寧不踊躍文云今從世尊聞此法音心懷踊
躍內外和合致此歡喜即世界釋也又改小
學大棄貧事草庵受富家家業文云今日乃
知真是佛子是故歡喜此為人釋也又憂悔
雙遣疑難並除內外妨障廓然大朗文云我
已得漏盡聞亦除憂惱是故歡喜此對治釋
也又佛子所應得者皆已得之文云安住實
智中我定當作佛此第一義釋也約教者夫
歡喜喜於入位而阿羅漢出三界籠樊破四
住子果對害不戚逢利不欣今言歡喜決非
世間喜也若苦忍明發若究竟無學先得
之今不應重喜若三人同以無言說道體析
雖異證空一致一致之喜久已得之亦不重
喜若二空觀為方便道假觀蕩二乘之隘陋
空觀蕩凡夫之喧湫過二邊惡得大歡喜依
圓悟初發心住名歡喜住初行亦名歡喜行
初地亦名歡喜地身子既是上根利智必是
超入之歡喜設不超入亦名歡喜此皆約教
釋也本迹釋者身子久成佛號金龍陀迹助

釋迦為右面智慧弟子始從外道拔邪歸正
示乳味歡喜利益凡夫次示酪味歡喜利益
賢聖次示生酥熟酥歡喜利益菩薩今作醍
醐入佛知見歡喜利益學佛道者如此等歡
喜皆迹所為也觀心解不復記云叙外儀者
即起合掌名身領解昔權實為二如掌不合
今解權即實如二掌合向佛者昔權非佛因
實非佛果今解權即實成大圓因必趣果
故言合掌向佛瞻仰尊顏者表其解實實即
佛境非方便法瞻仰尊顏無餘思念表開佛
知見意解於實亦即解權身領於權亦解於
實互舉一邊白佛下口領解也即是身子自
陳文為二初長行二偈頌初文為三一標三
喜章二釋三結成今從世尊標我身見佛身
故名身喜聞此法音依於佛口聞而歡喜故
言口喜得未曾有是我意解佛意故名意喜
是為標章也次所以者何下第二釋者提昔
之失顯今之得從所以者何訖無量知見明
昔不見佛為失昔佛為善薩授記我不豫斯
事見佛義遠既不見佛故無身喜聞如是法

者若日照高山時密有聞義顯如聾如啞不得道聞如是法也祇是方等教中聞大乘實慧與今不殊故言聞如是法也受記者亦是方等中與菩薩記二乘不豫斯事甚自感傷思益淨名中聞褒大折小內疑而外鄙名為感傷失一切知見者失佛眼之見失佛智之知也從世尊訖非世尊也明昔不聞法失良以身處山林心執小道則不聞法故無口喜我嘗獨處者思過之所也同入法性者正出其過執所入之一理疑於三教之能門一理既同而我失知見三教既異而菩薩受別受別則如來有偏所以成過今述此失故言悔過是我等咎者由我迷權何關理教由我感實何關佛偏追述昔非仰謝如來是為引過自歸也從所以者何訖每自剋責明意無解之失良以不待說所因則無實解又不識方便故無權解解無故故無意喜昔失既彰今得自顯不待說所因者自責不解實也不解方便者自責不解權也所因二義一不受待對於前二不停待於後初照高山明三諦之

慧是得佛因以此待對於我而我不受失之於前諸佛法久後要當說真實我不停待於此兩極間忽忽取小不解實權如文而今從佛下結成三喜先結後成從佛是結身喜也聞法結口喜也斷諸疑悔是結意喜乃知真是佛子近佛義成也從佛口生結口成也從法化生是結意成如此消文文盡釋理彰也更用四悉檀消文今從世尊下是世界歡喜從所以者何提昔失顯今得是為人喜從世尊我從昔來對治喜也從今日乃知下是第一義喜也更約喜心明四悉心喜動悅常未曾有喜動覺觀復動于形云偈有二十五行半為三初一行頌標三喜舉我聞兼得佛也從昔來下第二十二行頌釋三喜又為三今初一行半頌見佛喜長行明失知見頌中明不失大乘上論失論遠頌論近論得互現耳我處於山谷下第二十一行頌上不聞法又為二初九行頌上身遠故不聞次我本著邪見下第二兩行頌上入法性故不聞邪見是凡人著入法性是二乘著俱不聞法我

嘗於日夜者生死為夜涅槃為日為生死中有涅槃為生死外有耶若得悟時二疑雙遣又生死涅槃俱為夜此疑得除名為日日出時二疑雙遣又世人二種一草創學大二習小入大桶其事相直入者劣例如從阿毗曇中入者勝菩薩亦應爾於華嚴中入者化道應弱五味洩汰入者勝從而今乃自覺下第三有九行半頌上心得妙解喜上明不待所因不解方便頌中明得所因又解方便聞當作佛是所因聞五佛道同解魔非魔是解方便互顯一邊五佛章即是頌文也從聞佛柔輒音下第三二行半頌上結成如文爾時佛告舍利弗吾今下是第三述成段上身子自陳得悟今如來述解非虛文有三一昔曾教大二中忘取小三還為說大所以引昔曾教述其見佛之緣若中忘取小述其憂悔聞法之緣還為說大述其悟解不虛述成上三意也十住毗婆沙云身無上謂相好受持無上謂自利利他具足無上謂命見戒智慧無上謂四無礙不思議無上謂六波羅蜜解脫無

上能壞二障行無上謂聖行梵行又身無上名大丈夫受持無上名大慈悲具足無上名到彼岸智無上名一切智不思議無上名阿羅訶解脫無上名大涅槃行無上名三藐三佛陀菩薩瓔珞十三云道當清淨穢濁非道當一心多想非道當知足多欲非道當當恭敬憍慢非道當檢意放逸非道當當顯曜自隱非道當連屬無行非道當當覺悟愚惑非道當教化矜恪非道當道近善友習惡非道如是等種種明無上道今經以圓通為無上道若偏若次皆他經所論長夜隨我受學者昔雖大化未破無明惑闇心中隨佛受學了因雖遠猶尚不滅況今真悟寧虛故舉曾教述見佛不謬也我以方便生我法中者此義兩牽若昔以大化今生大解此屬初意若令免惡道權以小引此是第二意從我昔教汝志願佛道汝今悉忘自有中途廢大習小名中途悉忘若而今便自謂已得滅度即是而今悉忘由汝忘大願即習小致有憂悔而得聞法不虛也我今還欲令汝憶念

本願即是述其得解不虛先施權教成其中途小善後顯真實遂其本願大心也從汝於未來下是大段第四投記段前自陳佛印竟是故與記若得大解自知得佛何俟須記記有四意一昔未記二乘而今須記二中下未悟以記勉勵之三令聞者結緣四滿其本願是故記也有長行偈頌長行為十一時節二行因三得果釋十號甚多且記一種無虛妄名如來良福田名應供知法界名正徧知具三明名明行足不還來名善逝知眾生國土名世間解無與等名無上士調他心名丈夫為眾生眼名天人師知三聚名為佛壞波旬名婆伽婆四國土五說法六劫名七眾數八壽量九補處十法住久近悉如文大論四十八云舍利弗正法三十二小劫者三災飢病刀滅眾生者名小劫又直是時節名小劫如說法華經六十小劫亦是時節數耳非三災滅外物為小劫也偈有十一行半為二初十行頌上九意略不煩補處長有供養舍利後一行半結歎初一行超頌得果次供養下第

二一行追頌行因次過無量下第三半行起頌劫名次世界名下第四一行半頌國淨次彼國下第五一行半頌菩薩眾數次如是等下第六半行頌說法次佛為王子下第七二行頌壽量次佛滅度之下第八一行半頌法住久近次舍利廣下第九半行供養舍利後華光佛下第二一行半結歎宜應自欣慶者成初入歡喜位之解也初住能百佛世界作佛行地倍是第五四眾領解有長行偈頌初經家叙眾喜次陳供養作是言下正領解初領開權今乃復轉下領顯實也偈有六行半為二初二行頌上開權顯實後四行半自述得解隨喜迴向也我等亦如是者如身子之領解如身子被述成如身子之得記也問迦葉善吉諸大聲聞尚未得解四眾何人而先獲悟答四眾天人亦具三品上根同身子中下可知又解身子迦葉並是權行中下未開故迦葉滿願示同不解淨名云眾生未愈菩薩亦未愈云從爾時舍利弗白佛下第二大段為中根譬說文有四品此一品正是譬

喻開三顯一信解明中根得解藥草如來述成授記與決此四番皆約譬說下四段皆約因緣陳如明繫珠緣而領解阿難引空王緣而獲記云又例法說應有中根四眾歡喜而今無者一謂經家存略二例前後可知後文在法師品中云譬說文為二一請二答請為三一自述無疑二述同輩有惑三普為四眾自述如文同輩是同行懷舊故須為請四眾是化境今新運大悲則普為請佛常教化下執昔三教也而今於世尊前下執昔一理也昔說三是究竟今又說一為真實矛盾致迷故言皆墮疑惑有人云身子新舊兩疑千二百止有新疑今謂上根疑少中下疑多云何倒解善哉世尊下為四眾普請也因緣者前三後一之因緣也爾時佛告舍利下第二佛定九答文為三一發起二譬喻三勸信發起為二一抑二引抑令憤勇引令速進我先不言下指上明權皆為善提指上顯實皆為化菩薩者若權若實皆入佛道無住涅槃上已明言云何執教迷闇不解如此責謂是抑文也然

舍利弗今當下是引接安慰前并既切恐鄙懟自沈今許其譬喻更明此義若能解者猶稱智也二譬喻說長行偈頌長行開譬合譬開譬不同已如上說今為二一總二別總譬譬釋迦章中今我亦如是兩行偈略頌開權顯實也別譬譬釋迦章中我以佛眼觀見四十一行半偈廣頌開權顯實六意也總譬有六一長者二舍宅三一門四五百人五火起六三十子長者譬於我我即釋迦一化之主也火宅譬上處所安隱對上三界不安隱也一門譬上宣示佛道門也五百人譬上眾生也火起譬上對不安隱法五濁八苦也三十子譬上知眾生性欲三乘行人也長者譬為三一名行二位號三德業名如賓行如主行有親疎名有近遠故舉處所以顯名行也封疆為國最遠宰治為邑居中聚落是鄰閭最近長者名行徧此三處近不見其細陋遠但挹其高風口無擇言身無擇行意無擇法名行相稱真實大人內合如來三業隨智慧行稱機施化名稱普聞德周法界也舊以十方

虛空慈悲所被處名國三千為邑一四天下為聚落又大千為國中千為邑小千為聚落今皆不用大論六云柔順忍為聚落無生忍三菩提為城因果共為譬今經直用果德為譬實報土為國有餘土為邑同居土為聚落從本垂迹攝迹反本名行相稱無賓主之異彪炳洋溢徧三土也二標位號為三一世長者二出世長者三觀心長者世備十德一姓貴二位高三大富四威猛五智深六年者七行淨八禮備九上歎十下歸姓則三皇五帝之裔左貂右挿之家位則輔弼丞相鹽梅阿衡富則銅陵金谷豐饒侈靡威則嚴霜隆重不肅而成智則智如武庫權奇超拔年則蒼蒼稜稜物儀所伏行則白珪無點所行如言禮則節度庠序世所式瞻上則一人所敬下則四海所歸十德具焉名大長者出世長者佛從三世真如實際中生功成道著十號無極法財萬德悉皆具滿十力雄猛降魔制外一心三智無不通達早成正覺久遠若斯三業隨智運動無失具佛威儀心大如海十

方種覺所共稱譽七種方便而來依止是名出世佛大長者三觀心者觀心之智從實相出生在佛家種性真正三惑不起雖未發真是著如來衣稱寂滅忍三諦合藏一切功德正觀之慧降伏愛見中道雙照權實並明久積善根能修此觀此觀出於七方便上此觀觀心性名上定則三業無過歷緣對境威儀無失能如此觀是深信解相諸佛皆歡喜歡美持法者天龍八部恭敬供養下文云佛子住是地即是佛受用經行及坐卧既稱此人為佛豈不名觀心長者今以十德帖經義足而闕一文國邑聚落有大長者三處稱譽為大豈非姓貴長者豈非位高衰邁豈非耆老財富無量豈非豐足多有田宅即分略周瞻豈非智深多有僮僕豈非勢大其家廣大豈非德行師之唯有一門豈非禮節訓人一路多諸人眾即下人所歸但闕上人所敬一文今以大字兼之大人所知故稱大也從其年衰邁下三歎德業德有內外內則智略外則貴財年高博達今古譬佛智德衰邁根志純

熟譬佛斷德財富譬外德無量總譬萬德也田宅別譬也田能養命譬禪定資般若宅可棲身譬實境為智所託略則十八空門廣則無量空門若論福德無行而不修若論智慧無境而不照故云多有田宅也僮僕者給侍使人譬方便知見皆已具足和光六道曲順萬機即實智之僮僕也二其家廣大者家宅譬上安隱對不安隱不安隱譬三界也眾生穴穴皆宅三界如來應化統而家之故言廣大也三唯有一門者譬上種種法門宣示於佛道道場觀云實相理不異慧亦宜一出無異路故言一門光宅雲曰三界雖曠九十雖多論於出要唯是佛教故言一門今明若單理為門理無通塞何門之謂單教為門得經者眾何意不出今取理為教所詮文云以佛教門出三界苦得涅槃證門又二宅門車門宅者生死也門者出要路也此方便教之詮也車者大乘法也門者圓教之詮也若宅門是車門初三車教子亦應即是等賜大車若所出門非所入門驗車宅異也四五百人者

譬上眾生即五道也五堂閣下譬上安隱對不安隱法五濁也先出所燒之宅相譬六道果報次明能燒之火譬八苦五濁堂譬欲界閻譬色無色界牆譬四大類落譬滅損頹危譬遷變柱根譬命梁棟譬意識腐敗譬危殆不久欲令易解作觀釋之堂譬身之下分閣譬頭等上分牆譬皮膚肉類落譬老朽柱根譬兩足腐敗譬無常梁棟譬脊骨傾危譬大期周障屈曲譬大小腸又云譬心云周而下明能燒之火八苦徧在四大四生故言周而並皆無常故云俱時欬然譬本無今有本無此苦無明故有六長者諸子下三十子譬上知眾生性欲會習佛法天性相關則子義性欲有異若十是善薩子二十三十是二乘子此機俱得出宅故名為子無此機是五百人或者支佛出沒不同或小乘攝或中乘攝皆言十者悉有十智之性故云內有智性但無如實智性耳上三偈先頌實後頌權今總譬中先實後權云

妙法蓮華經文句卷第五上

妙法蓮華經文句卷第五上

校勘記

- 一 底本，明永樂北藏本。
- 一 九〇頁上一一行「第二」，南、清作「第三」。
- 一 九二頁中一五行第一六字「吹」，南、徑、清作「次」。
- 一 九四頁上五行「折小」，清作「斥小」。
- 一 九四頁上一九行「二義」，南作「一義」。

妙法蓮華經文句卷第五下

定十

隋天台智者大師說

門人灌頂記

從長者見是大火下是第二別譬也別更為四初長者見火譬譬上佛見五濁四行偈為本二捨机用車譬譬上釋迦為五濁寢大施小始坐道場十七行半偈為本三等賜諸子大車譬譬上釋迦示真實相我見佛子等志求佛道者六行偈為本四長者無虛妄譬譬上我為諸法王二行半偈為本就初見火其文有四其意但三一明能見二明所見三明驚怖四廣前所見但成三意長者見標出能見譬上我以佛眼觀見也是大火從四面起者標出所見譬上所見六道眾生也即大驚怖譬上為是眾生故而起大悲心也而諸子等於火宅內下廣第二所見之火也還是釋成驚怖之義身受心法即宅之四邊從此四邊起淨樂等四倒八苦之火眾苦皆集若知身不淨苦無常即煩惱火滅舊有三解一云四大為四面六識並託其中二即四生三云

四倒依下文以生老病死為四邊也即大驚怖者念其退大善故驚憂其將起重惡故怖驚即對慈念其無樂怖即對悲憂其有苦我雖能於此所燒之門安隱得出者即是釋成驚怖慈悲之義雖是未盡之辭明佛以智慧乃能尋正教見所詮諦不為五濁八苦所危故名安四倒暴風所不能動故名隱蕭然累外故名得出而眾生不爾為火所燒如來慈悲猶為憂火所熾故言雖也經言所燒之門者今問教為門者此教為燒為不燒教云教門不燒佛教為門能通所燒之人所通之人被燒名能通門名燒如門內人死名門為衰門實不衰又問若爾教是常住非有為法若不爾何故不燒今解不爾夫門有件有空非件無以標門非空無以通致件可灰燼空不可燒教有能詮所詮若非詮辯無以為教若非所詮何以得出詮辯可是無常所詮非復無常得教下所詮故名安隱得出能詮磨滅故言所燒之門不從所燒之門何由安隱得出藉於言教契於所詮大經云因無常故而

果是常如此釋者如經於所燒之門也若小乘無常教門此從所燒門出若大乘常住教門文字即解脫者此教即理體達燒無燒而安隱得出若就如來權智即是從所燒門出若就實智體於所燒安隱得出故先作衣械几案出之不得後以無常出之即此意也樂著嬉戲著見名嬉著愛名戲又耽酒四見名嬉唐喪其功名戲著愛亦爾耽酒五塵名嬉空無所獲名戲空生徒死而無厭離如彼兒戲不覺不知者都不言有火名不覺不覺火是執法名不知既不知火熱不畏傷身名不驚不慮斷命故不怖眾生全不覺五陰八苦不知四倒三毒既不識惑云何憂慮或侵法身傷於慧命如是不覺於苦不知於集不驚傷道不怖失滅以不聞四諦教則無聞慧名不覺不得思慧名不知不得見解名不覺不得思惟解名不知見諦即驚悟思惟即厭怖又不覺現在苦不知未來苦故下文云現受眾苦後受地獄等苦即此義逼身者五識也心者意識心王也身為八苦所逼而心不厭

惱也亦云曾種大乘功德是法身智慧為體體為四倒所逼而不知不覺心不歇患者不歇無常之苦不患煩惱之集也無求出意者不修道求滅也今謂火宅本譬五濁熾盛見濁戲譬煩惱濁不覺不知不驚不怖譬眾生濁火來逼身苦痛切已譬命濁心不歇患無求出意譬劫濁此與五濁相當云從是長者作是思惟下是第二捨凡用車譬譬上寢大施小上六行半明大擬不得後十一行用小擬得上不得有三一思大擬宜二無機三息化今譬為二初用勸門擬宜二用誠門擬宜就勸誠各三一擬宜二不受三捨捨勸門三者一從長者作是思惟身手有力下譬上念用大化於三七日中思惟如此事二從復更思惟下明子不受譬上無機眾生諸根鈍云何而可度三從或當墮落為火所燒下即是放捨善誘譬上無機息化我寧不說法疾入於涅槃也長者作是思惟下譬上三七日思惟也身手等者引下合譬云但以神力及智慧力以釋此譬身譬神通荷負手譬智慧提

拔依三昧斷德則有神通依智慧智德則有說法智斷之力能成法身此之智斷還從勸誠兩門入勸即為人悉檀誠即對治悉檀此二悉檀為第一義悉檀而作方便如來初欲勸門擬宜眾生令眾善奉行成就十力無畏一切種智而眾生不堪次欲以誠門擬宜今諸惡莫作證大涅槃眾生不堪無機息化故知念用大乘祇是勸誠兩悉檀神通智斷耳故上文云定慧力莊嚴以此度眾生即其義也前歎長者其年衰邁即譬智斷智斷即是身手力也衣械几案者三藏法師云衣械是外國盛華之器貢上貴人用此貯之舊云衣襟譬大乘因几案譬大乘果初擬大乘因果是則無機也舊又云此物譬大乘戒定慧初七思惟所得法此如用衣械二七思惟眾生根緣如用几三七思惟樹地恩如用案云此義出阿含經今取合譬文若我但以神力及智慧力讚如來知見力無所畏者眾生不能以此得度神力即是身慧力即是手如前說知見譬衣械無畏譬几十力譬案如來以神

通發動此三法以智慧宣說此三法無機息化衣械几案等略中廣之異耳略說名如來知見知即一切種智見即佛眼名略義玄譬如衣械一足而多舍處中說即名四無所畏用對四諦如几於法小廣於物小安隱或作廣說名為十力第十廣該括如案多足則無傾覆也於法則廣物則大安於三七日中思惟欲作如此廣略佛法而眾生不堪故言衣械几案也復更思惟下第二明子不受譬上無機唯有一門而復狹小門義如上說今更明通別別者一謂一理一道清淨門謂正教通於所通小謂不容斷常七方便等教理寬博則非狹小眾生不能以此理教自通將談無機故言狹小耳通者理純無雜故言一即理能通故言門微妙難知故言狹小教者十方諦求更無餘乘唯一佛乘故言一此教能通故言門此教微妙凡夫不知出處是知權不知入處是知實二乘因聞少知出要永不知入菩薩雖自知出亦不知入奪七方便皆不知入上文云若我讚佛乘眾生沒在

苦不能以教自通將談無機故言狹小行者
圓因自行行大直道無留難故故名為一善
行菩薩道直至道場故名為門妙行難行方
便無機故言狹小耳甚解人天小善故云幼
稚無大乘善名未有所識今明二萬佛所教
無上道大乘善根微弱名幼稚若聞大乘能
生誘毀名未有所識也戀著戲處者前明善
弱此明惡強即是因時深著見愛果時深著
依正欲界著六塵色界著禪味無色界著定
上文云眾生諸根鈍著樂癡所盲不堪聞大
乘也或當墮落為火所燒指此二句名放捨
善誘也墮落有二一者幼稚憶本戲處故墮
落二都無識執物不堅故墮落譬著五欲墮
在三途二者善弱無識誘毀大乘墮落三途
也從為說怖畏下第二對治門三者一擬宜
對治誠怖令出對治之相如大品中說四念
是摩訶衍以不可得故異於小乘也既著戲
處故說怖事令得免五濁火燒五陰舍宜應
捨離若久住著必斷善根故云無令為火之
所燒害從父雖憐愍下即是子不受誠也不

驚不畏者不生聞思如上說不識八苦五濁
能燒善根如不知火不識陰界入法是諸苦
器如不識舍不知喪失法身之由如不知何
者為失從但東西走戲視父而已指此二句
為放捨苦言也皆背明向闇如東西生死往
還速疾如馳走於中起見愛如戲也雖用大
擬不從大教故言視父而已從長者即作是
念此舍已為大火所燒下即是第二用車譬
譬上尋念過去佛所行方便力十一行偈上
文有四今譬亦四一者擬宜三車譬譬上尋
念過去佛亦作三乘化也二者父知先心所
好譬譬上作是思惟時十方佛皆現三者歎
三車譬譬上正施三乘思惟是事已即趣波
羅柰也四者適子所願譬譬上受行悟入是
名轉法輪也大乘化功為父命眾生大善為
子命大善若盡即子命斷子命斷則化功亦
廢即父命斷前言苦痛切已猶是未死今云
必為所焚即有死義也上文於所燒之門安
隱得出今云若不時出必為所燒此義云何
前得出者即是法身出今言若不時出即是

應身同疾眾生有善與應身時出眾生善斷
不與應身時出即是俱為所焚也今欲應身
擬宜令其時出也從我今營設方便欲設權
也從知子先心下第二明有得度之機也其
昔曾習小是知先心性欲不同是知各有所
好又知眾生昔曾習大習大未濃是為大弱
獸老病死故以小接是為小強如身子六心
中退本曾習大名知先心中獸老死名各有
所好從而告之言下第三是歎三車希有譬
譬上正轉法輪也此即為三謂勸示證玩好
希有下即是勸轉如此種種下即是示轉汝
等於此火宅宜速以來皆當與汝即是證轉
也從爾時諸子聞父所說下第四適子所願
譬譬上受行悟入前偈本略今譬事廣廣明
修因至果依六句解釋一適願者機教相稱
此即聞慧也勇銳者即是思慧思心動慮思
慧方便也互相推排者推四真理排伏見惑
邪正未決名為互相此入修慧屬煖頂位也
競者競取勝理也此是忍法位競取勝理初
觀三十二諦競趣真道後縮觀趣苦法忍也

共者是世第一法位同觀一諦與苦法忍四觀不別也馳走者入見道十五心速疾見理譬上便有涅槃音見道之中分得涅槃也爭出者思惟道也爭出三界成無學果斷思惟盡方出火宅即譬上偈及以阿羅漢法僧差別名也觀心解者中道正觀直觀實相心法相稱名適所願境無邊故觀亦無邊名勇境研心利名銳心境相研名互相推排心王心數緣境速疾名競共馳走徧歷一切陰界入等無非實相名為出火宅也云是時長者見諸子等下是別譬中第三等賜諸子大車譬譬上顯真實相此文為四一父見子免難歡喜譬譬上我即作是念所以出於世至今我喜無畏兩行一句偈為本二諸子索車譬譬上大車機發我見佛子等志求佛道者咸以恭敬心皆來至我所兩行偈為本三等賜諸子大車譬譬上於諸菩薩中正直捨方便但說無上道三句為本四諸子得車歡喜譬譬上菩薩聞是法疑網皆已除一偈為本上法說中光明機發次說障除佛喜無畏今譬中

先明免難後明索車若具足論應作四句有先障除後機發如四大聲聞等於三藏中障除大品末法華初大機始發二障未除大乘機發如華嚴中及法華中諸凡夫衆得入佛慧者餘兩句如上說若大機先動後障除如方便品所說若先除障後機動如今所說機動障除互現共成一意也又方便品明佛喜無畏此中諸子歡喜以子喜故其父亦喜此亦互現共成一意也就免難中具二義謂免難歡喜若子未免難父則憂念若得離火心即泰然故免難歡喜得為一譬以子歡喜其父亦喜得譬佛喜也四衢道中者舊云四濁障除如四達路更得一濁除如露地坐今不爾五濁直明垢障之法未論治道不應譬衢道衢道正譬四諦四諦觀異名為四衢四諦同會見諦如交路頭見惑雖除思惟猶在不名露地三界思盡名露地住果不進故云而坐不為見思所局故云泰然生滅度安隱想故言歡喜也各白父言下第二是索車譬文云願賜我等三種寶車文無索字義者依此

請辭明索車耳有人云二乘索車菩薩不索作十難難之一云二乘出三界外至許車處索果車菩薩未至許處那忽索車二云大乘經無菩薩索小乘果故知不索三云所化菩薩從初發心終至補處皆是凡夫不出三界義則無索能化菩薩三十三心見傾思未盡三十四心便是佛佛從誰索四乘果在正使門外佛果在習氣無知門外二乘斷正使盡不見車是故索菩薩未斷習與無知那忽索五明二是方便可言索文云唯此一事實餘二則非真以此推之但二索一不索六從大品已來至法華已前佛因佛果皆是方便者付窮子財此之珍寶皆應是方便若付財是真實則大品等明佛乘已是真實那忽更索七方便品偈叙昔說小是方便不叙大是方便當知佛子大乘非方便那忽有索八若三人索者何無領解領解無故故知不索也九合賜車文云見諸衆生出三界苦得涅槃樂故賜以大乘菩薩不證涅槃那忽索十諸子安坐故就父索二乘果滿不修行故安坐

可得有索菩薩行未息無安坐義那忽索私以總別駁之索是求請之別名在意名求索在口名請索在身名乞索如矇者求知如飢者請食如迷者問道凡居不達之地何有不索之理由索故許與許與故歡喜今文具請與歡喜法說中千二百人身子為首殷勤三請菩薩衆中彌勒為首佛口所生子大數有八萬合掌以敬心欲聞具足道譬說之初身子為中根人請又總為四衆請傍為下根請文云善哉世尊願為四衆說其因緣法說許云汝已殷勤三請豈得不說譬說許云當以譬喻更明此義因緣許云我及汝等宿世因緣吾今當說法說竟身子歡喜譬說竟迦葉等歡喜宿世說竟樓那歡喜又合譬文云今諸子等日夜劫數常得遊戲與諸菩薩乘是寶乘直至道場以喜故知與與故知請三周三義明文炳然何故偏言二索一不索別駁其一齊三藏明菩薩不斷感依法華有四句謂障除大機動障未除大機動機動則知索其二云大乘經無菩薩索小乘果大品云

三乘之人同以無言說道斷煩惱入涅槃斷煩惱入涅槃同何故不索其三云三十三心名菩薩三十四斷思盡即成佛從誰索此猶三藏義見障未除大機尚動況三十三心而當不動動即知索其四菩薩未斷習氣無知不應索斷盡成佛從誰索此三乘通教義具縛障存尚大機動况殘習無知耶其五唯此一事事實即是真那忽復索被會絕待之唯一一外更無法昔待二之唯一一外更有法一名同而體異聞執瓦礫魚目謂夜光月形愚童而智愍其六般若已來法華已上與付財法同不應有索汝不聞共不共般若若不共不須索共者不應不索云其七方便品初昔說小是方便不叙昔說大是方便大非方便是故不索者汝不聞壽量品中我少出家得三菩提乃至中間若小若大若已若他皆我方得諸佛亦然寧得不索其八若菩薩索菩薩應領解領解既無故知不索汝不聞法說竟天龍四衆皆領解其非菩薩謂是何耶又法師品中三乘皆與記若不領解那

忽與記其九出三界苦得安隱樂乃賜乃索菩薩未出未證是故不索猶是三藏義耳其十諸子安生爾乃賜車二乘行息名安坐菩薩行不息非安坐那忽索車猶是前義耳自有行息索行未息索又菩薩行行即是乘乘乘由索得何謂不索觀其說累三藏故設此十難管見一斑都非大體今當為爾分別說之自有不斷惑不索車三藏菩薩是自有斷惑索車通教菩薩是自有亦斷惑亦不斷惑亦索亦不索別教菩薩是自有非斷惑非不斷惑非索非不索圓教菩薩是又歷五味乳味兩意一亦斷亦不斷亦索亦不索二非斷非不斷非索非不索酪味一意不斷不索生酥備四意熟酥但三意醍醐一意宏綱大統其義如此於一一句一一意復各四句謂障除機動障未除機動障亦除亦未除機動障非除非不除機動斯宗不見執一非三深可悲愍世人執車數不同說車體不同或言初說三車後會三歸一或言初說有三後會三歸一或言初說有四後會三歸一所以出經

勿信人語此文引昔佛為聲聞說應四諦法為緣覺人說應十二因緣法為菩薩人說應六波羅蜜法今佛說三數亦如此華嚴第八云下劣獸沒者為示聲聞道根鈍樂因緣為說緣覺道根利有慈悲為說菩薩道無上樂大事說無量佛法三十六又云三解脫法出聲聞乘無諍法出緣覺乘六度四攝出大乘知一切法出佛乘又第九地說聲聞乘相支佛乘相菩薩乘相如來乘相地論釋第二地觀十不善集墮三塗十善集生天上十善與四諦觀智合成聲聞又上十善與不從他聞觀智合成緣覺又上十善與具足清淨觀智合成菩薩地又上上十善與一切種一切佛法合成佛瓔珞第十三云十方佛說三乘一乘中又開三合九乘九乘悉會入平等大慧聖說如此不能融通互相是非非法毀人過莫大焉今約教分別之若說三乘法門異而真諦同者三藏教也若說三乘法門同真諦皆同者通教也若說三乘三三九乘若說四乘淺深階級各各不同而同入平等大慧者

別教也若說三乘九乘四乘一一皆與平等大慧相應無二無異者圓教也又歷五味分別乳味但明菩薩乘佛乘略味但明異三乘生酥味備明三乘四乘九乘各各分齊不相濫熟酥味唯除異三乘餘如生酥也醍醐中純說佛乘無復餘乘也若識此意異說無妨若不知者祇增諍論耳世人明佛乘乘體有異光宅取佛果究竟盡無生二智為車體速出五百由旬之外對昔為高具舍萬德對昔為廣莊嚴取因總萬行為體上求為高下化為廣舊不取功德功德與凡夫共唯取智慧為體舊又取福慧共為體文云乘是三車以無漏根力覺道禪定解脫三昧而自娛樂豈但智慧耶又一師但取有解為體空解無動故不取盡無生智即有解也又一小乘取空慧為車體文云我等長夜修習空法云大乘亦以實慧方便為車體車體譬有有有運動故也私謂諸師釋佛乘之體而競指具度何異衆盲觸象諍其尾牙依天台智者明諸法實相正是車體一切衆寶莊校皆莊嚴具耳

至賜車文中當點出舊解小車者小果也果有有為無為功德正取有為以譬車運運入無餘也有為果中具有福慧以慧為正福屬具度其慧有十而八智通因果盡無生智唯是果位乃取二智以譬車果以是義故車在門外若依小品云是乘從三界出到薩婆若中住若未出時已乘是乘爭出火宅何故復言車在門外若先在外乘何而出然但乘通因果三十七品斷見思惑皆是因乘盡無生智皆名果乘要因乘斷除惑盡方得果乘盡無生智故言車在門外但果正因傍就果為言車在門外若內因斷結運義名乘外果不運何得名乘然果無斷惑之運要以盡無生智入無餘涅槃方是好運也若乘因到果何意方更索車舊云機索情索機索者可解情索者佛說盡無生教羅漢證此果已用神通天眼試觀未來猶見變易生死浩然自疑所得盡無生證若實無生云何見有如其浩然昔非究竟情中從佛索先所許是為情索若尋經文文無此語若推索義義不應然文

無可解推者下文云自於所得生滅度想既以天眼見有生死何故復起滅度之想此則自相矛盾又佛滅後羅漢不值餘佛不能決了既自以天眼照見生死何須見佛而決了耶又初禪天眼尚不見二禪况見變易亦與攝大乘乖也又羅漢得無漏業用天眼見變易未來生死果報者即時人修五戒十善應自見其未來果報當知界外果報豈是天眼所見耶不用此判情索也今言情索者昔日依教謂盡無生能入無餘而於方等中見菩薩不思議聞淨名彈弁若我所得是實大士不應折挫若我非實佛不應說具故云茫然不知所云至大品中領知大法聞此樂大心起方欲進修大乘而不能知得與不得此等皆是情中已索大乘之義故身子領解提昔疑情見諸菩薩授記作佛不豫斯事嗚呼自貴欲以問世尊為失為不失即是指昔方等已有情索也今加口索者因聞方便品初偈略聞佛說並是方便即復執今方便疑昔未極故云我今不知是義所趣動宿疑情故發

言三請索求昔日所說之實機在大乘情求昔實又情求大乘口問昔實六度通教例爾從舍利弗爾時下三等賜大車有兩章兩應兩釋一等子二等車以子等故則心等譬一切眾生等有佛性佛性同故等是子也第二車等者以法等故無非佛法譬一切法皆摩訶行摩訶衍同故等是大車而言各賜者各隨本習四諦六度無量諸法各於舊習開示真實舊習不同故言各皆摩訶衍故言大車其車高下廣狹為二一廣叙車體次釋有車之由叙車體中先叙高廣次明白牛後明價從假名車有高廣相譬如來知見深遠橫周法界之邊際豎徹三諦之源底故言高廣也眾寶莊校者譬萬行修飾也周匝欄楯者譬總持持萬善遮眾惡四面懸鈴者譬四辯下化也張設憶蓋者譬四無量眾德之中慈悲最高普覆一切也珍琦雜寶而嚴飾之者真實萬善嚴此慈悲大經云慈若具足十力無畏名如來慈慈中行布施等云寶繩交絡者譬四弘誓堅固大慈心也垂諸華纓者譬四

攝神通等悅動眾生也亦譬七覺妙髮也重敷綉者譬觀練熏修一切諸禪重沓柔軟也安置丹枕者車若駕運隨所到處須此支昂譬即動而靜即靜而動若車內枕者休息身首譬一行三昧息一切智一切行也丹即赤光譬無分別法也駕以白牛者譬無漏般若能道諦緣度一切萬行到薩婆若白是色本即與本淨無漏相應體具萬德如膚充煩惱不滌如色潔又四念處為白牛四正勤中二世善滿如膚充二世惡盡如色潔四如意足稱行者心如形體姝好筋譬五根住立能生義也力譬五力摧伏幹用義也行步平正以譬定慧均等又譬七覺調平其疾如風者八正道中行速疾到薩婆若僕從者譬方便波羅蜜能屈曲隨人給侍使令眾魔外道二乘小行皆隨方便智用故淨名云皆吾侍也又果地神通運役隨意即僕從也次所以者何下釋有車之由者由財富藏溢譬果地福慧圓滿名財富無量庫藏充溢行藏理藏一切法趣檀尸忍等是趣不過者是約行為如

來藏一切法趣陰入界根塵等是趣不過即
是約理明如來藏自行此行理名充化他名
溢實智滿名充權智用名溢入中道名充雙
照故名溢非但藏多又皆充溢何法不是摩
訶訶故大乘無量也而作是念下即是廣明
心等文為二一廣心等二釋廣心等者財富
無量是子無偏是故心等若富而非子是子
而貧則不得等今七寶大車其數無量若教
若行皆摩訶訶即財多也各各與之不宜差
別者不移本習而示真實如身子於智慧開
佛知見具一切佛法目連於禪定開佛知見
具一切佛法餘人例爾又方等般若念處正
勤根力覺道種種異名皆開示實相歷一切
法亦復如是故言無量也所以者何以我下
是釋兩等初釋財多尚周一國況復諸子譬
大圓因徧該善惡況佛知見耶次釋子等者
非子尚充況是子耶譬佛無緣者尚度況有
緣子耶尋文可解從是時諸子各乘大車下
第四適願歡喜譬上受行悟入本求羊鹿水
牛期出分段今得白牛盡於變易過本所望

豈不歡喜從於意云何下第四不虛譬譬法
王不妄一問二答三述歎問如文舍利弗言
下第二答為二一免難不虛亦各以重奪輕
不虛二不乖本心不虛亦云過本望不虛各
為三謂標章解釋况結標免難如文何以故
下第二釋者命重身輕全身免火已得大寶
濟于重命豈應有虛結免八苦之火全五分
之身已是大寶況二萬佛所大乘慧命圓因
成就佛知見開寧是虛妄次世尊若是下第
二不乖本心初標不乖本心章本知無三意
今不謗不謗者已不乖本心釋云本知無小
意今不毀隨惡既無毀因不墮惡果不與小
車不乖本意結云自知財富無量欲饒益其
子與一大車過本所望是故不虛結前章云
方便救濟似譬斷德神通之力結後章云財
富無量似譬智德辯說之力前是子等故不
虛後是財等故不虛佛告舍利下第三歎述
有二善哉者述其二不虛也問佛何不自說
不虛答佛許三與一自說為難身子說不虛
取信為易舍利弗如來亦復下第二合譬光

宅開十譬但合七不合三七中正合五兼第
五第八不合第七第九故知十譬繁而不會
今合總別二譬總中有六今文皆合小不次
第今初第一合上第一上長者名行位號德
業合云如來亦復如是先合位號如來無量
德號略舉十義如上說一切世間將處所以
定名行上云國邑聚落合直云一切世間通
指同居有餘自體皆是妙色妙心果報之處
如來徧應三處即一切世間合上國邑聚落
也於諸怖畏下合上歎內外德內是年高衰
邁識達則多譬如來智斷於諸怖畏無明永
盡合上衰邁顯斷德也成就無量知見合其
年高顯智德也力無畏等合上外德財富無
量也神力者深修禪定能得神通合上田也
智慧力智必照境如身之託處合上宅也具
足方便波羅蜜合上諸僕從也從大慈大悲
下第二合上第四慈悲是施化之本一切是
五道恒為慈悲所被合上五百人也而生三
界火宅下第三合上第二其家也為度眾生
下第四合上第六眾生有緣親者前度合上

三十子也生老病死等下第五合上第五款然火起譬也教化令得三菩提下第六合上第三教能詮理尋理起行即得菩提故知教理共用合上唯有一門譬也若講說令前後可解一須提方便品譬本來勸誨之後去

例爾從見諸衆生下第二合別譬別譬有四今合第一見火譬譬有三意其文有四合亦四但譬中驚怖在前諸子戀著戲處在後合中不覺不驚在前拔苦與樂在後互現辯其不定耳今以一見字第一合上第一能見之眼即是如來寂照智能見也諸衆生爲生

老下第二合上第二所見之火從四面起此中明八苦爲火四苦如文貪著追求求不得苦後受地獄天上人間是五陰苦愛離怨會如文此之八苦從四倒四面起也從衆生沒在其中下第三合上第四所見火譬諸子不覺不知等也不觀苦集故不厭不觀道滅故不求解脫雖遭大苦不以爲患合上心不厭患無求出意也從佛見此已便作是念下第四合上第三起驚怖我雖能於此所燒之門

安隱得出意也應拔其苦難者即大悲之力與無量樂者即大慈之力也從如來復作是念下合第二捨几用車譬上譬有勸誡今但合勸不合誡法說中亦勸善不明誡惡故勸修爲正誠惡是傍亦是勸善即誡惡誡惡即

勸善今合勸善即知合誡惡也上勸文有三謂擬宜無機息化擬宜有身手衣械等但以神力者合上身力及智慧力者合上手力也讚如來知見合衣械也力無所畏合几案也若佛初出即用此擬衆生不能以此得度也

所以者何下釋不得度合上第二子不受勸譬正由五濁障重未免生死等火大乘微妙不能得入故言何由能解佛之智慧此一句即合上唯有一門而復狹小小故不能解智不解智慧者即是行爲門意也如彼長者雖復身手有力而不用之合上第三放捨善誘無機息化或當墮落爲火所燒也此文無放捨語譬及譬本息化意甚分明也息化文爲二先牒前後三譬次正合息化牒前一譬正帖合息化牒後兩譬傍成息化也雖復身手

有力而不用之此牒前身手救子不得譬以合息化如來亦寢大化也但以殷勤下牒施三之譬也就然後各與下牒第三等賜大車譬也如來亦復如是下十六字正合第三息化也從但以智慧方便下合用車救得譬上文有四此中亦四但以智慧下合第一擬宜

三車也爲說三乘下合上第二知子先心也而作是言下合上第三歎三車希有上有勸示證今亦具合但不次第第一合上第二汝等莫得樂住三界下是示其盡無生處也三

界是示苦諦勿貪羶弊乃至生愛等示其集諦速出三界示其滅道滅道即是示其三界外有智斷三乘之果故令速出三界當得三乘三乘正取道滅爲體也我今爲汝保任此事終不虛者是第二合上第三必與證得不虛也復作是言汝等當知下第三合上第一歎希有如此三乘是諸佛方便引物儀式故衆聖所稱得無生智爲自在得盡智爲無繫我生已盡不受後有名無所依所作已辦梵行已立名無所求也從若有衆生內有智性

下合第四適子所願譬上有真似等四位今合亦四但上總今別三乘各為四皆引上譬來帖合也內有智性者宿習三乘樂欲成三乘智性故佛施三乘之教也內有智乃至從佛聞法信受合上聞父所說玩好之物適其願故合上聞慧也殷勤合上心各勇銳思慧也精進合上第二推排推是推理排是排惡惡去故精理明故進合上修慧也欲速出下合上第三競共馳走也是名聲聞乘合上第四爭出火宅三乘修行皆有此四而辟支佛求自然慧者辟支是法行人從他聞法少自推義多故取譬鹿鹿不依人自然者從十二緣門入此門本自有之非佛天人所作名自然慧不從他聞復名自然慧也菩薩稱一切智者不同二乘乃是佛智菩薩望此修因即是大乘兼運之意也如彼長者見諸子等安隱得出下合第三等賜大車譬上文有四一免難二索車三等賜四歡喜今略不合第二第四也但合免難義兼索車今等賜義兼歡喜今雙牒免難賜車二譬然後雙合二譬如

彼長者下牒免難自准財富下牒等賜如來亦復如是下合免難門有三義入義出義別義若三界為宅五陰為舍由迷色心而入色心即是入宅生死之門若作出者是乘從三界出即是稟佛通教下所詮為門若別義者即是稟別教下所詮為門也今言佛教門者正是藏通二教教下之理共為門得出三界而免難也如來爾時便作是念下合等賜也上等賜先列二章門二廣說三釋出今合關略文小不次第如來爾時便作是念我有無量智慧力下第一合上第四釋有車之由上云財富無量庫藏充溢也是諸眾生皆是我子下第二合上第五廣等心上云我財物無極不應以下劣小車也不令人獨得滅度皆以如來滅度而滅度之豈非合等心義是諸眾生脫三界下第三合上第一等心章門上云各賜諸子等也諸佛禪定解脫等下第四合上第二標車章門皆是一相一種下第五合上第三正廣大車通合上高廣乃至僕從等一相是實相即法身一種是種智般若

能生淨妙之樂樂即無苦名為解脫三德高廣具足莊嚴收羅衆德名摩訶衍合上大車譬也如彼長者以三車下合第四不虛譬上答有二一全身命二不乖本心各有三別今但合不乖本心兼得全身何者佛意本為除其五濁五濁既盡大善自全上不乖心有三一標次釋三況今但合釋合況也初牒三車誘引後與大車譬次合如來初說三乘誘導然後但以大乘此合解釋不乖本心上云先作是意我以方便令子得出也何以故下合上第三況出不虛即是長者自知財富無量欲饒益諸子故許三與一非是虛也此釋小異於前前意為令諸子得出意不在三既出不與亦非虛妄今明如來出世本欲說大但為小智樂著三界故以方便誘引既已得出還與大乘即稱本心故言能與衆生大乘之法但不盡能受也若華嚴中能受即為與大不俟開一為三不能受者以方便力於一佛乘分別說三三由衆生非佛本意故用此釋成不乖本心不虛也

妙法蓮華經文句卷第五下

妙法蓮華經文句卷第五下

校勘記

一 底本，明永樂北藏本。

一 一〇二頁上一五行第一一字「志」，

南作「至」。

一 一〇三頁下一九行第六字「三」，

南、經作「二」。

一 一〇八頁下一九行「別說三三」，

南作「三說三別」。

妙法蓮華經文句卷第六上 寧一

隋天台智者大師說
門人灌頂記

第二偈有一百六十五行分為二前有一百
行頌上長行後有六十五行明通經方法上
長行有開譬合譬偈頌亦二初有六十五行
半頌開譬次有三十四行半頌合譬初亦二
初有三十三行偈頌總譬次有二十二行半
偈頌別譬總頌六意六意中止頌其四兼得
其二頌家宅兼得一門頌五百人兼得三十
子初一句明長者即頌上位號即兼得名行
歎德既有長人之德即知名行徧為國邑所
崇亦知內外年德俱高也內合婆伽婆即位
號自知具足智斷慈悲萬德也有一大宅下
第二三行一句頌上第二家宅譬為二初一
句頌宅廣大其宅久故下第二三行廣出宅
體明所燒之相故知此頌宅體也三界無始
為久非今所造為故無常卑鄙名頓弊亦云
頭殿腹堂背為舍念念相續無常為高危一
云色界為堂欲界為舍不免墮落名高危命

根支持如柱過去行業為基陛也亦云兩足
為柱根三相所遷名摧朽也意識網維以為
梁棟諸苦所壞如傾斜亦云脊骨為梁棟膝
為基陛衰老之時為頹毀牆壁者一云四大
為牆壁皮膚為泥塗四威儀不正為亂墜五
識不聰不相主境為差脫亦云牆壁圯圻如
皮膚皺朽壯色鮮淨如初泥塗老色枯悴如
後禿落髮髭朽老則皆脫落如覆苦亂墜筋
骨老弱支節不接如椽栒差脫周障屈曲者
印師云三十六物更相隔障故云周障脂腸
盤迴故云屈曲非但無常所遷亦有不淨苦
等故云雜穢充徧也今云周障是六識屈曲
是六根六識緣六根取境艱關故言屈曲六
塵徧染六根故言雜穢充徧因緣觀心兩番
釋云有五百人下第三半行頌上第三五百
人譬三乘根性為五道所攝兼得三十子譬
也從鷓鴣下第四有二十九行偈正頌上第
五火起就此復四初有二十二偈明地上事
譬欲界火起次第第二有三偈半明穴中事譬
色界火起次第第三有二偈半明空中事譬無

色界火起後第四一偈總結眾難非一就欲
界火起復為四初十七偈半明所燒之類譬
眾生十使次第第二有一偈半明火起之由譬
起五濁所由次第第三一行半正明火起之勢
譬正起五濁後第四一行半明被燒之相譬
受八苦五濁就第十七行半復二初十六
行正明所燒後一行半總結就所燒中又二
初六行明禽獸被燒譬五鈍使眾生後十行
明鬼神被燒譬五利使眾生第一五鈍使為
二初五行半明五鈍第二半行結今初五鈍
為五初半行譬慢使眾生自舉輕他如鳥為
性陵高下視八鳥譬八慢文殊問經明八憍
今用配八鳥盛壯憍如鷓鴣性憍如梟富憍如
鷓自在憍如鷲壽命憍如烏聰明憍如鵲行
善憍如鳩色憍如鴿陵他為慢自貴為憍自
愛為貪愛他為淫自忿為恚忿他為瞋自惑
為愚惑他為癡云次蚯蚓下第二二句譬瞋
使瞋有三蚯毒盛不觸而吸譬非理生瞋虻
蠅觸則螫譬執理瞋蜈蚣譬戲論瞋世人云
赤頭者是蜈蚣不赤者是蜘蛛守宮下第三

二行譬癡使癡有獨起相應起守宮百足等
兀然譬獨頭無明狄狸鼯鼠等譬相應也諸
惡蟲輩下從癡根本備起諸結也明諸使相
緣或緣三界如交橫起之速疾如馳走屎尿
下一行明癡心所著之境皆無常苦無我不
淨由癡不了於中計淨等而生染著故云蠅
娘諸蟲而集其上孤狼下第四二行明貪使
貪有二種一有力二無力有力者以威勢取
如孤狼等無力者但能從他乞索羸弊如野
干等咀嚼下明貪取境引物向己如咀嚼不
以道理如踐踏貪心取境或取一城或取一
國其有齊畔如齧齧也亦云貪心取境有用
不用有用而取如咀嚼不用而取如踐踏又
少則咀嚼多則踐踏也骨肉狼藉者積聚五
塵不知止足也由是羣狗競來搏撮者此有
力貪搏撮無力之者謂王賊也飢羸惴惴者
常不知足如飢求不能得如羸種種營見如
惴惴多欲之人雖富而貧也愛心貪食五塵
之肉見心貪食道理之骨推求知見遂多所
解即是多骨須骨之狗競來撮之諸見心中

未得正法之食名飢不能伏斷見名羸處處
求解名為惴惴一云即是貪人希求念望也
闍諍揠制第五二句譬疑使猶豫二邊名疑
未決是非闍諍意謂為是名掣復謂為非為
揠嗟嗟嗥吠者發言論決是非之理也恐怖
兩句第二結上五鈍使也處處皆有下第二
有十行明五利使為二初半行總明利使利
使徧緣五陰四諦下故言處處皆有夫鬼神
有通有智禽獸則無故以利使譬鬼神鈍使
喻蟲獸夜又下第二九行半別明五利使為
五初三行明夜又是捷疾鬼譬邪見撥無因
果人是善報譬出世因果不雜煩惱撥無此
理如食人肉也毒蟲之屬是惡報如世間因
果雜諸煩惱撥無此理如噉毒蟲之屬也享
乳產生者世間之法從自類因生自類果也
各自藏護者因能有果名藏必得不失名護
也又人肉是善毒蟲是惡邪見之心撥無善
惡因果事如噉食也享乳產生總說善惡並
有因果相生之用也食之既飽者見心成就
也惡心熾盛者見心增廣也闍諍之聲者內

心成就外彰言教宣於無因無果之法能令
聞者墮落三途故言怖畏也鳩槃荼下第二
兩行二句譬戒取鳩槃荼是鬼勝者如有漏
善能勝諸蟲也蹲踞土埤者修十善戒能生
六天六天是欲界高處事如土埤也又外道
持戒能修禪定初得欲界定或得未來定未
來定未脫欲界欲界之頂如土埤也或離一
尺二尺者得色界定如一尺得無色處定如
二尺得升上界為往退墮為反起見蓋如縱
逸嬉戲捉狗兩足一云謗無苦因如捉狗足
撥無苦果如脚加頸集本得果如狗之聲利
見撥言無集無得苦之理令其失聲也觀解
者修六行觀伏貪貪不行似如被斷為失聲
狗是欲貪兩足為覺觀覺觀往還常在貪境
數息止心是能縛義為捉覺觀也撲者貪覺
若強向不淨境作不淨觀伏貪覺貪覺摧伏
如狗被撲困不能聲又云作不淨觀如撲狗
能生禪定如被撲失聲也脚加頸者如狗雖
被撲撲動不伏更以脚加貪雖知不淨止貪
猶未甚靜更以無常觀脚加保常之頸則生

怖畏則貪覺不起也又云一往制心如向地
撲常繫在緣如脚加頸令不得起也怖狗自
樂者以修無常覺悟貪心如怖狗因得禪味
名自樂也其身長大下第三一行半偈譬身
見豎入三世計我名長橫徧五陰計我名大
計我自在不修善法即無慚愧故言裸形以
惡莊嚴故言黑無功德資故言瘦計我者不
出三界故言常住其中計我在心發言宣說
有我之相故言發大惡聲異因此說望得道
果故言叫呼求食也復有諸鬼下第四半行
譬見取咽細命危而保其壽非想無常而計
涅槃故言其咽如針首如牛頭下第五兩行
譬邊見推我斷常斷常二邊如牛頭二角爲
身是我爲我是身依我見起邊見如頭兩角
也計常斷之過能斷出世善如食人肉能斷
世善根如或時噉狗或時計常或復計斷前
後迴轉如頭髮蓬亂計常即破斷計斷即破
常加殘害究陰無有智定食飲自資如飢渴
所逼夜叉餓鬼下第二一行半總結欲界煩
惱之相亦是結利鈍衆生之相並是有漏之

心常無道味故云飢急窺看牖者明其邪觀
空理慕仰道味雖復觀察而滯著心多不會
正理如窺窻見空不得無礙也是朽故宅屬
于一人下第二有一偈明失火之由三界是
佛化應之處發心已來誓願度脫故云屬於
一人長者在宅能令慎火由出去後諸子無
知故令火起內合正由如來大通佛時常教
是等令伏五濁衆生感盡如來捨應此等於
後便起五濁他土赴緣非是永去故言近出
又云從得無生已不生三界故名不久應
來故言近壽量品云數現涅槃即是出宅意
也於後宅舍下第三二行正明火起之勢四
面即是處所身受心法等起四倒五濁八苦
故云一時相續漸增爲熾命根斷爲爆風刀
解體爲裂又云受苦悲痛呻吟聲名爲爆諸
根破壞爲裂氣斷骨離筋絕爲摧折墮落四
大解散爲牆壁崩倒也諸鬼神等下第四一
行半明被燒之相或云親屬爲鬼神哭泣爲
揚聲今例上利使以譬神鬼利使之人或計
斷常若計常者謂法定空已有還無無即常

計斷之人謂法定斷唯此一死更無復續皆
唱言定說其事已顯故云揚聲大叫也若是
鈍使及諸戒取本不計斷今見無常但生疑
怖不知出離之方故言惶惶不能自出惡獸
毒蟲下第二三行半明穴中事譬色界火起
諸部解義瞋通三界即此文也文爲四初一
行明所燒之類四禪之定譬如孔穴也雖復
不及門外敞豁猶得免於猛炎入禪定中猶
得免於欲界羸惡也利使衆生亦得禪定如
毗舍闍鬼亦住其中薄福德故一句是第二
火起之由由少福故近惡遇苦爲火所逼一
句是第三明火起之勢孔穴之中雖無猛炎
猶有熱惱四禪雖無欲界惡亦有愛味細苦
故言爲火所逼共相殘害下第四二行明被
燒之相明利鈍相奪諸使衆生得禪是同所
計各異異故互相是非如相殘害也既於禪
中起諸見則不能生無漏定慧但著默然如
飲血又著五支如噉肉野干是欲界貪未來
定已斷故言並已前死亦名食取禪定之貪
如大惡獸能吞欲界貪也欲界四倒八苦如

猛炎色界四倒此苦如臭煙亦通身受心法
四大皮肉等故言四面充塞也蜈蚣下第三
二行半偈明空中事譬無色界火起為二初
一行明所燒之類後一行半明所燒之相獸
色界定出向無色獸色羸境觀無色法如毒
蛇類火燒出穴若爾瞋通三界也若得無色
定必滅下緣故云隨取而食也非想最頂猶
尚不免顛倒諸苦如頭上火然非想亦有八
苦之火心生異念名生苦念念不住名老苦
行心擾擾妨定名病苦退定是死苦求定不
得是求不得苦求定不得必有於鄣即怨憎
會苦四陰心即五盛陰苦不能即斷有頂種
故頭上火然也無無漏故飢渴所惱猶是輪
迴周障悶走也其宅如是下第四一行總結
三界衆難非一頌總譬竟時宅主在門外
立下有二十二行半偈頌第二別譬別譬者
四今頌但三初有二行半頌長者見火次第
二有十三行頌捨几用車寢大施小譬次第
三有十七行頌賜大車譬初二行半頌見火
有三一能見二所見三起驚怖此中具頌也

初宅主下三句即是能見之人上明見今云
聞以聞代見也聞必從他門外立者正頌上
我雖能於所燒之門安隱得出也立者在法
身地常懷大悲欲救衆生不處第一義空之
座也舊云十方佛語釋迦云汝有緣諸子在
三界中善根將滅也又云衆生感佛之機為
他人也今云法是佛師謂三昧法也此法為
師即他人也若入三昧則能見機三昧令佛
見故言有人言也又云大悲是他人也云汝
諸子等下第二一行一句頌所見之火問子
本未出云何因戲來入答或曾發心名出三
界而復退還名之為入如人舉足欲出門側
而反亦名為出亦名還入也又理性本淨非
三界法因無明故而起戲論便有生死故云
先因遊戲來入也大善未著為稚小無明所
覆為無知聞已驚入下第三二句頌上即大
驚怖而起大悲心方宜救濟下第二十三行
是頌捨几用車為二初有五行半頌上教子
不得上開譬中有勸誡上合中但合勸今但
頌誠誠文有三今明亦三初四偈半頌上我

當說怖畏擬宜次諸子無知下第二三句頌
不受誠嬉戲不已第三一句正頌息化方宜
者擬宜大教也告喻即是說衆患難誠教之
義指不已一句頌上視父而已放捨苦言之
義也是時長者而作是念下第二七行半偈
頌上用車上有四一者擬宜三車二知子先
心三歎三車希有四適子所願今頌中但有
三義略不頌知子先心前三行頌擬宜告諸
子下第二三偈勸三車希有上明勸示證
三義今頌亦三義重頌勸成四初一行頌勸
次半車下第二三句頌示次汝等出來第三
一句又頌勸次吾為汝等下第四一偈頌證
聞說如此諸車下第三一行半偈頌適子所
願今總頌上六句馳走頌上見諦空地頌上
無學也從長者見子得出火宅下第三有十
七行偈頌上第三等賜大車譬上文有四一
見難二索車三等賜大車四得車歡喜今頌
亦四初五行頌免難歡喜第二三行頌索車
第三七行半頌等賜第四一行半頌得車歡
喜就初五行頌上諸子免難又二初一行頌

免難次而自下第二四行頌歡喜坐師子座者有二釋一云諸子坐座得出三界故無畏也二云是長者坐座長者見子免難即得無畏初在門外猶有憂畏故云立今得出門方坐無畏故方便品云今我喜無畏免難文竟而日慶下第二四行頌長者歡喜如文知父安坐下第二三行偈頌第二索車如文長者大富下第三七行半頌上第三等賜大車上文有二章二廣二釋合有五文今但頌四不頌廣等心不頌釋等心初一行超頌第四釋大車屋盛稱庫地盛曰藏行具一切法名藏眼耳六根具一切法名庫云云次以眾寶物下第二六行偈頌第三廣大車次二句頌二章門以是妙車一句第三頌第二大車章門等賜諸子一句第四頌初等心章門也諸子是時歡喜踊躍下第四一行半頌得車歡喜遊於四方者乘中道慧橫遊四種四門四種四諦豎遊四十一位究竟常樂我淨之德故言嬉戲自在也告舍利弗我亦如是下第二三十四行半即是頌合譬也初四行頌合總譬

但作四意兼得六譬我亦如是一行頌合長者上半頌合位號下半頌合名行兼歎德義七種方便賢聖中尊九種世間之父一切眾生皆是吾子一偈頌合五道義兼三十子三十子是緣因子一切眾生即是正因子也三界無安半偈頌合家宅兼得一門義乘苦充滿一偈半頌合火起合總譬竟也從如來已離三界火宅下三十行半第二頌合別譬上頌開無不虛今頌合則有初三偈頌見諸眾生為生老等合見火譬上頌見火譬文有三今合亦三初一偈頌上如來能見正由寂然閑居能見五濁諸子也即合聞有人言次今此三界下第二一行半頌上所見諸眾生為生老病死之所燒煮合第二所見火譬唯我一人下第三半偈頌上佛見此已便作是念合驚入火宅也雖復教詔下第二四行頌捨几用車譬為二初一行頌捨几等上開譬有三擬宜無機息化今此一偈亦有二意但總略雖復教詔一句頌擬宜而不信受一句頌無機下二句頌息化或可下二頌無機也貪

著深故頌上未免生老病死憂悲苦惱等也以是方便下第二三偈頌合用車教子得譬上文有四今但頌三合亦三略不合知子先心初以是方便一句頌上但以智慧方便欲擬宜從為說三乘下第二一行一句頌合上第三歎三車希有是諸子等下第三一行半頌合第四適所願上合三乘各有四句今則總頌若心決定者從苦法忍已上是真決定此之一句總頌三乘馳走之位後具足下一行各頌三乘爭出之位也汝舍利弗我為下第三有八行頌合第三等賜大車譬長行不合索車及與歡喜頌開則具頌今合等賜歡喜不合免難索車去取終成有二文又二初五行頌合等賜後三行頌歡喜上合等賜有四不頌其二今合又略但合二章門及第三廣大車又頌釋有車之由初汝舍利下一行先頌大車章門上文諸佛禪定等次汝等若能下第二一行頌合等心章門上云是諸眾生脫三界者也次是乘微妙下第二三行頌合正廣大車上三皆是一相一種等次無量

億千諸力解脫下第四一行是頌上有車之由也得如是乘下第二三偈頌得車歡喜就此復二初二偈明各得大車後以是因緣下第二一偈結勸信也今初二偈日夜者初得佛知見中道智光如日分無明在如夜自得中道智如日慈悲入生死如夜常行二法故言遊戲三乘之人同入佛智故云與諸菩薩及聲聞眾又此明自行化他自獲是乘故言日夜遊戲以此化他故言與諸菩薩及聲聞眾能化三乘同乘寶乘也次一偈所說一乘無三因緣於十方土審實而求唯一無二除佛方便則不在言耳他云菩薩若不索車何因乘車歡喜告舍利弗汝諸人等下第四有十五行半偈頌上第四合不虛譬上合有二先舉二譬後合不虛今但頌合不虛文為二初三行半正頌合不虛章門次若有菩薩下第二十二偈頌合釋不虛身子作稱本心不虛譬父本欲令子得出難故設三車既得免難乃至不與小車亦不違先心是故不虛佛頌其譬則明不虛明佛本意即欲說一但為

五濁不肯信受故說於三濁郭既除還說一大即稱本心也今初章門為三初一行先定父子明本欲與大故文云皆是吾子理應平等與大也次汝等下第二一偈明乃說三乘意為除郭故云汝等累劫眾苦所燒次我雖先下第三一行半既已郭除還遂本心與大乘法故云今所應作唯佛智慧也若有菩薩下第二十二行頌合釋還釋前三意初二偈釋同皆是子理應平等次若人小智下第二七偈釋不能受故乃說三乘次其實未下第三有三偈釋後若堪能還與其大今初二行若有菩薩者方便三乘所化眾生皆是昔日結緣佛子亦皆同有真如佛性故云皆是菩薩也若人小智下第二七行明小智郭重不即信受為是方便開三接引小智為說苦諦者聲聞於三乘中最小復以苦諦為初門眾生心喜者稱其本習則喜本獸生死自求涅槃今聞出離即會宿習故歡喜此中正明有作四諦但離虛妄者無明已是不實通惑附無明起故呼之為虛妄有作四諦但除此惑

名為解脫脫於分段未脫變易故非自在其實未得下第三三偈釋郭既除情根又利還遂本心與大乘佛法本欲與一切解脫今汝始斷分段非大涅槃以其未得一切故終是未稱本心故言我意不欲今至滅度今則還令得無上道入大涅槃乃是究竟稱佛本心一切解脫即是無作滅諦無上道即是無作道諦用二諦破無作苦習昔欲說此而此眾生不堪郭既已除還說此也佛為法王於權實法已得自在開三顯一實當有虛也汝舍利弗我此法印下六五行偈勸信流通信者信佛說不說也勸者勸可通不可通有此二義故言勸信文為二一標兩章二釋初一行標說不說者如來說此法印為利益世間故說也不說者四十餘年未是說時五千未去是故不說也次在所遊方下半行標可通不可通章者勿妄宣傳也惡者強說令其墮苦善者不說悞其失樂若大悲愍惡則不為通若大慈念善則應為通是名標可通不可通章也從若有聞者是第二釋又為二初

八行釋可說不可說第二五十行半釋可通不可通今初八行明如來利益世間之相也通論三世利益別論今二乘入信阿鞞跋致是觀現在益曾見者觀過去善為說也信汝見我者觀未來善為說也下文云若深信解者見佛常住靈鷲即其義也斯法華經一行是結上開下如來觀知三世利益是故為說淺智不解則不為說此釋如來說不說章也從憍慢懈怠下釋行人通不通章又二初三十六行半明若用大悲門莫為惡說先引惡數必起惡謗獲惡果報是故大悲不可為說斷世間佛種者淨名以煩惱為如來種此取境界性也小品以一切種智學般若此取了因性為佛種涅槃用心性理不斷此取正因性為佛種今經明小善成佛此取緣因為佛種若不信小善成佛即斷世間佛種也若有利根下十九行釋弘經時用大慈門善人應為宣說今不失樂夫弘通之要諧和兩門今其得所是善流傳若不得所是妄宣傳文為二初十七行有五雙十隻善人之相可為宣

說後二行總結應可說也初過現為一雙利根是現在植善是過去強識是現在見百千是過去也二上下為一雙修慈是慈下恭敬是尊上也三內外為一雙捨惡親善是外求持戒如珠是內護四自行化他為一雙質直敬佛是自行譬喻說法是化他五始終為一雙四方求法請益之始頂受專修是歸憑之終云告舍利弗下兩行總結善信甚多略舉十相示流通方法顯慈悲兩門可通不可通之大要也

釋信解品

有人言信解三法謂一往化隨逐化畢竟化昔說大為一往背大後為隨逐父子相見為畢竟又人天善為一往說小乘齊法華為隨逐說法華得記為畢竟又初說二乘為一往轉教為隨逐法華為畢竟又轉教為一往歷方等為隨逐悟一乘為畢竟又說法華為一往十地常教化為隨逐至金剛心為畢竟又結僧那為一往中間為隨逐得佛為畢竟私謂諸解重疊玉屑非寶夫一往非本懷畢竟

是宗極說人天二乘為一往可非本懷昔為說大今說法華簡是畢竟那稱一往若法華畢竟而更成一往人天一往還成畢竟則大顛倒又二乘是一往草庵須破昔大為一往繫珠亦須破若一破一不破一是一往一非一往又父子相見是畢竟者前畢竟應悟一則後畢竟無復用若後畢竟乃悟一前畢竟非畢竟節節有妨今皆不用有人言此品是迹何者如來成道已久乃至中間中止亦是迹耳私謂義理乃然在文不便何者佛未說本迹那忽豫領若未會三已應悟一云今釋品者夫根有利鈍或有厚薄說有法譬悟有前後法華座前猶如豌豆文云如來說法既久我時在座身體疲懈但念空無相願於菩薩法都無一念好樂之心初聞略說動執生疑後聞五佛蒙籠未曉今聞譬喻歡喜踴躍信發解生疑去理明歡喜是世界信生是為人疑去是對治理明是第一義以是因緣故名信解品稟小大教初華凡成聖各有次位但小乘信行從聞生解苦忍明發信則稱行

法行歷法觀察苦忍明發法則稱行若信行人轉入修道轉名信解法行人入修道轉名見得準小望大亦應如此中根之人聞說譬喻初破疑惑入大乘見道故名爲信進入大乘修道故名爲解文云無上寶聚不求自得

我等今日真是聲聞以佛道聲令一切聞聞圓教入圓位故名信解品本迹者四大弟子久入大乘成就佛法迹引中根示初信解故名信解品此是領解段近領火宅遠領方便文爲二一經家敘歡喜二白佛自陳先敘內

心次敘外敬善吉獨稱慧命三人摩訶者通論皆大皆慧別論善吉解空空慧爲命此約行也諸慧人中佛慧第一佛於般若命其轉教其爲慧人所命故云慧命三弟子被命少不以空爲行宗此約教也摩訶如前說云得喜之由遠聞方便五段法說經家但敘聞希有法聞授記二種或可聞希有法敘四段見受記是第五段也如此聞見昔未曾有歡喜之由也發希有心者敘近聞譬喻四番之說希有心發心發故名之爲信以信故入入歡

喜位即信解品意也從座起者敘外敬如文例身子亦應三業領解準前可解白佛下口自陳文爲二初長行及七十三偈半正陳得解次十三偈歎佛恩深此解由佛故先陳次歎長行又二初略法說二譬廣說略又二法

說略舉譬法說又二先明昔稟三故不求二明今會一故自得不求中有標有釋標爲三一居僧首故二俗年邁故三證得故初居僧首者我法臘既高晚學以我爲軌忽改途易轍棄小求大爲後來所嫌自固護彼所以不

求二俗年已邁若作菩薩當專任大道廣度衆生今既朽老無所堪任是故不求三已得涅槃無爲正位不能發大心高原陸地不生蓮華盡無生智已立無所依求所以者何釋三不求文不次第先釋得涅槃不求次釋年邁即兼僧首或指昔說法既久心不喜樂釋居僧首不求既言在座復道年朽知釋僧首也釋不求如文我等今於佛前下陳得解之由由遠聞五章略廣開三顯實是故慶幸獲大善利者正陳得解是近聞四番譬喻希有

之法而獲開悟開悟善利也無量珍寶下第二是略舉譬譬喜不求而今自得希有法寶也從世尊我等樂說譬喻下是廣領解有開譬合譬欲開先詰發云譬爲五一從捨父逃逝下名父子相失譬近領火宅總譬遠領方

便略頌二從窮子備賃下名父子相見譬近領火宅見火遠領方便我以佛眼觀見三從即遣傍人急追將還下名追誘譬近領火宅捨几用車遠領方便寢大施小四從過是已後心相體信下委知家業譬此非領上近遠

乃追取方等彈訶大品轉教意耳五從復經少時父知子意下名付家業譬近領火宅賜一大車遠領法說正直捨方便又合第四第五共爲一領付譬在下更明其意也舊以西方無量壽佛以合長者今不用之西方佛別緣異佛別故隱顯義不成緣異故父子父義不成又此經首末全無此旨閉眼穿鑿今依文附義若釋窮子取二乘人半字法銷文若釋長者取盧舍那佛滿字法門銷文何者宅內長者脫瓔珞著垢衣衣瓔有異人祇是一譬

盧舍那佛隱無量神德示文六金輝執持盡
器設三乘教隱顯有殊何關體別舍那著脫
近尚不知彌陀在遠何嘗變換云父子相失
譬又為四一子背父去二父求子中止三子
遇到本四其父憂念四段各兩初兩者一背
父而去領總譬中五百人昔結大乘子父尋
復失解流浪五道故言或二十至五十歲
通是佛子子義微弱故言幼稚非結緣已界
故言久住他國二者向本而還領總譬三十
子此緣有微著之義故言長緣既經苦關
佛大悲故言遇到本國父求子而止為兩者
一父求子不得領總譬中長者從衆生退大
之後伺其大機未得其會故言不得二中止
一城其家者領總譬中宅大富者領總譬中
長者德業內外財富意耳子到父城為二一
到城之由領火起苦惱之相從退大已後處
處遊歷備嬰辛苦二遂到父城者以苦為機
扣於大悲故言遂到父城其父憂喜即是兩
者一念失子苦二念得子樂領總譬中一門
子既幼稚取門不當動父之憂元以此門通

之故動父之喜分章竟銷文者初子背父去
有二初譬如有人領二十子譬二乘人菩薩
位行難知且齊已領耳年既幼稚者舊云聞
法少為稚若爾下文云長大應是聞法多今
以無明厚重覆障解心解心無力故言幼稚
善根熏被稍稍欲著名為長大捨父逃逝者
退大為捨無明自覆曰逃趣向生死為遊問
佛捨應後衆生起惑是父離子非是子捨父
答由衆生不感佛則去世還成子捨父義久
住他國者涅槃法界是佛自國生死五欲是
為他國本求出離而退墮不反故云久住或
十是天道二十人道五十是五道約於一人
備輪諸道年既長大下二向國而還者幼有
二義一癡小故二未遭苦故則不知還譬結
緣已後大解未濃如癡不反尚有殘福耽迷
不反今習業冥熏微知向道遭苦失樂思求
出要此二為機扣佛名為漸向父國上文云
若人遭苦為說涅槃若以人天二善非感佛
緣在三界中不見佛父為窮不得出要之術
又為第八苦火燒故為困馳騁四方以求求

會者舊云人天五戒十善各有因果以為四
方用自資給又於四生營生以求衣食下文
云一百三十劫今乃得一見彼諸劫中非無
人天因果不能感佛故知此善非見佛機今
佛既未出諸凡夫人身受心法起於四見於
中求正道如求食求助道如求衣以厭苦求
理為可化之緣佛初出時諸外道等皆先得
度即此意也大經云諦觀四方喻於四諦準
此可知漸漸遊行遇向本國者明其厭苦希
脫邪求涅槃雖非本意亦蒙值佛故云遇向
也本國如上說下文明城舍云何分別一切
佛法為國此義則寬城語小密以斷德涅槃
防非禦惡為城舍語又親同體大悲為舍也
其父先來求子不得下第二求子中止譬亦
為二初從退大已後求機不會不故名不
得二中止一城者不為一子而廢家業譬佛
不以一處無機而廢餘方施化舊云二萬佛
後釋迦佛前兩楹間為中止今謂中義可然
止國城家皆不可用今取方便有餘土為國
在同居寶報兩間為中有餘涅槃為城住此

涅槃名止處此為家起勝劣兩應劣應聲聞勝應應菩薩五人斷通惑者同生其土皆為菩薩佛以勝應應之純以大乘家業訓令修學中止於此同覓同居子機非但中義得合國城家業皆悉分明大富者實相境為家具足萬德名為富五度福德名為財般若智慧名為寶導一切悉摩訶衍名無量金銀珠等是大乘三十七道品也此即領上長者大富義也倉庫盈溢者在內為盈在外為溢盛米為倉盛物為庫倉譬禪定禪生百八三昧故庫譬實相能發十八空智慧故自資為盈外化為溢領上多有田宅義也僮僕者方便知見波羅蜜皆悉具足屈曲隨機稱事稱理此領上又多僕從就位為語二乘及通教菩薩別教三十二心悉如僮僕別教十地如^十臣十向如佐十行如吏十住如民初入佛境界率土之賓無非王民雖得為民比吏佐等猶為踈遠十行歷別修習諸法種種驅馳如吏十迴向事理稍深職近王邊如佐十地輔佛行化降魔制敵故如臣也一心三觀如象

運圓教大乘次第三觀如馬運別教大乘即空析空觀如牛運通教等大乘析法觀自行如鹿羊等運二乘之法無數者權實諸法皆名車乘權實智觀名象馬牛羊非但教法甚多觀智亦復無數也出入者二而不二是入不二而二是出又入不二而二是入二而不二是出無量還一是入一中無量是出化他用為出自行用為入出法益眾生為息化功歸己為利乃徧他國者徧於三土行於非道通達佛道即其義也唯法性是已國耳商估賈客亦甚眾多者諸菩薩是商人又徧入三土以求法利故云眾多此土菩薩往他方聽法他方大士來此聞經往還採利也又應化二身如賈客將實法徧入三土化益眾生而歸法身故云甚多如世間人令他捉財興生亦自興生也時貧窮子遊諸聚落下第三是子還近父譬此亦二一求衣食二到父城初內合退大乘已備遭諸苦深起厭患欲求出離取理不中致成邪僻因邪慧歷心易可入正以求出世為感佛由也觀察五陰為聚落十

二入為邑十八界為國歷此求理名求衣食二遂到其父所止下此是正向其父所止之城者苦境為機感佛大悲名為到城城即涅槃涅槃通半滿眾生習解可有得涅槃之義故言到城父每念子下第四即是父憂念子譬此中亦二一念失子之苦如來自昔至今恒思子大機故言每念五十餘年者五道也開鬼出脩羅故言餘也未曾說者未曾向方便有餘土中臣佐吏人說有此子機緣也又應世已來自昔華嚴方等小品諸座未曾向諸大士說此聲聞本是大乘之子既非佛子不解佛法或如聾啞或花著拜座或棄鉢茫然種種不逮也心懷悔恨悔昔不勤教詔致令無訓逃逝恨子不惟恩義踈我親他內合如來悔不殷勤令入內凡遂使退失本解恨其無心不能精進固志逃迷不返故言悔恨也自念老朽者化期將畢無傳大法之人如老朽而無子也問法身所化諸菩薩等兼堪補處何遽此憂答法身所化本無興廢誰談老朽此非所論今明化身眷屬則有二種一

法身大士共相影嚮迹雖弟子本或是師亦不約此自念老朽也二者同居凡夫始從化佛初發道心者名此為子也子繼父業令胤族不斷若身子受決作華光佛則一方佛種相續不斷大乘家業遞相傳付若身子無可化之機則大乘法財現無付囑後來眾生佛種安寄老朽與歎正為此也復作是念我若得子下二念得子為樂可度之機名為得子與受佛記名付法財稱於本心復言快樂領上總譬竟

妙法蓮華經文句卷第六上

妙法蓮華經文句卷第六上

校勘記

- 一 底本，明永樂北藏本。
- 一 一一一頁下一九行第一〇字「加」，
[南]作「枷」。末行第一一字、次頁
上二行第八字同。
- 一 一一二頁上一八行第二字「加」，
[南]、[徑]作「如」。
- 一 一一三頁下一七行首字「見」，[南]、
[徑]、[清]作「免」。
- 一 一一六頁上六行首字「者」，[南]作
「結」。
- 一 一一六頁下二行第七字「箇」，[清]
作「固」。
- 一 一一六頁下一九行第一〇字「革」，
[南]作「隔」。

妙法蓮華經文句卷第六下

淨二

隋天台智者大師說
門人灌頂記

爾時窮子備貨下第二父子相見譬近領火
宅中見火遠領方便中五濁意為三一明窮
子備貨領火宅所見之火法說所見五濁二
父見子領火宅長者見法說中佛眼見也三
歡喜適願領火宅中驚怖法說中起大悲心
法譬並明父前見子此中明子前見父就佛
則靈智先知機後起應故言父先見子若約
衆生必先機而後應故言子先見父機應不
可思議不後不前故前後互舉也今取文便
但為二段一子見父二父見子此兩段中各
復為四初子見父四者一見父之由由求衣
食二見父之處處在門側三見父之相踞師
子牀四生畏避悔來至此見父之由由獸苦
欣樂推求理味漸漸積習遂成出世善根故
言備貨履轉以此善根能扣佛慈悲故言遇
到父舍父喻道後法身舍喻無緣慈悲大小
二機雙扣此舍有大機故言遙見其父有

小機故住在門側若唯小無大則應不見尊
特之身父不應言我財物庫藏今有所付若
唯大無小不應住立門側子不應言非我備
力得物之處也見父之處者即是門側二觀
為方便即門二邊圓中之機當門正見二乘

偏真故言門側但空三昧偏真慧眼傍窺法
身耳遙見其父正見有二種一近見二遠見
今言大機始發扣召事遠是故言遙又機微
非應赴名之為遙也踞師子牀者圓報法身
安處空理無復通別二惑八魔等畏故云踞

師子牀也華嚴說第一義空四無所畏為牀
也寶几承足者定慧為足實諦為几無生定
慧依真如境也婆羅門舊云高良大姓八地
已上也利利者七地已還也居士內凡夫等
舊云此經中明法身非常住法身也乃是他

方應身將應此土即為此間之法身故有內
凡諸人圍遶今謂不爾若作他方佛者子父
機應體用著脫皆不成如前說又不容小機
扣此大機扣彼亦不應結大緣於彼結小緣
於此亦不應雙結在此雙應在彼如是大惑

亂今明勝應應菩薩即盧舍那尊特身大機
所扣者也劣應應小乘丈六弊衣小機所扣
者也今經明常住醍醐與涅槃等法身圓頓
與華嚴等所譬長者威德侍衛利利婆羅門
恭敬圍遶悉指華嚴中眷屬皆無異也所說

法相如彼所明亦復無別婆羅門名淨行貴
族高潔即等覺離垢菩薩也利利即是王種
九地已下初地已上也居士富而不貴即三
十心也真珠瓔珞者即戒定慧陀羅尼三昧
四瓔珞也價直千萬者即四十地功德以嚴

法身也吏民僮僕者異門明義即是東方便
教斷通惑者名為民稟別教斷通惑者名為
吏若同門明義者還是方便波羅密也內與
實智同外與機緣同喻如吏民有內奉外役
之義也白拂者即是權智之用也左右者右

即入空智用拂四住塵左即入假智用拂無
知塵此二為中道方便故言侍立云云覆以寶
帳者真實慈悲也垂諸華幡者華即四攝幡
即神通香水灑地降注法水灑諸菩薩心地
以淹惑塵亦是定水灑散心也散眾名華者

布以七淨華謂戒定慧斷疑道非道知見淨
斷知淨也戒者攝律儀等三種戒也定者首
楞嚴等也慧者實智慧也斷疑者已度二諦
之疑也道非道淨者行於非道通達佛道也
知見淨者智德圓滿了了見佛性也斷知者
斷德成就無明永盡也羅列寶物者羅列諸
地真實功德也出內如前釋云云威德特尊者
光明無邊色像無邊相海巍巍堂堂此義須
作舍那之佛豈得作餘釋耶窮子見父有大
力勢下是第四見父畏避大力勢者智大故
名大力神通大故名大勢如上身手有力義
也恐怖者小機劣弱怯懼大道也悔來至此
者佛本欲以大法擬之應不稱機但有退大
之意故言悔來至此也竊作是念者機中潛
密冥有此事非是顯對見勝應身也或是王
王等者波旬是王徒輩為等小機灰斷無言
說道絕於色像既見勝應之像非天人所及
所說法相迥異二乘小智薄德未曾見聞便
謂是魔是魔所說略開三顯一身子狐疑將
非魔作佛惱亂我心耶若初用大逗小疑佛

為魔有過今日也復次勝應譬長者長者即
表報身佛故是王等法身是報師師即如王
諸經多名是經王智契於法即是智與法等
故名報佛為等此乃大乘法報非是小乘得
益之處故或是王王等也非我傭力得物之
處者小機不能受大化也不如往字至貧里乃
至衣食易得者淨名云能以貧所得法度斯
下劣也但空之理不舍萬德非如來藏故言
貧里偏空稱於小智故言肆力有地也衣食
易得者能有餘涅槃無漏衣食行行衣惠
行食也若久住此或見逼迫強使我作者行
大乘道經無量劫故言久住我本厭怖生死
若修大乘必入生死廣學萬行故言逼迫我
本樂小而今今我發大乘菩提心是為強使
捨大取小故言疾走也時富長者下第二父
見子譬亦有四一父見子處二見子便識三
見子歡喜四見子適願見子處者即師子牀
也如來法身居第一義空無畏之境明照機
也見子便識者知是往日結緣衆生也心大
歡喜者佛恒伺子機今機來稱慈是故歡喜

即是領法說而起大悲火宅即大驚怖彼明
拔苦故言驚怖此明與樂故言歡喜即作是
念庫藏今有所付者是見子適願昔見衆生
退大取小貧里求食資生艱難常欲與財無
機不得今日機來稱大慈心故言庫藏今有
所付我常思念者明其非但貧無大財又流
轉生死衆苦所逼為大悲所痛故言常思念
之雖欲救拔無機字匱乏故云無由見之今有
可度機生故云而忽自來稱大悲心故云甚
適我願我雖年朽猶故貪惜者釋於適願之
由由一期化訖故言年朽未見大機法無委
付將來之徒從誰得脫為可度者故言貪惜
今機自來無此憂念故我願得適也即遣傍
人急追將還下第三明追誘譬近領火宅捨
凡用車遠領法說寢大施小此文為二初遣
傍人追次遣二人誘前追領上身手有力而
不用之但方便品總誠勸為一釋文為三火
宅開勸出誠釋各為三而放捨文略長行合
勸不合誠而息化文廣偈中但頌誠不頌勸
又不頌息化皆有出沒火宅長行誠勸釋各

有三今則併領即遣傍人疾走往捉領上勸門之擬宜窮子驚愕領上勸門之無機強牽將還領上誠門之擬宜窮子自念無罪至悶絕躄地領上誠門之無機從父遙見下併領勸誠之息化此探取佛意佛雖勸門擬宜無

機意猶未息更作誠門擬宜事不獲已然後息化也遣傍人者初勸門擬宜也智是能遣教是所遣理義為正教義為傍從佛出大乘十二部擬宜眾生無機不受於其如乳故言遣傍人也又傍人者傍臣佐等也即是遣法身菩薩為說大乘如華嚴中今四菩薩說四十地即是遣傍人也疾走往捉者大乘明義顯露正直用此赴機疾極苦提故大車中云其疾如風若以菩薩為傍人者菩薩自有神力又被佛加亦能令彼疾入菩提窮子驚愕即勸門無機既現無機縱昔曾發廢久不憶卒聞大教乘心故驚不識故愕稱怨大喚者小乘以煩惱為怨生死為苦若勸煩惱即菩提即大喚者怨枉若聞生死即涅槃即大喚稱苦痛無機不受勸門也我不相犯者我不

于求何意用大化我此領勸門二意未領息化次再喚不來執之逾急者領擬宜誠門也前明勸善猶是容與我當為說怖畏之事即是急切強牽將還者誠以苦言今其速惡內既無機外逼大化即是強牽將還也自念

無罪者領不受誠門也罪者慈悲也眾生罪故入生死獄菩薩亦同罪入獄二乘人無大悲名為無罪今入生死即是而被囚執也無大方便而入生死必當永失三乘慧命故言必死思此等事故言轉更惶怖也強以大教

小智不解故言悶絕即起誹謗必墮三途故言躄地亦是迷悶無明地從父遙見之即是第三放捨勸誠息大乘化就此為四一思惟息化二釋息化三正息化四息化得宜初有兩意一知大志弱二知小志強父遙見者小去大遠故名為遙是結緣子故言為見而語使言者約教為使者智本說教智知無機智慧故教息約人為使者語諸菩薩不須現汝尊妙之身今二乘見淨名中攝汝身香無今彼諸眾生而起惑著普賢入此娑婆促身

今小皆是其義也勿強將來者既無大機恐傷其善根故言勿強也私謂不須此人者思惟息勸門擬宜勿強將來者思惟息誠門擬宜也冷水灑面者第二知有小志宜以灰斷理水除見思之熱面者獸生死名背向涅槃

如面也醒悟者開小逗機得離煩悶悟四真諦也草復與語者決定應息大乘教也所以者何下第二釋息化之意正獸苦欣空親狎下劣無慈悲心即畏難大法且任其小志抑佛本懷所以息化也審知二萬億佛所曾發道心非都無大機也且息大化佛意未已更俟後期不語他人者於昔小乘教中隨他意語方便覆護稱是聲聞不說隨自意語云是菩薩也使者語之下第三正明息化我今放汝即是知大機弱隨意所趣即是知小善強以此二緣故息大化也窮子歡喜下第四即是息化稱機不為大教所逼是故歡喜無謗大罪得免三途故言從地有小善生故言而起又前擬宜大法迷悶不解臥無明地今逗以小可得醒悟故言從地而起於四諦中欲

求道法故言往至貧里以求衣食或於四見之中求道故言貧里將欲誘引下是密遣二人誘引此為二一齊教近領三車救子遠領波羅奈施權次從又以他日下取意領法身地久照方便非道樹始知用小早鑿眾生致難尊特親狎垢衣故追領住前以成今解問四大弟子何因能知法身久照答推近知遠若始道樹知無大機不應兜率降神正慧託胎乃至現有煩惱納妃生子三十四心後身斷結驗知脫大小相海微妙瓔珞更著龜麟丈六垢衣其已久矣今初且釋齊教領者譬喻品文有四一用方便擬宜二知先心三歎三車四適其所願方便品亦四今領亦四從將欲誘引下是領上擬宜時二使人即求窮子既已得之領上知子先心有機也具陳上事領上歎三車希有窮子先取其價下領上適願爭出火宅也初將欲誘引者既息大化不容孤棄欲設方便故言將欲密遣二人者四弟子齊已分領不涉菩薩故言二人約法是因緣四諦約理是有作真俗約人是聲聞

緣覺初擬大乘云密遣傍人表一實諦一大乘教一菩薩人今明方便隱實為密指偏真為道約教隱滿字為密指半字言遣約人內祕菩薩行故言密外現是聲聞故言遣形者二乘教中不修相好但說苦無常不淨即是形色憔悴也約人則諸菩薩隱其本色示以迹形非了義說無有十力無畏名無威德也汝可詣彼者即以小教擬小機也大教明理直實故言疾走往捉小教明理迂隱故云徐語此有作處者見修兩道是斷惑作處也倍與汝直者五戒十善止出三途今四諦十二因緣能出生死是為一倍又外道六行但能伏惑今修四諦則能斷惑得至涅槃是為二倍也窮子若許者有機是許即設教無機是不許不設教欲何所作者二乘唯欲除惑取證不論淨佛國土成就眾生所以言雇汝除糞我等二人亦共作者二乘鈍根憑教修行方能修業約理者即是智諦相資也約人即權人共實人修行也時二使人即求窮子者第二審知有機故言已得領上知先心也具

陳上事下第三陳說雇作領上歎三車也除苦集之糞取道滅之價窮子先取其價尋與除糞下第四尋即為作領上適願爭出火宅也二乘慕果行因所以先取也其父見子慙而怪之者怪不求佛道慙其取阿羅漢所失者大所得者寡故言怪也齊此領法譬中意其文竟從又以他日下第二是取意領靈智先照久設權謀崎嶇隨逐非止樹下始見因緣已如上說此文為四一又以他日取意領先權智久欲擬耳二見子憔悴是久知方便是其玩好三脫妙著羸領久知須歎三車四親教子作久知適願受行今初又者鄭重辭也將欲取意領法身之地久知大小之機一三施化重述佛意故標章稱又也他日者二乘自謂方便為已非二乘法為他即擬法身也日者時也亦智也依法身之時用智照機故言他日若從此義實智照實為自權智照方便為他齊教領領化身用事為已日非化身用事為他日若就如來自行權實之智皆名為已如來化他權實之照皆名為他如來

自他權實之照照實為己照權為他此之探領法身之時用化他之權智照於權機若有若無照用權事若可若否皆是權智所照故言他日若從此義齊教領領化他之權事故二乘稱己事探領領自他之權此權非二乘事故稱為他雖有兩意他日俱成今依二乘所領又逐他日之文以探領領法身中照機也憲牖者偏見則小表權智照彼偏機也遙者小去大懸故名為遙見子者昔曾種大稱之為子以大擬之故言為見憲牖偏狹未宜大化故息大而施小也羸瘦下第二是領先知有小玩好也修因智力少為羸修因福力少為瘦內怖無常為憔悴外遭八苦為悴四住為羸土無知為塵空也即脫瓔珞下第三是領先知須歎三車希有也脫妙服譬隱報身無量功德四十二地戒定慧陀羅尼等瓔珞寂滅忍細軟上服大小相海嚴飾之具容服若盛子則驚畏二乘不宜見此相好是故脫之更著羸弊者現丈六形是羸生忍法忍是弊也塵土全身者現有煩惱有為有漏也執

除糞下但治見思有漏之法不論諸地清淨智慧也左手喻實右手喻權權用便易自此法斷結成佛又用此化人狀有所畏者示同怖生死又有寒風馬麥之報也語諸作人下第四親教子作譬也即是道品中七科法門以顯除糞之相領上諸子心各勇銳互相推排競共馳走爭出火宅也一者語作人譬譬四念處是外凡位二令勤作勿得懈怠譬譬四正勤三咄男子勿復餘去譬譬四如意足四好自安意下名安慰譬譬五根五所以者何下名無五過譬譬五力此前四句是第二內凡位六即時長者字以為子譬譬八正七雖欣此遇下名教常令除糞譬譬七覺此二句是第三聖位也今初語諸作人者即是說三藏示四念處是除糞之器斷結之境故遺教云常依念處行道能破四倒領火宅中適願勇銳即是聞慧也第二勿得懈怠者即是令勤修四念處也若起懈怠不能滅二惡不能生二善以二勤故能發煖火對火宅互相推排入修慧煖位也方便故得近其子

者念處未得理火溫心猶為疎外不可附近以初得煖方便則可附近也第三咄男子者咄是驚覺亦是責數上正勤中紛動即是智法如男子是陽性如意足是定法如女人是陰性良以正勤榮動不得與真相應故咄驚責數令捨散入靜故咄男子也汝常此作勿復餘去者念處正勤動不專一不名為常四如意中定不異緣思惟則定思惟則斷定斷專一故常不紛動故勿復餘去此猶在互相推排中即是頂法之位也當加汝價者煖法觀中不能發真如意觀中能發無漏故言加價若有所須者漏無漏善助道正道皆從如意觀求欲須即得四禪體舍支林如盆器生空羸如米法空細如麵此即正道四諦下十六諦觀無常如鹽苦如醋此即助道如米麵難食須鹽醋和之正道難顯須助道助之莫自疑難者結上正助審在如意觀中故令勿疑決定可辨如已物想故言勿難亦有老弊使人者若欲直取通以代手足如使人驅役者如意觀中亦有此通但通劣弱事同老弊

雖不丁壯亦堪運役又以正道求理正道弱未能發真欲須助道九想十想八背捨等助道使人者如意觀中亦有此法若得助助正即成共解脫人也第四好自安意者得五根安固難壞也我如汝父者忍解隣真似像未實故言如父亦是如子勿復憂慮者令其安意破壞見思也第五我老汝少者佛居道終已具智斷故言老大汝居道始未有智斷故名為少壯此即忍法位也無五過者得五力離五惡法也得信力故不欺精進力故不怠念力故不瞋定力故不恨慧力故不怨言餘作人者速指外道諸見求理名餘作人近指煖等四位未免五過亦名餘作人此文無五過即五力也自今已後如所生子者下忍十六利那時節猶長中忍雖復縮觀亦未是一刹那若上忍世間最後一刹那心隣真逼聖故名此位為如所生子即世界第一法位也第六即時長者更與作字名之為兒者得八正入見道中競共馳走故言名之為兒世界第一法與真不久故言即時阿含說五種佛子四

果及辟支佛名佛真子菩薩不斷結子義未成爾時窮子雖欣此遇下第七常令傭作譬譬雖為子思惟未盡猶居學位未得無難故二十年常令除糞亦復自知不任紹大正是依教修行盡苦耳故云猶故自謂客作賤人若得初果歇小樂大大乘機發者即應授以大乘又不須進斷其餘殘結正由不捨小志大機不發以是且今依教盡漏故言由是之故二十年中常令除糞二十年者見諦一解脫一無礙思惟九無礙九解脫故言二十年又云見思二道中斷結名二十年又云五下分五上分為二十年也又云猶於二乘法中斷思惑故名二十年又云依二使人共斷餘結故名二十年也從有二乘之機而來感佛故云自見子來已二十年若住二乘位轉大乘教名為於二十年中執作家事也二十語同各有所指此一句即是爭出三界火宅位也過是已後下是第四領付家業譬近領火宅等賜大車速領法說中無上道就此為二初領後付又各為二共領火宅等賜車中

四意亦是方便品顯實四意初章二者一心相體信即領上免難二委以家業漸以通泰成就大志即領上索車後章二者一付家業即領等賜大車二得付欣悅即領上得車歡喜也由心相體信故得委以家業家業既諳悉備知見則成就大志由意志通泰故得付與家業與家業故是則歡喜由有遠近若不先教傭作與一日之價豈得相體委業付財內合由三藏斷結堪並聞大集受折淨名轉教般若而致付財耳當知傭作取價即是遠由體信委業即是近由又前誘引譬中有齊教領始自道樹終訖出宅又有探領始自法身終訖思盡今領亦二始探領慈悲四味調熟終領付財究竟一味遠近始終合論五味何者即遣傍人傍人所說乃譬華嚴圓頓此教最初傍人譬牛所說譬乳內合從佛出十部經即初味也以此擬二乘人無機不受迷悶躡地於其全生如乳味也次明密遣二人說除糞法此譬息大之後鹿苑說三於小即信華凡成聖如轉乳為酪內合從十二部

出修多羅即第二味也次明心相體信入出無難譬三藏之後說方等淨名揚大折小二乘聞大不謗折小不退良以三藏斷結取一日價故得恣其褒貶若未斷結不堪聞揚大如前不受勸門亦不堪聞折小如前不受誠門而今不謗不退者心相體信故也親既證小則信大不虛得涅槃價故體折不瞋雖非已事而不疑謗此心淳熟如從酪出生酥內合從修多羅出方等經第三味也次明長者自知將死不久下譬方等心相體信入出無難已後委以家業使其領教為大菩薩說摩訶般若既領知衆物貫統法門心明口辯彌益慕樂但恨住小非是已分脫更開許豈不樂哉於是心漸通泰成就大志如似生酥出於熟酥是從方等出摩訶般若第四味也次臨欲終時而命其子者此譬般若之後判天性定父子會三歸一付財與記說法華之教開佛知見示真實相菩薩疑除聲聞作佛悉以如來滅度而滅度之如從熟酥出於醍醐是從摩訶般若出大涅槃即第五味也四大

弟子深得佛意探領一化五味之教始終次第其文出此也領家業文為二一相體信二命領業就體信復二先明體信二猶居本位今初相者是互相信也謂於三藏中得涅槃價此既不虛今為菩薩說此大乘亦復非虛此即子信父也佛知此等見思已斷聞必不謗無漏根利聞微生信此即父信子也由此見尊特身聞大乘教名此為入復被訶折猶見丈六說小乘法名此為出大小出入而無疑難也第二然其所止猶在本處者雖復入出無難得聞大乘而謂是菩薩之事非已智分不肯迴小向大猶居羅漢不言未來當得作佛此領大集淨名生酥之教也從世尊爾時長者有疾下第二委以家業此領大品佛命轉教般若熟酥之教也就此為二一命知家事二受命領知二章各為四初四者一明時節二正命知家事三誠令體我心四勅無令漏失初將死不久者有機則應為生機盡應謝為死今化機將畢應謝非久也語窮子言我今多有下第二命知家事金即別教理

銀即通教理大品所明真諦不出此二而云多有者理則非多約種種門亦得言多例如空非十八約破十八法名十八空也勸學中明一切法門皆是珍寶也倉是定門即百八三味庫是慧門十八空境也通別兩種定慧倉庫包藏一切禪定智慧無所闕少內充外溢故云盈溢其中多少者說於般若則有廣略二門菩薩行般若應知略廣相略則為少廣則為多自行為取化他為與大品中云汝當為菩薩說故云汝悉知之我心如是下第三誠體我心者佛以般若為心汝今傳燈當隨佛意說也又二乘人本解是折法空命當體此意者命轉教用誠令同我體法空也昔時被命謂傳燈與他今乃知佛令我識體之門故言當體此意今我與汝便為不異者釋此有三一被加今說與佛不異二就理以諸法皆如故得不異善吉如如來如一如無二如故言便為不異三就今時始悟父子天性本來不異而二乘人自謂被加異耳宜加用心下第四勅無令漏失也汝為菩薩說般若

教無令漏失二者就理此即汝法後時當用是故無令漏失也即受教勅下第二受命又為四一正受命領知二無希取善言雖說般若自謂我無其分也三未捨劣心猶居本處者住羅漢位雖復慕大亦未定言欲作菩薩也未捨下劣心者雖復恥小亦未定言捨於小證也四復經少時父知子意下即是領上索車譬鄙棄先心欲求大道大機發也問何時名少時答一云說般若竟於異處遊觀尋思所領大乘法門生心貪樂為失為不失如此等尋思即是大乘機發時也此時去法華未遠故言少時又當說無量義時大乘機發何以知然無量義中明七種方便無量漸頓從一法生既聞此說思惟昔之三藏三乘悉從一法生如是三乘亦應入一如是思時漸已通泰大心即發故言成就大志也臨欲終時下第二正付家業又為二謂一付業二歡喜初有四一付業時二命子聚眾為證三結會父子四正付家業初付時臨欲終者是明時節化緣將訖靈山八載說法華經唱入涅槃時也而命其子下第二聚眾即是二萬億佛所受化之徒名之為子大機熟人十方雲集也上四眾圍繞者是也并會親族者舊云分身如親族十地如國王九地如大臣八地如利利七地如居士北人用分身為親族多寶為國王也十地為大臣八地為利利三十心為居士若爾迹門說法分身多寶並未現前何得指此耶彼解云正是身子懷疑之時於法華中未能生信是故多寶分身一時來證若疑除信解受記已竟復用多寶何所證耶故知法說之時多寶已出但出經者言不疊安為作次第置因門後耳今謂此是入人情無以取據說迹門近事未用古證若說本門速事必須先證昔今不用彼解依薩云經云今明十方法身菩薩影響者為親族影響之眾多是釋迦昔日同業並共如來於二萬億佛所共開化之於其悉是伯叔之行故用此為親族國王者一切漸頓諸經無不稱所詮之處為經王當機益物興廢有時部部不同名之為國皆言第一即是王又此經會通諸

教豈非聚集國王故無量義中先已收集彼云初說四諦十二緣生次說方等十二部經次說摩訶般若華嚴海空此則普集諸經融通漸頓會入此典故名會國王也彌勒等諸大菩薩皆是等覺為大臣初地至九地為利利法王種性中生三十心為居士此等皆從釋迦受化諸君當知下第三結會父子實從我受學實是我子從我起解是我所生我實曾於二萬億佛所嘗教大法故我實是父於某城中者此經西國文多度此甚少或可說昔名字國土如大通智勝因緣今簡略名字直言某甲是諸眾生昔此大乘起無明闍道入生死故言捨吾逃走備經六趣故云五十年昔在本城懷憂推寬自昔法身地中常以二智觀覓可化之機也始於今日感應道交故云忽於是聞會遇見之今我所有下第四正付家業一切大乘萬行萬德故云一切所有也先所出內是子所知者追指昔日大品領教所委有廣略般若共不共法是汝所知即是汝有故法華但明佛之知見不更廣

說一切行相也窮子聞父此言下第二即是得付歡喜領上各乘大車得未曾有自願無心希望佛道而今忽聞得記作佛故云不求自得也三藏中本心不求方等中恥小望絕故不求般若中雖領非已分故不求如此不求而今自得也世尊大富長者下第二合譬先宅合之或前或後釋之甚略今但依文點意不復子派合譬略者貴在得意不俟費辭大富長者合父子相失譬譬文有四但合父子總得餘意如來合父似則合子似有二義一取大機為子者未逃逝既非真位猶居外凡故云似也取小機為子者小機似像大乘根性耳子既逃父貶之言似云問初釋品云已得入真此那言似答此合子逃父時是故言似品初明子開悟時汝問非也從如來常說我等為子下合父子相見譬但合長者見子便識從我等以三苦故下合追誘譬上有傍追二誘今合亦二上初遺傍追次再追次放捨今合兩門之無機何為見捉自念無罪合無大機也樂著小法者合有小志不合放

捨今日世尊令我等下合二誘譬上有齊教探領今合二意從蠲除下合齊教具陳上事從我等於中勤加精進下合上尋與除糞得至涅槃下合上先取其價也從然世尊先知我等下合上探領上譬有四今合三不合正教作指上勤加除糞即兼之不更合也上言遙見今言先知上言羸瘦憔悴今言心著弊欲上言即脫瓔珞更著麤弊今言便見棄捨不為分別寶藏之分從以方便力說如來智慧下合付家業譬上有由有付今合亦二由為兩一相信二委業今合亦二一相信有二先合體信以方便力說如來智慧者舊云如來智慧之因持作二乘之果今明帶三乘方便說大乘法相故言以方便力於我等前說大乘法亦是合出入無難以方便力出辯二乘以佛智力入明實相若不體信豈於我前明佛慧耶從我等從佛得涅槃一日之價下合猶在本處也從我等又因如來智慧下合領家業上有命有受今但合受受有四一受命二無希取三不捨下劣四漸通泰今但合

二初合受命領業而自於此下合無希取兼得諸也無志願者明佛加威力令如佛心而說也故我不志願所以者何下釋無希取意以方便力隨小乘心說言無分由此不知真是佛子所以不取佛以方便力隨我等說者佛帶方便力以實相法共二乘說我等不識不共之意故非佛子今我等方知下合付家業上有二有付有喜今合亦二上付業有四今則總合付與付有二一明佛本於大無悟二釋無悟正由樂小不早付大耳此經中下舉今證昔今理唯一故知昔三非實但為未堪故於大前毀皆小心欲令捨偽取真定知非悟然佛實以大乘而教化也我等說本無心下合歡喜亦是於三不求之意也八十六行半偈初七十三行半頌上次十三行數佛恩深初又二初二行頌法說後七十一行半頌譬說法說中不頌不求但頌自得頌譬說又二初四十一偈頌開譬次三十偈半頌合譬上開有四父子相失相見委業付財今皆頌初十三行頌父子相失上相失譬有四一

子背父二父求子三子漸還四父念子今頌亦四但不次第初一行半頌第一子背父去次第二七行頌第二父求子不得次第三二行超頌第四憂念轉深次第四二行半追頌第三漸還近父上四文各二今初譬如下一行半但頌子背父而去不頌向國而還也火宅中明長者所王國邑聚落語寬此中明窮子輪迴三界名諸國六道名五十餘年也其父憂念下第二七行是頌父求子不得上亦有二今頌亦二初半行頌覓子不得求之既疲下六偈半頌不以失一子廢家業事四方推求者不同於上上四方是約四諦推理今四方是觀四生中覓可度之機也造立舍宅者有餘國中有餘涅槃也起慈悲舍依性空宅也往來者眾者諸土菩薩來往聽法也而年朽邁下第三二行超頌第四憂念轉深上文有二此但頌先失子之苦無所委付是故憂耳爾時窮子求索衣食下第四二行半追頌上第三漸還向父上文有二今頌亦二初二行頌近父之由由求衣食也漸次經歷下

半行頌正近父城也初近父由中從邑至邑者根塵相涉如邑十八界如國修有漏善如有所得修二乘善如無所得不得大乘法食為飢餓無大力用為羸無大功德為瘦有無善上起見思如瘡癬從傭賃下七行半偈頌第二父子相見上文有二今頌亦二初六行半頌子見父次一行頌父見子上子見父文有四今頌三初半行頌見父之由由傭賃遂至父舍也次爾時長者下第二二行半頌第三見父之相也上明見父之處處是門側今言長者於其門內者兼得處也施大寶帳等正見父相處踞師子座也法身是師是王報應是長者注記券疏即是授記明修行也私謂以廣顯略為注授決為記四弘誓為券修行為疏窮子見父下三行半頌第四生畏避之心長者是時下一行頌第二父見子上文有四一見處二見即識三見歡喜四者適願今但頌二上半頌見子之處遙見下第二半行頌見子即識也即勅使者追捉將來下第三十行半頌上追誘譬今初三行頌傍追上

傍人追文有三一喚子不來二再喚不來三放捨今初三句頌初喚無機不來次迷悶下第二一句頌再喚不來次是人下第三二行頌無機即是上釋放捨意也即以方便下第二七行半頌密遣二人誘引上文有二今頌亦二初三行頌雇作譬次四行半頌教作譬上雇作文有四一設方便二求之即得三陳雇作四取價除糞今但頌二初二行頌第一設方便窮子聞之下一行頌第四取價除糞也今初設方便眇目是偏空姓者豎短不窮實相之源陋者橫狹無摩訶衍眾善莊嚴也非四無畏名無威異常樂我淨名無德次窮子聞之下第二取價淨六根房五陰舍也長者於曠下第二四行半頌上教作上文有四今頌亦四初半行頌曠中念子愚劣下第二半行頌羸瘦於是長者著下第三一行頌脫妙著麤方便附近下第四二行半頌正教作上有七科法門語者即合四念處也令勤作者即四正勤也既益汝價下一行頌四如意足也油塗足能履深水如神通又油能除風

定是無亂也飲食充足即上米麵也薦席厚
暖即是觀練熏修定能除散動也如是苦言
汝當勤作半行總頌上第四安慰第五無五
過根力既成乃堪苦言又以軟語半行總頌
第六作字第七今常作並是子位也長者有
智下第四十行頌上第四領付家業上文有
二今頌亦二今初三行半頌付業之由次六
行半頌正付業初由中有二今頌亦二初長
者有智下半行總頌心相體信即入出也經
二十年下第二三行頌委領家業上委業有
命有受今但頌受命上受命有四今但頌三
初一行半頌受命次猶處門下第二一行頌
猶居本位未捨劣心次父知子心下第三半
行頌通泰大志大乘機動也初二十年者不
得同上上除見思名二十此明執作家事或
言轉大乘教諸菩薩斷大乘別惑見思名
二十年或言說般若時長凡二十年或言住
二乘位轉大乘教為二十年仁王般若云二
十八年說摩訶般若從欲與財物下第二六
行半頌第二正付家業上文有二今頌亦二

初四行半頌正付業次二行頌得付歡喜上
正付業有四今但頌三無時節初欲與下一
行頌上第二集親族於此大衆下第二有二
行半頌上第三定父子天性凡我所有下第
三一行頌上第四正付與也子念昔貧下第
二二行頌得付歡喜也佛亦如是下三十偈
半頌合譬佛亦如是合第一父子相失也知
我樂小一句合父子相見譬也未曾說言二
句頌合第三追喚譬上合有二一合再喚不
來二合放捨今總頌其意耳而說我等下一
行頌上合密遣二人誘引譬上合齊教探教
二章今此一行但總頌其意耳佛勸我等下
二十八行半頌合第四領家業上合有二相
信委業今初十八行半但頌合委業次十行
頌合正付上受命中唯有二一受命二無希
取今初一行長頌命領知上領所無也最上
道即是空般若更無過其上也次下十七行
半正領受命及無希取等無不捨及通泰我
承佛教有五行頌正受命佛子聞法得記者
明轉教益他也爾時謂轉教教化菩薩不言

為我如彼窮子下十二行半頌第二無希取
此文廣上也於中又二初一行牒前譬帖合
次我等雖說下第二十一行半正合無希取
又為三初一行正頌無希取次我等內滅下
九行半具智斷故無希取又為三謂標釋結
初為二初一行標斷德具故無希取次我等
若聞下第二一行標智德具故無希取所以
若何下六行雙釋智斷二章次我等雖為下
第三二行半結釋自無希取次導師見下第
三一行明佛見捨我合無希取也如富長者
下十行頌正付業上合有二一正付業二得
付歡喜今頌亦二初三行頌正付次七行頌
得歡喜初三行中上總合正付業今亦總頌
但初一行半牒譬帖合次一行半正頌合也
我等今日下七行頌第二得付歡喜也得道
者得實相道也得果者分得大乘習果也此
二句明開佛知也於無漏法得清淨眼者此
二句明開佛見見實相理也昔日見無漏不
落凡夫今日見無漏不落二乘也昔日慧眼
見空今淨眼見中持戒報者昔持戒梵行共

顯無漏灰身滅智無人受此果報者今日梵行能得無漏即了因取果義持戒即緣因義清淨眼所見理即正因義我等真是聲聞者即大乘真位也十信以一音徧滿三千界似道非真入十住即是真也真阿羅漢有三義此中但舉應供一義也若不生變易殺通別惑是不生殺賊義堪為十法界福田即應供義應供殺賊互相顯也下十三行歎佛恩深難報如文私謂世尊大恩者一佛始建慈悲拔六道苦與四聖樂普十法界入四弘中此如來室恩二如來行菩薩道示教利喜曾教我大乘雖復中忘智願不失蓋如來室清涼溫暖大慈與樂恩三眾生遭苦視父而已佛伺其宜如積逐母備行六度以利眾生蓋如來室遮寒鄣熱大悲拔苦恩四佛成道已應受無為寂滅之樂而隱其神德用貧所樂法五戒十善冷水灑面今得醒悟蓋是佛衣遮貪欲熱恩五示老比丘像方便附近與一日價蓋是佛衣除見寒愛熱恩六過是已後心相體信彈訶貶斥今恥小慕大蓋佛衣遮醜

陋恩七命領家業金銀庫藏皆悉令知蓋是佛衣與我莊嚴恩八會親族定父子付以家業無上寶聚不求自得蓋如來座恩九十既坐座已身意泰然快得安隱以佛道聲令一切聞一切天人普於其中應受供養蓋如來座今我具足自行化他恩世尊為感願荷負所不能報此之謂也

妙法蓮華經文句卷第六下

妙法蓮華經文句卷第六下

校勘記

- 一 底本，明永樂北藏本。
- 一 一二二頁中八行「不舍」，經、清作「不舍」。
- 一 一二三頁上一九行第五字「者」，南、經、清作「稱」。
- 一 一二四頁下一〇行首字「先」，南、經作「先以」。
- 一 一二六頁下末行第三字「革」，南作「隔」。
- 一 一二九頁中七行第二字「見」，南作「見合」。
- 一 一二九頁中一九行「受今」，清作「受命」。

妙法蓮華經文句卷第七上

寧三

隋天台智者大師說

門人灌頂記

釋藥草喻品

此中具山川雲雨獨以藥草標名者土地是
能生雲雨是本三能潤草木是所生所潤所生所
潤通皆有用而藥草用強有漏諸善悉能除
惡無漏為最無漏眾中四大弟子以譬領佛
譬深會聖心佛讚善哉甚為希有述其得解
以喻其人故稱藥草喻品夫藥草最育日久

一蒙雲雨扶疏暎暎芽莖豐蔚於外力用充
潤於內譬諸無漏住最後身有餘涅槃更不
願求無上佛道今得聞經自乘佛乘兼以運
人文云我等今日真是聲聞以佛道聲令一
切聞內外自他具勝力用故稱藥草喻品夫
藥草者能除四大風冷補養五臟還年駐色
今蒙雲雨忽成藥王餌之徧治眾病變體成
仙譬諸無漏聞經破無明惑開佛知見文云
我等今日真是佛子無上寶聚不求自得佛
子所應得者皆已得之面於佛前得受記勅

嘉著而稱微故言藥草喻品前一番是師弟
領述世界悉檀意也次一番生善為人意也
次一番是對治第一義兩悉檀意也是名因
緣釋品餘約教本迹觀心準例可知不復記
云此品是譬說中第三述成段舊云述其十

三偈歎佛恩深又述其教作人譬文言曲巧
師云不應偏爾經稱善說如來真實功德備
述其領權領實明文在此十三偈止是二乘
齊教荷恩教作人譬是佛權功德耳今言都
述其周徧領解始天性結緣中間追誘終於

付財自微自著無量無邊諸恩德也其文為
二一略述成二廣述成略述又二一雙述善
哉二領所不及雙述者一善哉述其兩處領
實一善哉述其兩處領權善說如來真實功
德者真實是述實功德是述權又華嚴之報
宜領實也本三二藏之誘引領權也方等之體信
般若之領教俱領權實也法華之付財專論
實也辭致曲巧故言善說皆是佛法故言具
實誠如所言者印定之旨也又從如來復有
下述其領所不及云何不及謂退進橫豎亦

橫亦豎非橫非豎皆不及也所以者何大雲
普覆徧荷清涼大雨俱霑無不蒙澤咸令世
間皆得知見未曾有法那忽齊教止領二乘
得益不道人天小草是為退所不及菩薩名
上草亦名小樹大樹敷榮鬱茂自他饒益而
復不領是為進所不及又十法界同成佛法
界那忽止領二乘餘八法界都不涉言是為
橫所不及又七方便從淺至深皆入其實餘
五方便都不在言是為豎所不及又三世利
益未曾暫廢是為亦橫亦豎所不及夫山川

谿谷云總言一地一地能生未嘗揀擇獲彼
受此草木種子皆依於地更無餘依一雲霞
豔無處不密一雨一味不隔枯榮普潤既同
普得增長如來平等不可思議實不先頓後
漸初三末一如龍興慶雲普雨於一切身心
不降雨除熱得清涼是為五乘七方便十方
三世平等廣大甚深博遠不可思議無有差
別是為非橫非豎領所不及不及之旨非都
頓奪特以初心望後心未窮極地故云不盡
耳又初悟初阿亦具後茶功德但齊教之領

未暇進領橫豎周徧耳又權行大士宜應如此也廣述成又二長行偈頌長行又二初述成開三顯一次從汝等迦葉下結歎初有法譬合法中又二初先舉法王者不虛勸信也次於一切法下正述開三顯一夫人王外無所畏內不二言法王亦爾眾惡已盡發言誠諦舊云述中根不虛獎下根信受今言佛法雖多不出權實權實之外更無別法而言無量者此意難信故舉法王勸信又為下大雲譬作本從於一切法下約教明開權顯實從如來觀知下約智明開權顯實由二教顯二智由二智說二教智教相成也一切法者謂七方便橫也對一實為豎也若言不爾何故二萬億佛所初發大心中間取小又流轉五趣又十法界一人尚具況七方便耶此法雖多方便波羅蜜照之罄無不盡以隨其類音說之無不逗會為人天說戒善為二乘說諦緣為三藏說事度為通教說無生為別教說次第開如來藏是名述其領開三也從其所說法下約教述其顯實也地者實相也究竟

非二故名一其性廣博故名為切寂而常照故名為智無住之本立一切法故名為地此圓教實說也凡有所說皆令眾生到此智地顯實之文灼然如日云何闇寐作餘解耶例大品廣歷諸法皆摩訶衍衍即大乘乘即實相實相即一切智地上文云唯此一事實指此地也餘二則非真指七方便也此約漸頓二教述其開權顯實也從如來觀知一切諸法下約智述開權顯實觀一切歸趣是能照權也究竟明了者能照實也二智所照偏圓兩境通達無礙故能說權實二教此舉智釋教也知所歸趣是識藥深心所行是知病病藥俱是權法權法各有歸趣戒善等近趣人天若作緣義低頭舉手遠趣佛果念處道品等近趣涅槃若作福德莊嚴淨等所行是菩薩道遠趣實所乃至六度通別等法近遠歸趣途轍不同可解又戒善是人天樂諦緣度是三乘人藥乃至通別等亦可解深心所行有二種深心著於依正又深心著所執之法著依正者起深重十惡鄣人天乘著所執法

起四倒三道六蔽四住五住等鄣諸聖乘當知深心病相不同權智照之通達無礙又於諸法究盡明了者實智所照也一切權法無不入實故言究竟實智所知故言了佛眼所見故言明若此智照此藥此病不照彼藥彼病彼智照彼不能照此種別不同者權智照也一智徧照一切藥一切病實智照也能示眾生如此圓境智故言一切智慧也又一切法者謂十法界也十法各各相欲不同各獲果報歸趣亦異知諸法盡者名知病知一切深心所著名知藥藥有深淺大品云如實智知貪欲心瞋癡心以如實智知名知深心如理通達無有鄣礙若戒善諦緣度等一切法藥悉用如實智知名通達無礙又權智文中通達無礙者約權論實實智文中又於諸法諸法者約實論權二文互現者此明實是權實權是實權當知究竟非權非實非差別非不差別以智方便權有差別悉到智地則無差別如地無差別草木若干若干無若干無若干若干又如約心論法約法論心心有

諸數法無諸數心不離法法不離心無數而數數而無數耳權實亦爾云從譬如下第二譬說又為二初譬說後復宗稱歎譬有開合開為二一差別譬譬上述權教權智二無差別譬譬上述實教實智也三草二木纖濃不

土地既通譬識陰山川谿谷譬四陰能依草木雖依土地等土地等非即草木草木質幹但名草木草木種子更無別名但取能生之功名種子所生質幹名草木皆植根於地地則本也內合習因習果雖依五陰五陰非即因果要依於陰得有習因增長成辦名習果果因依陰而起則山川土地譬成草木種子受潤增長譬悉成也又更顯別譬者山雖高峻亦有滄隆等五相乃至土地雖平亦有丘池等五相即譬五乘五陰山高譬菩薩五陰

成叢衆樹成林治病力用勝者稱為樂如善法中皆能治惡而無漏善治惑義勝下卉木中樹林枝幹覆陰廣器用大故喻二菩薩種類若干者五乘七善因果種子故言若干即是種類各有稱謂即是名也各有體相即是色也密雲下第三密雲譬雲有形色覆陰下文有雷聲速震覆陰譬佛慈悲形色譬佛應世雷聲譬佛言教密雲即三密也慈悲即意密形色即身密雷聲即口密彌布者徧也既密又徧故言彌布也以慈悲熏應身說法徧十法界故言彌布也經律異相云雲有五色青者風多赤火多黃白地多黑水多有四電師東身味南百主西阿竭羅北阿祝藍四電聞諍是故有雷又水火風地闢故有雷五事無雨一風起吹二火起焦三阿脩羅手接入海四兩師淫亂五國王不理治兩師瞋故不兩云一時等注下第四注兩譬譬用口密八音四辯宣注法兩利潤衆生其澤普洽下第五需潤譬法寶普雨七種衆生心地所有習因種子即生聞慧名為需洽枝葉根莖者信

為根戒為莖定為枝慧為葉次第相資故譬
此四也小根莖等即人天信戒中根莖等即
二乘信戒大根莖等即菩薩信戒諸樹大小
下第六增長譬更復略牒明其草木隨分受
潤習報兩因善法既蒙法雨習報兩果各得
增長稱其種性者明施權稱機小者不過分
大者不減少即是七種習報兩因也華果敷
實者習報二果也又云增長即三義稱其種
性即是增長之由由設教稱機也各得增長
正明增長華果敷榮即增長之相也雖一地
所生下大段第二一地一兩無差別譬顯於
一實也此有三一一地所生道前心地所生
終因道後智地二一雲所雨一音所宣一乘
法門開發道中五種善根終是一音平等之
教三三草二木菓益不自覺知五種善根蒙
佛法雨隨分增長而不自知五種之因皆依
一佛性亦不自知五乘之教皆是大乘亦不
自知同歸佛慧唯有如來能知也迦葉當知
如來下合譬也合差別譬為二先正合次提
譬帖合差別譬有六今合不次第開譬明機

前論眾生合譬明應前合如來如來是化主
也此中第一正合上第三密雲亦兼合第一
世界此中第二合上第四注雨譬此中第三
合上第一世界山川谿谷譬此中第四合上
第二草木此中第五合上第五露潤此中第
六合上第六增長譬也合譬次第者明如來
應世則有八音說法說法即有受化眾生眾
生聞法各需道潤得潤是同不無差別增長
云第一合密雲先舉佛身密合雲有形後舉
佛口密合雲有聲如來亦復如是出現於世
即是正合應身出世也如大雲起即舉譬帖
合明如來大慈現身覆育一切也以大音聲
者即是舉佛口密合雲有聲也天人阿脩羅
者別舉三善道眾口密之益也即是三乘根
性三十子別舉聲益也如彼大雲即是舉譬
帖合雲有聲也徧覆大千者通舉一切皆是
佛子俱蒙口密益也或時但合五譬將普徧
世界下兼合世界土地也世界即是國土世
間天人脩羅即是假名五陰世間假名合上
世界五陰合上山川谿谷也於大眾中而唱

下即是第二合上第四注雨譬先標章門次
勸聽受章門有六一十號謂如來應供等二
四弘謂未度今度等三三達謂今世後世等
四一心三智謂知者具足五五眼謂見者六
三業共智慧行知道謂意不護開道謂身不
護說道謂口不護亦稱為導師謂知道者等
也汝等天人下勸物聽受佛八音詮吐六種
法門從多為論勸三善道宜應往聽法也爾
時無數億種乃至而聽法此中第三合上第
一山川譬攬果報而有眾生如依山川得有
世界等百千萬億者即是十法界眾生也今
正語七方便眾生差別配如上說或從汝等
天人者皆合山川譬也如來于時乃至精進
懈怠即是第四合上第二草木譬舊云此文
長出不合上今明上譬中有草木差別大小
不同此中明根有利鈍行有進怠正是習因
深淺與草木義同豈非合譬而言長出于時
者若論漸初即是鹿苑初說三乘時若論中
間處處得論于時利鈍者總判三途因惡果
苦不能受道名為鈍七種方便聞教得益名

為利別判人天但受果報不肯受道名為鈍
三乘根性斷惑出界名為利又聲聞觀生滅
名為鈍菩薩觀不生滅名為利通別圓云三
途放逸名息人天持五戒十善為精人天不
歇苦為息二乘怖畏無常為精二乘貪證不
求作佛為息菩薩志求佛道為進云從隨其
所堪至快得善利即第五合上第五受潤譬
隨其所堪即是稱會機宜無增減之失歡喜
得善利即是各蒙法潤受益也是諸眾生聞
是法已第六合上第六增長譬現世安隱後
生善處者即是報因感果合華數增長亦
得聞法乃至入道者即是習因牽習果合上
果實增長聞是法已合上增長之由現世安
隱正合增長後生善處者是合增長之相也
佛如大雲普覆一切三途亦得霑潤增長如
說般若方等明地獄得益也又諸經中亦說
龍鳥鬼神等聞法得道若火滅湯冷即是現
世安隱或生天上人中即是後生善處於天
人中修道即是以道受樂若人天聞法持戒
福德扶身鬼龍不犯即是現世安隱或天還

生天人還生人或天人互生即是後生善處
生能悟解即是以道受樂二乘聞法得有餘
涅槃是現世安隱如下云云是人於所得功
德生滅度想我於餘國作佛更有異名此人
於彼國得聞是經指方便有餘之士是善處
於彼聞經是得道受樂若生身菩薩聞虛舍
那佛說法得無生忍即現世安隱後生淨滿
世界為法身眷屬即是善處以道受樂難諸
郭礙者即是現世安隱任力所堪漸得入道
即後世以道受樂五乘者五戒乘出三途苦
十善乘出人道八苦聲聞乘出三界無常苦
緣覺乘出從他聞法苦菩薩乘出內無利智
外無相好苦是為五乘問但應以人天為世
間乘餘是出世間乘又佛為實乘餘是權乘
又佛為果乘餘是因乘又應為三乘人天為
下二乘為中佛為上又人天名不斷煩惱乘
二乘名斷煩惱乘佛名非斷非不斷乘又人
天名不斷佛名斷二乘名亦斷亦不斷又凡
夫賢聖非凡非聖有空非有非空等乘云大
論明五善根勝鬘辨四藏與三草二木云何

人天為二善二乘為一佛菩薩為五開大合
小五乘開小合大四藏合凡開聖五乘則凡
聖俱開隨緣不同耳如彼大雲下第二提譬
帖合六意者大雲帖合第一形聲兩益兩於
一切帖合第二六章法門卉木叢林帖合第
四受化眾生利鈍息進習因深淺如其種性
具足蒙潤帖合第五受潤得法利各得生長
帖合第六現世安隱增長也如來說法一相
下第二合無差別譬上開三合亦三但不
次第一相一味下雙合一地一雨所謂下雙
釋一地一雨其有眾生下合上而諸草木各
有差別所以者何下釋於差別如來能知差
別無差別一相者眾生之心同一真如相是
一地也一味者一乘之法同詮一理是一雨
也昔於一實相方便開為七相於一乘法分
別說有七教佛知究竟終歸一相一味也所
謂下雙釋一相一味眾生心性即是性德解
脫遠離心滅三種之相如來一音說此三法
即是三味此三相則以為境界緣生中道之
行終則得為一切智果故言究竟至於一切

種智也合草木差別譬如後解不重記有時作三意合一無差別意合上一地一雨二差別意合上草木差別三如來能知釋成兩意無差別者謂一相一味一相合上一地也解脫相者無生死相離相者無涅槃相滅相者無相亦無相唯有實相故名一相一相即無住本立一切法無住無相即無差別也立一切法即有差別差別如卉木無差別如一地地雖無差別而能生桃梅卉木差別等異桃李卉木雖差而同是一堅相若知地具桃李即識實中有權解無差別即是差別若知桃李堅相即識權中有實解差別即是無差別以是義故以一相合上一地譬也一味即是實教純一無雜例一相可解解脫者無分段變易二邊業縛故名解脫相離相者得中道智慧此慧能遠離二邊無所著故名離相滅相者二邊因滅得有餘涅槃二邊果滅得無餘涅槃故名滅相句句例作差無差別義準一相可解究竟至於一切種智者若得二邊滅相即是通別二惑盡入佛知見以一切種

智心中行般若初發畢竟二不別故言究竟此即佛之智慧故言一切種智也從其有眾生聞如來法不自覺知者即是明差別義從此下明差別者眾生是山川假實之差別亦是種子之差別如來即是雲聞法即是兩讀誦修行即是潤功德即增長如此等差別皆不能知也就文為五一眾生不知二如來能知三舉譬帖合眾生不知四牒前結釋如來能知五釋疑其有眾生舉不知之人法謂聞一音之法持說者是正明不知持說不同修行各異人天作戒善之解三乘作諦緣度解解既不同即是差別所得功德不自覺知者明五人雖各稟教不知佛是一味無差別教亦不知七種方便各各作解而各執已解為實此則不知於權亦不識實即是差別不自覺知也第二如來能知略減數舉十境合為四意一約四法知二約三法知三約二法知四約一法能知約四法者謂種相體性種者三道是三德種淨名云一切煩惱之倚為如來種此明由煩惱道即有般若也又云五

無間皆生解脫相此由不善即有善法解脫也一切眾生即涅槃相不可復滅此即生死為法身也此就相對論種若就類論種一切低頭舉手悉是解脫種一切世智三乘解心即般若種夫有心者皆當作佛即法身種諸種差別如來能知一切種祇是一種即是無差別如來亦能知差別即無差別無差別即差別如來亦能知相體性約十法界十如中釋若論差別即十法界相若論無差別即一佛界相差別無差別如來能知差即無差無差即差如來亦能知體性例然可解從念何事下約三法明如來能知三法者即是三慧仍有三重一三慧境二三慧體三三慧因緣念何事是明三慧用念取於所念之事即是三慧境從云何念者念是記錄所聞之法正是念慧之體也從以何法念下即是三慧取境聞法是其因緣又三慧境智因緣合故得有三慧法復名因緣也如此三乘三慧昔謂境體因緣有異即是差別若入圓妙三慧即無差別此有差別無差別如來能知又差

即無差無差即差如來亦能知從以何法下約二法明如來能知以何法即是因得何法即是果五乘之因各得其果即是差別眾生如佛如一如無二如唯是一因一果即無差別差別無差別如來亦能知差即無差無差即差如來亦能知從眾生住於種種之地是約一法如來能知七方便住於七位故言種種之地此即差別如來用如實佛眼見之如眾流入海失於本味則無差別隨他意語以智方便而演說之則如來能知差別其所說法皆悉到於一切智地則如來能知無差別云從如彼卉木下第三舉譬喻合眾生不知也從如來知是下第四牒前總結能知也一相一味等如前釋一相一味解脫離滅等為緣分別即是一中無量究竟涅槃終歸於空即是無量中一此是牒前重釋無差別也何者一相一味解脫離滅若是二乘法體猶是差別言宣今作大乘究竟涅槃終歸於空即通無差別究竟涅槃結前諸句皆非二乘有餘無餘乃是究竟涅槃也常寂滅相者結諸

句非是小乘寂滅乃是常住寂滅上文云諸法從本來常自寂滅相即此義也終歸於空者非是灰斷之空乃是中道第一義空鄭重抵掌簡實異權舊云終歸於空者雖復神通延壽無量示現復倍上數壽盡終歸灰斷故言終歸空此苦佛苦經那可言光宅云終歸人有餘捨無常身智也有人難此解若爾與二乘何異經文舉兩究竟初究竟至於一切種智此舉智果對二乘智非究竟二舉究竟涅槃常寂滅相終歸於空此舉斷對二乘斷非究竟究竟之文知非小乘空也龍印云大涅槃空無法相無煩惱故名空終歸常住第一義空忠師云終歸第一義空智慧有人云佛果無累故言空注者云空有洞遺乃名空古諸師皆不作小解光宅何意獨然佛知是已觀眾生下第五斷物疑佛昔既知始末皆一何不鹿苑即為說實釋云觀眾生心欲隨三悉檀而將護之恐其誹謗故不即說也汝等迦葉下第二復宗稱述欲釋疑者聞佛無量功德謂四弟子齊教領解何必是實故

佛稱述雖未及佛地齊教不虛也亦是引發下根令同得悟文為二初述二釋先歎希有者凡夫有反復聞能得益菩薩是已事解不多奇無為正位能捨證入實甚為希有能知隨宜說法述能領開三次言能信受即述其領顯一所以者何釋述意明佛於一道說三深玄難解而汝能信也私謂前文云如來復有無量功德汝等說不能盡後文云汝等甚為希有者佛恩普被猶如雲雨靡不覆潤佛恩普載猶如大地靡不生成豈有為一機一方而已故言汝等說不能盡佛恩雖普眾生日用不自覺知如三草二木植根乎地粟潤乎雨而不能知汝等能知始終十恩甚為希有未度今度等述其知佛四弘誓恩甚為希有眾生現世安隱後生善處以道受樂述其知大慈與樂恩甚為希有既聞法已離諸障礙任力所能漸得入道述其知大悲拔苦恩甚為希有輪王釋梵是小藥草述其知勸善除熱惱恩甚為希有知無漏法能得涅槃及緣覺證是中藥草述其知除諸熱見愛恩甚

為希有上草小樹是為恥小慕大述其知德
醜之恩甚為希有大樹是述其莊嚴之恩甚
為希有最實事一地一雨述其知付財坐座
身心財法自在安樂之恩甚為希有佛述其
差別歎者數十恩文盡若述其無差別歎者

即是一大恩也偈有五十四行半頌上開顯
開顯有法譬今皆頌初四行頌法說次五十
行半頌譬說法說復二先舉法王二則開顯
今初半偈頌法王不虛下三行半頌開顯上
文二教二智今亦具頌初一行半頌二教後

二行頌二智初隨眾生下半行頌權教次如
來尊重下第二一行頌實教次有智若聞下
一行頌釋推智後是故迦葉下一行頌釋實
智隨種種緣說種種教悉為今得大乘正見
自此之前皆名邪見也此頌是如來四悉檀
意破有法王即對治意隨眾生欲即世界意
智聞信解疑悔永失是為人意令得正見第
一義意三悉檀即頌上以智方便而為演說
今得正見頌上到一切智地云迦葉當知譬
如下五十行半頌上譬說初十行半頌開譬

次四十行頌合譬上開二譬今初九偈半頌
差別譬次一行頌無差別譬上差別有六今
亦頌六而不長行開譬如合次第也初三
行頌第三雲譬其兩音等下第二一行頌第
四注雨譬次山川險谷下第三一句頌第一
土地山川譬次幽邃下第四二句頌第二舟
木譬次大小諸樹下第五兩行三句頌第五
受潤譬一切諸樹下第六二行頌第六增長
譬雲譬應身應身隨智行故言慧雲能具
十二部法故言含潤也若應身不說法如須

扇多多寶者此雲不舍潤也身放大光如電
耀口震四辯如雷聲也九十五種邪光不現
故言掩蔽除九十八種惱熱如地上清涼也
如可承攬者應身降世似同三有有心往取
實不可得也八音四辯宣注法爾四方俱下
一時俱聞亦云四等也凡有心者皆蒙利潤
故言率土充人也此則上云歲下山川譬
也山川險谷一句譬應身應身地即是七方便
眾生五陰今蒙法雨身口業軟如土地得澤
也幽邃所生者是頌上第二眾生習因差別

譬眾生久遠所植習因隱在陰界入內故言
幽邃今蒙法雨悉得開發故言所生百穀語
通取五穀譬五乘能生百善也甘蔗蒲萄譬
定慧乾地普洽譬未信者令信也餘譬如文
如其體相性分大小下一行頌第二無差別
譬上文有三此中略不頌一地而所生兼之
初二句頌所生所潤次一句頌能潤則是頌
無差別也而各滋茂頌差別不自知也佛亦
如是出下四十行頌第二合譬初三十五偈
頌合差別次如是迦葉下五行頌合無差別
上合差別譬前正合後譬帖今頌亦先合次
便舉譬帖初一行頌合雲譬上兩句以身合
雲下兩句舉譬帖合次既出下第二有八行
半頌第二合雨譬上先標章門次勸聽受既
出下三行略頌十號次一行半頌四弘六章
門中但頌二章也充潤一切下一行半是頌
四弘誓諸天人下第二四行頌勸聽受我觀
一切下第三四行頌第三合上山川譬山川
譬七種五陰眾生如雨注不擇谿谷佛平等
說故無彼此有機為此無機為彼植善為愛

憎逆為憎佛事為自魔事為他應初為來應後為去入實為坐出權為立佛觀眾生為若此即是等雨山川之意頌上無數億種眾生來至佛所而聽法也貴賤上下下第四二行頌上第四如來于時觀是眾生合第二所生草木叢林貴賤乃至利鈍約七方便傳傳作之也一切眾生聞我法者下第五十一行頌上種種無量皆令歡喜合受潤譬文為三初一行總明受潤次或處人天下第二七行別明受潤次三行結所潤能潤有人解人天為小草二乘為中草外凡為大草內凡為小樹初地至七地為大樹有人以內凡為大草初地至七地為小樹八地為大樹有人以三十心為大草初地至六地為小樹七地去為大樹然三草二木佛自合喻明文朗然云何師心反佛違經耶就別受潤中文為五初一行人天俱未斷惑合為小草次知無漏法下第二二行明二乘俱有斷證合為中草次求世尊處下第三一行明六度志求作佛化他勝二乘獨為上草次又諸佛子下第四一行半

明通教已斷通惑誓扶餘習涉有化他望下為優比上為劣故名小樹次安住神通下第五一行半明別教自行化他高廣為勝故名大樹約三菩薩各作三樹六度約三僧祇通教約七八九地別教約三十心佛平等說下第三三行結所潤能潤又二初一行半舉譬帖釋所受潤雖明七種七種為少如海一滴佛以此喻一行半明能潤佛智多如海也我兩法雨下八行半頌第六諸眾生聞此法已合歡喜增長譬又二前兩行總頌增長又二初一行總頌增長次一行舉譬帖釋次諸佛之法下六行半別明增長為四初一行半明人天增長普得具足是頌現世安隱漸次修行是頌後世以道受樂次聲聞下第二一行半頌二乘增長住最後身有二解一云二乘此身若不值佛身未必無後由見佛故成最後身即是增長義二云二乘得有餘涅槃住最後身得佛五味調熟得入法華聞大乘得解即是增長若諸菩薩智慧堅固下第三一行半是通教增長堅固是體法慧了達三界

是斷惑盡復有住禪下第四二行是別教增長云問一雲一雨與一音同異答下地以一音今他聞一法佛以一音隨類各解今一雲一雨正是隨類之一音也有人解法身不二名一從法身出音故言一音有人言一時並出眾聲故言一音有人言五音之中隨用一音大論明一音報眾聲不言並出亦不言是法身出音毗婆沙言佛以一音說四諦五人聞人語八萬諸天聞天語地獄夜叉各聞同其語唱告至梵天是為梵音亦是佛報得清淨音聲最妙號為梵音若報得梵音則人所不聞聞亦不解如是迦葉下第二五行頌上無差別譬又為二前一行半頌無差別之差別後三行半頌差別無差別譬如大雲如一味雨即頌合上一味雨無差別也潤於人華各得成實即是頌上差別也次迦葉當知以諸因緣下即是明權權即差別合上所生也今當為汝者即是顯實實即無差別合上一地也非滅度者未度變易也獨言二乘者為其保證強也人天不計果為涅槃菩薩不中

問取證也是菩薩道者菩薩行道亦須斷通
惑汝已斷盡即是菩薩道法華論謂發心退
已還發前所修善不滅同後得果二乘智斷
是菩薩道者二乘執其果故斥言是菩薩道
道即因也問菩薩亦有果信解云得道得果
小品云有法是菩薩道無法是菩薩果何故
不言是菩薩果答此義亦應得今言若道若
果皆是佛因因即是道也

釋授記品
梵音和伽羅此云授記諸經破受記淨名云

從如生得記從如滅得記如無生滅則知無
記思益云願不聞記名小品云受記是戲論
今經云何答若見有記記人此見須破菩薩
誓記此記須與世諦故記第一義故無四悉
適時如下說若通途記如法師品初若別與
記如三周後說若正因記如常不輕若緣因
記如法師品十種供養若了因記如授三根
人若正因記則廣若緣了記則狹或遲記或
速記或佛記如此文或菩薩記如不輕雖無
劫國之定亦得是記復懸記如化城品未來

弟子是也他經但記菩薩不記二乘但記善
不記惡但記男不記女但記人天不記畜今
經皆記若首楞嚴有四種記今經具之未發
心與記如常不輕品發心現前無生三周記
是也瓔珞第九八種授記已知他不知衆人
盡知已不知已衆俱知已衆俱不知近覺遠
不覺遠覺近不覺俱覺俱不覺已知他不知
者發心自誓未廣及人未得四無所畏未得
善權故衆人盡知已不知者發心廣大得無
畏善權故皆知者位在七地無畏善權得空
觀故皆不知者未入七地未得無著行云遠
者不覺者彌勒是也諸根具足不捨如來無
著之行故近者不覺此人未能演說賢聖之
行師子膺是也近遠俱覺者諸根具足不捨
無著之行柔順菩薩是也近遠俱不覺者未
得善權不能悉知如來藏等行菩薩是也餘
經又云近知者從現佛得記也如彌勒等遠
知者不從今佛從當佛得記如佛語弊魔彌
勒當與汝記近遠俱知者今當佛俱與記也
近遠俱不知者今當佛俱不記也原諸佛本

為大事因緣出世今衆生開示悟入佛之知
見今大事已顯佛已說竟衆生已入暢佛本
懷衆生願滿法應與記如父遇子豈不付財
又行人無量世行願願在今佛文云其本願
如此故獲斯記此兩緣是世界悉檀故記又
二乘聞經改小入大圓因已足因必招果故
如來與記時衆咸知發願願為生身法身內
外眷屬或願但生彼土饒益衆生此兩是為
人悉檀與記又授二乘記破欲退大入小菩
薩何者若定有二乘可退為小今無二乘何
所可退又破欲發二乘心者彼證自捨我何
為取又破未改小者則便改小將證小者即
不取證此四對治悉檀與記又無生現前必
由實解開佛知見不謬又明了佛性故與受
記小乘入實決定作佛若爾一切衆生亦有
佛性何不與記然衆生但正無緣今聞經信
解緣正具足開佛知見知佛性見佛法見佛
性此兩第一義悉檀與記此四記攝上諸受
記盡云授記亦云受記受決受蒞授是與義
受是得義記是記事決是決定蒞是了蒞中

根人聞法譬二周開三顯一具足領解如來
 述成雖自知作佛而時事未審若蒙佛誠言
 授其當果劫國決定近遠了別則大歡喜今
 從佛授與得名故言授記品此文是譬說第
 四段上三段皆以譬喻說之此中授記亦用
 譬喻論記何意無第五段一解云指上指下
 略不論耳又云草喻中明一切受潤各得增
 長審知四眾皆獲利益經家略不出耳文為
 二一正與中根授記二許為下根宿世之說
 初又二先授迦葉次授三人並有長行偈頌
 迦葉長行中有六一行因二得果三劫國名
 字莊嚴四壽命五正像久近如文六國淨三
 弟子中復二一請記二與記請記中七偈初
 一行正請次二行半開譬次二行半合譬次
 一行結三人記各有行因得果劫國壽命法
 住數量悉如文從我諸弟子下二行半許為
 下根更說宿世此人已聞法譬復見上中受
 記而猶疑不了深生愧恥欲增進其道先許
 總記更說宿緣云云
 妙法蓮華經文句卷第七上

妙法蓮華經文句卷第七上

校勘記

一 底本，明永樂北藏本。

一 一三六頁下三行第六字「令」，
 作「今」。
 清

妙法蓮華經文句卷第七下

寧四

隋天台智者大師說

門人灌頂記

釋化城喻品

化者神力所為也以神力故無而歛有名之
 為化防非禦敵稱之為城內合二乘涅槃者
 權智所為也以權智力無而說有用教為化
 防思禦見名為涅槃蘇息引入實未究竟而
 言滅度權假施設故言化城喻如前說此是
 因緣釋也約教者若三藏義者於涅槃生安
 隱想生滅度想若通教二乘與三藏同菩薩
 不爾釋論云如父過險一脚入城一脚門外
 憶妻子故從城入險誓願扶餘習入生死而
 不以空為證也別教不道城如化用城防險
 從城門徑過將城作方便斷見思惑不道此
 為極也圓教知無賊病亦不須城故言化城
 也今是圓教意故題為化城喻品也本迹觀
 心不記問此品說因緣事下根得悟應名宿
 世品答品初廣說因緣末則結譬化城若從
 前應稱宿世經從未故言化城又上根疑薄

但取道樹三七思惟以明機緣中根疑濃加
 以譬喻探取二萬億佛所教無上道以為機
 緣下根疑復厚則明宿世久遠機緣若從宿
 世之始明久遠因緣語其中間言其化城明
 其究竟言其實所經家處中標品收得初後

從此義便故言化城品問化城是權實所是
 實何意棄實從權答由知城是化則知實所
 是實故標化不失實也此段三品經文例前
 應四但領解述成皆在授記段中何者若不
 領解安得授記述成故兼得二意又領解述

成得記或前後不定領解或默念發言不同
 其文少不足分品但入他段中此品正說因
 緣後兩品授記初二一先明知見久遠二
 明宿世結緣如來三達遠明如見今日所引
 往事決定不虛然後說宿命也此二各有長
 行偈頌初長行有三一出所見事即是好成
 大相大通勝佛也二舉譬明久遠三結見昔
 如今云偈有七行頌前三義如文佛壽五百
 四十下正明結緣又為兩初結緣由二正結
 緣由中又兩遠由近由遠由又二一大通智

勝佛成道二十方梵請法成道為五一佛壽
 長遠其佛本坐下第二成道前事但諸佛道
 同為緣事異釋迦苦行六年草生攢膝至肘
 不覺諸天哭喚動地不聞移坐得道彌勒即
 出家日得道彼佛十劫猶不現前非根有利
 鈍道有難易緣宜賒促應示長短耳三諸比
 丘大通過十小劫下明正成道四其佛未出
 家下明成道後眷屬供養五爾時十六王偈
 讚下明請轉法輪第一文易解第二成佛前
 事有二一佛坐道場所經時節二諸天供養

佛告諸至得三菩提時下第二諸梵請文為
 二一威光照動二十方梵請初威光者過去
 因果經云薩婆悉達處胎時三千國土朗然
 大光日月所不照處大明其中眾生各得相
 見初成道時亦如是朝為色天中為欲天瞞
 為鬼神說法夜亦如是觀解忽生眾生者心
 性本淨陰入界覆之則闇若修觀慧本性理
 顯又兩山是二諦其間是中道日月光是二
 智佛光是中道無分別智光照本有三諦洞
 明也爾時東方下第二十方梵文為二先九

方後上方九方爲四一東二東南三南四總明六方前三方梵文各有七一觀瑞二驚駭三相問決四尋光見佛五三業供養六請法七默許皆如文上方梵止有六世尊即說故無默許舊云東東南請小七方請大上方請小大若釋論明梵本請大佛雖說小未遂所請若說般若猶酬梵請耳若依方便品文梵王請大然佛法道同不應偏請但經論存略諸師偏據耳又如今佛自始至終具轉五味法輪一一皆酬梵請彼亦應然初十六子請轉滿教如今佛說華嚴東東南二方請轉半教如今佛說三藏後七方請轉對半明滿如今佛說方等上方梵請帶半明滿如今佛說般若後十六子請廢半明滿如今佛說法華醍醐教也今古節目文義相應云爾時大通智受十方下結緣近由由佛受請說法故後得覆講正作結緣文爲二一先轉半字法輪二諸子請轉廢半明滿字法輪初爲三一受請二正轉三聞法得道此中應說三乘如序品文而今不說者正爲下根論結緣開顯等

略不言六度耳三轉者謂示勸證云亦將三轉對示教利喜示即示轉教即勸轉利喜即證轉也亦對見諦思惟無學也爲聲聞三轉爲緣覺再轉爲菩薩一轉何故爾由根利鈍此一往說耳通方例皆三轉何故三轉諸佛語法法至於三爲衆生有三根故大論及婆沙悉作此說問初爲五人云何作三根耶復有八萬諸天何故無三根爲生三慧三根三道故十二行者一約四諦教二約十六行教十二者即示勸證是也行十二者三轉皆生眼智明覺又教十二爲能轉行十二爲所轉十二行是輪十二教非輪若作二輪義眼智明覺者約四十八法開此四心成十六心謂苦法忍爲眼苦法智爲智比忍爲明比智爲覺餘三諦亦爾故成十六心三根人各得十六心故成四十八行也十二諦是教法輪十二行是行法輪教輪則能轉唯是一權智所轉則有十二教也若行法輪能轉之教有十二所轉之行亦十二或通三人或約一人今就見諦道三人利根聞示轉即生眼智明覺

三人合舉故言十二行也所不能轉者沙門不聞尚不能知何況能轉支佛雖悟口不能說婆羅門雖聞其名不解其理魔梵亦爾夫轉者轉此法度入他心令彼得悟破六十二見乃名轉法輪爲無此義魔梵等所不能轉也有解大乘四諦次轉二諦次轉一諦次轉無諦皆是卷舒之意小乘四諦以生滅爲體大乘以無生爲體云十二因緣者還是別相細觀四諦耳約苦集即有無明老死約道滅即有無明滅乃至老死滅也又三人通觀十二緣二乘生滅十二緣爲菩薩無生十二緣無生十二緣本不生今不滅相生則相生傳滅云又三乘亦通論四諦二乘有量四諦爲菩薩無量四諦又六度亦通三人大品發趣品云阿羅漢支佛因六波羅蜜至彼岸攝大乘云凡夫二乘皆有六度但不同耳若爾應俱名波羅蜜然二乘行到涅槃彼岸亦稱波羅蜜但不能到佛道彼岸比菩薩異耳阿毗曇有六足六足即六度寶雲經明三乘毗尼云第三聞法得悟者初少中多不受者不

受四見悟初果也得解脫者脫子果兩縛得無學也深妙定者即俱解脫也云爾時十六王子皆出家下第二重請滿字法輪文為七一出家二請法三所將亦出家四佛受請五時衆有解不解六時節七說已入定諸根者六根也六根清淨故言通利又六根互用故言通入佛境界故言利智慧明了者開示悟入也彼佛初說圓頓諸子大乘功德悉皆具足愍諸方便重請佛開權顯實也聲聞皆已成就者明其郭除機動是故為請我等志願如來知見者此法華經但明佛之知見唯志於此即正請滿字廢半之文明顯若此也過二萬劫者上開三既久不容中間無事望下文意二萬劫中必說方等般若文云說六波羅蜜及諸神通事般若是行神通是事諸方等經多明不可思議事行也頌中又云分別真實法即是大品明實相般若意也十六沙彌信受及二乘即信得解者其餘千萬皆生疑惑是不解衆此不解衆即與十六子結法華之緣者也第七明說法已入定此正是結

緣之近由由佛入定不出諸疑惑衆無所詰問十六於後為不解者覆講說經也文中明入定處所即是靜室正入定即是住於禪定入定時節即是八萬四千劫云是時十六菩薩知佛入室下第二正結緣就此有二先法說結緣次譬說結緣就法說有三第一明昔日共結緣第二明中間更相值遇第三明今還說法華第一有四一者知佛入定二者王子覆講三者衆得利益四佛從定起稱歎菩薩由佛入定所以得說佛知一化將畢不復熟此段之人故令王子共其結緣又知此等必由王子究竟得度所以入定久而不出也云是十六沙彌下第一知佛入定各升法座下第二覆說法華一皆度下第三說法利益皆發菩提心故云度若初發心時誓願當作佛已過於世間即是度七方便彼岸義也大通智勝過八萬下第四佛從定起稱歎勸信此中復二一正稱歎菩薩二汝等皆當下勸物親近勸物親近中又二先勸親近次所以者何下第一釋勸意佛告諸比丘是十六

下第二明中間常相逢值逢值有三種若相逢遇常受大乘此輩中間皆已成就不至於今若相逢遇其退大仍接以小此輩中間猶故未盡今得還聞大乘之教三但論遇小不論遇大則中間未度于今亦不盡方始受大乃至滅後得道者是也問如上塵數多許時節今始得羅漢當知無生法忍何易可階答一云大聖善巧依四悉檀作如是說或說佛道長遠或說佛易得對治厭道長者說短於道生輕易想者說長或為發生宿善或隨世間所欲或為聞說長短即得入第一義當知言如許劫方今得羅漢者此是權行四悉檀引諸實行今入道耳諸比丘我今語汝彼佛下第三明今日還說法華此文復二先會古今後明還說法華先會古今復二一結師之古今二會弟子古今十六沙彌是古八方作佛是今也諸比丘我等為沙彌各各下次會弟子復二一會現在二會未來現在復四一不退者住三菩提也二此諸衆生退轉者今住聲聞三所以者何下釋退住意四爾時

所化無量下正結古今也及我滅度未來下第二會未來弟子復二一正會二我滅度後復有下釋疑者云現在者得聞佛說法華得入一道可是結緣之流未來者不聞法華而入滅度此豈能捨小得入一乘釋云雖滅度之終會得聞我於餘國作佛得聞是經餘國者三乘通教有餘國也除諸如來方便說者斷疑也三是方便說其實無三也諸比丘若如來下第二正明今日還說法華就此復三一時眾清淨二正說法華三釋前開三意涅槃時到者諸佛出世教道將畢之時即說此經如迦葉佛日月燈明等說此經竟即入涅槃釋迦說法華竟仍唱當滅眾又清淨者即斷德也信解堅固者信即四不壞信解即無漏正解了達真諦具諸禪定此智斷立也爾時堪教大道聞必信受也復次眾又清淨者得三藏教益免難也信解堅固者於方等教心相體信也了達空法聞般若教說法於空法中心得了達即轉教意也便集諸菩薩下正說法華集菩薩是聚親族等是說此經

也上釋親族法身大士影響眾以此文驗之其義明也集諸菩薩是會親族及聲聞眾是命其子也比丘當知如來方便下釋開三意也若世無二乘得滅度者何故如來前說權教釋云比丘當知如來方便深知眾生有小性欲著於五塵繫於五濁故先說三令破殺免難後說一也譬如五百下第二譬者有開有合開譬為二第一導師譬譬上覆講共結大緣即擬火宅之總譬方便之略頌也第二將導譬譬上中間相遇今還說法華也若中間相逢從我聞法皆為三菩提者不為此入設譬若中間相逢于今有住聲聞地者正為此入設第二譬也即擬火宅之別譬方便之廣頌就初導師譬其文有五即擬火宅總譬方便略頌中之六意也一五百由旬譬譬上未度之眾樂著諸有輪迴處所即擬火宅中其家廣大三界無安方便品安隱對不安隱處之意也二險難惡道譬譬上未度之眾煩惱垢重於如來智慧難信難解即擬火宅中火起方便品安隱對不安隱之法也三若有

多眾譬正譬上百千萬億種皆生疑惑不解之眾也即擬火宅中三十子五百人方便中知眾生性欲意也四欲過此道至珍寶處譬譬不取今取此譬譬上覆講法華擬草喻中一味雨火宅中唯有一門方便品宣示佛道意也五者一導師譬譬上第十六王子也即藥草中密雲火宅中長者方便中我今亦如是意也問此中作譬那不作父子相失長者驚入火宅不虛等名耶答凡作譬名各逐義便上取機感有無故言父子相失父子相見若取感應始赴機故言驚入火宅此中明將導眾人世世相值那得言相失先久結緣那得言始應為此義故不作相失驚入名耳而其意則通問何故不作不虛譬答上來已二十二番開權顯實其義已彰不虛本欲勸信下根信在不久故不須也五百由旬者基師三界結惑為三百七地所斷習氣為四百八地已上所斷無明為五百今謂非正別義又非三乘通義又有家云流來生死變易生死中間生死分段生死但取三種開為五百

不取流來流來是有識之初反源之始故不說之有人難此云勝鬘云因五果二果二者謂分段變易因五者謂五住語果既別開流來與中間語因亦應更廣五住無據不可用大論明肉身菩薩即分段法身菩薩謂變易又云阿羅漢捨三界報身受法性身故知生死二耳有人云三百喻三界四百喻七地二國中難過五百喻八地已上難者言四百喻七地則應三百喻六地六地與二乘齊功二乘極久唯六十劫或百劫菩薩至六地時二十二大僧祇二乘於佛道紆迴不應得齊今謂此非別義亦非通義有人言三界為三百七住及二乘為四百七住已上為五百如大經云初果八萬劫至菩提心處如三根人至此處即領解五種人至此處名度五百也此取極鈍故云八萬劫到利人不必爾如佛世得四果者聞法華皆發心何必八萬劫難云經明度三百由旬立二地豈是度三人也若五人並發菩提心名度五百者乃大經之一意明五人發心離於五位非此中意此中

明三百是權度在化城五百至寶所名實度廢化城進寶所若五人皆度皆進失化城譬意有人云三界為三百聲聞為四百緣覺地為五百凡夫三界郭二乘涅槃郭亦是有空二見華嚴藥樹不生深水火坑火坑即三界深水即二乘三界是二乘之牢獄二乘是菩薩之牢獄又是福智二邊不能自行不能化他大品明四百由旬合二乘為一百法華開為五百大品明菩薩度凡聖二地未明二乘是權闕化城之意既未論化城亦未明寶所答大品已顯實故辨寶所未開權不明化城下文云為止息故說二涅槃此令度三百由旬也汝所住地近於佛慧此令出二百由旬也文既分明無勞惑也又明二乘六義同十義別同出三界同盡無生同斷正使同得有餘無餘同得一切智同名小乘所以合為一化城別開十義行因久近六十劫百劫故根利鈍從師獨悟無悲鹿羊有相無相觀略廣能說得四果法不能說法得煖法在佛世不在佛世頓證漸證多現通少說法聲聞不定

火宅三車今為二百三根同為火宅所燒三根求出故三車佛道長遠二乘是惡道故二百須離佛乘非郭但明二百何故約凡開三約聖開二此引進之言耳所度猶少未度猶多若爾未成了義佛道雖長如萬里行但五百是難餘者則易問二百是二乘難三界是凡夫難菩薩有難不菩薩不以火宅為難不應求車而出既求車出何不為二百所郭云大論六十六云險道是世間一百由旬是欲界二百色界三百無色界四百是二乘又倒出數一百是二乘道二百是無色三百是色界四百是欲界此經明五百由旬即菩薩道若過五百即入佛道云人師及經論異出如前今依此經判之三界果報處為三百有餘國處為四百實報國處為五百下文合譬云知諸生生死死即是處所明矣但佛旨難知更須廣解見惑為一百五下分為二百五上分為三百塵沙為四百無明為五百下文合譬云煩惱險難惡道義相扶也入空觀能過三百入假觀能過四百入中觀能過五百下

文合譬云善知險道通塞之相即雙知因果二種五百義相扶也二險難惡道者譬生死因果也分段變易此即果險難也見思五住即因險難也由此因果故言惡道也無人者道有二種一曠絕有人可依二無人可依譬生死中有涅槃煩惱中有菩提雖復曠絕則有人可依若生死煩惱無涅槃菩提樂中無病病中無藥此則曠絕無人可依也三若有多眾者此譬王子所化未度之眾也四欲過此險道求至種覺故言至珍寶處也五有一導師者即第十六王子也眼耳清淨曰聰意清淨曰利總而言之即六根清淨也智即一心三智也明即具足五眼也又三明為明十力為達將導眾人下是第二將導譬此與火宅方便別譬廣頌意同也就此文為三一所將人眾譬譬本結緣未得度者本緣不失而為導師所將同上火宅長者見火驚怖方便品見五濁而起大悲心中二路懈退譬譬上中間相值退大乘心即以小接與火宅中不用身手而歎三車希有方便品息大乘化念

用方便意也三爾時導師知此人眾下滅化引至寶所譬譬上還為說法華經便集菩薩及聲聞眾為說此經即與火宅賜一大車方便中但說無上道意同也分文竟次釋文初所將人眾者通是結緣之眾也若別論者昔得大益被將已竟未得大益正是所將若約五百人三十子中未得開悟之人也中路懈退者即是第二譬文為二一退大二接小退大擬上息一接小擬上施三退大文為三一中路懈退即擬上無大機二白導師言擬上不受勸誠我等疲極即是不受勸門而復怖畏即不受誠門三不能復進者即擬上息化也分文竟次釋者初中路者非是半途名中路但以發心為始至佛為終此兩楹間而起退意故名中路第二白導師言者自有通途十四慈悲導師如文云有一導師將導眾人者是也自有結緣導師如文云所將人眾白導師言是也自有權智導師如文云導師多諸方便者是也自有實智導師如文云導師知此人眾是也今言白導師者正白結緣之導師

也以其退大則大滅接小則小生一生一滅感於法身呼此為白王子知其退大即是聞其所白善根微弱無明所翳故言疲極憚生死名為怖畏第三不能復進前路猶遠者見思塵沙無明難可卒斷也然用小乘接之今頓還本處亦有進義導師多方便下第二即以小接也上火宅方便開三乘法皆有四意此中具足初多方便譬擬宜而作是念下第二傷其失寶譬知有小無大也次作是念已下第三化作城譬正用方便是時疲極之眾下第四入城譬三乘悟入也上兩意如文作化城譬自復為二先作化後說化以方便力下正作化告眾言下正說化上車譬云吾為汝等造作此車今城是有故須先作說化城譬擬上勸示證也汝等勿怖莫得退還者勸轉令前進入城也今是大城乃至隨意所作者是示轉示城可住也若入是城快得安樂是證轉讚城安隱也前至寶所亦可得去者三藏教中未論前進一說云明三乘教時語言若發大乘求佛者亦善如其不能但作

二乘亦好例如勝鬘云三乘初業不愚於法自知應得作佛但厭憚不堪故取永滅耳若爾成別教又說云但今入化城竟然後更復前進大品淨名中悉有其意此即別接通意耳但於今佛未開顯之前不得彰灼而有此語若論宿世應有是言何者既知退意王子教化言汝等若畏生死且取涅槃消息然後更行大道亦可隨意亦如今人欲學大乘而畏怖生死欲起退心有人勸言汝且斷煩惱證羅漢然後更取大道亦可得也今現在一代化道未周不得忽有此語若開權顯實即得說之如涅槃中諸取羅漢者皆是其義也大歡喜即聞慧未曾有即煖位免惡道即頂位快安隱即忍位前入城即見諦位已度想即無學位此與火宅適子願勇銳推排出宅同也生已度想如得盡智安隱想如得無生智又具智德如已度證斷德如安隱也有人說寶所者三界二乘若過即至佛道佛道是寶所大經有三文一至菩提心二至菩提三至大涅槃門若至菩提心必至菩提及涅槃

引此三文者至菩提心謂至因菩提涅槃謂至果果中有智斷菩提是智涅槃是斷具說始終具說智斷故說三文也然過五百有三義一免惡道二得好路三是寶所菩提心謂度惡道菩提行如平坦路三得佛道如至寶所下文云今為汝說實汝所得非真此明度五百惡道也為佛一切智當發大精進謂行菩提好道也汝證一切智十力等佛法謂得佛道也何故要須度五百二乘度三百菩薩度四百佛乘度五百也爾時導師知此下第

中四果不經少時皆得入大豈須八萬之與十千耶云寶處在近向者大城我所化作即舉廢權譬以帖顯實譬也上云如來智慧難信難解是諸人等應以是法漸入佛慧擬方便中云我令脫苦縛得涅槃者佛以方便力示以三乘教也舊問車城皆譬無生智車何故無城何故有而車三城一車動城靜答長者道門外有車有隔故諸子不見可得假設門外有車車實無也城在迥地不得假設故城是有也就理教者執三教取理則三教皆得理此即有義如城也將理取教理既唯此一教即無三家之果即車義據無也車三城一者諸人同息一處所以城一也車就三人三人所樂不同故三理教者三家盡無生不異如城三人正使雖同盡而習氣有盡不盡有傍得知見有不得者故用此莊嚴盡無生此義不同如三車三家盡無生智明因盡果亡此處是極如城靜盡無生智運入無餘如車動也難云今明約眾生心車城俱有約佛智明亦有亦無權智所明為有如城實智

所明為無如車云化城正意為退大取小人
傍為發軔學小入上二周正意為發軔學小
人傍為退大人也三車通今昔化城正是引
教意未道是化也問化為三車與化城何異
答三車為說法輪作譬化城為神通輪作譬

又車約聲作譬諸子聞而不見城為色作譬
問城與二使云何使能指示如教詮理城為
息患教動而城靜教即四諦十二緣有異城
是二智入無餘不異教通因果城車但在果
教通有為無為城車但在無為權智謂車是
無名教施設故實智謂車是有無離文字說
解脫故權智照城為有引眾生故實智照城
是無偏真非實故權智照車是三逗三緣故
實智照車是一俱會一乘故權智照城為一
是偏真故實智照城為三如來藏故權智照
城為靜是灰斷故實智照城為動滅此化故
權智照車為運運入無餘故實智照車為靜
不動不出故作如此釋豈與舊同舊祇在小
乘中作義問凡五處開三顯一為有何異答
通論無異別論有差方便品約教開三顯一

文云如來但以一佛乘故為眾生說法無二
亦無三也火宅約行開三顯一車是運義運
則譬行文云各乘大車遊於四方嬉戲快樂
也信解中約人開三顯一結會儻作之人即
是長者之兒我等昔來真是佛子也藥草喻

中約差別無差別明權實不的去取但明眾
生不知佛令其知若七種差別即知權同依
一理無差別即知實差別無差別無差別而
差別今知此意耳終不說言無一有一此約
自行權實二智隨自意語故佛能知而眾生
不知也亦是通前後知不知明權實也今
化城正約理開三顯一寶所化城皆是小大
兩理破除二乘化理顯於寶所真實一理也
下去五百領解舉珠為譬亦是約理也諸比
丘如來下第二合譬先正合後舉譬帖合而
不次第如來亦復如是下初合第五導師譬
今為汝等下第二合第三多諸人眾譬知諸
生死煩惱惡道險難下第三合第二險惡道
譬長遠二字第四合第一五百由旬譬應去
應度者第五合聰慧明達亦是合第四欲過

險道至珍寶處也若眾生但聞下合第二將
導師譬本有三今亦合三若眾生合第一所
將人眾也但聞一佛乘者合第二退大接小
譬若眾生住於二地下合第三滅化將至寶
所譬也第二譬本有退大接小今具合之上

退大有三意但聞一佛乘者合上中路懈退
無機意也不欲見佛不欲聞法合上白導師
不受誠勸也便作是念者合上不能前進息
化意也佛知是心下合上小接退譬本有四
今合但三佛知是心合上導師多方擬宜
意也怯弱下劣者合上此等可憙知有小機
也而於中道為止息故下合第三現作化城
眾人人城譬也而於中道說二涅槃者三界
惑盡塵沙無明未破於此兩極判有餘無餘
涅槃亦是聲聞緣覺涅槃又分段已盡變易
未除二死之間判為有餘無餘故言中道云
若眾生住於二地下合第三將至寶所上文
有二今合亦二若眾生住於二地此合知止
息已如來爾時即便為說下此合將向寶所
如彼導師下第二牒譬帖合牒接退譬來合

施三牒滅化譬來合顯一如文云第二偈頌四十九行半偈頌上上有二今初二十二行半頌結緣之由次二十七行頌第二正結緣上由有近遠今初二行頌上遠由次無量慧世尊下十行半頌近由上遠由有二今初六行頌大通成道次六行頌十方梵來請轉法輪上成道中有五今初三行頌第二將成道前事次過十小劫已下第二一行頌第三正成道次彼佛十六子下第三二行頌第五十六子請轉法輪兼頌第四成道已眷屬申供養略不頌第一佛壽長遠也世尊甚難值下六行頌十方梵請上有二今初一行頌威光動耀次東方諸下第二五行頌十方梵尋光而來此中前三行頌東方次二行總頌九方也從無量慧世尊下第二十行半頌近由上有二今初五行頌第一轉二乘法輪次時十六王子下第二五行半頌第二重請轉大乘法輪上第一文復三初無量下半行頌第一受請次為宣下第二一行半頌第二正轉二乘法輪次宣暢下第三三行頌第三時衆

聞法得道時十六王子下五行半第二王子重請中有七初二句頌第一王子出家次皆共請彼下第二一行半頌第二正請轉大乘次佛知童子下第三二行頌二萬劫中間說方等般若次說是法華下第四半行正頌第四受請說法華次彼佛說經已下第五一行頌第七說經已入定略不頌第三父王所將八萬求出家第五聞經之衆有解不解第六說經時節長久也是諸沙彌等下二十七行頌正結緣上文有二今初八行頌法說次十九行頌譬說上法說有三今初三行頌第一昔結因緣次一行頌第二中間相值次四行頌第三今日還說法華上昔結因緣有四初半行頌佛入定次為無量億下第二一行半頌正覆講後一一沙彌下第三一行頌聞法得益略不頌第四佛起定稱歎也次彼佛滅度後下第二三行頌中間相遇是十六沙彌下第三四行頌今日說法華上文二初結會古今有現在未來今初三行頌結會現在師弟也以是本因緣下第二一行頌還說法華

上文有三今初一句頌第一時衆清淨以是本因緣今日時衆免難機發也次今說法華下第二三句頌第二為說是經也略不頌第三釋開三意也險惡道下第二十九行頌譬開合初十一行半頌開譬後七行半頌合譬上開譬為二今初三行頌五百由旬譬次八行半頌將導譬上五百譬有五今初一行頌第二險惡道次無數千萬下第二半行頌第三多諸人衆次其路甚下第三半行頌第一五百由旬次時有一導師下第四一句頌第五一導師強識有下三句頌聰慧明達也不頌第四衆人皆疲倦下第二有八行半頌第二將導譬上文有三今亦頌三初二字頌上第一將導從皆疲倦下第二五行三句三字頌第二衆人懈退權立化城譬次導師知已下第三二行半頌第三滅化引至寶所譬上第二文有二謂初懈退次接退今初三句三字頌懈退次五行頌作化接退上懈退中有三今略不頌第一中路也上接退作化文今皆具頌初一行頌第二傷失大次尋時思下

第二二句頌第一作念次化作大城下第三
二行半頌第三作化上文又二今初一行半
頌正作化譬諸舍宅者諸空觀境也園林者
二乘總持無漏法林也九次第定為渠流八
解為浴池重門是三空門又是重空三昧盡
無生智為樓閣高出也男女是定慧也觀心
解者智體周備如城隍善法圓足如郭之圍
繞畢竟空為舍宅直善能成自行如男能幹
家事慈悲外化如女外適次即作是化已下
第二一行頌上說化次諸人既入下第四一
行頌第四入城導師知息已下第三兩行半
頌第三滅化至寶所上文有二今初一句頌
第一知息已次集眾下第二二行一句頌滅
化引向寶所也我亦復如是下第二七行半
頌第二合二譬初半行頌合第一五百譬次
七行頌合第二將導譬上合五百又有四今
半行總頌而已也見諸求道者兩行頌合懈
退譬上頌開譬不頌中路今一行合中路懈
退次一行頌合接退作化也既知到涅槃下
第二五行頌第二合滅化至寶所上文合二

今頌亦二初半行頌第一知息已爾乃集大
眾下第二三行半頌第二合滅化引向寶所
也合息化偈中即有三德祕密藏義汝證一
切智即是般若具三十二相即是法身乃是
真實滅即是解脫三法不縱不橫即是見佛
性也諸佛之導師下一行頌帖合也
釋五百弟子受記品
此品具記千二而標五百者何五百得記名
同五百口陳頌解故以標品耳此品是因緣
說中第二段就得記有二千二百二千
十二復二一授滿願二授千二百滿願復二
一序默頌解二如來述記先敘其得解歡喜
次敘其默念頌解歡喜復二一敘其得解之
由二敘其得解歡喜得解之由有四初聞法
譬二周聞三顯一二授身子等五大弟子記
三復聞宿世結緣之事四復聞諸佛如來三
達無礙觀彼久遠猶若今日即是大自在神
通之力斤異二乘止齊八萬也若從佛聞是
智慧即領方便火宅中顯實方便隨宜所說
即領兩處開權諸大弟子即領開權授菩提

記即領顯實宿世因緣即領顯實神通之力
即領開權也得未曾有下敘其得解歡喜先
明內解歡喜次明外形恭敬由昔未聞開權
顯實而今得聞故言得未曾有除涅槃愛斷
破別惑故言心淨開佛知見是故踊躍得解
由佛故起恭敬也若約本迹者慶諸實行耳
而作是念下正明默念頌解初明默念頌解
次明默求發迹請記上二周得悟皆發言頌
解此何默念上為下根未悟事須彰言勸動
今下根已悟無所勸動故默念不言又上來
但頌解不求發迹言則不嫌今則亦解亦發
亦解故念避物譏嫌故默念允宜也又默
念頌解是大頌解如淨名默然是真入不二
法門也又權實不可思議非言非念而言而
念非言而言故上來口陳頌解亦非念而念
今則默念頌解上來何意不求發迹為下根
未悟是故不求發迹今下根已解權化事足
也若下根發迹則知中上亦權若約上中則
於下不便故也世尊其奇特所為希有者領
實智也隨順世間若干種性而為說法即領

權智也是七種方便之根性也此領方便品中開權顯實意也拔出衆生處處貪著者即是領火宅中開權顯實也我等於佛功德言不能宣者領上藥草喻中如來有無量功德汝等所不能及也既云言不能宣亦是念所不及也唯佛能知下即是默念求發迹請記也我等者通念請發諸人迹也深心是本今現作是迹本願者大慈誓願也大慈下化故我為誓上求作佛故我有願請上求即是求記請說下化即求發迹又從深心故明其三世助佛宣化從本願故即與授記也佛告下第二佛述而記之有長行偈頌長行有二一述本迹二與授記初有三一就釋迦世行因發迹二約過去佛世行因顯本三就三世佛所修因行滿就釋迦佛所行因發迹復三一舉示其人二總標本迹章三別釋本迹即標言汝等見不有二意一見其迹為小不二見其本功德不衆人但見迹為聲聞而不能知本是菩薩故云見不我常稱其下是標其迹迹為說法人中最為第一若非法身妙本無

以垂於第一勝迹昔來但言於迹中說法第一今則不爾於無上法久得第一此舉迹以顯本也亦常歎其下標其本地福慧萬行法門故云種種也本地既有種種法門亦復何但迹為二乘耶此舉本以明迹也精勤護持下別釋也助宣我法者即是迹中助宣半滿之法迹為下根聲聞即是護持助宣酪法迹在方等示受彈訶即是護持助宣生酥法迹領般若即是護持助宣熟酥法迹在法華得悟即是護持助宣醍醐法上總本中云我常稱歎種種功德者即此意也具足權實功德而迹起五味助佛調熟實行衆生宣非精勤助宣之意也別釋本迹功德能於四衆示教者分別半字教也具足解釋者助宣滿字般若教也而大饒益者助佛饒益半滿之衆生也同梵行者是迹所化半滿弟子也自捨如來下別述本地功德也自捨者降妙覺已來也無能知者七種方便也汝等勿謂助宣我法下第二就過去佛世顯其本行非直止於我所助宣半滿之法久遠佛所亦復助宣半

滿之法取今日助宣為發迹取過去助宣為顯本顯本有二一速本二近本速本冥邈為信良難故略而不述但舉九十億近本有宿命智能知近本故舉近以證速就九十億文具明助佛宣揚五味之教調熟衆生護持助宣即擬助宣半字酪味法佛之正法即擬助宣方等生酥味法又於空法明了者即擬助宣熟酥味法亦如今佛轉教說於般若明六波羅蜜互相收攝旋轉無礙九十億佛所亦助宣揚如今無異彼佛世人咸皆謂之實是聲聞于時既未發迹但謂被加命轉般若不言是大菩薩也化無量衆生今立三菩提者即是助宣醍醐味法在文可解云云亦於七佛下第三約三世佛所修因如文此亦例前助宣半滿五味之法利益大小也十七

妙法蓮華經文句卷第七下

妙法蓮華經文句卷第七下

校勘記

一 底本，明永樂北藏本。

一 一四四頁上一七行第二字「今」，

〔南〕作「合」。

一 一四六頁下四行第五字「今」，〔清〕作「令」。

一 一五二頁中一七行「二三」，〔南〕作「二一」。

一 一五三頁中一八行第六字「二」，〔南、清〕作「三」。

妙法蓮華經文句卷第八上 寧五

隋天台智者大師說

門人 禮 頌 記

漸漸具足菩薩下第二授記文為七一明因
圓二過無量下明果滿三明國土廣淨四明
國劫名字五明佛壽量六明法住大久七明
佛滅後供養舍利就第三國廣淨中復五一
明國大嚴淨地平如掌者經直言如掌不言
手掌手掌不平則非所引海底有石名掌此
石無有一微塵許不平當是類如海掌耳又
賢劫經正明如佛手掌非引人掌也二明純
是善道三明人天福慧具足月藏第九法食
喜食禪食經文總言法喜禪悅別分應有三
種差別四明菩薩聲聞眾數甚多五總結也
月藏第五云不殺得十功德一於一切眾生
得無所畏乃至第十命終生善道後作佛國
無害仗之具國人長壽不盜十功德一果報
具足而大為事決斷無有難礙乃至第十死
生善道後作佛國華寶莊嚴充滿不淫十功
德一諸根律儀為事決斷乃至死生善道後

作佛國無女人不妄語十功德一眾生信其
言乃至死生善道後作佛時國無臭穢常滿
寶華不兩舌十功德一身不可壞乃至死生
善道後作佛國魔不能壞眷屬不惡口得十
功德一柔輒語乃至死生善道作佛國法聲
充滿不綺語十功德一天人愛敬乃至死生
善道作佛國眾生強記不忘不貪十功德一
身根不缺乃至死生善道作佛國無魔外道
不瞋十功德一離一切瞋乃至死生善道作
佛國人得三昧不邪見十功德一心性柔善
乃至死生善道作佛國人正信偈有二十一
行半頌上發迹授記初有十四行頌發迹次
七行半頌授記初復二前七行總發諸聲聞
迹頌上我等之意也後七行頌上發滿願迹
總中有五初一行總標佛子為行難思已得
垂迹之法次知眾樂小法下第二一行明垂
迹之由次以無數方便下第三二行明垂迹
利益次內秘下第四二行明內懷大道外現
小失次若我具足下第五一行指略抑廣小
欲者示求小乘也懈怠示退大乘也非但示

為聲聞亦作外道及三毒凡夫也身子示瞋
難陀示貪調達示癡云今此當下第二七行
頌發滿願迹本上文有三今略頌二初五行
頌顯過去本後未來亦供養下第二二行頌
三世中佛所行因略不頌七佛及現佛也供
養諸如來下七行半頌授記上文有七今頌
其四初半行頌因圓次半行頌果滿其國名
淨下三句超頌國劫名號菩薩眾甚多下五
行三句頌國土廣淨略不頌壽命法住滅後
起塔也第二授千二百記一念請二與記三
領解請記如文授記文有長行偈頌長行有
三一總許千二百記二別授陳如陳如最初
悟道居首上座故別授記三別授記五百五
百名同頌別與記問但見五百得記不見千
二百答此五百即千二百數頌中末後一行
半總受七百故是千二百也又持品云我先
總記一切聲聞皆已授記即指今一行半非
是止授七百聲聞也偈頌有十一行為二初
九行半頌記陳如及與五百後一行半總授
一切聲聞記五百領解文有長行偈頌長行

先經家敘其歡喜次自陳領解經家先慶今得解歡喜次愧昔不解故自責慶中先明內心慶喜後明外形恭敬也悔過自責者即是明其愧昔不解也世尊我等下第二自陳領解有二一法說二譬說法說中初悔得少為足次責根鈍難悟從世尊乃至滅度是悔責昔迷得小為足不知求大從今乃知之是責根鈍始悟不早知之今知小非究竟大為真實也譬中二初略次正舉譬如無智者略舉譬況所以者何下釋無智意也譬說有二一者醉酒譬譬法說自悔得少為足不知求大領前法譬宿世中施權意二者親友覺悟譬譬法說自責根鈍難悟今乃知之領前法譬宿世中顯實就初復三意一者繫珠譬領上王子結緣二者醉臥不覺譬領上遇其退大三者起已遊行譬領上接之以小譬如有人者即二乘人也親友者昔日第十六王子也家即大乘教為家也醉酒而臥者當于爾時大機暫發無明暫伏以得聞經內心微解以無明重故還復迷失醉有二義一重醉都不

覺知二輕醉微覺事忘亦名不覺雖有二義終成繫珠如毒鼓耳官事當行者明王子餘處機興逗緣往應故云當行弘法化他此非私務故云官事無價寶珠者一乘實相真如智寶也繫其衣裏者慚愧忍辱能遮瞋恚及防外惡即是外衣信樂之心內裏善根即是內衣于時聞法微信樂欲即了因智願種子也第二醉臥不覺知者無明心重尋復不憶此領中間懈退不受大法也第三起已遊行他國者領上中間接之以小受三乘化也善根欲發歇苦求樂故云起已遊行無明覆解不知向本求大乘衣食故言向他國求於小乘衣食若魔佛相望生死魔界為他國佛法大小皆為本國就小大相望小乘未免生死猶是他國大乘永免生死乃為本土究竟還源也明背大乘國往小乘土不知從珠取給而備作自資獲一日價得少為足也於後會遇下第二親友發覺譬領上以是本因緣今說法華等賜大車也此為三先訶責二示珠三勸質訶責譬上動執生疑示珠譬宿世因

緣勸質譬得記作佛三周皆有此三意法說中我今脫苦縛即是訶責五佛章即是開示身子得記即是勸質譬說中我先不言皆為菩提即是訶責三車一車即是示珠中根得記即是勸質下根宿世因緣汝等善聽即是訶責覆講結緣還為說大即是示珠下根得記即是勸質繫珠中三意望三周者始在佛樹以大擬即是繫珠無機息化即是醉臥尋施方便即是起行譬喻中二萬億佛所即是繫珠遣傍人追問絕不受即是醉臥三車引得即是起行因緣中大通智勝佛所即是繫珠中路懈退即是醉臥接之以小即是起行此等皆名領權也某年月日者指大通佛所也佛亦如是下第二合譬譬本有二今各有三意從教化我等下合初一繫珠而尋廢忘合初二醉不覺知既得羅漢下合初三起已遊行一切智願下合後親友覺示譬上有三今亦三從智願不失者是合後一訶責從我久今汝下合後二示珠從我今乃知下合後三勸質所須也第二偈頌有十二行半為二

初一行半頌內心得解又二初一行頌慶喜
 次半行頌悔責也次於無量佛寶下第二有
 十一行頌自陳領解上文有二今初半行頌
 悔責得少為足略不頌難悟今乃知之如無
 智愚人半行頌略舉譬便自以為足頌釋無
 智意次十行頌譬說開合初六行頌開後四
 行頌合上開有二今初四行頌捨寶不知後
 二行頌親友覺悟餘文易見

釋授學無學人記品

研真斷惑名為學真窮惑盡名無學研修真
 理慕求勝見名之為學學位在三果四向真
 無漏慧也阿羅漢果研理已窮勝見已極無
 所復學故名無學約教釋品者析法研真名
 之為學惑盡真窮名為無學三藏意也體法
 研真名之為學無真無惑名為無學通意也
 自淺之深名之為學通別惑盡權實理窮名
 為無學此別意也研如來藏有學無學法性
 實相非學非無學而學而無學云是二千人
 或是學或是無學人同是一流一時受記同
 一名號故別為一品也此品是授記文中第

二段也就此文為二一請記二授記請中復
 二一者二人請二者千人請二人請記復
 有二一默念二者發言請記發言請記復二
 一者引例亦應有分二者引望二人最親時
 眾所望羅雲是佛子俗中親重阿難持佛法
 藏道中親勝勝重兩人不蒙別記則眾望不
 足也問若重若勝應同上流何意在此若如
 列眾二人在上教中獲記何意居下答總與
 千二百記二人已同上流今更索別記耳阿
 難是學人羅雲弟子位故入學無學章耳二
 千請記但有默念引例二意同故言如阿難
 願耳無發言者無重無勝等事也授記復二
 一先記二人後記二千阿難記中復五一長
 行二偈頌三十八菩薩生疑四如來發迹釋
 疑五阿難願本述歎疑者通疑聲聞今日發
 心即蒙佛記國淨若此昔方等中記諸菩薩
 無量劫行乃得佛記佛即發迹釋疑昔日與
 我同發大心即是同學由我精進前超得佛
 由彼多聞猶故持經迹為侍者本地如此今
 授妙記何足可疑餘記悉如文

釋法師品

此品五種法師一受持二讀三誦四解說五
 書寫大論明六種法師信力故受念力故持
 看文為讀不忘為誦宣傳為說聖人經書難
 解須解釋六種法師今經合受持為一合解
 說為一開讀誦為二足書寫為五別論四人
 是自行一人是化他大經分九品前四人無
 解是弟子位後五人有解是師位通論若自
 軌五法則自行之法師若教他五法則化他
 之法師自軌故通稱弟子化他故通稱法師
 今從通義故名法師品若作減數說者末五
 為四即四安樂行如後說若末四為三者受
 持是意業讀誦說是口業書寫是身業別論
 口業是化他身意是自行通論三業自軌即
 是自行之法師三業教詔即化他之法師故
 言法師品又是三門行此五法以自熏修即
 福德門弘宣五法廣利益者即化他門自修
 益彼皆順佛教即報恩門別論者自修報恩
 名自行益彼即化他通論自軌軌他皆稱法
 師故言法師品也又讀誦書寫是外行即如

來衣受持是內行即如來座解說益他是如
來室如來室別論是匠他衣座別論是自匠
通論不爾慈悲獲物惠利歸己名之如室遮
彼惡障已醜名之為衣安心於空方能安他
安他安己名之為座此則自軌三法亦名法
師利物必以慈悲入室為首涉有以忍辱為
基濟他以亡我為本能行三法大教宣通即
世間依止故名法師又東為二謂自行化他
此易解不復記又東為一謂如來行具一切
行悲拔一切苦謂四趣三界二乘菩薩等苦
慈與一切樂謂人天涅槃常住等樂柔和衣
障一切醜謂四住無知無明等醜空座亡一
切相謂有相無相非有相非無相此則通意
別意者慈悲生一切善柔和遮一切惡空座
蕩一切相又慈忍立一切福德空座成一切
智慧智慧是目所謂五眼福德是足所謂六
度又慈悲勝一切聲聞緣覺柔和勝一切凡
夫外道空座勝析體偏等菩薩故淨名云譬
如勝怨乃可為勇又慈悲破天魔柔和破陰
魔空破煩惱魔死魔大品云化一切眾生觀

一切空魔不得使云又慈忍故能問空座故
能答具二莊嚴又觀空故能問慈忍故能答
慈忍故能種能立能資空慧故能耘能破能
導又慈悲故何所隔柔和故何所礙空座故
何所諍出三諦故名為勝幢包含普攝名摩
訶衍是如來行故稱三昧王經言一切善法
慈為根本忍辱第一道無相最上若論圓行
說不可盡云問何故約三法明法師答事一
往論必須登堂整服坐座乃可敷弘故約三
耳又事理合論夫迷惑不出三種一約苦果
起惑二約結業起惑三約諦理起惑故用三
門而示導之又約理迷真故墮苦故用慈悲
門迷俗故沈空受樂故用和忍門迷中故成
智障故用空門云法者軌則也師者訓匠也
法雖可軌體不自弘通之在人五種通經皆
得稱師舉法成其自行皆以妙法為師師於
妙法自行成就故言法師又五種人能以妙
法訓匠於他故舉法目師故稱法師品也若
自軌法若法匠他俱名法師者則因緣釋品
也凡多種解皆約圓教法門而釋品也前三

周是迹門正說領解受記竟此下五品是迹
門流通非止陰益當時復欲津洽來世故有
五品流通法師寶塔兩品明弘經功深福重
流通未聞利益巨大達多一品引往弘經彼
我兼益以證功德深重持品八萬大士忍力
成者此土弘經新得記者他土弘經安樂行
一品舊云接退流通或當如此未必全然外
凡初心欣斯勝福見聲聞畏憚聞菩薩擯辱
顧己力弱無益自他便生退沒佛為此人說
安樂行依之法弘不慮危苦又法師品釋尊
自說弘經功福命竟流通寶塔品多寶分身
且證且助勸竟流通法師品初長行偈頌歎
美五種法師能持法人後長行偈頌歎美所
持之法又示通經方軌初復二一就稟道弟
子門功深福重二授道師門功深福重弟子
門又二一佛世弟子二滅後弟子初因藥王
告八萬者因者憑寄也欲以妙法憑寄藥王
使其領受告語八萬皆流通也指人問其見
不者的示持經得福之人也佛世又二一從
告藥王下揀出人類二從成於佛前下揀出

得記之緣若於佛前當機妙悟者是多聞深解二千五百者是也皆已現前與總別記竟今所揀類或是八部之類或是四眾三乘之類結法華座席咸於佛前者明其時節值佛在座也一句一偈者聞法極少也乃至一念者時節最促也皆與記當得善提者明其聞極少時極促隨喜之功遂得佛果何況具足得聞盡形受持五種流通三業供養云聞一句一偈者聞少解淺之類今皆與記少者尚記況復多深以少況多普廣若此下周既爾中上亦然可以意知不俟更說見實三昧經別與四天王記同名火持三十三天同名因陀羅幢王拘翼同名無著跋天同名淨智兜率同名釋法王上兩天亦通與記不顯別名梵天名大智力此是聞多解深之類今與聞少解淺之類耳舊云支佛菩薩無受記此文三乘皆記不須疑也一偈一句者增一集云隨取經中要偈如四諦之流者是也十住毗婆沙云惡賤名獸不求名無欲心無垢名解脫捨擔名涅槃惡賤於集不求於苦無垢是

道捨擔是滅又云佛語滿宿我有四句所謂四諦四念處等是也觀心者以一一句以一偈無句無偈而不一者云若取迹門中要句開示悟入乘是實乘遊於四方四安樂行勸發四意等是也一念隨喜者自未有行但隨喜法及人功報尚多況行到耶隨喜喜心有二若聞開權顯實即於一念心中深解非權非實之理信佛知見又能雙解權實事理圓融雖具煩惱性能知如來秘密之藏此即豎論隨喜又若聞開權顯實之意即於一心廣解一切心及一切法皆是佛法無有障礙若欲分別辯說無窮月四月至歲旋轉不盡雖未得真隨喜心能如此解法既如此人亦如是此約橫論隨喜即橫而豎即豎而橫故大經云寧願少聞多解義味即此意也後當更說從告藥王又如來滅後下明佛滅後弟子亦二先出弟子類略舉於人例上可知次言我亦與記功報如前解也若復有人下第二師門有長行偈頌長行有二先別後總別者人譚下上時譚現未總者無論下上及以

現未通明逆之得罪順之得福也就別復二一明現世二明來世就現世復二先明下品師後明上品師下品師為二初明師相次明師功報師相者即是五種法師十種供養也次藥王當知是諸人等已曾供養下明下品功報也曾供養者先因深也愍眾生故生此人間明現功大也若有人問下明未來報重也從何況盡能受持者明上品師亦二先況出上品師相次藥王當知是人自捨清淨業報此明上品功報也若是善男子於我滅後能竊為一人下明滅後師亦有上下品亦二先出下品人者即是但豎得其意有慧無聞止堪竊說未可處眾故是下品之師竊為一人說一句者雖得一句之解既不廣聞多學異義不可眾中而說一切問難有所不通便今正理不得宣弘如釋論明有慧無聞譬如小雨無雷若欲申此一句正言且當竊說耳當知是人則如來使者明其功報經是如智所說說於如理今日行人秉此如教宣於如理即是如來所使也行如來事者如智照

如理為事今日行人依如教行如理即是行
如來事也一如智一如理化眾生為事今日
行人能有大悲以此經中真如之理為眾生
說今得利益亦名行如來事也觀心解如來
使者智心觀境境即真如境來發智智為如
所使也如來所遣者觀智從如中來也行如
來事者歷一切法無不真如真如即佛事也
何況於大眾中下明上品人略不格量功報
此意可知也若有惡人下第二總明五種法
師逆者得罪順者得福也此中罪福不論福
田濃瘠但約初後心明其輕重初心學人既
具煩惱若加障礙則所學事廢故獲罪多佛
則平等惡不干偏豈能障礙故言罪輕供養
亦爾此人有待若得供養所修事成故施其
福勝佛則無待眾事滿足雖復獻供於佛無
益故言報劣譬如王子在難供奉所須其功
甚大若辱王種獲罪不輕故罪福俱重若獻
大王衣食為要事微汝欲侵陵不能致損故
罪福俱薄藥王下明讀誦如佛莊嚴即是順
之得福佛以定慧莊嚴此人能修定慧故也

為如來有荷者在背為荷在肩為擔修非權
非實法身之體即是為如來荷能權能實二
智之用即是為如來擔隨所向方應向禮者
上明以法為師今明堪為物師此人有趣向
悉與實相應皆可敬順順即是向敬即是
禮敬而順之及與供養等云偈有十六行為
三初二偈不頌長行別贊勸自行利他次十
三行頌上師門別通後一行歎經頌別總中
又二初七行頌別後六行頌總上別門有現
未今初四行頌現後三行頌未上現未一師
各有上下今初若有能下一行頌下品上半
出法師當知佛所下半出功報也諸有能受
持此下三行頌現在上品師初半行出上品
師捨於清淨土下第二二行半頌功報也吾
滅後下此三行頌未來初二行超頌況出上
品為二今初吾滅後下半行頌法師長行中
本闕功報今偈則有當合掌下第二一行半
明功報也若能於後世下第二一行追頌下
品師初半頌出人次我遣在下第二半頌功
報也若於一劫下第二六行總頌上總門上

總門亦二初二行頌逆者得罪有人求佛道
下第二四行頌順之得福也藥王今告汝下
第三一行歎經尊妙從爾時佛復告下第二
歎所持法及弘經方法所持法是自軌法弘
經法是軌他法有長行偈頌長行初歎經法
次方軌歎為五一約法歎亦格量歎二約人
歎三約處歎四約因歎五約果歎法妙故人
貴人貴故處尊處尊因圓因果極也初歎
法者已今當說此經為最有師解已是般若
當是涅槃法華之前小大相隔法華已後已
得會同此經正是會三之始歸一之初故言
第一經歎法華在已今當外此師闕一節云
今初言已者大品已上漸頓諸說也今者同
一座席謂無量義經也當者謂涅槃也大品
等漸頓皆帶方便取信為易今無量義一生
無量無量未還一是亦易信今法華論法一
切差別融通歸一法論人則師弟本迹俱皆
久遠二門悉與昔反難信難解當鋒難事法
華已說涅槃在後則易可信也祕要之藏者
隱而不說為祕總一切為要真如實相包蘊

為藏不可分布者法妙難信深智可授無智
益罪故不可妄說也從昔已來未曾顯說者
於三藏中不說二乘作佛亦不明師弟本迹
方等般若雖說實相之藏亦未說五乘作佛
亦未發迹顯本頓漸諸經皆未融會故名為
祕此經具說昔所祕法即是開祕密藏亦即
是祕密藏如此祕藏未曾顯說如來在世猶
多怨嫉者四十餘年不得即說今雖欲說而
五千尋即退座佛世尚爾何況未來理在難
化也如來滅後其能書持下第二約人歎也
此法在人則人尊貴如來衣履者即是修學
大忍為衣也上文云如來莊嚴也佛護念者
實相為佛實智為子尊崇實相發生實智即
為諸佛所護念也四信為信力四弘為願力
大智為善根力也信則信理理即法身志願
是立行行即解脫善根根固難動此即般若
當知三力即是三德祕密之藏初心棲此與
佛不殊故名與如來共宿也又信力修畢竟
空如來智如來棲畢竟空為舍此人信力亦
學畢竟空故與如來共宿手摩頭者此人以

願力善力自行權實以為機感機感名頭如
來以化他權實二智名手開發前人自行權
實之頭感應道交故言摩頭摩頭即投記也
在在處處下第三約處歎此法在處處貴
夫佛生處得道轉法輪入涅槃等處法王所
遊皆應起塔此經是法身生處得道之場法
輪正體大涅槃窟此經所在須塔供養不復
安舍利者釋論云碎骨是生身舍利經卷是
法身舍利此經是法身舍利不須更安生身
舍利生法二身各有全碎皆可解云若出家
下第四舉因歎若未善行菩薩道者稟前三
教即是碎散法身舍利未能巧度若入圓教
即是全身舍利則巧度巧度為善行也其有
眾生下第五舉果歎文為五一明近果二開
譬三合譬四釋近五揀非今初明近果當知
必得近三菩提果者安樂行中名為近處此
菩提果佛眼佛智知見處為體則有二種一
者初心菩提二者後心菩提今言近者正近
初住菩提又望圓果而修圓因得似解者名
之為近前約因歎修通別因即是未善去圓

果遠也若修圓因即是善行去圓果近也今
以圓如實智為因還以為果道前真如即是
正因道中真如即為緣因亦名了因道後真
如即是圓果故普賢觀云大乘因者即是實
相大乘果者亦是實相釋論云初觀實相名
因觀竟名果就理而論真如實相無當因果
亦非前後若約眾生修行則有前後及以因
果也譬如有人下第二開譬為二釋一約觀
門二約教門觀門者眾生之心具諸煩惱名
高原修習觀智名穿掘方證理味如得清水
依通觀乾慧地如乾土性地為溼土泥見諦
為得清水別觀從假入空但見空不見不空
斷四住如鑿乾土去水尚遠從空出假先知
非假今知非空因是二觀得入中道能伏無
明轉見溼土去水則近也圓觀中道非空非
假而照空假如漸至溼泥四住已盡無明已
伏已得中道相似圓解故言如泥若入初住
發真中解即破無明如泥澄清得見中道如
見清水法華論云佛性水當知次第次約教
門者土譬經教水喻中道教詮中道如土合

水三藏教門未詮中道猶如乾土方等般若帶於方便說中道義如見溼土法華教正直顯露說無上道如見泥因法華教生聞思修即悟中道真見佛性所發真慧不復依文如獲清水無復土相故華嚴云十住菩薩所有慧身不由他悟也有人言初教如高原乾土大品如溼土法華如泥佛果如水有人言維摩思益如乾土無量義如溼土法華如泥佛果如水有人言大品如乾土無量義如溼土法華如泥佛果如水三家皆五時之說生師云受持法華求佛道欲得如渴三乘於一乘難信於法華求解如高原受持讀誦為穿未能如聞而解為未聞如乾土能解為至泥注家同有人云此一解去佛遠一解去佛近初三師明諸教去佛遠法華去佛近後二解但於法華中論遠近尋經應二義一舉餘經對法華明遠近二就法華論遠近諸師失經旨問餘經何故去佛遠答未開權求佛人未決法華唯一無三永出退心故去佛近文云決了聲聞法問般若云何去佛遠答未開權邊

則遠始行菩薩不覺般若密化付財則於其是遠夫般若實慧方便是三世佛法身父母求佛者如老病人兩健扶之偏能遠去當知般若最勝法華開權不異般若顯實非般若外別有法華法華般若異名耳既是諸師異釋故錄之耳次菩薩亦如是下第三合璧於法華中獲聞思修即是圓觀三慧方能近果非乾溼等教中聞思修也所以者何下第四釋得近意也一切菩薩者明諸權因也三菩提者明一切權果也權因權果皆攝屬此經如乾溼等土悉依於水故言攝屬也開方便門示真實相者先宅云昔鹿苑機雜盛說三藏未明一理爾時以權隱實一理為權教所閉今王城赴大機顯於真實真實既顯則廢除昔教昔教被廢故方便門開一理既彰真實相顯也私謂此解乃是破方便非開方便也河西道朗云直詔三為方便即是開方便門昔不言三三為方便故方便門閉今詔三為方便即示一為真實也私謂此釋符文有人解開教身兩方便示教身兩真實三世佛唯

有形聲權實約此開示則十二八萬煥然了矣私謂前二師約教開示後人加之以身此竊龍印之義而為已釋還是破方便意非開義也問方便當體是門為通實相故為門私答具二義為實相門可解當體是門如華嚴尋善知識得種種法門算砂觀海等此二門各有開閉昔不言三三為方便故其門掩今說三是方便故其門開昔不說一是真實實門掩今說一是真實故實門開二者此方便復通實相故三乘方便為一乘門實相亦二義一當體虛通故名之為門如淨名不二門華嚴法界門等二能通方便作門劉虬云通物之功乃由乎一故一為方便之門汲引之效頗賴於三故三為真實之相言非三則方便之門得開語唯一則真實之相可示有人云具論有三義一以三為方便一為真實二三一皆方便非三非一為真實三三一為二非三非一為不二二不二皆權非二非不二為實此三章得為門如以三為一門此以權通實若以一為三門以實起權乃至不二亦

爾互得為門亦互得為相但不得互為權實耳私謂以三為一門者三乘通實相不若不通則非門須開三始得是門若開三者非復三也云何以三為實相門又三非佛因那得是實相門破此一義餘二例去云問方便真實互得為門亦得方便為方便門實相為實相門不此有四句二如前三實相為實相門四方便為方便門如名為義門義為名門由方便名顯方便義故名為義門由方便義應方便名故義為名門實相亦爾中論序云實非名不悟故寄中以宣之即其事也問得以三顯三以一顯一不此亦四句二如前以三顯三者言昔三異今一此三在一外今一異昔三此一在三外故一非三一三非一三悉是執見破此病故於一佛乘分別說三故三是一三汝等所行是菩薩道故一是一三一三一既不相異因緣之義以因緣三一顯自性三一亦以自性三一顯因緣三一故云以三顯一以一顯三有人引十五處明門方便品有二譬喻品有六信解品有三化城品有二

法師品有一觀音品有一方便二者智慧門權智為實智門生師云言教為門言教說實智故言教是實智門法華論同也次云以種種法門宣示佛道此用大乘教為門譬喻六者一其家廣大唯有一門還以大乘教為門二云所燒之門此約三界限域為門如諸家為門三唯有一門而復狹小還是大乘教為門四三車在門外還以三界為門五以佛教門出三界苦此用小教為門六在門外立依大乘用二死限域為門小乘亦出一切煩惱外正習已盡名在門外立也信解品住立門側大乘理教為門二云猶在門外亦如前三云長者門內如前化城請開甘露門亦大小教門重門高樓閣亦用小乘三空門方便門如前釋觀音亦以大教為門今釋開方便門者昔所不說今皆說之昔說一切世間治生產業何曾是於方便今皆開之即是實相不相違背昔說小乘方便若小乘果小乘果尚非實相門况小方便而當是門今皆開之即是實相汝等所行是菩薩道決了聲聞法是

諸經之王昔說二為方便門者今皆開之即是實相寧復是門成今眾生開示悟入佛之知見一色一香無非佛法若門若非門悉皆開之示真實相顯佛性水若不開者則深固幽遠無人能到而今開之即得見水無乾土也又作三慧釋一切皆屬此經即圓聞慧也此經開方便即圓思慧也示真實相者即圓修慧也此三幽遠佛今開示即得觀真藥王若有菩薩聞下第五揀非若菩薩聞此說而驚疑聲聞上慢悉是乾土尚非溼土况見水耶從若有善男子善女人如來滅後下第二略示弘經方法又為二一示方法二明利益方法為三一標章門二解釋三勸修修如來室是大慈悲若就同體即法身也若被眾生即是解脫能令眾生會於同體即是般若修如來衣者若就所覆即法身也若就能覆嚴身即寂滅忍也若就和光利物即解脫也若能坐即般若也若就所坐即法身也身座冥稱即解脫也又大慈安樂即資成柔和伏嗔斷惑即觀照坐座即法身安樂行中還廣

此三法上文如來莊嚴即衣也上云如來肩所荷者即此座也擔者即擔運是入室也我於餘國下第二舉五利益勸發流通一遣化人二遣化四衆三遣八部四見佛身五與總持也若初心未淳止可遣化人未可遣化四衆八部若見天龍倚此自高妨損其道故不可令見也若心無倚著則堪見佛況復天龍況得總持自證利益耶偈有十八行半爲三初一行總勸不頌長行次十六行半頌上長行後一行結勸上約果歎文有五今初一行半頌開譬次藥王汝當知第二二行半頌合譬略不頌餘三近果釋揀非等也上通經方軌中有二方軌利益今十二行半頌初三行半頌方軌中有三今亦頌三意也我千萬億下次九行頌利益初一行總明如來以五事利益之意正由應身徧滿十方能爲五事守護行人若我滅後下一行半頌第二遣四衆引導下一行半頌第一遣化人若說法之人下二行頌第五今得總持若人具是德下一行頌第四今得見佛若人在空閑下二行頌

第三遣八部云

妙法蓮華經文句卷第八上

妙法蓮華經文句卷第八上

校勘記

- 一 底本，明永樂北藏本。
 - 一 一六一頁上四行第二字「今」，作「令」。
- [南]

妙法蓮華經文句卷第八下

寧

隋天台智者大師說

門人灌頂記

釋見寶塔品

梵言塔婆或偷婆此翻方墳亦言靈廟又言

支提無骨身者也此塔既有全身不散則不稱支提阿含明四支微切謂生處得道轉法輪入滅四處起塔今之寶塔是先佛入滅支微經云佛三種身從此經生諸佛於此而坐道場諸佛於此而轉法輪諸佛於此而般涅槃祇此法華即是三世諸佛之四支微先佛已居今佛並坐當佛亦然此塔出來明顯此事四眾皆親故言見寶塔品瓔珞經善吉問生身全身碎身功德等耶佛言不等色身言教化訓三業具足清淨眾生得至道場全碎舍利正可威神光明供養得福是故不等又問頂王如來十二那術劫說法教化舍利亦爾此應是等佛言皆頂王如來神力所作耳彼經格全碎舍利皆由生身佛力今經格生身全碎舍利法身偏圓舍利皆從經出顯

此經功德弘持力大從地涌來證明此事四眾皆親故言見寶塔品北地師云佛為身子說經時寶塔已現為作證明若說經竟來證何等經家作次第安置三周後耳此乃人情則不可信今依薩雲分陀利經云佛說法華

無央數偈時有七寶塔從地涌出中有金鉢林上有佛字袍休蘭羅漢言大寶歎釋尊言我故來供養願坐我金鉢更為我說薩雲分陀利依此經證即是說三周後更請壽量明文聖說而不肯用之穿鑿那可承耶此塔

正為證前請後從地涌出四眾皆親故言見寶塔品地師說多寶是法身佛釋論說多寶並願化身來證經此文亦爾師言法身無來無出報身魏堂堂應身普應一切若即此謂是三佛者未盡其體也祇是表示而已多寶表法佛釋尊表報佛分身表應佛三佛雖三而不一異應作如此說如此信解也此四番即四悉檀解見寶塔云塔出為兩一發音聲以證前開塔以起後證前者證三周說法皆是真實若略言真實者皆與實相相應也

若廣言真實者離四句絕百非也若處中說者八不名真實塔從地涌示不滅分座共坐示不生入塔示不常現塔示不斷分身示不一全身示不異多寶護座示不來釋迦坐半座示不出八不顯然故是真實又證迹門流

通持經功深弘宣力大皆真實也平等大慧者與般若云何釋論七十九云般若是三世諸佛妙法如一城門四方皆入當知般若亦稱妙法此經稱平等大慧二文相指其意可知起後者若欲開塔須集分身明玄付屬聲

徹下方召本弟子論於壽量久遠之塔從地涌出開自在神通之力顯過去世益物也發大音聲開師子奮迅之力顯現在十方開權顯實也有大誓願未來諸佛若說此經我之寶塔皆到其所為作證明開大勢威猛之力顯未來常住不滅也又塔在空中亦證前起後七方便人藏理未開無明所隱如塔在地開三周開三顯實開佛知見顯出法身如塔涌空此即證前修得法身久已明著如塔在空無能開者表本地久成眾所不識若發迹

願本了達無疑此即起後也若塔從地出表
法身顯與餘經亦同亦異菩薩顯法身則同
二乘顯法身則異若塔在空開門見佛表發
迹願本與餘經永異若塔來證前事已彰灼
蓋不須疑塔來起後密有其意眾所未知今
取後義預作此釋亦復無咎觀心解者依經
修觀與法身相應境智必會如塔來證經境
智既會則大報圓滿如釋迦與多寶同坐一
座以大報圓故隨機出應如分身皆集由多
寶出故則三佛得願由持經故即具三身普
賢觀云佛三種身從方等生即此義也有人
分此品下十一品是神通身輪開本迹從彌
勒問下是說法口輪開本迹本迹意未彰從
此分文太早云此品有長行偈頌長行有三
一明多寶涌現二明分身速集三明釋迦唱
募初文有六一塔現之相二諸天供養三多
寶稱歎四時眾驚疑五大樂說問六如來答
七寶為塔者明法身之地以性得七覺七聖
財寶塔者實相之境法身所依處也高五有
由旬者是二萬里豎明因中萬行果中萬德

也廣二百五十由旬即是一萬里橫用萬善
莊嚴也地者無明心地也以無所破破於無
明以無所住住第一義空種種寶物者眾多
定慧而莊校也欄楯是總持也龕室千萬者
無量慈悲之室亦是無量空舍幢幡是神通
勝相也垂寶瓔珞者四十地功德上莊嚴法
身下被眾生也寶鈴萬億者八音四辯也四
面出香者四諦道風吹四德香也高至四天
王宮者窮四諦理也從三十三天下第二諸
天供養事解可知更復約理三十心為三十
十地為一等覺為一妙覺為一合為三十三
同依實相境也兩天曼陀羅者初心亦具四
十二地功德後心亦爾皆以四十地所有因
花歸向法身也餘諸天龍下即是內凡外凡
等亦依實相向果行因也爾時寶塔中下第
三多寶稱歎正證前開權顯實不虛也平等
大慧者即是諸佛智慧如前行步平等義也
平等有二一法等即中道理二眾生等一切
眾生同得佛慧大者如前高廣義也約觀心
者空觀豎等假觀橫等中觀橫豎平等平等

雙照即是平等大慧也如是如是者一如法
相是二如根性是也皆是真實也如法相說
故言真實也爾時四眾見下第四時眾驚疑
文有二一得法喜二者疑怪也爾時有菩薩
下第五大樂說因疑請問若望下答意應為
三問一問何因有此塔二問何故塔從地出
三問何故發是音聲也爾時佛告下第六佛
答此三一先答第二問此佛有願為證法華
故從地涌出也被佛成道下追答第一問由
彼佛命令造此塔也次其佛以神下第三答
第三為作證明故發是音聲也釋論明多寶
佛不得說法而取滅度師解不爾彼佛告諸
比丘比丘即是受化之人何謂不說當是多
寶亦得開三不得顯實故釋論云不得說法
耳以是義故雖復滅度在在處處有說法華
經便隨喜作證也大樂說以如來神力下第
二明分身速集就此有七一樂說請見多寶
二應集分身三樂說請集四放光速召五諸
佛回來六嚴淨國界七與欲開塔釋初請云
承佛神力者欲開塔須集佛集佛即付囑付

囑即召下方下方出即應開近顯遠此是大
事之由豈非佛神力令問也餘段如文爾時
佛放白毫下四放光遠召三變土淨者此正
由三昧三昧有三初變婆羅是皆捨能變穩
為淨次變二百那由他是勝處轉變自在後
變二百那由他是一切處於境無闕又初一
變淨表淨除四住次一變淨表淨除塵沙後
一變淨表淨除無明是時諸佛坐師子座第
七與欲開塔復五一諸佛問訊說欲二釋迦
開塔三四眾皆同見聞四二佛分座而坐五
四眾請加諸佛同與欲開塔如僧中作法與
欲意也大集明若干佛與欲華嚴亦說十方
若干佛同說華嚴大品亦云千佛同說般若
皆不云是釋迦分身準今經者應是分身彼
帶方便故時中不顯說耳今經非但數多亦
直說是分身咸來與欲也爾時釋迦見下第
二開塔者即是開權見佛者即是顯實亦是
證前復將開後如却關鑰者却障機動也以
大音聲下第三釋迦唱募竟流通人復為三
一大聲唱募如來不欠下第二明付囑時至

佛欲以下第三明付囑有在在者若佛在
世隨機利物自說正法無待他人今佛化緣
機盡欲令此法利益無窮故須付囑流通也
付囑有在者此有二意一近今有在付八萬
二萬舊住菩薩此土弘宣二遠今有在付本
弟子下方千界微塵今觸處流通又發起壽
量也偈有四十八行頌上三意初有三行半
頌多寶滅度第二有八行半頌分身集第三
有三十六行頌釋迦付囑前二如文告諸大
眾下第三復二初八行半舉三佛以勸流通
次有二十七行半舉難持之法以勸流通就
初有三初一行半舉寶其人其多寶下第
二有三行正舉三佛以勸持經次其有能護
下第三四行能持此經即是供養三佛及見
三佛以釋勸意諸善男子下第二二十七行
半舉難持之法以勸流通復二初二十行正
舉勸二七行半釋勸意就初復三初一行誠
勸次諸餘經典下第二十七行正舉難持以
勸流通後我為佛道下第三二行釋難持意
若有能持即持佛身此意豈易第二諸善男

子我於下七行半明能持難持能成勝德以
釋勸意就此復三初一行半重舉持經人次
此經難持下第二一行半明能持難持則諸
佛喜歡次是則勇猛下第三四行半明能持
難持即成勝行勝行有自他也恐畏世者天
竺名沙特此云恐畏天竺云毘陀此云賢劫
之異名耳
釋提婆達多品
生時人天心熱因此立名即因緣釋名也因
行逆而理順即圓教之意非餘教意也本地
清涼迹示天熱同衆生病耳寶唱經目云法
華凡四譯兩存兩設雲摩羅利此言法護西
晉長安譯名正法華法護仍教演安法所承
者是也鳩摩羅什此翻章壽是龜茲國人以
偽秦弘始五年四月二十三日於長安道遙
園譯大品竟至八年夏於草堂寺譯此妙法
蓮華命僧廩講之廩開為九轍當時二十八
品長安宮人請此品淹留在內江東所傳止
得二十七品梁有滿法師講經一百徧於長
沙郡燒身仍以此品安持品之前彼自私安

未聞天下陳有南嶽禪師次此品在寶塔之後晚以正法華勘之甚相應今四續混和見長安舊本故知二師深得經意提婆達多亦言達兜此翻天熱其破僧將五百比丘去身子厭之眠熟目連擊衆將還眠起發誓誓報此怨捧三十肘石廣十五肘擲佛山神手遮小石迸傷佛足血出教闍王放醉象蹋佛拳華色比丘尼死安毒十八欲禮佛足中傷於佛是爲五逆罪若作三逆教王毒爪至害佛攝以其應行逆生時人天心熱從是得名故言天熱此迹也若作本解者衆生煩惱故菩薩示熱同其病行而度脫之此品來意引古弘經傳益非謬明今宣化事驗不虛舉往勸今使流通也文爲二一訖生佛前蓮華化生明昔日達多通經釋迦成道二從於時下方多寶所從菩薩下明今日文殊通經龍女作佛稟教尚然宣通之功益豈不大矣故提婆達受記文殊可以意知云第一有三一明往昔師弟持經之相二結會古今三勸信第一有長行偈頌長行有四一明求法時節二於

多劫中下正明求法三時有仙人下明求得法師四王聞下明受法奉行第一如文於多劫中下第二復二一明發願爲欲滿足下二明修行行中復二一明欲滿檀那勤行布施如文二時世人下明爲滿般若推求妙法偈有七行半頌上長行初二句頌第一求法時節次雖作下第二一行半頌第二正求法次時有阿私下第三一行半頌第三得說法師時王聞仙言下第四二行半頌受法奉行後亦不爲已下第五一行半結證勸信告諸比丘王者下第二結會古今復二一正結會古今如文由提婆下第二明師弟功報俱滿滿中復二先明弟子因報已滿次佛告四衆下第二明法師妙果當成弟子中復三先明因滿次三十二相下明果圓後皆因提婆下結證由通經者益初具足六波羅蜜者度義甚多如大論說捨依正名檀防止七支名戒打罵不報名忍爲事始終名精進四禪八定名禪分地息諍名般若又若東十善爲六者不殺至不妄語是檀不兩舌是尸不惡口是

忍不綺語是進不貪瞋是禪不邪見是般若菩薩善戒第十云六波羅蜜有三種一對治謂慳惡瞋念亂癡云二謂相生謂捨家持戒遇辱須忍忍已精進進已調五根根調知法界三謂果報富具色力壽安辯又餘經云施報富戒報善道忍報端正進報神通禪報生天智報破煩惱如是等例皆是三藏明六度相也若施受財物三事皆空名檀不見持犯名戒能忍所忍不可得名忍身心不動名精進不亂不味名禪非智非愚名般若如此疏例即通教中六度相若言檀有十利伏慳煩惱捨心相續與衆生同資產生家富家生施心現前四衆愛樂處衆不怯畏勝名徧布手足柔軟乃至詣道場恒值善知識戒有十利者滿一切智如佛所學智者不毀誓願不退安住於行棄捨生死慕樂涅槃得無纏心得勝三昧不之信財忍有十利者火刀毒水皆不能害非人所護身相莊嚴閉惡道生梵天晝夜常安身不離喜樂精進有十利者他不能折伏佛所攝非人所護聞法不忘未聞

能聞增長辯才得三昧性少病惱隨食能銷
如優鉢華增長禪有十利者安住儀式行慈
境界無悔熱守護諸根得無貪喜離愛欲修
禪不空解脫魔羅安住佛境解脫成熱燃若
有十利者不取施相不依戒不住忍力不離
身心精進禪無所住魔不能擾他言論不能
動達生死底起增上慈不樂二乘地四事應
修檀一修道者破慳貪故二莊嚴菩提故三
自他利益欲施時施已皆歡喜名自利飢
渴者得除是名利他四得後世大善果後世
獲大尊貴饒財四事應持戒自修善法滅惡
戒莊嚴菩提攝眾生臥覺安不悔恨於眾生
無害心後受人天得涅槃等樂四事應修忍
修忍除不忍莊嚴菩提攝眾生彼此離怖畏
後世無瞋眷屬不壞不受苦惱得人天涅槃
樂四事應須修精進道破懈怠莊嚴菩提攝
眾生增善法是自利不惱他是利他後得大
力致菩提四事應修禪定破亂心莊嚴菩
提攝眾生身心寂靜是自利不惱眾生是利
他後受清淨身安隱得涅槃四事應修般若

智慧破無明莊嚴菩提攝眾生智慧自樂是
自利能教眾生是利他能壞煩惱及智障等
是大果如此流例是別教明六度相也月藏
第一云若眾生唯依讀誦求菩提是人為著
世俗尚不調已煩惱何能調他是人著嫉妒
名利富貴高心自是輕慢毀他尚不得欲界
善根況色無色善根況二乘菩提況無上菩
提如星火不能乾海口氣不能動山藕絲不
能稱岳何者世俗不能滿菩提何者是第一
義謂造一切福事若修身修心修慧以第一
義熏修則速滿六波羅蜜若行若坐捨攀緣
想是檀捨攀緣不犯是尸於境界不生瘡疣
是羸不捨於離是精進於事中不放逸是禪
於諸法體性無生是般若復次於陰捨是檀
不計念陰是尸於陰無我想是羸於陰起怨
想是進於陰不熾然是禪於陰畢竟棄是般
若於界捨是檀於界不擾濁是尸於界捨因
緣是羸於界數數捨是進於界不起發是禪
於界如幻想是般若如是等是第一義諦
善巧方便甚深法要能滿六波羅蜜以此法

自為為他三世菩薩悉修是法成菩提故非
世俗也此法能息眾生煩惱道苦道安置善
提道華嚴七地方明念念具十波羅蜜修習
一切佛法以求佛道善根與一切眾生是檀
能滅一切煩惱熱是尸於一切眾生無所傷
是忍求善無厭是進修道心不散常向一切
智是禪忍諸法不生門是般若能起無量智
門是方便求轉勝智是願魔邪不能阻是力
於一切法相如實說是智是十波羅蜜具故
四攝道品三解脫一切助菩提法於念念中
皆具足諸地皆念念具足此地勝故如此例
是圓教六度相也次三十二相下明果圓三
十二相者足平如奩底足趺隆如龜背兩相
共一修堅固布施千輻輪但一修安慰恐怖
者足跟長手足指長圓直身三相共一修謂
不殺戒七處滿肩頸臂脚一修謂恒作施主
手足合縷及柔軟兩相一修謂四攝足跟直
踝不現毛右旋三相共一修恒以善法饒益
眾生鹿膊腸相一修以經書教人不悋皮膚
不受塵垢相一修如問而答黃金色相一修

忍辱好衣施陰馬藏相一修和合諍訟梵身
圓等相手摩膝相共一修慈等心教導肩圓
項光師子臆三相共一修恒令施得增長萬
字相一修不惱衆生紺眼牛王睫二相共一
修不恚愛視衆生頂髻青髮二相共一修諸
功德在人前一孔一毛白毫二相共一修不
妄語四十齒白齊二相共一修不兩舌廣長
舌梵音聲二相共一修不羸惡語師子頰一
修不綺語四牙一修離邪命一切衆生功德
等佛一毛佛諸毛功德等一好諸好等一相
諸相等白毫肉髻白毫肉髻百千萬億乃成
梵音聲三十二相因雖各各論其真因者持
戒精進精進無戒尚不得人天身況餘相耶
此則三藏教相本也空無生是通教相本道
種智是別教相本實相是圓教相本八十種
好者二十指手足表裏八處平滿踈膝六
處好妙肩肘腕六處滿兩髀奇中三處好龍
尻二處馬藏一兩膊二臂齊二脇腋乳六腹
背背項四上下牙上下脣齶兩頰兩鬢兩目
兩眉兩鼻孔額兩頰兩耳頭圓若分別四種

好義準相可知告諸四衆下第二明師妙果
當成師中復三初明正果成分陀利經云調
達作佛號提和羅耶漢言天王國名提和越
漢言天地時天王佛住世二十下第二明化
度時天王佛般涅槃下第三明滅後利益佛
告比丘下第三勸修如文蓮華化生者胎經
云蓮華生者非胎卵濕化之化生也非化而
言化耳實不如四生中之化生也請觀音云
蓮華化生爲父母無量壽觀云處華臺久者
爲胎生實非胎也例蓮華生者亦稱溼卵而
非溼卵云於時下方者第二明今日文殊通
經利益復二初明文殊通經二從文殊言我
於海中下明利益第一復五一明智積請退
分陀利經云下方佛所從菩薩名般若拘羅
漢言智積二釋迦下明釋尊止之令待通經
利益之證智積謂多寶爲證經故出勸物流
通既訖是故請還釋迦止者雖迹門事訖本
門未彰故託在文殊以留多寶佛之密意非
菩薩所知從爾時文殊下第三文殊尋來四
智積菩薩下智積問所化幾如五文殊師利

言下文殊答非口所宣也就第五復七一答
利益甚衆所言未下第二蒙益者集證此諸
菩薩下第三皆是文殊所化本聲聞人下第
四本聲聞人先稟權教住二乘道分陀利經
云蓮華從池出者本發菩薩心其華在空中
說摩訶衍事本發聲聞心者華在空中但說
斷生死事從今皆修行下第五今聞實教悉
住大乘法文殊謂智積下第六文殊結益爾
時下七智積偈歎也從文殊言我於海中下
第二明利益文爲九一文殊自敘二智積問
三答四智積執別教爲疑五龍女明圓釋疑
六身子挾三藏權難七龍女以一實除疑八
時衆聞見得益九智積身子默然信伏第五
龍女明圓釋疑初經敘現申敬次有三行半
偈爲三初半行明持經得解次二行明成就
二身後一行引佛爲證罪福者約七方便傳
作今偈深達無罪無福入一實相名爲深達
也十方即十法界同以實慧朗之故言徧照
也具三十二相者深得法身之理即備相好
如大品明欲得一切法當學般若如得如意

珠也二乘但得空空無相好也云第六身子復難先總難信後釋出五礙第七龍女現成明證復二一者獻珠表得圓解圓珠表其修得圓因奉佛是將因剋果佛受疾者獲果速也此即一念坐道場成佛不虛也二正示因圓果滿胎經云魔梵釋女皆不捨身不受身悉於現身得成佛故偈言法性如大海不說有是非凡夫賢聖人平等無高下唯在心垢滅取證如反掌第八爾時娑婆下明時衆見聞復二先明見聞二人天歡喜彼此蒙益南方緣熟宜以八相成道此土緣薄祇以龍女教化此是權巧之力得一身一切身普現色身三昧也

釋持品

二萬菩薩奉命弘經故名持品重勸八十萬

億那由他弘經故名勸持品問何故爾答二萬是法師品初別命之數故奉旨受持八十萬億那由他等前無別命止是通覓今佛眼視令其發誓此土通經通證驗深重佛意殷勤是故蒙勸而弘故有二意也就文爲二

先明受持後明勸持初文復三一二萬菩薩奉命此土持經二五百八千聲聞發誓他國流通三諸尼請記問此諸聲聞已成大士何故不能此土弘經答爲引初心始行菩薩未能惡世苦行通經復欲開於安樂行品也第

二勸持有長行偈頌長行有五十一佛眼視二

菩薩請告三佛默然四菩薩知意五發誓通

經眼視默勸而不告言者上來雖不別命而

舉持經功德深厚引證分明多寶分身遠來

勸發此之殷勤事義已足有欲應命宜即發

誓無煩復言又將護聲聞他方之願故不稱

揚也偈有二十行請護持經不復細分尋文

可解前十七行被忍衣弘經次第二一行入

室弘經次第三一行坐座弘經次第四一行

總結請加中阿合第六云阿蘭若此翻無事

頭陀此翻抖擻寶雲經第六云阿練兒處比

丘見王王子婆羅門及一切人來比丘唱善

分法身餘一切道法亦如是說如龜鼻人說梅檀自既無香亦不自聞天人龍神鳩槃荼終不供養無戒人餘四分亦如是說無有能將妙法來必由淨戒之所起餘四亦如是若遇垂死最重病痛惱逼極無慘念佛三昧常不捨一切苦切奪其心彼人自解是法故則知一切諸法空忍辱鎧者中阿合第五云黑齒比丘訴佛云舍利弗罵我說我佛疾喚舍利弗實罵說不舍利弗言心不定者或說罵我心已定云何說罵如折角牛不觸犍人如殘童子耻不惱彼我心如地水火風淨與不淨大小便利涕唾受而不罵心如掃帚淨不淨俱掃又如破器盛脂置之日中滌滌恒漏自觀九孔常漏不淨云何罵說於他又如死蛇狗等繫淨童子頸懸恥自愧不罵說他佛問如是惡人彼云何觀答人有五一身善口意不善但念其善不念不善如納衣比丘見糞聚弊帛左提右舒截棄不淨而取於淨念用其身淨以規我身棄其口意以誡我口意又口行淨身意不淨亦念其口棄其身意

如熱渴者值多草地披草掬水涼身止渴又
意淨身口不淨亦念其意不用其身口如行
路熱渴唯牛跡少水我若用掬若手水則渾
濁應兩膝跪兩手憑口就吸之以除熱渴又
三業皆不淨者雖無可用當痛念之如路見

病人安置使穩念此不淨使得值善知識治
其三業勿令墮落三途又三種皆淨常念是
人以自訓況念齊願齊如清涼池多諸華草
熱渴入中以自蘇息常念境界以去我惡此
是三藏教中用苦無常不淨無我空為鑿也

毗婆沙第八云念罵是一語餘皆喚聲終日
喚聲於我何為又此方是卑陋語他方是稱
讚語我若念此卑語無處得樂又觀此字罵
若顛倒此字即成讚又罵是一界少分一入
少分一陰少分罵少不罵多又誰成就罵罵
者成就成就自彼於我何為又罵是一字一
字不成罵二字成罵無有一時稱二字者若
稱後字前字已滅又能罵所罵一時同一刹
那俱滅於我何為如是等用空為鑿也十七
云凡聖俱有三受云何差別凡夫於苦受有

二一身受苦二心受憂悲如三毒箭失樂則
瞋得樂則喜不苦不樂則癡聖人但有身受
而無心受於苦不瞋於樂不愛於不苦不樂
不癡三使不能使於使得解脫故有凡聖之
異如此等有無差降者此用別教為鑿也今

經明鑿者以念佛為鑿是念法佛第一義佛
即是法故文云念佛告勅即法也佛即是僧
僧即事理俱和毗盧遮那徧一切處也如此
之鑿一鑿一切鑿即圓教鑿也
釋安樂行品

釋此品為三依事附文法門事者身無危險
故安心無憂惱故樂身安心樂故能進行附
文者著如來衣則法身安入如來室故解脫
心樂坐如來座故般若導行進此附上品文
釋耳住忍辱地故身安而不卒暴故心樂觀
諸法實相故行進又法門者安名不動樂名
無受行名無行不動者六道生死二聖涅槃
所不能動既不緣二邊則身無動搖上文云
身體及手足靜然安不動其心常恬相未曾
有散亂則安住不動如須彌頂常住不動法

門也樂者不受三昧廣大之用不受凡夫之
五受乃至圓教中五受生見亦皆不受有受
則有苦無受則無苦無苦無樂乃名大樂無
行者若有所受即有所行無受則無所行不
行凡夫行不行賢聖行故言無行而行中道

是故名行即法門也今更廣事解夫安樂者
即大涅槃從果立名也行者即涅槃道從因
得名也諸餘因果俱苦如常見外道行於苦
行還得苦果若因樂果苦如斷見外道恣情
取樂後得苦報若因苦果樂如折法二乘無

常拙度加功苦至方入涅槃今言安樂行者
因果俱樂即是大品如寶巧度大經云定苦
行者謂諸凡夫苦樂行者聲聞緣覺定樂行
者謂諸菩薩也結七方便處因處果皆非安
樂行獨此妙因妙果稱安樂行也更廣依文
釋者安樂行是涅槃道涅槃有三義謂三德
祕藏行有三義謂止行觀行慈悲行止行者
三業柔和遠從俱寂即是體法身行即上文
如來衣也觀行者一實相慧無分別光即體
般若行即上如來座也慈悲行者四弘誓願

廣度一切即體解脫行即上文如來室也總此三行爲涅槃道總於三德爲行之境界稱安樂道稱爲行大論云菩薩從初發心常觀涅槃行道因時用此三行法導三業爲行三業淨故即是淨於六根六根若淨發相似解而得入真果時名佛眼耳等因名止行果名斷德因名觀行果名智德因名慈悲行果名恩德又因名三業果名三密因時慈導三業利他果時名三輪不思議化如此觀時無復分別一切諸法中悉有安樂性一切衆生即大涅槃不可復滅行於非道通達佛道此即絕待明安樂行此行與涅槃義合彼云復有一行是如來行如來是人安樂是法如來是安樂人安樂是如來法總而言之其義不異別亦不異此明寂滅忍法空座如來室彼明金銀寶樹寶樹即無漏寶林無漏與空寂滅忍合金沙大河直入西海即一實慧與諸法空合得道女人則無諂曲此無緣大慈與如來室合彼呼爲無餘義此呼爲無上道又五行義亦與衣座室意同也問大經明親附

國王持弓帶箭摧伏惡人此經遠離豪華謙下慈善剛柔碩乖云何不異答大經偏論折伏住一子地何曾無攝受此經偏明攝受頭破七分非無折伏各舉一端適時而已理必具四何者適時稱宜即世界攝受即爲人意折伏即對治意悟道即第一義意也廣法門釋者應明不動門不受門不行門略不記也此品是迹門流通第四意若二萬八十億那由他受命弘經深識權實廣知漸頓又達機緣神力自在濁世惱亂不韋通經不俟更示方法若初依始心欲修圓行入濁弘經爲濁所惱自行不立亦無化功爲是人故須示方法明安樂行故有此品來也此安樂行有何次第然法華圓行一行無量行不可思議何定前後今且一緒法師品略示弘經則以益他爲本先明入室此中辨惡世弘經安諸偏惱先著如來衣前後互現耳若約行次者諸法從本已來常自寂滅相若乖寂起相應先以般若蕩繁則初坐座諸法不生而般若生同體慈悲愍衆故行道次入如來室既以

慈悲化世必涉違從決須安忍次著如來衣雖作此次說非行時行時入空即具一切法況慈忍耶四安樂行者舊云一假實二空爲體二說法爲體三離過爲體四慈悲爲體基師云一空二離憍慢三除嫉妒四大慈悲龍師云一身遠諸惡漸近空理二除口過三除意嫉四起慈悲南岳師云一無著正慧二口不說過三敬上接下四大慈悲天台師云止觀慈悲導三業及誓願身業有止故離身惡業有觀故不得身不得身業不得能離無所得故不墮凡夫有慈悲故勤修身業廣利一切不墮二乘地有止行故著忍辱衣有觀行故坐如來座有慈悲故入如來室止行離過即成斷德觀行無著即成智德慈悲利他即成恩德恩德資成智德智德能通達斷德是名身業安樂行餘口意誓願亦如是品文有問有答問中先歎前品深行菩薩能如此弘經後問淺行菩薩云何惡世宣說是經佛告下第二答中有三一標四行章門二解釋修行方法三總明行成之相初標章如文一者

安住下第二解釋方法即為四別初文又二
一釋方法二結行成修行有長行偈頌長行
又二初一者下標行近次文殊下釋行近初
雙標如文次釋中又二謂行處近處或云內
凡初行名行處若久習純熟漸能近理名近
處引前品近果之行為例也或云行處約因
近處約果行處明智近處明境瑤師云七住
已上心體於理為行處已過分段也自此已
還無生未能現前漸近於理為近處同是分
段此二是行始通為一安樂行也私謂初家
以行為淺若大經云十地菩薩以行故見不
了了當知行則不淺後家以近為淺若淨名
云近無等等佛自在慧此則近更成深若兩
行俱深則成前品菩薩弘經之行不關初心
方法若兩行俱淺即七方便人所行何關圓
行方法故不可偏據深淺然行名進趣近名
親習親習故進趣進趣故親習復何淺深又
行近是上方法行處是如來衣近處是如來
座座衣既不淺深行近何得優劣又忍辱必
內懷至理歷緣耐事目之為行空座必體達

外緣棲息真境目之為近蓋事理互現復何
淺深若爾何故分行近詣理略說名行處附
事廣說名近處說有廣略理無淺深今約三
法明行處一直緣一諦一諦為一切所歸為
一切作本而徧無分別一切所歸者即忍辱
地也地即中道諸法歸之故名為地眾行休
息故名忍辱此即行不行之行也為一切作
本者如萬物得地而生眾行得理而成若得
理本在剛能柔在逆能順在暴能治在驚能
安無量功德從中道地生地無所生而生功
德即不行之行徧無分別者則不分別不
行與行差別之相故云又復不行不分別等
也即是非行非不行無三行而三行故名為
行同一實諦故名為處如此行處合上經文
休息眾行合如來衣隨生功德合如來室徧
無分別合如來座是名一法釋行處是弘經
方軌也二約二法即生法二忍二忍即生法
二空二空異二乘何者人法二空約真俗假
實明二空二忍悉見中道故不同二乘若更
開者即四忍若作五忍指善字為信忍若作

六忍指和字為和從忍若對地即開四十二
忍一地尚有四十一地功德一忍寧無四十
一忍法耶今且約四忍消文謂伏順無生寂
滅忍也此四忍與別教異彼前二忍是生忍
位則淺後二忍是法忍位則深今圓生法悉
通四心亦通何者二空理即是中道初住修
四忍入中見二空理乃至後心亦窮二空理
大經云發心畢竟二不別若約無淺深判四
忍者從初發心圓伏五住至金剛頂皆名伏
忍初後悉不違實相名順忍初後悉不起二
邊心名無生忍初後悉休息眾行名寂滅忍
聞生死不怨卒畏苦聞涅槃不怨卒證樂聞
佛常與無常二乘作佛不作佛聞生死涅槃
異與不異聞佛道長短難易非長非短非難
非易等皆不驚怖行此行者從始至終以二
空理忍諸法即著如來衣安住二空理即坐
如來座愍諸眾生即入如來室二空四忍名
為行理即是處是名約二法明行處為弘經
方軌也三約三法三法即不思議三諦也住
忍辱地總論三諦如有地可據方能忍辱也

柔和善順者善順真諦能忍虛妄見愛寒熱等故言善順也而不卒暴心不驚者安於俗諦忍眾根緣稱適機宜故云不卒暴體忍違從故心不驚也於法無所行等者即安中諦能忍二邊故云無所行正住中道故云觀實相亦不得中實故云不分別此則據三諦之地名處忍五住之辱名行行亦為三謂止行即行不行觀行即非行非不行慈悲行即不行行合上衣座舍等是為約三法明行處辨弘經方軌也龍師云住忍辱地總舉生法二忍下別明二忍柔和善順明身業也而不卒暴是口業心亦不驚是意業此就三業明修生忍於諸法無所行不行有相也而觀如實相行空平等也亦不行不分別不行無相也有無兩亡會於中道此三句明修法忍得是二忍結為行處彼明二忍未知約何若三教二忍全非法華之義若約圓教不應隔別不融云云何名近下第二近處文為三遠十惱亂即遠故論近亦是附戒門助觀修攝其心即近故論近亦是附定門助觀也觀一切法

空即非遠非近論近亦是附慧門助觀上直緣理住忍辱地今戒門廣出眾辱之緣應修遠離非持刀仗亦不棄捨但以正慧而遠離之當知遠近廣上行所不行也上直明不暴驚今定門廣出修定心修定處修定要門以定力故在暴而治在驚而安當知即近論近廣上不行行也上直明無所行今廣觀一切空具歷諸境無量無邊無礙無障當知非遠非近廣上非行非不行就初有十種應遠者一豪勢二邪人法三兇險戲四旃陀羅五二乘眾六遠欲想七遠不男八遠危害九遠譏嫌十遠畜養等路伽耶此云惡論亦云破論逆路者逆君父之論又路名為善論亦名師破弟子逆路名惡論亦名弟子破師那羅延者上伎戲亦云緣畫其身作變異又云緣幢擲倒之屬也分十種為二邊九是生死一是涅槃二俱遠離即寂滅之異名耳觀心釋十種云云近近處有三意云

妙法蓮華經文句卷第八下

妙法蓮華經文句卷第八下

校勘記

一 底本，明永樂北藏本。

一 一七二頁中一五行第四字「加」，

〔南作「知」。

一 一七二頁下五行第一三字「慘」，

〔南作「瘳」。

隋天台智者大師說

門人灌頂記

非遠非近文為三一總標境智二別釋三結成觀者中道觀智也一切法者十法界境也

若單論智無所觀故舉一切以顯皆空如實去別釋也二邊三諦無一異名如非七方便故名實以實為相故言如實相不顛倒者無八倒也不動者不為二死所動也不退者心心寂滅入薩婆若海也不轉者不如凡夫轉生死不如二乘轉凡聖如虛空者但有名字字不可得中道觀智亦但有字求不可得無所有性者無自他共無因等性也一切言語道斷者不可思議也不生者感智理皆不生也不出者如來所治畢竟不復發也不起者諸方便皆寂滅也無名者名不能名也無相者相不能相也無所有者無二邊之有也無量者非數法也無邊者無方所也無礙無障者徧一切處也但以因緣有者結也上直明中道觀慧今明雙照二邊理性畢竟清淨

如上所說非前非惑而從惑因緣生生死從解因緣生涅槃又因緣有有於涅槃從顛倒生者生於生死此則雙照意顯也常樂觀如是等法者即三諦等法也又但因緣有從顛倒生者結不思議三諦境也故說者不思議

教也常樂觀者結不思議三觀也又觀一切法空如實相標觀體不顛倒去九句釋觀相不為二邊八倒所動名不倒不動不墮二乘凡夫二地故云不退不轉此二句明智用理非未來故不生非過去故不出非現在故不起釋論五十一云如虛空無入無出無住相攝大乘亦爾無未來入處無過去出處無現在住處第四十三云因邊不起名不出緣邊不起名不生凡有十九句初一句總後十八句對大品十八空如實相即第一義空不顛倒即內空內無六入我所不顛倒不動即外空外不為六塵流動也不退者即內外空十二入空故言不退不轉即空空空破諸法諸法所破空是能破無復諸法唯有空在此空亦空故言空空空既空故無復能轉

故言不轉也如虛空即是太空執方計破故言如虛空無所有性即畢竟空諸法無遺餘故名畢竟空以畢竟空故無所有性也一切言語道斷即一切空一切空不可說故言語道斷不生即有為空有為是因緣和合既不合即不生不出即無為空無名出離出離法空故名不出不起即無始空求原初不可得故無起無名即性空可解無相即相空實無所有即不可得空無量即有法空有法即有量有量既空故言無量無邊即無法空無法則是邊表今空故則無邊無礙即有法無法空二不可得故言無礙無障即散空妨障不可得故言無障十八空皆是中道正慧皆名為空隨十八種境故言十八耳大經云如來常修十八空義故用十八空用釋十八句也偈有二十八行三句為三初一行頌標章次二十二行頌修行後五行三句明行成長行行近別釋偈中合頌正言意同開合互現廣略之解彌復可依上行近二文各有三今偈合頌不復次第初應入行下十四行頌事

遠近上有十種遠離頌中略不次第在文可見亦是頌人空行處取意即兼頌近處三意故偈云是則名為行處近處常離國王者比丘親近國王有十非法一陰謀王命二王誅大臣三典藏亡寶四宮人懷妊五王身中毒六大臣諍競七二國交兵八王恠不施民九斂民物十多疾疫謂比丘行呪有此十事一切臣民謂是比丘所作此謗比丘即謗法亦謗佛故佛不令親近王也外道梵志者摩澄伽經云初人名梵天造一韋陀次名白淨變一為四一名讚誦韋陀二名祭祀三名歌詠四名禳災一一各三十二萬偈合成一百二十八萬偈有一千七百卷也次名弗沙有二十五弟子各於一韋陀能廣分別遂有二十五韋陀次有人名鸚鵡變一韋陀為十八次有人名善道有二十一弟子變為二十一韋陀如是展轉變為千二百六韋陀也毗陀論此云智論婆耶婆造凡四種一信力毗陀明事火滅罪二耶受毗陀明供養婆羅門得福三婆摩毗陀明和合二國四阿陀婆毗陀

明聞戰讀此四論自稱一切智人毗伽羅此名記論婆尼尼造明種種經書并諸雜語衛世師論優留法造此翻最勝出世八百年明六諦迦毗羅此翻黃頭亦云龜種造論名僧佉僧佉此云無頂因人名論故言迦毗羅說二十五諦小乘三藏學者佛在波羅奈最初為五人說契經修多羅藏佛在羅閱祇最初為須那提說毗尼藏佛在毗舍離獼猴池最初為跋耆子說阿毗曇藏五百羅漢初夜集阿毗曇藏相續解脫經此為三藏學也深著五欲欲相者四天下人龍須輪四天王皆根相到切利天以風為事炎天相近為事兜率相牽為事化樂天相親為事他化自在心念為事上天皆離欲寡女處女者阿難問佛如來滅後見女人云何佛言勿與相見設見勿共語設共語當專心念佛及諸不男彼名般吒者此翻黃門黃門者有男女形不能男女入里乞食者雜阿含云有一羊往糞聚飽食還羣貢高我得好食比丘亦如是得四事已起深著欲想不知出要設不得恒生想設得

向諸比丘貢高毀蔑他人我得彼不能得是為羊比丘乞食師子王遇大獸即噉不味不著得小獸即噉不鄙不薄比丘亦爾得四事供養不起深著無有欲想自知出要設不得利養不起亂念無增減心是為師子王比丘乞食乞食行役病四事而前後八時明八精進八懈怠乞食前作是念為修道補飢瘡乞雖未得不廢念行乞食得已為報恩念道不輟前後兩時倍加精進餘三事前後亦如是反此名八懈怠寶雲經明乞食作四分一分奉同梵行一分與與人一分施鬼神一分自食又復不行下第二八行頌非遠非近理遠近處若有比丘下第三五行三句明行成又三初一行半標行成事成外儀無失理成內心無滯故云無怯弱也次菩薩有時下第二三行行成而得安樂後一行一句頌長行總結菩薩入靜室下釋安樂之因因修禪定止於過惡得人無我外則不損因修智慧離諸取著得法無我內無顛倒是則心不怯弱不怯弱名安樂也文殊下第三一行一句頌長

行總結也第二口安樂行亦長行偈頌長行爲二一標章二釋行法標章如文若口宣說下釋行法又二謂止行觀行止爲四一不說過二不輕慢三不歎毀四不怨嫌初不樂說人經過者人聽有過法有何過七方便法是

佛隨他意語名不了義若過其法則惱其人非安樂行相也二亦不輕慢者不倚圓篋偏重實輕權也三不說他人長短者初不說一切人次別舉聲聞夫人惡聞其失故不譚短面舉對毀故不稱長亦不約張說趙長趙謂以他長譏已短寄彼諷此亦不得向張說趙短背毀於彼亦復背毀於我爲此義故善惡俱止也又不說長短者日藏第一云劫中後夜減省睡眠精進坐禪誦經修道皆捨生死向涅槃路不稱他短不說己長謙下卑遜不自憍高衣食知足頭陀精進不放逸行係念思惟心不馳散於一切衆生起慈悲心又如修多羅所說空行自讀誦教人讀誦不諂他不說他過不稱己長於聲聞人又根性不定若歎二乘或令彼退大取小若毀皆二乘或

令其大小俱失兩無所取也四不生怨嫌心者若謂其人法妨害我道即是怨心謂其鄙劣即是嫉心心機一動聲說即發杜說過之源故不生怨嫌也善修如是下觀行門也觀諸法空無所取著心不苟執不逆人意不違法相則不說小乘法答但以大乘答者若見無大機而說小得方便益若不見無大而說小妨其大緣等是不見但說大無咎偈有十六行半爲三初二行頌標章次九行半頌前行法後五行明行成初二行頌上住安樂行上總稱應住頌中別出行相行相者有三安隱說法者半行欲令前人得安隱道及果即入室義清淨地等半行即坐座義油漆身等一行即著衣義三法導口業名安樂行安處法座下九行半頌行爲二初五行半頌止行次四行頌觀行上止行有四今具頌初隨問爲說半行頌不輕慢慢則不隨若有比丘至隨義答二二行半頌不說長短但依義不譚人好惡若有難問隨義答者有二一可答二不可答問答相難詰相上下若勝負則自知

是爲智者語自放恣敢有違者誅之是爲王者語長短是非皆不知唯覓勝而已是爲愚者語因緣譬喻去至入於佛道三一行半頌不樂說人法過若說人過生人毒念今不說過故使發心入佛道佛道從喜生也除懶惰意四一行頌無怨嫌怨嫌心起則懈懶憂惱今以慈心說法無怨嫌者精進無憂上長行皆約止善說頌中皆約行善也從晝夜常說無上道教去第二四行頌上觀門上云但以大乘答頌云說無上道上云令得一切種智頌云願成佛道我滅度下第二五行偈明口安樂行成初一行標行成次無嫉下第三二行明內無過則外難不生如無臭物蠅則不來次智者如是下第三一行明內有善法所以行成如我上說者若內無過如長行中說若內有善如偈中說次其人功德下第四一行格量功德如文第三意安樂行亦長行偈頌長行亦爲三標章釋行結成釋中亦先止後觀止中有四一不嫉諂二不輕罵三不惱亂四不諍競夫二乘欲速出生死先除貪

欲菩薩先除瞋見嫉是瞋垢語是見垢嫉忌
違慈悲之心非化他之法論誑乖智慧之道
非自行之法智慧被障將何上求慈悲苟妙
將何下化安樂行菩薩最須棄之亦勿輕罵
下不應以圓行訶別知機可責不知勿罵容
有退善根義比丘下不應以圓訶通其本無
大機強以圓訶乖心成惱通既被訶圓復未
解前疑後悔大小俱失去道紆迴名甚遠此
惱別行人沈空取證名不得此惱通人歇生
死名懈怠悲華明小乘者為懈怠起大悲心
去明觀行亦為四約前四惡而起於行善一
於一切起大悲違於嫉諂二於如來起慈父
心違於輕罵凡求佛道即是學人敬學如佛
不得輕罵諸者通三世此即未來如來也三
於菩薩起大師想違於惱亂理論三乘皆是
菩薩有化訓德皆眾生師應起師想勿言其
短四平等說法違於諍論平等破偏執諍也
不多不少量器利鈍也文殊下結行成又二
一由止惡惡不能加故云無能惱亂二由觀
行故勝人來集得好同學也偈有六行初五

行頌上止觀二行各有四意後一行頌行成
第四誓願安樂行有二初長行次偈頌長行
又二初明行法次歎經就行法為三標章行
法結成標章如文行法為三初在家出家去
明標誓願境二從應作是念去明起誓願之
由三從我得去正立誓願初明慈誓境通取
曾發方便心者而未出三界名在家斷通惑
盡名出家此攝得兩種二乘三種菩薩此輩
亦具無明亦應是大悲境但其皆曾發心與
慈誓相應須與其圓道因果之樂故言生大
慈心耳悲境者非菩薩人通取未曾發方便
心者名非菩薩全不歸向方便況復真實此
悲境攝得一切三界內者此等亦須與樂但
其流轉無際正與慈誓相應宜拔其罪因罪
果故言生大悲心耳從應作是念至隨宜說
法者即起慈之由由諸樂小執佛方便以為
真實不會圓道故言大失大失是慈誓之由
從不聞不知去是悲誓之由由未發偏圓心
不聞偏圓二道故以不聞偏道無聞慧不知
者無思慧不覺者無修慧又無圓三慧何者

不問故不聞不信故不知不解故不修偏圓
三慧權實皆無甚可憐愍起悲之由從其人
雖不問不信此經去正發誓願彼雖不問不
信偏圓二道菩薩不約偏發誓但欲與其圓
道三慧故言雖不問不信此經我得三菩提
引今得入也誓願菩提智慧神通皆約安樂
行得何者深觀如來座故得智慧力四辯莊
嚴能以慧拔也深觀如來室如來衣得大善
寂力不起滅定現諸威儀神通福德莊嚴先
以定動也從文殊去是結行成爲三初總結
無過失則是行成行云何成以其立大誓願
故入如來室行成以其知四眾失圓道故即
如來座行成以其誓制其心不懈怠故如來
衣行成三行具立故言行成無過失者慈悲
成故無瞋垢失如來衣成故無懈怠如來座
成故無論曲也常為比丘下第二別結慈悲
行成以慈成故攝得四眾人天供養聽法普
願成故感佛神通諸天作護如來座成聽者
歡喜所以下第三釋誓行成三世佛尚守護
況諸天耶從文殊至是法華下第二歎經難

聞又二法說譬說法說又二一昔未曾顯說故昔不得二今日乃得譬說亦二一不與珠譬譬昔未曾顯說二與珠譬譬今日得聞二譬各有開合不與珠譬為六一威伏諸國二小王不順三起兵往罰四有功歡喜五隨功賞賜六而不與珠輪王譬如來化世降伏諸國譬陰界入諸境二小王譬煩惱等未得無漏調伏名不順其命三起種種兵譬七賢中方法為前軍須陀斯陀中方法為次軍阿那阿羅漢中方法為後軍所破者是三毒等分八萬四千之寇盜能破者是八萬四千法門之官兵王見兵下第四有功歡喜隨功賞下第五隨功賞賜者田即三昧宅即智慧聚落初果二果邑即三果城即涅槃衣服即慚忍善法嚴身之具助道善法也種種七寶即七覺等象馬車乘即二乘盡無生智也奴婢即神通得有漏善法如人民唯譬中下第六而不與珠有出分段機為小功勳有出變易之機為大功勳驚怪者未有大勳忽照譬珠諸臣皆怪譬眾生大機未動忽說此經二乘疑

惑菩薩驚怪合六譬一一如文文殊如輪王下與珠譬又二一有大勳二與珠明珠者明譬中道智圓譬於常在頂者極果所宗譬中者實為權所隱解譬即開權與珠即顯實合亦二能令至於一切智智即果名是行一也第一之說者是教一秘藏是理一兼得八一也偈有十四行半為二初四行頌上行法次十行半頌上歎經初頌行法又二初一行超頌行成上總明行成今頌別顯常行忍辱頌著衣行成哀愍一切頌入室行成乃能演說頌坐座行成次後末世下第二三行頌修行法上有三境由誓等傷具頌次譬如強力下第二有十行半頌上歎法難聞上有法譬合今但頌譬合頌譬有二初三行頌不與珠次如有勇下第二一行頌與珠次如來亦爾下第二合譬初三行半頌合不與珠次既知眾生下第二三行頌合與珠其中細開云我滅度後下二十三行是品之第三總結行成感微之相以勸修行為三初一行半結勸四行次二十行半舉三報以勸亦名三障清淨後

一行總結也三障淨轉現生後世惡業盡即得現生後勝報也初一行無憂惱是報障轉轉現報二半行不生貧窮是業障轉轉生報也三眾生樂見下十九行煩惱障轉轉後報也今初讀是經一行滅現世憂惱即除苦受之報此轉現報心無病痛等即轉報色也不生貧窮下二半行轉惡業也惡業因應感惡果經力轉惡因得好果即轉生報也不生即無惡生業現在持經不作貧窮業來世不生卑賤也眾生樂見下十九行明後報轉轉三煩惱障也為二初三行別明三煩惱障轉二十六行總明一切障轉也初又三初眾生樂見下一行別明貪障轉多欲者則人忽慢又障生梵天欲障轉故人所樂見天童給使也刀杖不加下第二一行半別明瞋障轉捨瞋則除內刀箭入陣則外刃不傷智慧光明下半行三別明愚癡障轉若於夢中夢見妙事下第二有十六行總明一切煩惱障轉也亦是後報轉持經現感此相當知過去久已成就今藉緣而發耳又有成佛因果等相並

是後報故於夢中見未來後報之相百千萬劫事在一念夢中用表妙法不可思議一中無量無量中一是相前現後當剋果又為六從初信心乃至妙覺八相成佛皆如來莊嚴而自莊嚴即忍辱報約初三行夢入十信又二初二行半慈悲報次半行正見無癡報次又見諸佛下二六行半夢入十住次又見自身在下三三句夢修十行次證諸實相下四一句夢悟十迴向次深入禪定下五半行夢入十地次諸佛身全下六五行夢入妙覺既云證不退智即為授記者當知得入初住無生得記之位也又見自身在山林知是十行修習善法也證諸實相知是十迴向正觀中道位也深入禪定即第十地中無垢三昧入金剛定諸佛皆現摩頂受職也夢八相佛以知妙覺此中或是初住能八相成佛之相仍前次位寄譚極覺耳若後惡世一行總結行成也信根者於三寶得堅固信一切不能沮壞精進根者得四正勤念根得四念處觀勤方便調伏貪憂定根得四禪慧根是解四諦

如實知也又信根於如來發菩提心所得淨信心精進根於如來所發心所起精進念根於如來發心所起念定根於如來所起三昧慧根於如來所起智慧八正是沙門道亦是沙門法成就貪瞋一切煩惱盡是沙門義四果是沙門果夢者從須陀洹至支佛悉有夢唯佛不夢無疑無習氣故不夢從五事故有夢如偈說以疑心分別學習因現事非人來相語因此五事夢又是所更聞見及諸患為七事故有夢現在意識尚不見色云何夢中意地見色答皆是曾見曾聞故想耳又是吉不吉相耳夢中無通無宿命智云何能見未來世事答此非願智境界乃是比知諸人曾有如是夢如是果今以比知耳問誰眠答五道及中陰皆有眠在胎諸根具者亦是眠乃至佛亦眠問眠是愚是蓋此云何通答佛起現前欲調身故眠非蓋非愚眠也

影孰能思量召過以示現弘經以益當故言從地踊出品虛空湛然無早晚或者執迹而闢其本召昔示今破近顯遠故言從地踊出品寂場少父寂光老兒示其藥力咸令得知故言從地踊出品文云是從何所來以何因緣集今以諸義釋品顯四悉檀因緣之解故言從地踊出品此下是大段第二開師門之近迹顯佛地之遠本其文為三一從此下至汝等自當因是得聞序段也二從爾時釋迦告彌勒下至分別功德品彌勒說十九行偈正說段也三從偈後下十一品半流通段云序文為二一踊出二疑問踊出為三一他方菩薩請弘經二如來不許三方踊出他方菩薩聞通經福大咸欲發願住此弘宣故請為之如來止之凡有三義汝等各各自有已任若住此土廢彼利益一又他方此土結緣事淺雖欲宣授必無巨益二又若許之則不得召下下若不來迹不得破遠不得顯是為三義如來止之召下方來亦有三義是我弟子應弘我法以緣深廣能徧此土益徧分

身土益徧他方土益又得開近顯遠是故止彼而召下也從佛說是時下是第三下方跳出為二一經家敘相二明問訊兩段各五初五者一踊出二身相三住處四聞命五眷屬住處者常寂光土也常即常德寂即樂德光即淨我是為四德秘密之藏是其住處以不住法住秘藏中下方者法性之淵底玄宗之極地故言下方在下不屬此空中不屬彼非此非彼即中道也出此不在上不在此下不上不下住在空中亦是中道也來之由者聞命故來弘法故來破執故來顯本故來皆如上說所將眷屬者若人情往望謂領六萬五萬恒沙者為多領三二一者為少單已者隻獨若依文往尋六萬五萬者為少單已者為多文云單已獨處者其數轉過上若依法門者一一皆是導師德能引眾人至於寶所當知一已非獨六萬非多一即一道清淨二即定慧三即戒定慧四即四諦五即五眼六即六度一一度具十法界一一界各有十十即有百百即具千十善即有萬一度具萬六度

即六萬法門多不為多一不為少非多非少而多而少云是諸菩薩從地出下第二問訊為五一三業供養二陳問訊之辭三佛答安樂四偈頌隨喜五如來述歎就初三業供養經五十小劫謂如半日四眾徧見此乃隱長而現短借其神力令狹而見廣俱是不可思議也拜遠是身讚法是口瞻仰是意五十小劫與半日者此是時節不可思議如來所見不以二相下方菩薩常面稱揚如來默然常受其讚解者即短而長謂五十小劫惑者即長而短謂如半日斯為本迹而作弄引如來未說闡本而執迹佛若開顯悟近而達遠亦知不思議一也四眾徧見菩薩者亦是不思議也夫肉眼天眼所見不遠而今所覩充滿虛空見兩猛知龍大見華盛知池深見應滿虛空則知真彌法界也初標四導師次陳問辭問又二長行偈頌長行有二一問如來安樂二問眾生意度云但舉四人者欲擬開示悟入四十位耳如華嚴但舉法慧德林金幢金藏說四十位云三如來具答安樂易度兩

事相成易度則安樂安樂則易度易度為兩一根利德厚世世已來常受大化始見我身即稟華嚴入如來慧果熟易零是眾生意度二根鈍德薄世世已來不受大化為是人故須開頓說漸三藏方等般若而調伏之亦令此人今聞法華入於佛慧比前雖難於佛甚易佛識其宜方便得所薄須塗慰慧悟是同今略舉十意釋之第一始見今見第二開合不開合第三豎廣橫略第四本一迹多迹共本獨第五加說不加說第六變土不變土第七多處不多處第八斥奪不斥奪第九直顯實開權顯實第十利根初熟鈍根後熟第一始見今見者初成道時名始見法華座席久後真實名今見也日照高山即說於頓不開不合為不入者開頓說漸五味調伏今漸歸頓頓直豎入於法界故言豎廣不歷方便故言橫略今歷五味即是橫廣得入佛慧亦是豎廣一臺故本一千葉故迹多迹與眾經同故言共本與眾經異故言獨加四菩薩說四十位自說開示悟入不加於他華王世界

故言不變三變土田故言變土七處八會是為多處者闍崛山遠處虛空故不多處滅化城改容作故言斥奪無如此事故不斥奪行大直道名直顯實決了聲聞法名開權顯實根利緣熟始入佛慧根鈍後熟今入佛慧緣宜不同略為十異種智法界等無差別故文云始見我身聞我所說即皆信受入如來慧除先修習學小乘者今於此經入於佛慧明文在茲不須疑也諸師見其緣異逐緣異解迷不知反去道轉遠若識理同千車共轍佛慧則無殊也舊云華嚴了義滿字常住法華不了義非滿非常今以此文並之若始入是了義今入不了義者始入是佛慧今入非佛慧若佛慧既齊了義亦等滿字常住悉然云云地人呼華嚴為圓宗法華為不真宗今亦用此文並之第四菩薩領解隨喜能問者即是華嚴中四大士法華中身子三請俱是能問也所問者即是問佛智慧也第五如來述歎者與問碩異問家隨喜能問人皆是菩薩及所化人間已信行我等隨喜如來述歎能化

人生隨喜者此義云何然能問者皆是古佛汝能隨喜即是如來菩薩隨喜其迹如來述歎其本此亦密表壽量云爾時彌勒及八萬大士下第二疑問序自寂場已降今座已往十方大士來會不絕雖不可限我以補處智力悉見悉知而於此眾不識一人然我遊化十方觀奉諸佛諸佛大眾快所諳知就履歷之處亦所不識若來若去如是推之皆所不識又彼諸大士是前進先達彌勒是後番末學後不知前故所不識又彼等大士本實相底應現十方別頭教化所有真應非彌勒境界是故不識又佛託弘經召諸大士大士聞師命故來密聞壽量非時眾所知故言不識此約四悉檀釋疑問序也云疑問為二一此土菩薩疑二他土菩薩疑此土疑又二初長行疑念次偈十九行半偈正問又為五初一行一句問何處來次何因緣下第二一行三句問何因緣來次一一諸菩薩下第三九行敘其數量次是諸大威德下第四兩行問其師誰次如是菩薩神通下第五五行半結請

又五初兩句結歎次四方地下第二兩行請答來處次我於此眾下第三一行請答來緣次今此之大眾下第四一行半大會同請次無量德下第五二句請答師主云二他方菩薩疑者分身眷屬橫在十方與彌勒同疑二土俱不知本地欲顯成道甚久各各陳疑已佛佛皆仰待彌勒云爾時釋迦牟尼佛告彌勒下第二正說文為二先長行次偈頌誠許後正說長行先述讚次誠誠勿亂勿怠勿退次許標果智者如來知見知見妙果也次開化教者宣示也自在神力者過去益物也師子奮迅者現在十方分身所被之處也或云奮迅將前之狀也此表未來常住益物之相也大勢威猛者未來益物也或以此為現在震動十方隨人意用耳幸依文次第者好又私謂如來自在者我也神通者樂也師子奮迅奮迅除垢淨也大勢威猛未來益物即常也此點四德意也云四行偈初三句頌三誠後三行一句頌許初一句頌標智慧果次三行頌三世爾時世尊下第二即正說段

也文為三此去盡壽量品正開近顯速二分
別品初總授法身記三彌勒總申領解初又
二先略開近顯速執生疑次廣開近顯速
斷惑生信略又二一略開二因疑更請就略
開有長行偈頌此中但答二問不答何因緣
集由不答故所以重請長行雙答雙釋如文
釋下方空中住者釋論明有底散三昧應作
四說有者三有也底者非想非非想也以深
勝故為底又有者名相也底者空也以空寂
故為底又有者二邊俗也底者邊際智滿故
為底今經以下方空為底不是上界不是下
界表中道為底此是約教分別云於諸經典
下釋也師知弟子備智斷兩德初是雙修智
斷次雙證智斷於經典分別是修智正憶念
是修斷不樂在眾是證斷勤行精進是證智
從不依止人天而住是釋處也人天是二邊
不住不著也深智無礙者依不思議智也樂
於佛法者樂不思議境也境智甚微非近行
菩薩也偈八行半初五行半頌答兩問下三
行頌雙釋云爾時彌勒下因疑更請有長行

偈頌長行為二一疑二請聞上善提樹下乃
教化之今皆住不退又聞我從久遠來教化
是等眾聞此二說動執生疑白佛下騰疑更
請又二一法二譬法說為三初即白佛下一
疑成道近所化甚多執近而疑遠也次世尊
此大菩薩下第二所化既多行位深妙執遠
而疑近也次世尊如此之事下第三結請譬
說有開合開為三色美髮黑譬上成道近意
也指百歲人去譬上所化甚多意也准北諸
師以譬釋譬父服還年藥貌同二十五子不
服藥形如百歲若知藥力不疑子父不知者
怪之如來橫服垂迹之藥示伽耶始生諸菩
薩直論本地久發道心今住不退若佛及佛
快知此事自下不達不得不疑是事難信下
結譬也初合近譬如文從而此大眾下合遠
譬觀此菩薩久種善根非止伽耶發心善入
出住者九次第定是善入師子奮迅是善出
超越是善住通藏意也從初地至十地名善
入十地入重玄門倒修凡夫事名善出妙覺
徧滿名善住別意也畢法性三昧名善入首

楞嚴名善出王三昧名善住圓意也次第習
諸善法據因為善習就果為善入云善答難
問者具二莊嚴也七方便之尊故云寶也今
日世尊下請答也又三從今日下舉佛語從
我等下第二明請意請意為二一為現在我
雖未達信而已矣然諸菩薩下第二為未來
淺行善生誹謗新發意者謗墮惡道不退者
雖信不謗不能增道若為分別謗者則生信
信者則增道云從唯然下第三請答請答亦
二初除我等疑及未來下第二除未來疑偈
十四行頌上法譬五行頌法說九行頌譬說
法說中三初一行頌執近次此諸佛子下第
二二行三句頌疑遠後云何而可下第三一
行一句頌結請頌譬中初二行頌開譬後世
尊亦如是下七行頌合譬亦三就初二句頌
合近次是諸菩薩等志下第二三行半頌合
遠後我等從佛聞下第三三行頌合請答云
妙法蓮華經文句卷第九上

妙法蓮華經文句卷第九上

校勘記

一 底本，明永樂北藏本。

一 一七九頁上一三行「劫中」，南、

經作「初中」。

一 一八〇頁中一行「後一」，南作「後二」。

一 一八四頁中一三行第六字「聞」，南作「開」。

妙法蓮華經文句卷第九下 寧八

隋天台智者大師說

門人灌頂記

釋壽量品

先出異解數師序云壽無量劫未足以明其久分身無數不足以異其體然則壽量定其非數分身明其不異普賢顯其無成多寶明其不滅耳河西道朗云明法身真化不異存沒理一多寶現明法身常存壽量明與太虛齊量道場觀云會三歸一乘之始也滅影澄神乘之終也滅影謂息迹澄神則明本故迹無常而本常也注者云非存亡之數曰壽出脩天之限稱量法身非形年所攝使大士修踐極之照不以伽耶為成佛百年為期願也竺道生云其色身佛者應現而有無有實形既形不實豈有壽哉然則萬形同致古今為一古亦今也今亦古也無時不有無處不在若有時不有有處不在者於衆生然耳佛不爾也是以極譚長壽云伽耶是也伽耶是者非復伽耶伽耶既非彼長何獨是乎長短斯

亡長短恒存焉前代匠者如向所說多約無量明常近世人師多云壽是量法前過恒沙後倍上數終歸限極而明無常又惑者執品明壽量是無常那作常解本為答之品直道壽量不道壽有量不道壽無量爾作無常

他作常解此復何咎鷓蚌相扼我乘其弊應具四解謂實有量而言無量彌陀是也實無量而言量如此品及金光明是也實無量而言無量如涅槃云唯佛與佛其壽無量是也實有量而言量如八十唱滅是也品文具

此義豈可是一而非三耶問若壽量明常與涅槃何異今反質之法華一乘與勝鬘一乘何異云若分別答者法華略明常涅槃廣明常勝鬘為一明一法華會三明一云問近成是方便速成是真實者華嚴寂滅道場大經超前九劫皆成方便若爾法華開遠竟常不輕那更近當知法華已復方便若爾會三歸一竟亦應不會三歸一若爾開三顯一諸佛道同開近顯遠亦諸佛道同若爾諸佛皆爾非獨釋迦若獨釋迦前諸義壞答云是我方

便諸佛亦然又諸菩薩聞壽量發願願我於未來說壽亦如是此即諸佛道同亦不偏言一近一遠故知寄無始無終無近無遠顯法身常住有始有終有近有遠論其應迹用此義望諸經對緣雖異終不異也既了衆經諸

師不可師也問義推常可然徵文何據答明者貴其理暗者守其文但尋詮會宗是教之正意苟執糟糠問橋何益又教本為緣緣異說異或隨欣隨宜隨治隨悟悟則達到已矣那更盤桓阡陌何為故云泥洹真法寶衆生

種種門入此之謂也又文有多少涅槃以未來常住為宗其文則多不以過去久成為宗其文則少若隨多棄少則是魔說非佛說也此經以過去久成為宗點塵數界其文則多未來常住其文則少若從多棄少頭破作七分如阿梨樹枝譬天子勅若多若少俱不可違違之得罪方便品云世間相常住於道場知已導師方便說此文即未來常住不滅又云我常住於此又云常在靈鷲山及餘諸住處善賢觀云常波羅蜜所攝成處我波羅蜜

所安立處如此常文亦復不少又此經處處明法身法身豈不常耶問既明法身應論三德答權實二智豈非般若三世示現豈非解脫實相本地即是法身三德明文爲若此也釋品如來者十方三世諸佛二佛三佛本佛迹佛之通號也壽量者證量也證量十方三世二佛三佛本佛迹佛之功德也今正證量本地三佛功德故言如來壽量品如來義甚多且明二三如來餘例可解二如來者成論云乘如實道來成正覺故名如來乘是法如如智實是法如如境道是因覺是果若單論乘者如如無所知單明實者如如無能知境智和合則有因果照境未窮名因盡源爲果道覺義成即是乘如實道來成正覺此真身如來也以如實智乘如實道來生三有示成正覺者即應身如來也三如來者大論云如法相解如法相說故名如來如者法如如境非因非果有佛無佛性相常然徧一切處而無有異爲如不動而至爲來指此爲法身如來也法如如智乘於如如真實之道來成妙

覺智稱如理從理名如從智名來即報身如來故論云如法相解故名如來也以如如境智合故即能處處示成正覺水銀和真金能塗諸色像功德和法身處處應現往八相成道轉妙法輪即應身如來故論云如法相說故名如來也法身如來名毗盧遮那此翻徧一切處報身如來名盧舍那此翻淨滿應身如來名釋迦文此翻度沃焦是三如來若單取者則不可也大經云法身亦非般若亦非解脫亦非三法具足稱秘密藏名大涅槃不可一異縱橫並別圓覽三法稱假名如來也梵網經結成華嚴教華臺爲本華葉爲末別爲一緣作如此說而本末不得相離像法決疑經結成涅槃文云或見釋迦爲毗盧遮那或爲盧舍那蓋前緣異見非佛三也普賢觀結成法華文云釋迦牟尼名毗盧遮那乃是異名非別體也總衆經之意當知三佛非一異明矣問此品無三佛名那作此釋答雖不標名而具其義文云非如非異非如三界見於三界此非徧如顯於圓如即法身如來義

也又云如來如實知見三界之相即是如如智稱如如境一切種智知見即佛眼此是報身如來義也又云或示己身已事或示他身他事此即應身如來義也若但性德三如來者是橫但修德三如來者是縱先法次報後應亦是縱今經圓說不縱不橫三如來也揀縱橫如來尚非今義況三藏通教如來耶又法華之前亦明圓如來者同是迹中所說耳發迹顯本三如來者永異諸經論云示現成大菩提無上故示三種菩提一應化菩提隨所應現即爲示現如經出釋氏宮故二報佛菩提十地滿足得常涅槃如經我實成佛已來無量無邊劫故三法佛菩提謂如來藏性淨涅槃不變如經如來如實知見三界之相故經具其義論出其名不作上釋寧會經論耶次明壽量者壽者受義真如不隔諸法故名爲受又境智相應故名受又一期報得百年不斷故名受量者證量也量字則通無的別據證量法如來以如理爲命報如來以智慧爲命應如來同緣理爲命證量諸命若有

量若無量若非量非無量法身如來如理命者有佛無佛性相常然不論相應與不相續亦無有量及無量文云非如非異非虛非實蓋是詮量法身如理命也詮量報身如來以如如智契如如境境發智為報智冥境為受境既無量無邊常住不滅智亦如是函大蓋大文云我智力如是久修業所得慧光照無量壽命無數劫此是詮量報身如來智慧命也詮量應身者應身同緣緣長同長緣從同促云云自彼於我何為文云數數現生數數現滅或復自說名字不同年紀大小此是詮量應佛同緣命也復次法身非量非無量報身金剛前有量金剛後無量應身隨緣則有量應用不斷則無量通途詮量二句在聖一句屬凡有量無常都非佛義舊來所說乃是增減兩謬加誣於佛非魔是何四句詮量其義已顯為未解者更常等四句料簡先別作次通作別者非常非無常雙非理極即法身也常者即報身也報智境合亦非常非無常但取正智圓滿不生不滅過金剛心之前故

取常為報身耳亦常亦無常應身也應用無盡為亦常數唱涅槃名亦無常無常者金剛心已前智用增進乃至凡夫生滅出沒皆是無常三佛各一句凡夫共一句此約別教別分別也通途圓說者一如來悉備四句法身四者非常非無常雙破凡聖八倒故常者如虛空常故無常者無凡夫生滅倒故亦常亦無常者寂而雙照故報身四者非常非無常者智冥境故常者出過二乘故無常者無生滅倒故亦常亦無常能雙照故應身四者非常非無常者非報非生死故常者常應同故無常者同無常故亦常亦無常者兩存故凡夫既得無常一句通途亦作四句但有性德之理尚無四句名字況行用耶可以意得不俟說也一身即是三身不一不異當知一佛身即具諸身壽命功德隨緣感見長短不同大經云凡夫二乘見佛壽命猶如冬日菩薩所見猶如春日唯佛見佛壽命無量猶如夏日所以然者凡夫博地翳障朦朧蔽通二乘雖斷四住不見中道若捨分段受法性身

未破無明彼土所奉猶是勝應當知二乘祇見冬日若諸菩薩未登地住所見同前若破無明乃至受分法身與而為語得見報身壽命奪而為語猶是勝應未窮報身之源未盡法性之極所見佛壽猶是春日唯佛與佛窮性盡源見法身壽猶如夏日大經舉三譬譬之於謂常中虛空第一一切壽命如來第一此譬法身壽命無始無終性相凝湛不同應報也二譬如四河皆歸大海此譬報身所修萬善皆感佛報壽命海中三阿耨達池出四大河此譬應身壽命從法報出同他長短也此品詮量通明三身若從別意正在報身何以故義便文會義便者報身智慧上冥下契三身宛足故言義便文會者我成佛已來甚大久遠故能三世利益眾生所成即法身能成即報身法報合故能益物故言文會以此推之正意是論報身功德也復次如是三身種種功德悉是本時道場樹下先久成就名之為本中間今日寂滅道場所成就者名之為迹諸經所說本迹者即寂滅道場所

成法報爲本從本所起勝劣兩應爲迹今經所明取寂場及中間所成三身皆名爲迹取本昔道場所成三身名之爲本故與諸經爲異也非本無以垂迹非迹無以顯本本迹雖殊不思議一也肇師之言意在寂場之本耳復次寂場本迹復有種種或以涅槃爲本從真起應爲迹迹本俱空言思雙斷故不思議一也或以俗爲本從俗起應爲迹迹本深廣下地不能言思邊涯故言不可思議一也或以中爲本從中起應爲迹迹本皆言語道斷心行處滅故云不思議一也復次此三非三亦復非一非三非一爲本而三而一爲迹皆言語道斷心行處滅不思議一也未知諸師指何處本迹不思議一也今攝聚四番皆是迹中不思議一耳遠指本地三番四番不可思議以爲其本從箇本而垂迹將箇迹而顯本本迹雖殊不思議一如此本迹何得不異衆經何得不異諸師問諸經各說位行或多或少華嚴四十一位瓔珞五十二位名義皆廣此經始末都無此事云何言異答譬如世

人修種種業集種種寶求種種位若無壽命用財位爲大經云譬如長者生育一子相師占之有短壽相不任紹繼父母知已忽之如草法門亦爾行種種因獲種種果現種種通化種種衆說種種法度種種人總在如來壽命海中第八中之要法性智應機標目莫非異是何廣開近顯遠文爲二先誠信次正答佛旨論誠衆受爲信此文有三誠三請重請重誠迹門三請一誠此中四請四誠前後合五誠七請奇特大事殷勤鄭重也誠是忠誠諦是審實不欺於物言則詣真昔七方便隨他意語非告誠實今隨自意語示之以要故言誠諦菩薩既奉誠誠不敢致疑聞必取信信受誠言也正答有長行偈頌長行爲二法說譬說法說爲二一三世益物二總結不虛近情唯見現在八十不知過去無央未來不滅故約三世開近顯遠如此利益非獨我然諸佛亦爾故總結不虛也法說中未來語少譬說偈中文多云云過去益物文爲二一從如來秘密下出執近之情二從然善男子下破近

顯遠初又三一出所迷法二出能迷衆三出迷遠之謂秘密者一身即三身名爲秘密三身即一身名爲密又昔所不說名爲秘密唯佛自知名爲密神通之力者三身之用也神是天然不動之理即法性身也通是無壅不思議慧即報身也力是幹用自在即應身也佛於三世等有三身於諸教中秘之不傳故一切世間天人脩羅謂今佛始於道樹得此三身故執近以疑遠此本說中不復言及二乘但對菩薩菩薩攝在天人脩羅三善道內餘三惡趣罪重根鈍少智不知作此謂也故大品但云摩訶衍勝出天人阿脩羅亦不言三途也菩薩有三種下方他方舊住下方即本日所化故無執近之謂他方舊住俱有二種一從法身應生者往世先得無生或已先開發迹顯本設未得聞報盡受法性身於法身地自應得聞長遠之說是故應生菩薩多無執近之謂二者今生始得無生忍及未得者咸有此謂也然善男子我實成佛已來下第二明破執遠迷以顯久遠之本上文誠諦之誠

即是此也就此復二一顯遠二從自從是來
下明過去益物所宜就初二一法說顯遠
二舉譬格量法說成佛已來甚大久遠伽耶
近謂即破破近顯遠略有十意如玄義云此
文正用破近顯遠破近謂情廢近顯遠廢於
近教也譬中爲三一舉譬問二答三合顯出
長遠餘經或明數不可說塵沙等爲喻方此
此則爲多直下塵被照之界已不可說況不
下塵寧當可說下塵不下塵界尚不可說下
塵不下塵塵豈可說耶況復過是寧可說耶

彌勒等下第二答中舉三人不知也合譬如
文從自從是來下明益物所宜又三一益物
處二拂迹上疑三從若有眾生來至我所下
正明益物所宜須顯處者上引譬甚久久居
何處故云常在此土及於他國而作佛事如
文於是中間下拂執迹上之疑疑因疑果昔
教所說處處行因又處處得記即是果疑今
拂除此疑指然燈佛者即拂因疑又復言其
入於涅槃即拂果疑如此因果非復一條皆
我方便非實說也故名拂疑或有人云方便

說然燈佛是我之師然實是釋迦現作非生
現生非滅現滅故言又復言其涅槃今謂不
爾但取前釋何者然燈佛于時緣熟以佛像
化之我緣未熟但爲菩薩從佛得記得記即
是果義行行即是因消文自足言其者即是

中間施化之其耳非謂然燈也又中間益物
即有形聲兩益若言值然燈佛者此有形益
又復言其入於涅槃者彼佛滅後助佛揚化
即有聲益若爾形聲兩益皆屬中間因耳既
有形聲之生生必有死死即入涅槃名此爲

果耳不得言中間已成佛果何者法華之前
未說成佛何得有佛果之疑舊以然燈是我
現作此亦非解法華前經未論昔已成佛何
教說然燈是我所現而拂此疑耶若有眾生
來至我所下第三正明益物所宜又爲二一

感應二施化至我所者即是過去眾生漸頓
兩機冥扣法身也佛眼觀者即是久已成佛
用佛眼鑑照無有遺差將欲起於劣勝兩應
而利益之善機凡有二力一感人天華報二
感佛道果報若以法眼觀知萬善緣其重輕

各得華報不能究竟知其終得種智果報若
以佛眼照萬善知其始末此經一向明佛
眼觀知眾生萬善究竟得佛一大事出世之
正意也信等諸根者信等五根也慧根即了
因餘根即緣因此二善根各有利鈍通攝頓

漸機緣頓機利鈍即是圓別根機漸機利鈍
即是藏通機緣又小乘根名鈍大乘根名利
又小乘根名利人天乘名鈍十法界眾生所
有善根利鈍爲機不用惡法惡法非緣了二
因也如來悉照十界善機隨所應度而現形

聲鏡益也從處處自說下正明應化所宜又
二先形聲益次得益歡喜先形益又二先明
非生現生次非滅現滅自說名字不同者形
既其現則有名字因名召體機有優劣形有
勝負形異故名則不同年紀大小者即形勝

負勝者即勝應負者即劣應也名不同者即
二佛現壽有量無量也處處者豎論則過去
之處處行因國土也橫論即十方國土也名
字不同約豎處所亦有生法名字不同如今
之應身望過去然燈佛等約橫國土亦有生

法名字如今之望分身亦如華嚴十號中所
列釋迦異名若干不同又諸經所辯佛有二
身名字不同所召法體皆異或說毗那或舍
那或釋迦法身佛或名如如實相第一義般
若楞嚴等比也此約示現佛法界身名字不
同若現九法界身名字不同則無量無邊可
以意得年紀大小者此明壽命長短逐上所
現應身或說壽二萬如迦葉佛時或說壽八
萬時如彌勒佛時傳互明大小縱橫可知就
法報應佛壽命大小如玄義云或三身相望
辯大小或三身各別皆為小合說名為大例
三點云此皆隨所應度為其現身及命長短
耳亦復現言當入涅槃者應以滅度而得度
者即現滅度也令其戀仰而得解脫此義現
下譬說中也又以種種方便說微妙法者是
現聲益也小身短壽即是說於漸教故言種
種方便也大身長壽即是說頓教故言說微
妙法雖初以漸終令入大故言皆令得歡喜
仍此歡喜即是施化得益佛依四悉檀施形
聲兩益眾生獲於四利稱機則喜乖機則惱

下文云皆實不虛即此義也從諸善男子如
來見諸眾生下是現在師子奮迅益物此三
昧有十功德一分別他人諸根熟不熟清淨
不清淨二以如來法輪教未度者悉入法律
三弘誓徧滿十方音聲亦爾或一音徧滿百
千萬音皆亦徧滿普教眾類四轉無上輪化
眾生皆取滅度餘人不能轉獨佛能轉五能
示出家剃髮持淨戒亦能使人樂六性行合
空七放光示滅或存或亡或示相好或隱相
好八降伏四魔九令他得入至要增長止觀
十具上十善之本身三口四等云此文為二
一明機感二明應化如來見者即佛眼照也
諸眾生樂小法者所見之機也華嚴云大眾
雖清淨其餘樂小法者或生疑悔長夜衰惱
愍此故默偈云其餘不久行智慧未明了依
識不依智聞已生憂悔彼將墜惡道念此故
不說按彼經無聲聞二乘但指不久行者為
樂小法人耳師云樂小者非小乘人也乃是
樂近說者為小耳今當通說之所謂貪愛二
十五有即人天之機來至我所名小法也貪

樂涅槃來自解脫即二乘之機來至我所亦
名樂小法也樂於漸次紆迴佛道即三菩薩
機來至我所亦名樂小法也德薄者緣了二
善功用微劣下文云諸子幼稚也垢重者見
思未除也問非生現生備施頓漸二化七方
便等可是樂小法者圓頓赴機是應樂大法
者云何通判為樂小法耶答向略其意今廣
釋凡為四義一約往日雖發大心不能專精
多著弊欲不得出世名弊欲為小法也二約
現在如佛未出世諸天人等雖有大機而心
深世樂著於邪見故名樂小法此二義與下
譬宛轉于地意同也三約修行雖不樂於三
界弊欲小法而樂三乘灰斷亦名小法雖不
樂於三乘近果而樂歷別修於一乘不能於
一心圓頓普修故名樂小此三意約因門明
樂小法也四約果門樂聞近成之小出釋氏
宮始得菩提不欲樂聞長遠大久之道故言
樂小此等小心非始今日若先樂大佛即不
說始成說始成者皆為樂小法者耳為是人
說下第二現在應化又二一非生現生二非

滅現滅現生又二一現生二利益現生又二
一現生二非生現生者迹現於生非生者非
始爾生也爲是人說我始得菩提前明利鈍
二機來感法身今即現勝劣兩應劣應應鈍
根勝應應利報此兩應並有生法二身生劣
應二身生者以正慧託胎出生行七步如迦
旃延子所述乃至六年苦行已還是名生身
生也法身生者即三十四心斷結習盡所得
五分法身是也勝應生身生者如華嚴大經
等說與諸菩薩摩訶耶胎常說大乘出行十
方各各七步是名生身生法身生者於寂滅
道場金剛後心斷無明盡得妙覺相應慧窮
照法性萬德種智圓明普備是名法身生出
家者劣應出分段家勝應出二死家得菩提
者劣應得有作四諦所發無漏盡無生智名
爲菩提勝應即照三諦一實之道一切種智
爲菩提也然我實成下明本實不生但天人
脩羅見此二種生法二身謂言始生此則不
然然我久已得此生法二身今日之生非實
生也故云久遠若斯若斯者如上譬之長久

也但以方便下明既非實生何故現生爲利
樂小法人德薄垢重者使得佛道故言但以
方便教化衆生作如是說者非生而現生故
云作如是說也餘經破劣應生身生非生尚
不破劣應法身生非生今經正破勝應法身
生非生何者我實成佛已來久遠若斯故知
今日劣勝兩法身生皆被破故生非生與餘
經永異也如來所演下第二明現生形聲益
先明形聲次明不虛說即聲教示即形規形
聲不出自他若說法身是說已身若說應身
是說他身益言值然燈佛即是說已身然燈
是我師是說他身示正報是自己事示現依
報是示他事隨他意語是說他身隨自意語
是說已身示已他事亦類如此諸所言說皆
實不虛者又二先明不虛次釋不虛初偏據
聲益不虛釋則雙釋不虛初不虛者漸頓二
機稟此二種形聲皆益不虛上過去章明皆
歡喜似如世界之益今明皆不虛勝劣形聲
逗於二機獲四悉檀皆不虛也大論明四悉
檀並實世界故實對治爲人故實爲而論

三是世間實此實則虛緣中亦有世間三實
第一義則虛若以此虛實約迹本二門漸頓
益者虛實昔方便行未得實道之益是其因
虛執於近迹未得本地真實之益即是果虛
今聞迹門之說同入實相即得因中實益聞
本門之說即除執近之情得於長遠果地之
實益今得二實對昔二虛約圓頓衆生於迹
本二門一實一虛得中道之行是得因中之
實益而執近果是於果虛今聞說因更不別
得真實之益聞說遠果即得實果之益昔有
一虛今得一實故云皆實不虛也問今昔大
乘所顯實相前後悟者應有異耶答初入次
入乃至壞草庵通入中道但入有漸頓故分
二教例入真諦鈍者依析法無常等觀利者
用體法空觀故分藏通耳從所以者何如來
如實知見下第二總釋益物不虛先釋形益
後釋言益不虛此中六句顯於應身不離法
身法身無形亦無起滅衆生有起滅之機感
於法身如來願力應同起滅起滅之見出自
衆生故約三界以明諸句又爲二一照理不

虛二從以諸衆生下明稱機不虛達理稱機設教化物必不虛也如實知見即是實智如理而照三界之實實則無三界之因相也無有生死者無有二死之苦也起集名退無常果現名出也亦無在生死之世及入涅槃之

滅此二俱滅故云亦無在世及滅度者非於滅度之實非於生死之虛故云非實非虛也非於世間之隔異非於出世之真如故云非如非異此四明中道也若雙非二邊結句定一邊例如非生非死結句為生是生是死結

句為死是退是出結句為退非退非出結句為出非虛非實結句為實是虛是實結句為虛如此之流今皆非之乃至單復具足亦非之方顯中道意耳不如三界見於三界者不如二種三界衆生所見三界之相唯佛一人

如實窮照三界之實內具實智之用亦是隨自意語亦是或說已身之事故大品云第一義中無所分別也如來權智如量知見三界之相即如三界衆生之見如實知見無二死而隨他意示二死身說有二死無退無出而

隨他意說有退有出亦無在世及滅度者而隨他意示生世間示入涅槃說有在世有得滅者無實而說涅槃之實無虛而說三界之虛無三世之異而說有異無真諦之如而說有如同於三界見於三界皆是隨他意語名

為或說他身事示他身事如來二智明審二諦所以形言兩益皆實不虛也以諸衆生下第二釋稱機不虛先明機感次論施化以諸衆生根機利鈍漸頓不同性欲行智種種差別欲令各得增諸善根故說已他之教不虛

因緣譬喻也漸頓根性各有種種此須用為人悉檀為人悉檀正為生諸善根善根猶是性習欲成性今何故先性後欲釋云因有本日根性能起今日之欲樂如因煩惱故有五陰復因五陰更有煩惱不前不後性欲亦爾

要因習欲而成性也欲者漸頓二機若種種欲樂不同此須用世界悉檀也行者起作業行隨樂欲而修諸行也此須用為人悉檀也行中好多愛著致有妨障此須對治悉檀憶想者是智慧即相似解由修行故能得解生

此是方便猶未稱理無言說道猶是念想之觀漸頓衆生居在內外凡位有諸善根欲樂欲樂故修行修行故得似解此須用第一義悉檀隨其所得憶想之解更為說法即得朗悟第一義乃至初地欲樂修行二地時亦憶

想二地之境即是念想若發生二地真解即是念想觀除言語法滅乃至佛方得究竟離於憶想獲常寂照耳欲令生下第二正對機施已他聲益於漸頓種種根機今生種種善根故現若干已他身事若干自他聲教若干

因緣譬喻若對漸機以三藏中四門若干因緣譬喻於一一門中復有若干如為懈怠者說苦忍為我慢者說無常忍等通教四門亦如是若對頓機如別圓等亦各四門若干種種如三十二菩薩各說入不二法門華嚴中

種種行類相貌皆為種種根機施若干譬喻言辭說法也所作佛事未曾暫廢者總結不虛如上若干已他形聲皆令衆生入佛知見不為人天二乘小事故云所作佛事也若一人獨得滅度餘人不得者所作佛事即為有

廢廢即今衆不得實益豈得會皆實不虛云何皆實昔云我坐道場不得一法實七方便並非究竟滅二涅槃者方便空奉故知唯虛未見皆實若昔施七權邊不得入一實者可言其虛虛引得出無有虛出而不入實者故知昔虛為實故也皆實不虛佛事無廢即此義矣如是我成佛甚大久遠下明非滅現滅又二初明非滅現滅二從如來以是方便下明現滅利益初又二先明本實不滅次從然今下明迹中唱滅我成佛已來下明果位常常故不滅寄此四字明未來大勢威猛常住益物也從我本行下舉因况果以明常住舊人據此以證無常云前過恒沙後倍上數神通延壽猶是無常僻取文意大有所失經舉因况果果非數也經云久修業所得壽命無數劫非神通延壽也何者佛修圓因登初住時已得常壽常壽區盡已倍上數况復果耶云何兼所况之果苟執能况之因縱今此因已是於常非無常也譬如太子時祿已不可盡况登尊極祿用寧可盡乎明文在茲何須

迴揆疑誤後生耶然今非實下第二迹中唱滅三身並有非滅唱滅義如淨名云法本不生今則無滅即是法身非滅又云是寂滅義即是唱滅也何者若已了達不唱寂滅為未了者唱耳若言照寂即是唱滅若言寂照即是唱生夫法身者雖非生非滅亦有生滅若迷心執著即煩惱生而智慧滅若解心無滯即智慧生煩惱滅滅惑生解此是無常滅若解生惑滅即是寂滅此之生滅悉約法性而辨若無迷解二緣則不唱有此生滅也報身非滅唱滅者誰有智慧誰有煩惱而言智慧能破此即明闇不相除即報身不滅義衆生未了聞此便謂其即是佛而生憍恣不復修道故復唱言道能滅惑有煩惱時則無智慧有智慧時則無煩惱豈非智慧能滅煩惱耶應身非滅唱滅者應是法報之用體既無滅用豈有窮即應身不滅但為衆生若常見佛則生憍恣故唱我於今夜當取滅度又法身當體明不滅報身說不滅必約法身以理而論智慧能破為到故破不到故破為共為獨

如此推理無有能破之功即智慧不滅惑義就有智慧則無煩惱即是慧能滅惑應身說不滅須約法報法報常然應用不絕衆生不盡即不滅度若法身當體論不生滅報身了達無能生滅應身相續不生滅云從以是方便教化下第二明現滅益物又為二先不滅衆生有損二從以方便說比丘當知下若唱滅者於物有益初又二初不滅有損次廣釋不滅有損者如前樂小法人見佛常在種種善根貧窮下賤不生二善故無益見思不斷二惡則是有損貪著五欲入於憶想情想即是見惑五欲即是思惑也由此衆生垢重故須唱滅不唱滅則二惡生而不滅二善損而不生若依四悉檀現滅則二惡滅二善生為滅二惡故用對治第一義第一義滅未生惡對治滅已生惡世界為人生二善世界生未生善為人生已生善又世界滅已生惡對治滅未生惡如禪五陰滅欲界惡即是世界滅已生惡為人生已生善第一義生未生無為之善若見下第二廣釋若見佛常在便

起憍恣心等故有損不能生恭敬故無益憍恣即增見惑厭怠即生思惑不生難遣想即不能生見諦解不恭敬即不能生思惟道為是義故宜應現滅若見聞三佛不滅悉有憍恣義便謂眾生如彌勒如一如無二如平等即真由是生於憍心上慢謂一切煩惱本自不生今亦無滅何須修道即便恣情放逸為是唱言是寂滅義又聞一切眾生即菩提相菩提相即煩惱相明暗不相除顯出佛菩提眾生聞此復起慢恣不復修善懈怠放逸為是等故唱言報身智慧能滅煩惱無明力大佛菩提智之所能滅應身非滅現滅易解若唱言法本不生今亦不滅要須滅惑方乃寂滅經云智慧不滅煩惱然明時無暗汝今具足煩惱何能有慧當知智慧能滅障惑眾生聞是唱滅便於三佛生難遣想起恭敬心是故如來以方便下明唱滅有益先歎佛難值次釋難值三佛並難值眾生樂著小法見思障重聞三身不滅則不修道難得契會也所以下釋也諸薄德人過百千劫或有見佛或

不見者若見三佛其人多善少惡不為其人唱滅是人見佛常在靈山也或不見佛其人障重善輕為說三身難會眾生聞之便作是念三佛雖復非生非滅必須生善滅惑乃得證見此事不易故云難遭也心懷戀慕渴仰者此明現滅無損滅於見思名無損種善根名有益又善男子下第二大段結三世益物物得實益又為三先明諸佛出五濁必先三後一先近後遠次明皆是為化眾生後明皆非虛妄也譬如下第二譬說有開譬合譬開譬為二一良醫治子譬譬上三世應化所宜二治子實益譬譬上三世利物不虛上未來文少此中具有就初為三一醫速行譬譬過去益物二還已復去譬現在應化三尋復來歸譬未來應化過去文為二一發近顯遠二明過去應化所宜今但譬應化所宜所宜有三一處所二拂迹疑三正應化今但譬應化應化又二一機感二正應化今具譬之如有良醫者超譬上我以佛眼觀有能應之智也從多諸子息是追譬上若有眾生來至我所

能感之機也上應化所宜又二一益物二明歡喜今但譬益物上益物又二一非生現生二非滅現滅今但譬現滅初良醫者醫有十種一者治病病增無損或時致死譬空見外道恣意行惡教人起邪斷善根法身既亡慧命亦死二者治病不增不損譬有見苦行外道投巖赴火苦行行善不得禪定不能斷結即是無損亦不能斷善即是不增也三者治病損而無增但世醫所治差已還復生即是修定斷結外道也四者治病能令差已不復發而所治不徧即二乘人止治一兩種有緣者不能徧治一切也五者雖能兼徧而無巧術用治苦痛釋論呼為拙度即是六度菩薩慈悲廣治也六治病妙術治無痛惱而不能治必死之人譬通教菩薩體法但治有反復凡夫不治焦種二乘也七雖治難愈之病而不一時治一切病即是別教菩薩也八能一時治一切病而不能令平復如本即圓教初心十信也九能徧治一切亦能平復如本而不能令過本即圓教後心也十一時治一切

病即能平復又使過本即是如來前三種醫
即大經中之舊醫用乳藥也後七並容醫無
術者但用無常苦等法如用辛苦酢藥也有
術速來還令服乳最後究竟良醫也良者善
也內有三達五眼即是八術妙得藥性善治
者外識病源能用藥也智慧者權實二智深
知二諦也聰達者五眼察機頓漸不差也十
二部教文理甚深如明鍊方藥依四悉檀治
衆生病如善治衆病也無量義云醫王大醫
王以大醫故稱爲良醫多諸子息若十聲聞
二十支佛百數菩薩菩薩之子凡有三種子
義一就一切衆生皆有二種性德佛性即是
佛子故云其中衆生悉是吾子此文云多諸
子息也約十心數法即有百子心王爲正因
佛性慧是了因性餘九相扶起屬緣因性一
數起時九數扶助如是成百也性德佛子非
善非惡而通善惡故此十數及與心王爲通
心數是以性德三因悉屬正因佛子二者就
昔結緣爲佛子如十六王子覆講法華時聞
法者亦生微解即成了因性昔微能修行爲

緣因性正性爲本此三因並屬緣因資發今
日一實之解故以昔日結緣爲緣因佛子即
火宅中三十子也此約十信一信起時即具
餘九還有百信故得結緣爲佛子也三者了
因之子即是今日聞法華經安住實智中我
定當作佛決了聲聞法是諸經之王從佛口
生得佛法分故名真子此亦有二因性今既
顯了見於佛性並屬了因佛子百子之義還
將十數入十善法中十信入初住中是故正
因通於本末此文明百子不取了因子了因
子屬下不失心服藥中明之以有事緣遠至
他國者譬過去應化中現滅也諸子於後下
第二還已復去譬現世益物又一一諸子於
後飲毒譬上機應相關見諸衆生德薄垢重
衆生於佛滅後樂著三界邪師之法故云飲
他毒藥即是遊行詣他國輪轉諸趣墮在三
界故云宛轉于地是時其父還來歸家下譬
上我少出家得三菩提第二非生現生也上
有二形聲及利益不虛今言諸子飲毒去譬
上形益信受邪師之法名爲飲毒失心是無

大小機感生不失心是有大小機感生又失
心者貪著三界失先所種三乘善根也爲是
人非滅唱滅不失心者雖著五欲而不失三
乘善根爲是人故非生現生善強惡輕見佛
即能修道斷結如子見父求藥病愈善輕惡
重得見佛亦求護而不修道如子見父求救
不肯服藥父爲此子唱言應死遙見者明佛
出世時衆生亦見色身而爲見思障隔五分
不得親奉法身故云遠也見聞佛出皆有喜
敬之事現諸經文梵王請等例是求救之辭
也父見子等苦下譬上聲益又二初譬佛受
請轉二諦法輪也而作是言下譬誠勸經方
者即十二部教也藥草即教所詮八萬法門
也從佛出十二部乃至出涅槃此出漸頓藥
草也直從佛出十二部此出頓藥草也從佛
出修多羅此出漸藥草也色者譬戒戒防身
口事相彰顯也香者譬定功德香熏一切也
味者譬慧能得理味也此戒定慧即八正道
修八正道能見佛性又色是般若照了法性
之色分明無礙香是解脫斷德離臭也味是

法身理味也三法不縱不橫名祕密藏依教修行得入此藏也說三乘空三昧力如持無相如節無作如合一三昧具戒定慧也又空觀如持假觀如節中觀如合此三觀各不離戒定慧將此法與漸頓衆生今修行名服也從而作是言乃至可服即是勸門也從速除苦惱乃至無復衆患即是誠門也將誠勸二教令諸衆生服法藥也其諸子中不失心者下譬上得益不虛上有二一不虛次釋不虛今云其諸子中不失心者服藥病差即譬上皆實不虛也釋不虛不作譬也

妙法蓮華經文句卷第九下

妙法蓮華經文句卷第九下

校勘記

一 底本，明永樂北藏本。

一 一九七頁中八行末字「還」，清作

「遠」。

隋天台智者大師說

門人唯頂記

從餘失心者下譬上非滅現滅上有二一不
久應死譬上非滅現滅二諸子醒悟譬上唱

滅利益又唱死之由由于不服譬上薄德見
佛常在但增憍恣上現滅中有二一本實不
滅二非滅唱滅不出現滅之由由亦是唱滅
利益中今譬不譬第一而明現滅之由正由
衆生薄德見佛不修行即是不肯服藥也我

今當設下正唱應死譬非滅唱滅此中明衰
老為二一擬宜去住譬上住有損滅有益二
即作是言下唱應死正譬現滅化期將竟也
死時已至者當入涅槃也留經教在故云是
好良藥今留在此復至他國者即是此方現
滅他方現生上文云願在他方遙見守護即
其義也遣使者或取涅槃中大聲普告為使
人或用神通或用舍利或用經教等為使人
今用四依菩薩語衆生云佛已滅度但留此
法我今宣弘汝當受行也後時衆生若無四

依傳述經法豈能自知佛已滅度故用四依
是使人也二是時諸子下諸子醒悟譬現滅
利益上文有二一明損益二釋損益今但譬
得益此中自惟孤露下明滅後得益如優波
笈多所化之流也又為二一現滅利益二是

未來機感良由滅後衆生醒悟服藥修行以
作因緣能感未來應化如遺教云其未度者
作得度因緣亦有現得感見普賢觀云精進
苦到得見釋迦分身多寶東方善德等及七
佛世尊第三其父闍子悉已得差下即是未

來益物威猛之力父闍子差即機感使見之
即是起未來之應化方將形聲兩益也如文
從諸善男子於意云何下牒不虛譬明三世
利益不虛也從佛言我亦如是去明合譬也
成佛已來無量劫者合過去世也方便力言
當滅度合現在世也文略不合未來亦無能
說我虛妄合益物不虛也偈二十五行半頌
上法譬初二十行半頌法說次五行頌譬說
上法說有二今頌亦二初十九行半頌三世
益物次一行頌皆實不虛初四行頌過去世

益物為三初一行頌上成道已久次常說法
下第二一行頌上中間益物次為度衆生下
第三二行頌上住處次衆見我下第二五行
頌現在上文有二初二行半頌非生現生次
我時語下第二二行半頌非滅現滅次我見

諸下第三十行半頌上未來上但寄常住不
滅四字今頌則廣文為四初我見下一行半
明未來機應次神通力如是下第二四行頌
上常住不滅常在靈鷲山此謂實報土也及
餘諸住處者謂方便有餘土也即上餘國義

也天人充滿者三十心是人十地是天擊天
鼓者無問自說也是陀羅華者說賢聖位也
次我淨土下第三二行明不見因緣次諸有
修功德下第四三行明得見因緣次汝等有
智下第二一行頌上利益不虛也次五行頌
譬為二一行頌開譬為三初一句頌過去為
治下二句頌現在不頌未來也無能說下第
三一句頌不虛後我亦為下第二四行頌合
譬上合中本不合未來今初半行頌合過去
次凡夫下第二二行半頌合現在後每自作

下第三一行頌合不虛開三顯一開近顯速
欲令衆生速入佛道此事必得不虛也
釋分別功德品

佛說壽量二世弟子得種種益故言功德淺
深不同故言分別品也此文是本門第二投
記段論分此文有法力修力法力者有五
一證二信三供養皆如今品四開法如隨喜
品五讀誦持說讀誦如法師功德品持者追
指法師安樂行動持三品說者如神力囑累
品也修力者苦行力如藥王教化如妙音
護難如觀音陀羅尼示功德如妙莊嚴王護
法如普賢品也光宅云一約功德門記其行
進現在修因二約智慧門記其損生未來得
果三明外凡發心夫授記通因果此三通是
授記耳下八世界發心應在初列以外凡開
經發心住三十心三十心開經始出內凡登
於初地得無生忍初地開經進入二地得聞
持二地開經得入三地名樂說辯三地開經
入四地得無量旋四地開經入五地名不退
五地入六地名清淨輪小千已去約損生門

授記七地已斷無明惑感有九品能為九生
作因從七地已上果報無有期限難可得判
但斷九品煩惱為言煩惱品數百千萬種今
約一種九品作義七地所斷作上下二品乃
至十地所斷亦作上下二品金剛心所斷作
一品六地開經登七地下忍斷一品所餘八
品在為八生作因故云八生當得菩提七地
上忍復斷一品即損二品生餘七品為七生
作因七生當得菩提諸品例有上下一品盡
損一生文略故從八地乃至四生餘有一生
即金剛心斷之法也法華論云得無生忍者
謂入初地證智應知從八生乃至一生得菩
提者謂諸凡夫決定能證初地隨分生及一
生則證菩提菩提者雖三界分段生死隨分
能見真如佛性名得菩提非謂究竟滿足菩
提今謂論前深後淺光宅前淺後深二彼相
拒世孰判之夫無生法忍經論不同地旃延
子明五法成就獲不退轉六度菩薩位也須
陀洹若智若斷是菩薩無生法忍者三乘共
位也登初地得無生忍者別菩薩位也登初

住得無生法忍者圓菩薩位也皆聖教明文
不可參濫又淨名近無等等得無生忍仁王
云至金剛頂皆名伏忍亦名寂滅忍蓋是別
圓地地通途之意不可定用即光宅以發心
為內凡三十心位為無生忍是初地皆別家
名教非通家門戶從初地至六地呼為福德
門大經稱有為有漏名聲聞僧則通教意耳
七地已上斷九品生因者小乘大乘得入位
人誰不斷惑未足定判若言七地斷無明者
非通又非別乃是別接通意耳光宅游漾不
會今經天親以發心為無生忍從八生至一
生凡夫決定斷果報生盡得入初地獲無生
忍者專據別義亦不會經今分文為三一經
家總序二如來分別三時眾供養總序如文
分別者佛語圓妙不可用權位釋經故上文
開示悟入佛之知見今本門增道損生皆約
圓位解釋下八世界發心者六根清淨人初
入十信位也故仁王云十善菩薩發大心長
別三界苦輪海即此義也得無生忍入十住
位也故華嚴云初發心住一發一切發得如

來一身無量身清淨妙法身湛然應一切即此義也得聞持陀羅尼入十行位也得樂說辯才入十迴向位也得無量旋陀羅尼入初地也得不退入二地也得清淨入三地也八生入四地也七生入五地也六生入六地也

五生入七地也四生入八地也三生入九地也二生入十地也一生入等覺金剛心若論增道損生不如先定斷因生之生不如天親斷果報之生但約智德論增約斷德論損約法身論生約無明論滅例如大經月喻從初

一日至十五日日光色漸增從十六日至三十日光色漸減約一月體而論增減喻約法身而論智斷或可一人一時有八番增或可一世或八世或無量世或可一念或可八念或無量念或可衆微塵數人亦如是是故不可

以因生果生局之不可離張智斷釋之然本門得道數倍衆經非但數多又熏修日久原本垂迹處處開引中間相值數數成熟今世五味節節調伏收羅結攝歸會法華譬如田家春生夏長耕種耘治秋收冬藏一時獲刈

自法華已後有得道者如拈拾耳三時衆供養者聞深遠法得大饒益欲報佛恩而設供養亦是寄事以表領解上述門菩薩亦悟而大事未畢所以不陳本門既竟彌勒總申領解明諸菩薩執持旛蓋次第而上至于梵天

旛者轉義蓋者覆義地者始義梵者淨義智斷番番轉慈悲番番覆高下深淺不失次第際于梵天表諸菩薩增道損生隣于妙覺極於極淨若作天親解者只得初地一番豈得與此文會耶偈有十九行分爲三初二行頌

時衆得解次九行頌如來分別後八行頌時衆供養得無量無漏清淨之果報者揀異二乘有量故言無量妙因所感故言清淨無障礙土故言果報異二乘無報也聞佛壽無量此文定判爲無量何得用舊解有量南師從

偈後長行下屬流通段引上述門文殊現在亦是流通北師以四信弟子現在聞經判屬正說從又如來滅後下乃是流通二家盡可用今且依南方從偈後凡十一品半分爲二一從此下至不輕品明弘經功德深勸流通

二從神力品下八品付屬流通各復有三此半品及隨喜品明初品因功德勸流通二從法師功德明初品果功德勸流通不輕品引信毀罪福證勸流通後三者神力囑累囑累流通藥王下五品約化他勸流通普賢約自

行勸流通生起者現在聞經得真似兩解益如上說若直聞一句而生隨喜如現在四信格其功德未來無佛恐人疑福少故說滅後五品功德也因功德微密未若果功德彰灼故說法師功德品因果雙舉未若引證分明

故說不輕雖舉往人未若現變故說神力雖示神力未若摩頂付囑故說囑累雖通途囑累未若示其要術棄身存道故說藥王雖誠能化未若誠其所化隨聞法處應生佛想故說妙音觀音若初心弘經既無神力當依內

禁故說陀羅尼復須外護故說嚴王普賢聯翩重疊使大法弘通耳就偈後長行爲二一現在四信二滅後五品云何四信略解三人廣說二人觀成一人信通四人故言四信也四信者一念信解未能演說二略解言趣

三廣爲他說四深信觀成初一念信解有長行偈頌長行有三一舉示其人二明功德三位行不退今釋一念信解者謂隨所聞處豁爾開明隨語而入無有罣礙信一切法皆是佛法又信佛法不隔一切法不得佛法不得一切法而見一切法亦見佛法即一而三即三而一亦是行於非道通達佛道行於佛道通達一切道不得佛道一切道而通達佛道一切道無所有而有無所有非所有非無所有如門前路通達一切東西南北儘無壅礙眼耳鼻舌身意凡有所對悉亦如是無疑曰信明了曰解是爲一念信解心也若坐思惟隨所思惟豁然開悟通達三諦亦復如是如是信解名鐵輪位又一解未是具足鐵輪乃是十信之初心其人未得六根清淨故非鐵輪正位也次格量者先總論無量次格量多少爲二初舉五度爲格量本般若即是今之正慧故言除般若也問既離般若則五不名度答皆爲求佛慧盡施戒邊亦得名度蓋次第意也以是功德下第二正格多少也

若善男子下第三明位行不退別六心猶退七心不退圓初住心即不退聞壽量功德自外而資圓順信解自內而熏所以不退大品云有菩薩退有不退有魔無魔皆此義也偈十九行半初二行先頌格量多少次二行追頌人相後五行半頌行位不退無量劫行道者久修諸度也願我於未來者起慈悲願也藉久行願聞經信解今之初品始聞此經一念信解功等久行亦乃過之也又阿逸多聞佛壽長遠是第二品前但信解未能敷說說涉名數須善方言今品具足故言爲他解說從勝受名名第二品以說力故能起自他無上之慧此文先標人相次格量也何況廣聞此經下第三品廣聞廣解廣爲他說廣修供養供養外資令內智疾入能生一切種智先出人相次格量也阿逸多下第四人備上三品加修觀行入禪用慧想成相起能見有餘實報兩土相貌見佛共比丘僧常在香山者方便有餘土相也又見娑婆純諸菩薩者實報相也初二品是聞慧位廣聞廣說是思

慧位觀行想成是修慧位自淺之深成六根清淨十信位也又如來滅後下明五品文爲二先列五品格量四品功德後隨喜品格量初品功德問何故爾答四品粗格量初品廣格量廣格量已況出勝者可以意得佛不壞文巧說若此也五品者一直起隨喜心二加自受持讀誦三加勸他受持讀誦四加兼行六度五加正行六度此五人者通論皆自行化他下文云五十人展轉相教也既皆有自行通稱弟子皆有化他通稱法師也別論二人但自行三人具化他作法師往名在三不在五自行既通所以皆稱弟子也初品標人而已格量在後說何況下第二品況出能受持讀誦者是也標人可解從斯人頂戴下是格量也初心畏緣所紛動妨修正業直專持此經即上供養廢事存理所益弘多後心理觀若熟涉外不妨內事資於道如油多火猛若順流而揚帆又加功力其勢轉疾也指經文是法身舍利不須安生身舍利文詮所詮能詮是塔不須事塔經文能容第一義僧不

俟相從僧也問若爾持經即是第一義戒何故復言能持戒者答此明初品意不應以後品作難若欲釋者持經即順理戒亦是任運持得初篇二篇今言能持戒者第三篇去事中無虧耳第三品復能教他者是也先標人從起立下格量也況復有人下第四品復能兼行六度者是也先標人從其德最勝下格量也若人讀誦下第五品復能正行六度是也先標人從若我滅後下格量也結此五品前三人是聞慧位兼行六度思慧位正行六度是修慧位都是十信前耳或云初隨喜品是入信心位分一品為兩心五品即十信心即是鐵輪六根清淨位也偈十九行半初五行半頌第二品次若能持下三行頌第三品若有信解下四行頌第四品次恭敬下七行頌第五品生心如佛想者初依人號如來也不久詣道樹者其位在鐵輪不久得入銅輪能八相作佛也已趣道場者行處也三菩提者近處也此第五品與第四信齊同是修慧位若論入位同是六根清淨位也而有現未

佛世滅後之異耳云
釋隨喜功德品

隨者隨順事理無二無別喜是慶已慶人聞深奧法順理有實功德順事有權功德慶已有智慧慶人有慈悲權實智斷合而說之故言隨喜功德品又順理者聞佛本地深遠深遠信順不逆無一毫之疑滯順事者聞佛三世益物橫豎該亘徧一切處亦無一毫疑滯即廣事而達深理即深理而達廣事不二而二不別而別雖二雖別無二無別如此信解名之為隨如來出世四十餘年不顯真實七方便人不語誠諦慶我及人以凡夫心等佛所知用所生眼同如來見如此知見究竟法界廣無涯底無等無等等更無過上佛今說此我得聞此故名隨喜功德品第五十人是初品之初初但有一念理解但有一念慶已慶他未有事行思不及人所獲功德如來巧喻功蓋無學況復最初於會聞者況復二三四五品者況復入位十住十行乃至後心者誰聞如是深妙功德而不景慕如來說此令

物尚之故言隨喜功德品上來稱美持經功德時眾咸謂入真因位乃致斯德於初心之初起輕弱想忽聞好堅處地芽已百圍頻伽在穀聲勝眾鳥希有奇特疑釋然故名隨喜功德品外道得五通者能移山竭海而不伏見愛不及煖法人二乘無學子果俱脫猶被涅槃縛不知其因果俱權通教人修因雖巧發心不識五百由旬得果止除四住別人雖勝二乘修因則偏其門又拙非佛所讚皆不及初隨喜人佛今舉阿以況後茶都勝諸教故言隨喜功德品問此與大品隨喜云何答此法彼人人法互舉文有問答各長行偈頌前品已格四人不說初者彌勒承機問出此義如文佛答為二初答內心隨喜人二直明外聽法人初為五一展轉相教二格量本三問四答五正格量南方解五十人為三一展轉勝二展轉平三展轉劣勝者難得平者亦希劣者比是格劣況出平勝北方人解最初妙覺為第十地人說十地人為第九地人說如是展轉至于十信格後況初今謂不爾

佛明言初品於會中聞傳傳相教展轉五十格後況初後非十信之始初非妙覺之終何用此解此解窮深不會經旨今爲二一橫約諸教四衆二直約圓教數之三藏有四門一門有四衆更開沙彌沙彌尼合六人四門則二十四人約信行法行則四十八人最初最後合五十人通別四門亦如是直就圓門數者數法有小七大大七有七七四十九皆是師弟具自行化他之德最後一人但是自解無教他德故格不以顯上耳格量中先與世樂拔果苦後與涅槃樂拔生死苦此是略舉梵福今更廣之滿閻浮人福不及西瞿耶尼一人福滿西瞿人福不及東弗婆提一人福滿三天下人福不及北鬱單越一人福滿四天下人福不及一四天王四天王不及一釋乃至第六天不及一梵福梵福有定散散者無塔處作塔塔壞者治之和合僧衆請轉法輪衆散者還合之是爲四福與梵天等故言梵福也聖福者謂阿羅漢住最後身得有餘涅槃者是也又有體法三乘人同學無

生斷煩惱盡如燒木成炭又薩埵聖福自行化他俱以無言說道斷煩惱入無餘又薩埵福謂從初發心次第化人入大涅槃如是格量梵福不及聖福聖福不及體聖福體聖福不及小薩埵福小薩埵福不及大薩埵福大薩埵福不及聞法華經初隨喜福何以故彼非佛法故非實故非圓故雖住後果不及我初心其義如是私謂勸人聽法從與陀羅尼菩薩共生一處至人相具足合有五十功德將功德目人亦成五十但上五十論內解隨喜今唯論外事爲異也又此文亦有六根功德利根智慧是意功德不瘖瘂舌功德鼻脣高直鼻功德見佛眼功德聞法耳功德餘是身功德前是相似位功德今是相似位前功德耳聽經文爲四一自往二分座三勸他四具聽修行云云偈十八行爲二初九行頌隨喜次若有勸下第二九行頌聽經隨喜中三前一行半頌五十人次最後人下第二五行半頌格量本次最後下第三二行頌格量略不頌福甚多後九行頌聽經小不次第爲四初

五行超頌勸聽經次若故詣下第二二行追頌自往次若於講法下第三一行頌分座次何況下第四一行頌修行云云釋法師功德品法師義如上說功德者前謂初品之初功德今五品之上謂六根清淨內外莊嚴五根清淨名外莊嚴意根清淨名內莊嚴又從地獄已上至佛而還一切色像悉身中現者名內莊嚴從地獄已上佛已還一切色像以普現三昧而外化者名外莊嚴身根既爾餘五根亦然讀誦既爾四種亦然初品既爾四品加然相似既爾分真倍然行者聞說此功德利喜不自勝勤求無厭信進倍增明識大乘有大勢力決無疑網似解之初初過二乘之極極百千萬倍指始顯終懸解究竟第一義諦不可思議此品所明備斯四意故言法師功德品也六根功德者光宅云三業合十善一善具十爲百自行化他隨喜讚歎合四百約五種法師爲二千三品分之即六千功德此土三根用弱奪言八百三根用強與言千二

與奪合論還是六千也有人明數與光宅同
下品八百中品一千上品千二百諸師偏釋
未會今經亦不合諸教大品云色淨故般若
淨般若淨故色淨色淨五根淨般若淨意根
淨若六根等云何判上中下強弱用耶若一
強一不強一淨一不淨一上品餘非上品云云
正法華整足具六千功德不論上中下云云法
華論云凡人以經力故得勝根用雖未入初
地以父母所生肉眼見大千內外也大經云
如來一根則能見色聞聲嗅香別味覺觸知
法今經六根清淨與大品同以是功德莊嚴
六根與正法華同鼻見色聞聲覺知與涅槃
同肉眼有天眼慧法佛眼等用與論同文義
如此不可以偏見抑正經今當說之光宅數
整足根不依文今按三業安樂行即有十善
一善有十即百善一善中有十如即千善就
化他為二千約如來室如來衣如來座即成
六千五種法師悉具六根清淨一一根皆有
一千功德也復次一心中具十法界一一界
皆有十如即成一百一根通取六塵即有六

百約定慧二莊嚴即是一千二百根根悉用
定慧莊嚴等千二百也若論六根清淨清淨
則不言功德若少若多若言莊嚴能盈能縮
能等等莊嚴者根根六千若言千二顯其能
盈若言八百顯其能縮若言清淨無盈無縮
無等六根互用根自在故不可思議故若偏
判者則失旨也相似之位若依四輪即鐵輪
位也若依五十二位即十信心也若依仁王
即十善大心也今對常精進者即十信之第
三心也諸經名目雖異同是圓教相似位耳
文為二初總列六根盈縮功德數次別作六
章解釋各有長行偈頌眼根章明父母所生
名肉眼而所見過於天眼梵王報得天眼在
己界徧見大千大千外有風輪與眼作障不
能見外若在他界則不徧見大千非所統故
小羅漢見小千大羅漢見大千辟支佛見百
佛世界不以風輪為礙亦無已他界隔今經
論眼能見大千內外應是天眼那名肉眼此
是圓教似位因經之力有勝根用既未發真
不得稱天眼猶名肉眼例如小乘方便未得

神通則不稱天眼耳猶是分段之身故稱父
母所生雖稱肉眼具五眼用見大千內外天
眼用見一切眾生及業因緣法眼用其目甚
清淨慧眼用一時悉見大千內外見業見淨
又圓伏法界上惑佛眼用大經云雖有肉眼
名為佛眼佛眼故名清淨具五眼故故言莊
嚴能盈能縮名勝根用名根自在豈可祇作
八百千二百解耶耳根章徧聞大千內外十
法界音聲聞六道即肉天二耳聞二乘即慧
耳聞菩薩即法耳聞佛即佛耳又父母所生
肉耳能聞內外即天耳聽之不著即慧耳不
謬即法耳一時互聞即佛耳以耳例眼眼亦
如是見人天是二眼見二乘是慧眼見菩薩
是法眼見佛即佛眼云鼻根章亦如是父母
所生即肉鼻大千內外即天鼻不著不著即
慧鼻分別不謬即法鼻一時互用即佛鼻此
章明互用者鼻知好惡別貴賤觀天宮莊嚴
等則鼻有眼用讀經說法聞香能知鼻有耳
用諸樹華果實及蘇油香氣鼻有舌用入禪
出禪禪有八觸故五欲嬉戲亦是觸法鼻有

身用滌欲癡恚心亦知修善者鼻有意用鼻
根自在勝用若茲例五根亦如是舌根章亦
如是父母所生即是肉舌能作十法界語約
此即是五舌義明矣能作十法界語即天舌
不壞即慧舌不謬即法舌一時互用即佛舌

云問苦澀惡味至舌皆變成上味衆色到眼
何不變成妙色舊不例味有損益損者變不
損者不變諸色不壞眼故不例今解不爾一
切色同佛色一切聲同佛聲等皆清淨例則
無妨徧知一切色法聲法無亂無謬分別亦

無妨自在之根那作頑礙之解耶身根章亦
如是世間所有皆於身中現肉身用上至
有頂於身中現天身用也二乘身中現慧身
用也菩薩於身中現法身用也佛於身中現
佛身用也一時圓現一時互用一時無謬一
時無著云意根章亦如是世間資生產業皆
順正法人意淨天心所行天所動作悉知天
意淨四月即四諦一歲即十二月是十二因
緣與實相不相違背即慧意淨一月即一乘
菩薩意淨有所思量皆是先佛經中所說即

佛意淨一時圓明一時圓互一時無滌一時
無謬根自在能盈能縮能等能淨云
釋常不輕菩薩品

內懷不輕之解外敬不輕之境身立不輕之
行口宣不輕之教人作不輕之目不輕之解
者法華論云此菩薩知衆生有佛性不敢輕
之佛性有五正因佛性通亘本當緣了佛性
種子本有非適今也果性果果性定當得之
決不虛也是名不輕之解將解以歷人彼亦
如此是名敬不輕之境敬此境故名不輕之

行宣此語故名不輕之教昔毀者以此目人
今經家以此目品見實三昧云佛爲父王說
一切皆是佛王問一切衆生即是佛不佛答
若如實見衆生於其即是佛私類此語若不
如實見佛於其則非聖譬初學射的多乖少
當以地爲的無往不著若分別賢聖孰是孰
非如實觀之即是佛也初是因緣解後是圓
教解云此品引人爲證證五品功德深六根
報重我昔隨喜獲現生後報以募流通也文
有長行偈頌長行爲三一雙指前品罪福二

雙開今品信毀三雙勸後二逆順雙指者先
指罪如法師品說次指福如功德品說如文
第二雙開信毀者有事本本事本有時節
名號劫國說法等悉如文第二從最初威音
王下是明本事又三初明時節二於像法中
下雙標兩人名毀者因時名增上慢信者因
時名常不輕次第三得大勢下雙明得失得
失又二初就信者論得得正說之宏宗得流
通之妙益名常不輕是人一凡有所見是理
一皆悉禮拜是行一而作是言是教一此是
開權顯實之四一也從乃至遠見下是本理
一故往禮拜是本行一而作是言是本教一
少人一其義可解此是開近顯遠之四一也
文云不專讀誦經典但行禮拜者此是初隨
喜人之位也隨喜一切法悉有安樂性皆一
實相隨喜一切人皆有三佛性讀誦經典即
了因性皆行菩薩道即緣因性不敢輕慢而
復深敬者即正因性敬人敬法不起諍競即
隨喜意也不輕深敬是如來座也忍於打罵
是若如來衣也以慈悲心常行不替即如來

室也又深敬是意業不輕之說是口業故往禮拜是身業此三與慈悲俱即誓願安樂行也如此三四豈非流通之妙益而謂何耶從四衆之中下第二明毀者之失生瞋恚心不淨者不受四一也罵言無智智知於理既言無智不受理一也比丘即不受人一也從何所來不受行一也虛妄授記不受教一也經歷多年常被罵者結不受開權顯實之四一也避走遠住高聲唱言亦復不受此不受開近顯遠本地之四一也常作是語故結信者深信不休也四衆爲作不輕名者此結毀者皆毀不止也問釋迦出世踟躕不說常不輕一見造次而言何也答本已有善釋迦以小而將護之本未有善不輕以大而強毒之云云從臨欲終時下雙明信毀果報初文爲二一明果報二結會古今信者論三報現得六根清淨生值燈明佛後值二千億佛神通力是身業淨樂說辯力是口業淨善寂力是意業淨云云結會又二初結會如文從若我宿世下第二是舉信者而勸順也如文從彼時四衆

下明毀者果報又二先明得果後結古今毀者得善惡兩果謗故墮惡聞佛性名毒鼓之力獲善果報結古今又二初結古今次從當知下舉逆以顯順勸持以遮毀經有大力終感大果務當勤習五種之行偈有十九行半廿九初十五行半但頌信毀因果後四行頌勸持在文可見不細出也著法者是法不可示若定謂是有即是著法乃至定謂是非有非無亦名著法者佛藏云刀輪害閻浮人其失猶少有所得心說大乘者其罪過彼也云云大論云執有與無諍乃至執非有非無與有無諍如牛皮龍繩俱不免患中論云諸佛說空法本爲化於有若有著空者諸佛所不化若定言諸法非有非無者是名愚癡論若失四悉檀意自行化他皆名著法若得四悉檀意自他俱無著也

妙法蓮華經文句卷第十上

妙法蓮華經文句卷第十上
校勘記

- 一 底本，明永樂北藏本。
- 一 二〇一頁下一六行第七字「復」，
清作「後」。

妙法蓮華經又句義第十下 第十

隋天台智者大師說

門人增頂記

釋如來神力品

如來者上釋竟神名不測力名幹用不測則

天然之體深幹用則轉變之力大此中為付

囑深法現十種大力故名神力品自此品下

凡有八品是付囑流通今品明菩薩受命弘

經次品如來摩頂付累文有長行偈頌長行

為三一菩薩受命二佛現神力三結要勸持

初經家敬儀次發誓弘經弘經為三一時

節佛滅後是也二處所分身等國是也三誓

願非但奉命益他亦自願此真淨大法兼濟

俱美也從爾時下是第二現十神力為二初

所對之眾次正現神力於文殊等者迹化眾

也舊住者下方本化眾也一切者他方來者

及從分身佛來者也問但見下方發誓不見

文殊等發誓何也答上文云我土自有菩薩

能持此經即兼得之也十神力者一吐舌相

者今經所演開三顯一內秘外現廢近顯遠

明三世益物皆誠諦不虛福德人舌至鼻三
藏佛至髮際今至梵天出過凡聖之外極於
淨天之頂相既殊常說彌可信二通身毛孔
徧體放光周照十方無處不朗表智境罄也
上白毫吐耀始在東方表七方便初見一理

今本門既竟放一切光照一切土能令初因
終于等覺究竟佛慧分身諸佛亦復如是三
聲咳者將語之狀也亦是通暢之相也四十
餘年隱秘真實今獲伸舒無有遺滯是我出
世大事通暢是故聲咳欲以此法付諸菩薩

今於後世導利眾生將語斯事是故聲咳聲
咳具二義一咳咳事了一咳咳付他也四彈
指者隨喜也隨喜七方便同入圓道隨喜圓
道增智損生隨喜諸善薩持真淨大法隨喜
後世獲無上寶此一彈指豎徹三世橫亘十

方五地六種動者表初心至後心六番動無
明今明復動一切人六根今得清淨也六番
見大會者表諸佛道同也而今而後亦復如
是上五千起去三變被移既失本心不能現
益宜以非滅現滅從諸善薩弘經得道入於

佛慧如今會無異亦表未來有機一也七空
中唱聲者表於未來有教一也八南無歸命
為佛弟子表於未來有人一也九遙散諸物
雲聚而來者表未來有行一也十十方通同
如一佛土者表理一也問何以知十相表現

意復表將來意答文云我以如來神力為囑
累此經故猶不能盡表現表將其義明矣從
爾時佛告上行下是第三結要付囑文為四
一稱歎付囑二結要付囑三勸發付囑四釋
付囑初歎如文結要有四句一切法者一切

皆佛法也此結一切皆妙名也一切力者通
達無礙具八自在此結妙用也一切秘藏者
徧一切處皆是實相此結妙體也一切深事
者因果是深事此結妙宗也皆於此經宣示
顯說者總結一經唯四而已撮其樞柄而授

與之從是故汝等下三是勸發付囑如文從
所以者何下四是釋付囑也上云經卷所在
之處皆應起塔經中要說要在四事道場釋
上甚深之事得善提釋上秘藏轉法輪釋上
一切法入涅槃釋上神力此之四要攝經文

盡故皆應起塔也所言要者得菩提是法身轉法輪是般若入涅槃是解脫三法成秘密藏佛住其中即是塔義也阿含云佛出世唯四處起塔生處得道處轉法輪入涅槃坐道場是法身生處餘悉如文偈有十六行初四行頌十神力次十二行頌結要囑累下二行是人之功德總頌四法能持則為已見我下第二八行半別頌四法初一偈半頌一切法持法即持佛身云今我及分身兩偈頌神力神力勸佛令歡喜諸佛坐道場一偈頌祕要

釋囑累品

可解於諸法之義四偈頌甚深之事說法破闇入一乘是佛甚深之事也後一偈半總頌結也

囑是佛所付囑累是煩爾宣傳此從聖旨得名故言囑累囑是頂受所囑累是甘而弗勞此從菩薩敬順得名故言囑累囑是如來金口所囑累是菩薩丹心頂荷此從授受合論故言囑累品也是故如來躬從座起申手摩頂授以難得之法大眾曲躬合掌如世尊勅

當具奉行殷勤授受故名囑累品也文為二初付囑次時眾歡喜初為三一如來付囑二菩薩領受三事畢唱讚初又三一正付二釋付三誠付正付者佛以一權智善巧之手摩三千三百那由他國土側塞虛空諸菩薩實

智之頂如來授道化他故名權智手也菩薩自行受道故名實智頂也若申手摩頂即身付囑也權智臨實智即意付囑也而作是言者即口付囑也文有四悉檀意我於無量劫修是難得之法者此從前佛受學今以付爾爾當授彼三世繼嗣即世界悉檀也一心流布即為人悉檀也廣令增者即對治悉檀也益者即第一義悉檀也所以者何下釋付也

有大慈悲者如來室也無諸慳吝者如來衣也亦無所畏者如來座也佛之智慧者一切智也如來智慧者道種智也自然智慧者一切種智也於如來室中能施眾生三種智慧乃至座中亦復如是如是施主故無慳吝故無所畏汝等當學如來此法是名釋出佛意而付囑之從於未來世下是誠付者若根深

智利直說佛慧若不堪者於餘深法中示教利喜佛慧是深而非餘六方便是餘而非深別教次第是餘亦是深汝能以餘深助申佛慧者即善巧報佛之恩是名誠付囑也從時諸菩薩下是第二領受歡喜意領受曲躬低頭是身領受俱發聲言是口領受兼得意領受也如世尊勅者領受大施主如來室意當具奉行領受無慳吝如來衣意願不有慮領受無所畏如來座意佛既三付菩薩三受皆如文爾時釋迦下是第三唱散多寶為證經故來今迹本二門已訖故須敬造如故分身為開塔故集開塔事了故令分身還本塔不可重開故分身去而不現塔猶聽法故閉而尚在問塔若聽法亦應不閉答證正已故閉聽流通故在云從說是語時下是大眾歡喜諸佛為化他事遂故喜菩薩為自行得法故喜又說人清淨故喜佛是也聞清淨法故喜妙經是也聞法獲證故喜現在未來得益者是也三事具足故大歡喜云

釋藥王菩薩本事品

觀經曰昔名星光從尊者日藏聞說佛慧以雪山上藥供養眾僧願我未來能治眾生身心兩病舉世歡喜號曰藥王此文明一切眾生喜見頓捨一身復燒兩臂輕生重法命殞道存舉昔願今故言本事品也若推此義星

光應在喜見之後從捨藥發誓已來名藥王故云此下五品皆是化他流通本品明化他之師唯願大法大得弘宣大願眾生獲大饒益所以竭其神力盡其形命殷殷虔虔志猶未已庶令弟子宗法如師我傳爾爾復傳

明明明無已師之志也故知此品易弘法之師也下如妙音觀音兩品明他方大士奉命弘經普現色身形無定準不可牛羊眼看不可以凡庸識度於所聞處勿生輕想輕想則法不深心故知下品易受法弟子也有人言上諸品諸佛為佛事此品下菩薩為佛事此一往耳上品亦有菩薩此下品亦有諸佛云今明方便品開三願一願因已竟安樂行品明乘乘之法壽量明乘果已竟此品下明乘乘之人故十二門論云大乘者普賢文殊大

人之所乘也藥王以苦行乘乘妙音觀音以三昧乘乘陀羅尼以總持乘乘妙莊嚴以誓願乘乘普賢以神通乘乘作此解者於化他流通義便也文為四一問二答三利益四多寶稱善問為三一通問遊化二別問苦行三

請答如文二答為二一但答苦行者遊化則指色身三昧或指下二品也二歎經答苦行中先明事本次明本事事本為三謂時節有佛聲聞國土等悉如文本事為三一佛說法二修供養三結會然佛音為一切何獨喜見

其是對揚須付流通如今之身子寄一而言諸耳苦行又一一現在二未來現在又一一修行得法二作念報恩報恩又二二三昧力二正報身力身力為三一燒身二佛稱歎三時節真法供養者當是內運智觀觀煩惱因果皆用空慧蕩之故言真法也又觀若身若火能供所供皆是實相誰燒誰能供所供皆不可得故名真法也一切眾生下未來苦行又為五一生王家二說本事三往佛所四如來付囑五奉命任持悉如文任持又四一

起塔二燒臂三利益四現報悉如文佛告下是第三結會古今又為二一結會二勸修勸修者能然一指勝捨外身外輕內重故功福有異文云妻子者外身也國城等外財也從若復有人以七寶下歎經先歎能持者次歎所持法後明持福深七寶奉四聖不如持一偈法是聖師能生能養能成能榮莫過於法故人輕法重也宿王下第二歎所持法又二初歎法體次歎法用川流江河諸水之中海為第一者無量義云四水譬教藥草喻中一雲能雨譬說今更諸水總一切教別舉四者譬乳酪生熟四味教也此法華教譬醍醐海也說窮本地為深徧一切處為大純明佛法不說餘法為鹹最為深大其義如是十寶山名出華嚴及眾經云土黑鐵圍故非是寶十山雖寶或一或二神龍雜居須彌四寶所成純天所住譬餘教說能依十地四心或凡或賢或聖說所依或俗或真或中是為卑下此法華經所說諦理常樂我淨如四寶所成開示悟入者之所依是故此義最為高上星

月同是陰精俱於夜現星無虧盈不及於月諸經說權智不得自在此經明權即實實即權盈虧相指不二而二如此說權智勝餘教也日是陽精獨能破闇諸經明實智破惑尚不及即實而權那得並即權而實故知此經明實智最為第一輪王號今止在四域釋齊三十三梵號今總上冠下譬餘經說三諦三昧各不相收不得自在此經所說以實相入真決了聲聞法是諸經之王實相入俗一切治生產業不相違背實相入中諸法無非佛法文云一切學無學及發菩薩心者之父其義如是一切凡夫四果支佛第一者此明任運無功用也餘經要因功用乃得入流如四果人因聞思修方乃得悟此經明無作四諦不雜方便自然流入薩婆若海如太白牛肥壯多力其疾如風云聲聞支佛菩薩為第一者此明因第一也餘經明因是七方便今經明因出方便外故因第一也如來第一者此明果也餘經明果近在寂場此經明果遠指本地故最第一此經能救下歎法用初歎教

苦用次十二事歎與樂用後結皆如文從若人得聞下明持經福深先舉全聞經福次舉聞品福有格量有囑累如文口出香是現報餘是後報得聞是經不老者此須觀解不老是樂不死是常聞於此經得常樂之解坦然在懷無所畏忌說是下是第三聞品得益如文第四多寶稱善如文

釋妙音菩薩品
文中自釋昔奉雲雷音王佛十萬種妓今遊化他土音樂自隨昔奉八萬四千寶鉢今爾許道器眷屬圍遶昔得一切眾生語言陀羅尼今以普現色身以妙音聲徧吼十方弘宣此教故名妙音品此品明菩薩以難思之力隨類通經物觀其迹莫測其本但甘其味無擇其形當早其地自墮其流即是化他門中

第二意也文為六一放光東召二奉命西來三十方弘經四二土得益五還歸本國六聞品進道大人相者大相海也徧體毛功德不及一好功德眾好功德不及一相功德諸相從下向上展轉相勝不及白毫功德白毫功

德不及肉髻功德故是大人相也此相業者從孝順師長起今放是光召本弟子使弘中道之經利益大機者也白毫從一道清淨起今放此光今弘此法也問佛一一相皆法界海何故勝負答他經所明宜作此說耳問佛

有緣弟子布滿十方何故召東說西不論八方耶答此有所表淨名云日月何意行闍浮提欲以光明除眾闇東是光始西是其終有始有終其唯聖人乎未發心者令其發心未究竟者令其究竟一菩薩既爾諸眾亦然

一方既爾諸方亦然聖不煩文舉一敬諸故但言東西耳發來文為二一發來緣二正發來緣緣為六一經家敘其福慧二被照三辭四誠五受旨六現來相敘福之由由值先佛多也甚深智慧即智慧莊嚴十六三昧即福德莊嚴也光照身辭佛悉如文佛誠者然法身大士故不肅而成所將眷屬或未達者故寄彼而規此耳夫佛身與理相稱不得見卑小而忘其尊嚴此約如來座為誠也夫師及弟子智斷具足師既施權弟子亦隱其實此

約如來衣為誠也夫依報國土皆正報所感如來以慈臨大千宜須高須下勿觀依報而忽正報也此約如來室為誠也此佛弘經亦勅三意彼尊誠約諸佛道同也受旨者如來力是座力神通力是室力莊嚴力是衣力此受弘經之大旨利物之宗要故能不動此會遊化十方焉現相文為六一遣蓮華二問三答四請五推功六命來悉如文問若文殊位下辭不應求見若文殊位高相來那忽不識答雖同一位有始中終止此一事不知無忝高位又眾中見瑞不了發起今知故問佛耳從于時下是發來文為六一與眷屬經歷二敘相登臺三問訊傳旨四請見多寶五世尊為通六塔中稱善悉如文第三弘經為二問答初問種何善根二問有是神力善根是問昔神力是問今佛還答二意昔獻樂奉器仍結古今悉如文此答其種善根之問從華德下答其神力之問示三十四凡身四聖人身結成十法界六道耳爾時華德下是問今住何定而能如此自在利益佛答如文說是品

下是第四二土利益三昧與陀羅尼體一而用異寂用為三昧持用名陀羅尼又色身變現名三昧音聲辯說名陀羅尼上品云初得一切色身三昧轉身得一切語言陀羅尼當知音聲猶是色法故言體一用異又舌根清淨名陀羅尼餘根清淨名三昧都是六根清淨法門耳爾時妙音下第五還本土動地兩華者菩薩經歷尚能傍益况佛前放光傍照東方百八萬億那由他土亦傍論利益也第六聞品進道如文

釋觀世音菩薩普門品

此品是當途王經講者甚眾今之解釋不與他同別有私記兩卷略撮彼釋此題有通有別通有十雙別有五隻十雙者一人法乃至第十智斷云云觀世音者人也普門者法也人有多種云云法有多種云云依前問答論觀世音人依後問答論普門法人法合題故言觀世音普門品二觀世音者大悲拔苦依前問答百千苦惱皆得解脫普門者大慈與樂依後問答應以得度而為說法也三觀世音者智

慧莊嚴智能斷惑如明時無闇普門者福德莊嚴福能轉壽如珠兩寶者也四觀世音者觀冥於境即法身也普門者隨所應現即應身也五觀世音者譬藥樹王徧體愈病普門者譬如意珠王隨意所與六觀世音者冥作利益無所見聞第十三毒七難皆離二求兩願皆滿也普門者顯作利益目觀三十三聖容耳聞十九尊教也七觀世音者隨自意照實智也普門者隨於他意照權智也八觀世音者不動本際也普門者迹住方圓也九觀世音者根本是了因種子普門者根本是緣因種子也十觀世音者究竟是智德如十四夜月光也普門者究竟是斷德如二十九夜月邪輝將盡也經文兩問答合無量義略用十雙始從人法終至智斷釋品通名其義如是別論五隻者一觀也觀有多種謂析觀體觀次第觀圓觀析觀者滅色入空也體觀者即色是空也次第觀者從析觀乃至圓觀也圓觀者即析觀是實相乃至次第觀亦實相也今簡三觀唯論圓觀云云普門觀若不圓門不

稱普即此義也世者若就於行先世後觀若就言說先觀後世今從說便故後論世世亦多種謂有為世無為世二邊世不思議世有為世者三界世也無為世者二涅槃也二邊世者生死涅槃也不思議世者實相境也簡卻諸世但取不思議世也音者機也機亦多種人天機二乘機菩薩機佛機人天機者諸惡莫作諸善奉行也二乘機者獸畏生死欣尚無為也菩薩機者先人後己慈悲仁讓也佛機者一切諸法中悉以等觀入一切無礙人一道出生死也揀卻諸音之機唯取佛音之機而設應以此機應因緣故名觀世音也普者周徧也諸法無量若不得普則是偏法若得普者則是圓法故思益云一切法邪一切法正略約十法明普得此意已類一切法無不是普所謂慈悲普弘誓普修行普離惑普入法門普神通普方便普說法普成就眾未普供養諸佛普始自人天終至菩薩皆有慈悲然有普有不普生法兩緣慈體既偏被緣不廣不得稱普無緣與實相體同其理既

圓慈靡不徧如礮石吸鐵任運相應如此慈悲徧熏一切名慈悲普弘誓普者弘廣也誓制也廣制要心故言弘誓弘誓約四諦起若約有作無生無量四諦者收法不盡不名為普若約無作四諦者名弘誓普也修行普者例如佛未值定光佛前凡有所修不與理合從得記已觸事即理理智歷法而修行者無行而不普也斷惑普者若用一切智道種智斷四住塵沙等惑如卻枝條不名斷惑普者用一切種智斷無明者五住皆盡如除根本名斷惑普入法門普者道前名修方便道後所入名入法門若二乘以一心入一定一心作一不得眾多又為定所縛故不名普若歷別諸地淺深階差亦不名普若入王三昧一切三昧悉入其中不起滅定現諸威儀故名法門普神通普者大羅漢天眼照大千支佛照百佛世界菩薩照恒沙世界皆緣境狹發通亦偏若緣實相修者一發一切發相似神通如上說沉真神通而非普耶方便普者二種道前方便修行中攝道後又二一者法體

如入法門中說二者化用如今說逗機利物稱適緣宜一時圓徧雖復種種運為於法性實際而無損減是名方便普說法普者能以一妙音稱十法界機隨其宜類俱全解脫如脩羅琴故名說法普成就眾普者一切世間及出世間所有事業皆菩薩所為鑿井造舟神農嘗藥雲蔭日照利益眾生乃至利益一切賢聖示教利喜令入三菩提是名成就眾普供養諸佛普者若作外事供養以一時一食一華一香普供養一切佛無前無後一時等供於一塵中出種種塵亦復如是若作內觀者圓智導眾行圓智名為佛眾行資圓智即是供養佛者行資餘智不名供養普眾行資圓智是名供養普門者從假入空空通而假壅從空入假假通而空壅偏通則非普壅故非門中道非空非假正通實相雙照二諦故名普正通故名門普門圓通義則無量略舉其十類則可知此品猶是普現三昧化他流通也文為三一問二答三聞品得益問答兩番初番問為二初經家敘時者說東

方菩薩竟次說西方菩薩時也其說東方生善竟次說西方生善時二說東方斷疑竟次說西方斷疑時其說東方得道竟次說西方得道時四無盡意者大品明空則無盡大集明八十無盡門淨名云夫無盡者非盡非無盡故名無盡總三經用三觀三智釋無盡也意者智也無盡者境也智契於境單從於境應言無盡單從於智應言於意境智合稱故言無盡意也一又意者世出世之本也二又意即法界中道故言能觀心性名為上定三此約三智三觀釋名也與問者大經云具二莊嚴能問能答無盡意前以慧莊嚴問觀世音慧莊嚴佛以慧莊嚴答觀世音慧莊嚴也佛答為三一總答二別答三勸持名答總為四一人數二遭苦三聞名稱號四得解脫自有多苦苦一人多人受一苦一人受多苦一人受少苦今文百千萬億衆生多人也受諸苦惱多苦也舉多顯少多尚能救況少苦耶遭苦是惡稱名是善善惡合為機義也而得解脫是應也此是機感因緣名觀世音亦是

人法因緣乃至智斷因緣名觀世音後去例如此結名不煩文別答為三一一口機應二意機應三身機應口又二初明七難次結火難為四一持名是善二遭火是惡三應四結於一難中例為三番一果報火地獄已上初禪已還皆論機應二惡業火地獄已上非想已還皆論機應三煩惱火地獄已上等覺已還皆論機應七難三毒二求例皆如此此義既廣可以意知不可文記身機為二初二求次結求男有立願修行德業求女文略修行正言禮拜是同故略之願業各異故重出之結如文從是故衆生下是勸持名為三勸持格量結歎上述勝名美德不辨形質若欲歸崇宜持名字是故勸持也入大乘論云法身唯一應色則多於六十二億應等一法身也智者云圓人唯一偏人則多於六十二億偏菩薩等一圓菩薩也第二番問為三云何遊問身云何說問口方便問意此聖人三密無謀之權隨機適應也佛答亦三一別答二總答三勸供養應以者答方便力也現身答其問

遊也說法答其問口也凡有三十三身十九說法云從成就下結別開總別文廣意狹總答文狹意廣云從是故下勸供養此中見形聞法故勸供養也初勸次受旨受旨為六奉命不受重奉佛勸即受結皆如文從持地下是聞品功德云無等等者九法界心不能等理佛法界心能等此理故無等等而等也又畢竟之理是無等初緣畢竟理而發心能等於理故言無等等也又心之與理俱不可得將何物等何物而言無等等耶心之與理俱不可說不可說而說說此心等此理故言無等等耳初一是一橫釋次一是一豎釋次一非橫非豎釋也云云

釋陀羅尼品

此翻總持總持惡不起善不失其又翻能遮能持能持善能遮惡其二此能遮惡能持中善其眾經開遮不同或專用治病如那達居士或專護法如此文或專用滅罪如方等或通用治病滅罪護經如請觀音或大明呪無上明呪無等等明呪則非治病非滅罪非

護經若通方者亦應兼若論別者幸須依經勿乖教云諸師或說呪者是鬼神王名稱其王名部落敬主不敢為非故能降伏一切鬼魅其或云呪者如軍中之密號唱號相應無所訶問若不相應即執治罪若不順呪者頭

破七分若順呪者則無過失其或云呪者密默治惡惡自休息譬如微賊從此國逃彼國訛稱王子彼國以公主妻之多瞋難事有一明人從其國來主往說之其人語主若當瞋時說偈偈云無親遊他國欺誑一切人羸食是常事何勞復作瞋說是偈時默然瞋歇後不復瞋是主及一切人但聞斯偈皆不知意呪亦如是密默遮惡餘無識者其或云呪者是諸佛密語如王索先陀婆一切羣下無有能識唯有智臣乃能知之呪亦如是祇是一法徧有諸力病愈罪除善生道合其為此義故皆存本音譯人不翻意在此也惡世弘經喜多惱難以呪護之使道流通也文為四一問持經功德二答甚多三請以呪護四問品得益一問如文二答有格量本問多不答甚

多格出功德如文請說呪有五番一藥王二勇施三毗沙門四持國五十女藥王為四一請二說三歎四印下例有三如文十女為五

一列名二請說三歎四誓五印夜叉翻捷疾鬼羅利翻食人鬼二部是北方所領者富單那熱病鬼吉遮起尸鬼若人若夜叉俱有此鬼毗陀羅亦色鬼捷陀羅黃色鬼詳末烏摩勒烏色鬼詳末阿跋摩羅青色鬼阿黎樹枝墮地法爾破為七片絨父母破僧是三逆罪外國油者擣麻使生蟲合堅之規多汁益肥此過尤也斗秤輕出重入欺盜之尤近世有小斗出大斗入震銘其替斯罪亦不輕也釋妙莊嚴王本事品此因緣出他經昔佛末法有四比丘於法華經極生殷重雖卷舒秘教甘露未霑日夜翹誠畧刻無忘歎云苟非其人乎地非其處乎世間紛紛靜散相乖直爾求閑尚須歇棄况崇道乎於是結契山林志欣佛慧幽居日積衣糧單罄有待多煩無時不之一餐嚙嚙慶萬里之行十旬九飯屈雲霄之志可得言哉

其一人云吾等四窮尚不存身法當安寄若三人者但以命奉道莫慮朝中我一人者捨此身力誓給所須於是振錫門間以求供繼自春至冬周而復始如僕奉大家甘苦無喜愠三人得展其誠功圓事辦一世之益當無

量生其一人者數涉人間屢逢聲色垢器未火難可護持偶逢王出車馬駢闐旌旗喻赫生心動念愛彼光榮功德熏修隨念受報人中天上帝得為王福雖不貲亦有限也三人得道會而議云我免籠樊功由此王其耽果報增長有為從此死已不復為王方沈火坑良難可救幸其未苦正可開化其一人云此王著欲而復邪見若非愛鈞無由可拔一人可為端正婦二作聰明兒兒婦之言必當從順如宜設化果獲改邪婦者妙音菩薩是昔二子者今藥王藥上二菩薩是昔時王者今華德菩薩是所以白毫東召升紫臺而西引神呪護經使流通而大益說四聖之前緣故名妙莊嚴王本事品又妙莊嚴者妙法功德莊嚴諸根也此王往日於妙法有緣道熏時

熟諸根應淨生雖未獲其理必臻靈瑞感通
嘉名早立例如善吉雖未無諍已號空生故
下文云得清淨功德莊嚴三昧以是義故名
妙莊嚴王也前品說呪護今品說人護人護
尚爾呪護彌良普勸流通也文爲六一明事
本二雙標能所三能化方便四所化得益五
結會古今六聞品悟道事本如文彼佛法中
下第二雙標能所化一人能化三人俱出
其名別顯二子福慧六度四弘餘經指此爲
十波羅蜜橫法門也三十七助道豎法門也
餘經爲正道行爲助道今經指十度爲正
呼此是助道也禪度中具有三昧道品中節
節有三昧更標七三昧者廣顯法門耳從時
彼佛下第三能化方便文爲三一時至二論
議三現化初時至者彼佛出世常宣正法於
王緣弱則非其時若說法華則其時矣文云
彼佛將欲引導說法華經即其義也第二論
議文中子白母時至母讓令化父子怨出邪
見家母責令憂念悉如文從於是二子下是
第三現化現化應十八變可具釋之從時父

見子下第四所化得益文爲十一信子伏師
王親那變或一或二狹而且陋見子所作歎
未曾有信其子而伏其師問師是誰我亦願
見二父王已信宮中八萬四千又熟白母稱
慶願放出家母亦聽之三重催父母今正其
時佛難值故四化功已著佛歎功德法華三
昧者攝一切法歸一實相如前說離惡趣者
一往以三途爲惡趣具論二十五有皆乘真
起妄悉是惡趣今皆離之即二十五三昧破
二十五有也佛集三昧者即秘密之藏佛集
其中唯佛行處非餘人也五俱詰佛所聞法
供養見瑞歡喜六佛與受記七出家修行八
稱歎二子九佛述行高十歎佛自誓佛讚善
知識大有義善知識能作佛事此則外護善
知識示教利喜者此則教授善知識所謂化
導今得見佛者此則同行善知識今入菩提
此則實際實相善知識雜阿含云善知識者
若貞良妻此即外護義又善知識者如宗親
財此即同行義又善知識如商主導此即教
授義又善知識如子臥父懷此即實際義也

佛告大衆下是結會古今先結會次結數二
菩薩也說是下聞品得道如文
釋普賢菩薩勸發品
大論觀經同名稱吉此經稱普賢皆漢語梵
音必輸颺陀此云普賢悲華云我誓於穢惡
世界行菩薩道使得嚴淨我行要當勝諸善
薩寶藏佛言以是因緣今改汝字名爲普賢
此即三悉檀意復是因緣解釋又是行願得
名由來從於念處至四善根通稱爲普賢別
約世第一法隣真近聖稱之爲賢此三藏中
說耳今明伏道之頂其因周徧曰普斷道之
後隣于極聖曰賢若十信是伏道之始非頂
非周隣于初聖之初非後非極乃至第十地
亦非周極况前諸位乎今論等覺之位居衆
伏之頂伏道周徧故名爲普斷道纒盡所較
無幾隣終際極故名爲賢釋論引十四夜月
如十五夜月斯義明矣此約圓教位釋後位
普賢也勸發者總法之辭也遙在彼國具聞
此經始末既周欲令自行化他永永無已故
自東自西而來勸發具四悉檀意云云我

為供養法華經故自現其身若見我身甚大
歡喜其一已見我故轉復精進即得三昧及陀
羅尼其二得是陀羅尼故無有非人能破壞者
亦復不為女人之所惑亂其三三千大千世界
微塵菩薩具善賢道其四如此明文即四悉檀
而來勸發也上判流通為三從十九行偈已
後三品半舉經力大以勸流通藥王品下五
品舉菩薩化道力大以勸流通此一品舉普
賢誓願力大以勸流通分文為四一發來二
勸發三述發四發益初經家敘發來為三一
上供二下化三修敬自在者理一也神通者
行一也威德者人一也名聞者教一也又自
在者常也神通者樂也威德者我也名聞者
淨也言說如此即一而四德無不備自在義
焉淨力故兩華樂力故奏伎神通故動地自
在力故隨意而兩隨去隨雨隨動隨奏其十譬如
大龍飛行不息身邊雲雨流起無窮普賢及
眷屬以菩薩身用四德力來勸發四一所逕
歷處自行上供其事如此從又與諸天龍下
所逕歷處下化利益隨他所宜現八部像略

用二力隨所堪任其事如此三者修敬身旋
面禮如文勸發為二一請問勸發二誓願勸
發有問有答問者遙聞經竟戀法無已遠來
之志志在勸發是故更請正說勸發自行更
請流通勸發化他如來若許二途再演光光
無極是故雙請也佛答先總次別三結別列
四法名如文其既雙請如來巧答略舉四以
蔽諸何者四法之要該括正通何者佛雖無
偏若能遠惡從善反迷還正開權知見顯佛
知見者則稱可聖心諸佛護念若佛知見開
則般若照明是植眾德本亦是入正定聚不
亂不味不取不捨亦是發救眾生當知此四
與開權顯實名異體同無二無別又佛護念
者是開佛知見植眾德本是示佛知見發救
眾生是悟佛知見入正定聚是入佛知見迹
門之要此四收矣又迹則有本從本開示悟
入故有迹中開示悟入今開迹即顯本本迹
無二無別以四法答其請正於義明矣以四
法答請流通流通之方唯三唯四發救眾生
是入如來室入正定聚佛所護念是著如來

衣植眾德本是坐如來座是弘宣之要即四
而三發救眾生是誓願安樂行入正定聚是
意安樂行植眾德本是口安樂行護念是身
安樂行當知後四即前四也一答酬其兩請
舉四冠罩一經法華之重演斯經之再宣遠
來之勸發其義如此三結者於如來滅後必
得是經舊云能行四法於未來世常手得是
經今謂不爾上文云諸法實相我已為汝等
說又云咸令眾生開示悟入佛之知見蓋法
華之正體能行四法必得此解名解為經此
結其請正之問若能運此解行傳與他人他
人得斯信解成初依人能得真解成第二第
三第四依人此結其請流通之問此意不見
浪作餘說耶白佛下第二誓願勸發文為二
一護人二護法護人為六一攘其外難初總
攘其難故言使無伺求得其便者是也次別
攘其難舉十二非是也二教其內法凡三番
教訓初行立讀誦乘六牙白象安慰其心次
坐思惟復乘六牙教示其經與其三昧也陀
羅尼旋假入空也百千旋者旋空出假也方

便者二為方便道得入中道第一義諦也後
 三七一心精進復乘六牙示教利喜說呪如
 文三覆以神力若聞若持莫非神力如文四
 示勝因若能五種法師即三世佛所為種為
 熟為脫此人同未來諸佛得脫故言同普賢
 行此人已於先佛植善故言深種善根此人
 為現佛所熟故言手摩其頭五示近果但能
 書寫近在切利具五法師次在兜率如文六
 總結是故智者下是也從世尊我今神力下
 是第二誓願護法如文第三述發者即是如
 來舉勝述成其劣增進行者勇銳弘宣先述
 護法云汝能如是外多利益內積慈悲又久
 劫已來作如此護我亦以佛之神力守護是
 法況復汝耶如文從若有人下述其護人雖
 不次第述成意足當知是人則見釋迦牟尼
 佛者述其示身教法其尚見我萬德果身況
 汝因中六牙白象其尚從佛口具足聞經況
 汝所教忘失章句其尚為佛口讚手摩佛衣
 所覆況汝因人陀羅尼覆耶從不貪著世樂
 下述其舉因廣舉因中無諸過惡少欲知足

修普賢行述勝因也從若如來滅後下述其
 舉近果也其人當詣道必成遠果況近果
 耶亦於現世得其近果不但生天也從若人
 輕毀下述其能攘外難佛廣示毀者之罪令
 知過必改不相惱亂非但持經者難滅亦乃
 欲毀者福生無毀無難彼此安樂曠濟無偏
 慈之至也從應起速迎當如敬佛述其結信
 者功德第四從說是下發益之文也一聞品
 益旋陀羅尼是初地位具普賢道是十地位
 二聞經益大眾歡喜是也歡喜如前說此中
 云何猶稱聲聞乃是經家存其本位耳又經
 家稱其是大乘聲聞以佛道聲令一切聞斯
 義彌顯也

妙法蓮華經文句卷第十下

妙法蓮華經文句卷第十下

校勘記

- 一 底本，明永樂北藏本。
- 一 二〇九頁中六行「化他」，南作「他化」。
- 一 二〇九頁中一〇行「佛受」，南作「受佛」。
- 一 二一一頁上一五行第一四字「太」，南、清作「大」。
- 一 二一二頁下一〇行第一〇字「住」，南作「任」。
- 一 二一三頁上一八行首字「未」，南、清作「生」。



妙法蓮華經文句卷第二

計四十一紙

冥

天台智者大師述

憍梵波提此翻牛呵無量壽稱牛王增一云牛跡昔五百世曾為牛王牛若食後恒事虛消餘報未夷嘆常嚼時人稱為牛呵昔五百鴈一鴈常得花果供於鴈王佛一夏受阿耨達王請五百比丘皆散馬麥而憍梵獨在天上尸利沙園受天王供養增一云樂在天上不樂人間者牛跡比丘第一樂在天上者是隨樂欲世界悉檀也供鴈王福所致者為人也避人笑者對治也天不笑者第一義也云又云人但觀形不知有德若笑羅漢即得罪避人笑故常居天上天知有德不笑其形故居天也佛滅度後迦葉集千大羅漢遺下座僧使追憍梵憍梵問佛及和尚答言皆滅即言佛出我出佛住我住佛滅我滅四道流注大迦葉所水說偈云大象既去象子隨世尊和尚既滅度我今在此復何為斯亦第一義也約教者住天圍是示善有牛嚼是示惡三藏意也以牛嚼身得道此示惡非惡也居天圍而嚼示善非善通教意示界內外善惡者別教意示善惡實相者圓教意本迹者本住四無所畏安住聖主如牛王第一義天迹示牛呵樂居天上也觀心者觀於心性中道之理安步平正其疾如風即牛王觀也離婆多亦云離越此翻星宿或室宿或假和合文殊問經稱常作聲父母從星辰乞子既其感獲因星作名雖得出家猶隨本字假和合者有人引釋論空其中宿見二鬼爭屍告其分判設依理在理俱不免害故隨實而答大鬼拔其手足

妙法蓮華經文句卷第二

第三紙

冥字

小鬼取屍補之食竟拭口而去其因煩惱不測誰身故言假和合常作聲者其疑此事若我本身眼見拔去若是他身復隨我行住疑惑猶豫逢人即問汝見我身不故言常作聲眾僧云此人易度語云汝身本是他遺體非已有也即得道也云增一云坐禪入定心不倒亂者離越比丘第一約教言析破五陰非我所有三藏意體遠五陰本非我有通意分別十法界五陰皆非已有別意達五陰非我有非他有見陰皆相即圓意本迹者本住日星宿三昧迹示此名觀心者觀心念佛見十方佛多如夜觀星云畢陵伽婆蹉此翻餘習五百世為婆羅門餘氣猶高過恒水咄小婢駐流恒神為之兩派神往訴佛佛憐憫即令手小婢莫瞋大眾笑之憺而更罵佛言本習如此實無高心增一云樹下苦坐不避風雨者婆蹉比丘第一約教者減慢無慢三藏意也即慢無慢通意也分別十法界高下別意也八自在我具足佛法圓意也本迹者本住常樂我淨八自在我微妙梵聲迹示慢心惡口耳觀心者觀塵言輒語歸第一義云薄拘羅者此翻善安或偉形或大肥盛或豚囊或楞節或賣性然而色貌端正故言善容也年一百六十歲無病無天有五不死報後母置教藥釜中水中魚食刀破皆不死昔持不殺戒故九十一劫命不中天昔施僧一訶梨勒果故身常無病能持一戒四戒莊嚴堅持不犯不避水火餘人雖持五戒多毀犯也云身樂寂靜常處閑居不樂眾中眼不樂玄黃等色耳不樂聞

世間之聲鼻不嗅世間香臭舌不嘗為人說一兩句語意常在禪定不散亂乃至舍利塔亦樂閉靜阿育王禮諸羅漢塔次至其塔而說偈言雖自練無明於世少利益供二十貝子增一云施一錢而貝子從塔飛出來著王足諸臣驚怪閉靜少欲乃至其塔猶有是力故增一云壽命極長終不中常樂閉居不處衆中薄拘羅第一約教者滅喧入真三藏寂靜即喧而真通寂靜離二邊入中別寂靜即邊而中圓寂靜本者本住大寂滅定長壽是常無病是樂不天是我寂靜是淨居此四德之本迹示六根寂靜耳觀心者心性中道即空即假即中常樂我淨觀也摩訶拘締羅此翻大勝舍利弗舅由來論勝姊姊子論則不勝知所懷者智寄辯尚爾何況出胎云云即棄家往南天竺讀十八經時人笑之累世難通一生非異喟然歎曰在家為姊所勝出路為他所輕誓讀不休無暇翦爪時人呼為長爪梵志學記還家問甥所在人云為佛弟子即大憍慢我甥八歲聲震五世彼沙門者有何道術誘我姊子徑往佛所思惟良久不得一法入心語佛言一切法不忍忍即安義此言一切法我皆能破使不得安故言一切法不忍佛問汝見是忍不此墮兩負處若我見忍前已云一切不忍若我見不忍無以勝佛即低頭得法眼淨身子扇佛聞言喜得阿羅漢果增一云得四辯才觸難能答拘締羅第一南方天王毗留匄又常來隨侍約教者外通四韋陀內通三藏三藏四辯也我無所得辯乃如是通教辯

也若名若義徧十法界別教辯也依於實相徧一切辯圓教辯也本者本住口密口輪不思議化大定大慧迹示大勝也觀心者觀心即空即定即假即慧以嚴其心云云難陀亦云放牛難陀此翻善歡喜亦翻欣樂淨飯王偈十萬釋出家即一人也有師言是律中踐難陀約教者專歡喜理無歡喜三藏意也即事歡喜是理歡喜是通教意也歡喜地即別教也歡喜住即圓教意也本者本住實際非喜非不喜迹名歡喜觀心者觀心與理相似相應故名歡喜觀也孫陀羅難陀孫陀羅此翻好愛亦端正難陀如前種姓如那律中說四月九日生短佛四指容儀提特與世殊異若入衆中不識者謂言佛來彌沙塞律云摩竭有裸形外道大聰明國人號為智者見者共身子論議結古善心生欲於佛法出家見難陀色貌殊偉歎云短小比丘智慧難既況堂堂者乎難陀即度出家婦即孫陀利極端正息不相離佛與阿難途行乞食到其門正共婦在高樓食即起迎佛婦言須君還乃共食耳白佛言轉輪王種云何自辱持鉢取飯佛即還尼俱類園語阿難令難陀送食來阿難宣佛旨令其送飯奉佛佛令剃頭握拳語剃者勿持刀臨閻浮提王頂佛偈不得止仍剃頭明日佛與五百比丘應請求住守寺意欲逃去佛令關房掃地開南北開掃此彼汗復懼佛歸即地走歸去於路值佛屏身隱樹樹迴外空佛見即喚將還問何故去即答昨與婦別待還入食憶婦去耳佛將遊天堂地獄云云故以婦

妙法華經文句卷第二 第五飛 頁字號
字標之約教者俗諦有法喜真諦無喜三藏教也即俗喜是真喜通教也從通法喜有俗法喜中法喜別教也即通喜具一切法喜圓教也本迹觀心如前云云富樓那翻滿願彌多羅翻慈尼女也父於滿江禱梵天求子正值江滿又夢七寶器盛滿中寶入母懷母懷子父願獲滿從諸遂願故言滿願母名彌多羅尼此翻慈行亦云知識四韋陀有此品其母誦之以此為名尼者女也通稱女為尼通稱男為那既是慈之所生故言慈子增一云我父名滿我母名慈諸梵行人呼我為滿慈子此從父母兩緣得名故云滿慈子是人善知內外經書靡所不知就知滿故復名滿增一云善能廣說分別義理滿願子最第二下文云於說法人中最為第一第一者說滿字也欲還本國利益佛言彼國弊惡汝云何答我當修忍若毀辱我我當自幸不得拳歐拳歐時自幸不得木杖杖時自幸不得刀刃刀刃時自幸離五陰毒器是為行忍滿故名滿七車喻經中說為大智舍利弗所稱歎一切梵行人皆當繫衣頂戴於汝若見汝者得大利益是為歡滿故名滿約教者殷勤析法所作已辦三藏願滿體達即空於法得證通教願滿法眼具足別教願滿住秘密藏圓教願滿本迹者本願久滿迹為說法第二示眾生知識也觀心者如止觀中人行理等善知識觀也須菩提此翻空生時家中倉庫篋篋器皿一切皆空問占者占者言吉因空而生字曰空生從依報器皿瑞空以名正報依正俱吉故言空生

也常修空行故言喜業若供養者得現報故言善
吉常樂遊止閑林石窟寂靜之處所修行業以空為
本常入空定住無諍三昧喜說空法有所宣辯皆分
別空將護眾生不令起礙嫌行即住嫌住即行佛切
利下率土輻湊爭前頂禮端坐石室念諸法空色非
佛乃至識非佛眼非佛乃至意非佛語然悟道佛告
蓮華比丘尼非汝前禮汝禮色身須菩提前見法身
約教者自有滅色空智生體色空智生從有智生空
智從空智生俗智從俗智生中智生即有智是圓
空智生而今是圓空智生也本者本佳實相法身迹
示見空而生也觀心者不在內外中間非自有是為
觀心法身也阿難此云歡喜或無染淨飯王太子
為金輪霸其宗社棄國捐王憂惱殆絕魔來誑之
汝子已死王哭云阿夷語既虛瑞相亦無驗復有天
來云汝子成佛王疑未決須臾信報昨夜天地大動
太子成佛王大歡喜白飯王奏云生見舉國欣欣因
名歡喜是為父母作字阿難端正人見皆悅佛使著
覆肩衣有一女人將兒詣井見阿難目視不暇不覺
以綆繫其兒頭中阿含云四眾若聞阿難所說若多
若少無不歡喜欲發問時先為聲咳大衆皆歡喜四
眾若觀其默行住坐臥指擗處分進止動轉皆歡喜
阿難四月八日佛成道日生侍佛得二十五年推此
佛年五十五阿難年二十五佛時求侍五百請為如
前說眾勸阿難阿難順從五百皆歡喜目連騰阿難
三願佛言預知譏嫌求不受故衣食欲自利益求出

入無時佛印而許佛言阿難勝過去侍過去侍聞說
乃解今佛未發言阿難已解如來意須是不須是皆
悉能知故以法付阿難如來歡喜四天王各奉佛鉢
佛累而按之合成一鉢四緣宛然而此鉢大重阿難
歡喜荷持無倦中阿含第七云阿難侍佛二十五
年所聞八十捷度皆誦不遺不重問一句念力歡
喜阿難隨佛入天人龍宮見天人龍女心無染著雖
未盡殘思而能不染一切天人龍神無不歡喜佛滅
度後在師子牀迦葉大衆讚曰面如淨滿月眼若青
蓮華佛法大海水流入阿難心自誓坐入涅槃住恐
離車有怨進恐闍王有怨於恒河中入風奮迅三昧
分身為四分一與天一與龍一毗舍離一阿闍世阿育
王禮阿難塔奉千萬兩金偈歎曰能攝持法身法燈
故法住念感佛智海故設上供養念持多所聞口出
微妙語世尊所讚歎天人之所愛增云知時明物
所至無疑所憶不忘多聞廣達堪任奉持阿難第
約教者歡喜阿難三藏也賢阿難通也典藏阿難別
也海阿難圓也本迹者本住非歡喜非不歡喜法身
如虛空智慧如雲雨能持能受迹為歡喜也觀心與
相似即空即假即中相應是觀心歡喜乃至真觀相
應云羅睺羅此言覆障住昔塞鼠穴又不看婆羅
門六日由是緣故言覆障太子求出家父王不許
殷勤不已王言若汝有子聽汝出家菩薩指指妃腹
卻後六年汝當生男在胎六年故言覆障具諦三藏
云羅睺本名脩羅能手障日月翻此應言障月佛言

我法如月此見障我不即出家世世障我我世世能
捨故言覆障佛出家後耶輸有娠諸釋咸瞋何因
有此欲治欲殺惡聲盈路寶女劬毗羅證之小差因
焚火坑發大誓願我若為非子母俱滅若具遺體天
當為證因抱子投坑坑變為池蓮華捧體及國人
始復不疑後佛還國耶輸令羅睺奉佛歡喜九羅云
以幼稚之年於大衆中徑持上佛耶輸以此息謗誘
由有子故言覆障祖王歡喜雖失其父而獲其子孫
為金輪吾亦何恨想其長大異神寶至而佛索令出
家父王不許耶輸將上高樓自連飛空乘取佛度出
家付舍利弗為弟子既出家已王位亦失故言覆障
羅睺以沙彌之年喜多妄語國王大臣婆羅門居士
來求見佛羅云吾云不在今無量人不得見佛是為
障他由是妄語佛即訶責行還使羅云洗足脚批
澡盆三覆三仰然後覆地命令注水羅睺云盆覆注
水不立佛言汝如覆盆於佛法中法水不立當實
語勿妄語也後時修道殷勤不獲以問佛佛言汝為
人說五陰未答言未當為他說說竟又問汝說十二
入未說十八界未說法是得道之門若欲得道當為
他說法因廣說法竟然後得道是為覆障既已得
道見愛皆除三界生盡故言覆障三界生盡願不能
牽故言覆障佛勅四大羅漢不得滅度待我法滅盡
由是住持于今未得入無餘涅槃故言覆障云約教
者折法道諦障四住三藏意也體法道諦障四住通
教也次第三智障五住別教也一心三智障五住圓

如法華經文句卷第一 第十卷 具字字

教也本迹者本住中道障塞二邊八種障障涅槃邊一種障障生死邊一種非障生死非障涅槃障無餘也觀心例前可解云云六結如是等眾所知識或言知祇是識或言聞名為知見形為識見形為知見心為識本者本為眾生作滿字知識迹為半字知識云云觀行知識如止觀多知識眾竟次列少知識眾者復有學無學二千人俱但舉位明數而不歎德呼此為少知識眾耳聖與凡絕交亦不分別多識少識特以希高慕遠者以多識引之藏名隱德退讓者以少識引之隨順眾生故有若干不可以多少之迹失其本學無學者三藏中十八種學人九種無學人通教五地皆名學六地名無學又通教九地名為學佛地為無學別圓中或就功用無功用或就具足未具足明學無學阿含云外道問佛羅漢更學不佛言羅漢不作惡法住於善法學其無學即名為學若爾學人亦稱無學學人齊其所斷不復更斷即是無學是為四句就五方便非學非無學便是五句約四教中例亦應兩四五二十句本迹者本法身大士居滿字學無學位眾生應以半字學無學人莊嚴雙樹也觀者正觀中道不緣二邊中間即是無學能如是觀是名為學若就觀門明數者觀色心具十法界十如界如互論即具二十舉迹故標本法迹即是本迹也次列尼眾者舊以此例前為三眾今不用若例前為多識少識二眾者又復無文義亦不可但是舉兩眾主何須苦名為大小多少耶先列波闍波提此

如法華經文句卷第一 第十卷 具字字

翻大愛道亦云憍曇彌此翻眾主尼者天竺女人通名也本住智度法門迹為千佛之母生育導師觀釋者中觀廣博名大無緣慈名愛中理虛通名道大即自行愛即化他如以愛故受生慈故涉有道即通自行化他也六千者數也觀門者觀六根清淨具千功德雖眼有八百耳千二百以多足少數滿六千表本法門亦是觀行意也羅睺羅母耶輸陀羅者以子標母此翻花色亦曰名聞或云無翻温良恭儉德齊太子然在家為菩薩之妻天人知識出家為尼眾之主位居無學豈是無名聞眾耶十二遊經出三羅睺是瞿夷子涅槃及法華皆云是耶輸子二義云何通或可彼經舉大母此處舉所生釋論瞿毗陀是寶女不孕即是瞿夷此翻明女故知定是耶輸子也本迹者妻則齊也豈有博地為太子妻故知本住寂定微妙法喜迹為佛妻悲花云寶藏佛所誓願為妻耳觀空無漏法喜即以鹿野表妻觀假道種智法喜即以耶輸表妻觀中法喜即以瞿夷表妻上當分明本迹觀心今更摠論顯善權曲巧明觀行精微夫首楞嚴種種示現稱遍根性靡所不為今且近論託迹玉宮降神聖后法身菩薩皆輔佛行化散影餘家若三十二瑞金姿誕應諸大士各各出生或空室兩寶寄辯通夢若皇皇太子捨國捐王踰城學道諸大士悉從師請業才藝兼通為彼宗匠若法輪初啟甘露門開聞諸大士化緣未熟示同不受分庭抗禮崇

法華經文句卷第一 第十卷 具字字

我道真能化所化全生如乳若所化緣熟則素絲易染池花早開華凡成聖轉乳成酪師宗為佛上首弟子或智慧神通辯才三昧各各第一共輔法王更度未度重熟已熟於方等座席間菩薩不可思議功德恥小慕大恥小則嗚呼自責失於如來無量知見慕大則不知當云何得佛無上慧如轉酪為生酥次間般若摩訶衍門初歷色心終于種智含挾小大出內取與或共或別或偏或圓奉命領知而無希取雖未頓捨已漸通泰如轉生酥為熟酥次聞法華會天性定父子授記剎付大乘廢三歸一如餘四味同一醍醐不令一人獨得滅度皆以如來滅度而滅度之法王法臣大事出世巧用方便初用半字法破二十五有之繫仍成四枯雙樹利益眾生次用半滿法破二乘之獨善成菩薩之廣大成四榮雙樹利益聖人後用常住滿字破二邊之前後成非枯非榮佛秘密藏究竟利益主將之功畢大誓之願滿故身子自連於法華而息化聖主贖命斯亦不久云云如我本誓願今者已滿足如來不久當入涅槃唱滅之言起自於此二萬燈明迦葉佛等皆於法華究竟今以師弟皆於此經發迹內秘菩薩道外現作聲聞我實成佛已來無量億劫以此推之諸大羅漢從法身地俯影隨緣迹隨萬本為學無學作男作女示道示俗首楞嚴力靡所不現方便善權為若此云云慈明觀者上師弟施化法身所為若不作觀方便於行人無益如貧數寶似盲執燭然心數甚多且約善數如弟子者眾但

舉十人耳十善數者謂信進念定慧喜捨捨覺戒此十數輔心王能改惡就善革凡成聖辦一切法門但以十心為本如十弟子輔佛行化共執眾生立于佛法也信數對那律天眼第一眼是五根首如諸方以東為上信於諸數初入佛法也進數對迦葉頭陀第一抖擻勤苦對進數也念數對波離持律第一念力牢強憶持不忘也定數對目連神通第一慧數對身子智慧第一皆可解喜數對阿難多聞第一多聞分別樂樂即喜數也捨數對須達論體窮微盡理除邪顯正如猗離惡得善放苦入樂也捨數對善吉解空第一若住空平等與捨數相應覺數對富樓那說法第一覺是語本本立則辯說無窮戒數對羅云持戒第二可解十數扶心王能成觀行於一念中深入善法三寶具足王即佛寶數即僧寶所緣實際無王無數即法寶若入實際王數之功力用足矣又取通大地十數與心王俱起入善入惡偏通一切謂想欲觸慧念思解脫憶定受也相對富樓那想得假名其人善達假名辯才無滯欲對迦葉迦葉無世間欲而欲於無為觸對須延觸入二事更相涉入須延善論義能窮往復慧即身子可解念對波離念持律之上也思對羅云思是行陰此人實行持戒也解脫對善吉脫名無累此人解空於有得脫憶對那律憶動發取境修天眼易三摩提定數對目連可解受對阿難多聞領持無謬也十人各備眾德為引專門宣示佛道隨眾生欲欲慧者師身

子乃至欲多聞者師阿難共輔法王各掌一職今觀心亦如是二心中皆具王數為成觀故王數相扶而取開悟或於想數入道或於欲數入道隨所宜者心王心數而共攻之化取塵勞諸心而作佛事作此觀未悟觀行如乳若發無漏觀行如酪若破塵沙如生熟蘇若破無明觀如醍醐至醍醐時王數皆畢心法數不行故名行般若波羅蜜普賢觀云觀心無心法不住法我心自空罪福無主即是無心無數名為正觀是心數塵勞若不盡者觀則不訖故經言眾生不度我不成正覺即此意也第二列菩薩眾者釋論云菩薩為出家在家四眾攝何故別列答有菩薩墮四眾中有四眾不情菩薩中為其不發心作佛故今別列同發心求作佛者名菩薩眾文為六一氣類二大數三階位四歎德五列名六結句一氣類者即是菩薩摩訶薩也若具存應言菩提薩埵摩訶薩埵什師嫌煩略提埵二字菩提此言道理薩埵此言心摩訶此言大此諸人等皆求廣博大道又成熟眾生故道心大道心之氣類也菩薩多種謂偏通別圓如釋論引迦旃延子明六度齊限而滿者此欲調血眾生為乳也若大品明有菩薩發心與薩婆若相應者此欲調乳入酪也若大品明有菩薩發心遊戲神通淨佛國土又如淨名中得不思議解脫者皆能變身登座而復受屈被訶者此欲調酪為生熟蘇也若大品明有菩薩發心即坐道樹成正覺轉法輪度眾生者此是調蘇為醍醐也

故下文云菩薩聞是法疑網皆已除又云若菩薩不聞法華非善行菩薩道若聞此經即善行菩薩道又涅槃云菩薩不聞涅槃常有希望若聞涅槃希望都息故略有四種也本迹者本地難測或居覺或齊法王如善財入法界見文殊色像無邊法門深遠本鄰諸佛迹輔釋迦為菩薩普現色身三昧力散影垂容以口輪不可思議化隨宜廣說可以意知不可以言辯也所以迹引四味歸乎一實譬如鏡磁器諸淳璞成醍醐已一期化息然其本地究竟成就豈是今日始入大乘亦非寂滅道場高山先照若頓若漸皆迹所為耳觀解者中道觀心雙照二諦名大通至菩提果名道破五住塵勞名成眾生云八萬人者數也餘經集眾甚多此經何少或是語其大數或譬王論密事不可率土同謀云約觀心者觀一善心具十法界十界交互具百法界千性相等十善即萬法約八正道即八萬法門也云皆於阿耨三菩提不退轉者明位也阿耨此云無上道如境妙中說位如位妙中說不退轉者約位行念論不退應四種分別不生三惡道位不退不生邊地諸根完具不受女身即行不退常識宿命即念不退具此名阿鞞跋致地三藏義也若六心已前輕毛菩薩信根未立其位猶退七心已上從初地至六地不退為凡夫二乘名位不退雖正使已盡而未能徧修萬行其行猶退至七地名行不退而猶起二乘念故有念退至八地道觀雙流入法流水名念不退此名阿鞞跋致地

此乃三乘共十地之義耳地師云十住是證不退十行是位不退十地尚是行不退十地是念不退此是別教義不會此經今所用璣珞云初地三觀現前心心寂滅自然流入此亦別教不退今亦不用者華嚴明初住得如來一身無量身具三不退此圓教不退此是一實事今用此判位也本迹者本地寂滅尚非十地況是初住尚非初住不退況復別通別通之位宜釋餘經列舉圓教之位正在今經諸經論師既不識迹安能知本所歎既謬毀在其中還成增減兩謬何謂歎德觀心者三觀即三不退又一心三觀即一心三不退舊云比目得陀羅尼去始是歎德今取不退轉即具兩意成上屬明位起後屬歎德舊云歎德作十二句分為四意初三句歎現德次三句歎往行次四句歎內體後兩句歎外名四意不同而德居於初故稱歎德歎現又兩初一句歎自行後二句歎化他歎行為三初句歎行本本從諸佛得般若次句歎本行行福德也既有福德能資於慧次句為佛所歎體又三初慈悲歎應身中間兩句歎心慧報身後一句歎法身歎名為二初句歎名普聞次句歎能度眾生此之分文極有眉眼嚴論宗體殊無趣向若歎通教通教無三身又非入佛慧名不普聞種種義不成若歎別教別教初地已過二乘云何七地更起聲聞支佛之念若歎圓教不應言七地已下無不退之德進退無當竟知歎誰是所不用今以十三句作橫豎消文一豎約十地義便二

橫約初住義便不退轉者成前即是明位起後即是歎德以對初地初地名歡喜喜其不退愜三邊入中道獲三不退故知歎初歡喜地也皆得陀羅尼歎二地名離垢亦名離離離諸惡違持眾善即陀羅尼義故知歎離垢地也樂說辯才歎三地地名明地內智明外說辯欲知智在說說有種種樂說最勝故知歎第三明地也轉不退轉法輪歎四地名能破能破闇又能焦炷轉法輪自害已惑如焦炷破他迷如除闇故知歎第四能破地也供養百千諸佛歎五地名難勝地此地得深禪定用神通力難勝難及於一念頃徧至十方供養諸佛故知歎第五地也於諸佛所植眾德本歎六地名現前由得禪能供養諸佛福資種種智現前智是德本如植種於地故知歎第六地也常為諸佛之所稱歎歎第七速行地此地二智方便出過一切廣修利益稱會佛心故知歎第七地以慈修身歎第八不動地正智不動不出三界但以慈薰身應入五道薰口為說法薰心為設方便正法華具薰三業故知歎第八地也善入佛慧歎第九地名善慧深入實際妙徹本源此名義最合故知歎第九地通達大智歎第十地名法雲法身如虛空禪定如大雲智慧如大雨善入佛法名慧巧用佛法名智互舉耳到於彼岸歎十地內德到三諦之彼岸因中說果又到在不久也名稱普聞歎十地外德由內德深廣致令聲名普聞內外相稱若開等覺位者

此二句擬之能度百千眾生者餘地度人或一界至九界不名能度十地勝前故稱能度諸地悉具眾功德而今出沒釋者為人情好異故依十地名便故又豎義易解故作此一途消文耳次橫歎者直約初住說之餘位位例可解初發心住一發一切發出過二邊革凡超聖入中道其心心寂滅念念流入薩婆若海故言得不退轉初住遮離取相無知無明等障持達般若解脫法身等德故言得陀羅尼十信似解尚能以妙音徧滿三千界何況初住具解口密功德故言樂說辯才初住能分身百世界作佛論其實處無量無邊以能作佛說法教化故言能轉不退法輪初住得不思議神力徧能承事法界諸佛故言供養百千諸佛初住得實相本能植眾德也初住開佛知見知見已法與諸佛同故為佛之所稱歎初住無緣慈普現色身徧應法界故言以慈修身初住入秘密藏故言善入佛慧初住一心三智無能障礙故云通達大智初住事理分究竟故言到於彼岸初住圓德真實與名相稱故言名稱普聞諸佛世界初住能為十法界而作依止安立救護故言能度百千眾生初住更有無量無邊不可思議種種功德略言十三句耳二住去乃至等覺亦復如是故大品云初阿字門具四十一字功德後茶亦具諸字功德中間亦爾字等語等功德亦等問此中歎斷惑德三藏不斷惑可不被歎聲聞尚被歎迹為通列何不歎德答通歎於迹乃有此義今經正明

圓人不歎方便耳問云何諸句功德皆歎初住耶答
日餘位亦如是獨初住舊云八地有諸功德不以
為疑今圓歎初住何德不攝初住尚爾何況後位耶
法華論云上支下支門揔相相應知初得不退
轉一句是揔此不退有十種示現聞法不退轉即是
陀羅尼樂說不退轉即是樂說辯才說不退轉即是
是轉不退法輪依善知識不退轉即是供養百千諸
佛植眾德本斷疑不退轉即是為諸佛稱歎入事
不退轉即是慈修身入一切智如實境不退轉
即是善入佛慧依我空法空不退轉即是通達大
智入如實境不退轉即是到於彼岸應作所作不
退轉即是度百千眾生故初揔句即是上支次諸
別句即是下支記中橫歎初住德即與此意同也論
云二者攝取事門者示現諸菩薩住何等清淨地
中因何等方便何等境界何等應作所作故若從
此義作豎歎菩薩德亦無妨觀心解歎德者不退
轉如前說陀羅尼者空觀是旋陀羅尼假觀是百
千旋陀羅尼中觀是法音方便陀羅尼又空觀觀
心但有名字即聞持陀羅尼假觀觀心無量心心
心數法皆是法門即行持陀羅尼中觀觀心心即
實相即是義持陀羅尼假觀觀心具十法界法即
法無礙辯中觀觀心十法界皆入實相即義無礙
辯空觀觀心十法界但有名字語言即辭無礙辯
觀一心即三心三心即一心一切界旋轉無礙
即樂說無礙辯空觀是轉位不退法輪假觀是轉

行不退法輪中觀是轉念不退法輪供養佛者祇
是隨順佛語今順佛教修三觀心即是供養佛為破
五住得解脫故即供養法三諦理和即供養僧又眾
行心資觀智心即供養佛觀智心開發境界即供
養法境智心和即供養僧實相心是觀智心本觀
智心是眾行心本得本種植則立故言植眾德本
觀智心冥於境界境界印於觀智智有所照常與
境合即是為佛所歎空觀為法緣慈所薰假觀為
眾緣慈所薰中觀為無緣慈所薰空觀入通佛
慧假觀入別佛慧中觀入圓佛慧空觀到一切智彼
岸假觀到道種智彼岸中觀到一切種智彼岸空觀
聞於真諦假觀聞於俗諦中觀普聞中道第一義
諦亦普聞三諦空觀度四住百千眾生假觀度塵沙
百千眾生中觀度無明百千眾生一心三觀有無量
德歎不能盡止略諺耳五列名者大士大名或從法
門或從行德或從本願雖是一名備無量義今依經
依觀銷十八菩薩名文殊師利此云妙德大經云了
了見佛性猶如妙德等無行經云滿殊尸利普超云
濡首思益云雖說諸法而不起法相不起非法相故
名妙德悲花云願我行菩薩道所化眾生皆於十
方先成正覺令我天眼悉皆見之我之國土皆一生
菩薩悉令我勸發道心我行菩薩道無有齊限
寶藏佛言汝作功德甚深甚深願取妙土今故號
汝名文殊師利在北方歡喜世界作佛號歡喜藏
摩尼寶積佛今猶現在聞名滅四重罪為菩薩像

影嚮釋迦耳觀心性理三德秘密不縱不橫故名妙
德觀世音者天竺云婆婁吉低稅思益云若眾生見
者即時畢定得於菩提稱名者得免眾苦故名觀
音悲花云若有眾生受苦稱我名者念我者為我
天目天眼所見聞不得免苦不取正覺寶藏佛云汝
觀一切眾生大悲心今當字汝為觀世音此下文
自釋名云觀心釋者三智名觀三諦名世三觀是語
本故名音得大勢者思益云我投足之處震動三千
大千世界及魔宮殿故名大勢至悲花云願我世界
如觀世音等無有異寶藏佛言由汝願取大千世界
故今當字汝為大勢至觀心釋者三止為足投三諦
地動十法界一切見愛所住之處皆悉傾動云不休
息者思益云恒河沙劫為一日夜是三十日為月十
二月為歲過百千萬億劫得值一佛如是值恒河沙
佛行諸梵行修習功德然後受記心不休息故名不
休息觀心者觀空不住空出假不住假而入中不住
中雙照三諦名不休息寶掌者普超云被上德鏡乃
至佛無能沮敗今釋大乘若於夢中不志三乘常以
實心諸通慧心為人講宣於珍寶心無所貪惜故名
寶掌觀心者不思議三諦名之為寶一心三觀名
之為掌以此觀掌執此諦寶自利利他故云寶掌
藥王者悲花云願賢劫二十四佛初成道我皆供養
諸佛入滅我皆起塔劫盡苦惱我皆救護刀兵疫疫作
大醫王然後作佛寶藏佛言今當字汝為火淨藥王
在後作佛即樓至如來觀心釋云此下欠釋七菩薩

跋陀婆羅者此言善守亦善守思益云若眾生聞
 名者畢定得三菩提故名善守觀解者中道正觀
 於諸善中最高首故言善守彌勒者此云慈氏
 思益云若眾生見者即得慈心三昧故名慈氏賢惠
 云國王見象師調象即慈心生從是得名慈氏悲花
 云發願於刀火劫中擁護眾生令觀解者中道正觀
 即是無緣大慈慈善根力令諸心數皆入同體大慈
 法中雖諸不善故稱慈氏又云慈乃姓也名阿逸多
 此翻無勝下文云此下欠釋實積導師者思益云於
 隨邪道眾生大悲心令入正道不求恩報故名導
 師觀解者三觀妙智導一切行不墜三邊皆入正觀
 故名導師未釋者俟後道註云六如是下是結句也
 第三列雜眾者善云凡夫眾中有耶魯善云俗眾此
 中有道善云天人眾中有龍鬼皆不便令呼為雜
 眾意則兼矣所謂五道三界八番是故言雜方等經
 亦列地獄中陰經亦化無色此皆隨機適現不可一
 例作並復不可定其次第舊云人是土主讓諸客在
 前無量義經祇與此經同席明國王國臣國士國女
 不論實主相讓出經家趣列在文或有別意未詳今
 觀此文有八番先標帝釋次列四王前龍後鳥鬼神
 重出為此義故呼為雜眾不可言其次第又雜眾者
 此中有得道未得道者雜果報與形服雜故言雜其
 中得二乘道者無漏智與無明煩惱雜故言雜其中
 得菩薩道者溫和與眾機雜故言雜其中得佛道者
 一法具一切法故言雜雜義如是豈可以凡夫形俗

判之復不可以五道人天等判之故言雜也此是約
 教釋云釋提桓因因陀羅或云旃提羅此翻能作
 切利天主切利此翻三十三四面各八城就喜見城合
 三十三共居須彌頂須彌此翻安明四寶所成高廣
 三百三十六萬里此是欲天之主故前列雜阿含四十
 云有一比丘問佛何故名釋提桓因答本為人時行於
 頓施堪能作主故名釋提桓因何故名富蘭陀羅為
 人時數數行施故何故名摩伽婆本為人時名故何
 故名娑婆羅本為人時此衣布施故何故名憍尸迦
 本為人時姓故何故名舍脂鉢低舍脂是婦鉢低是
 夫何故名千眼本為人時聰明於一時坐思千種義
 觀察稱量故名千眼何故名提利為三十二天主
 瓔珞第三云天帝名拘翼教門者阿含中帝釋是
 阿那含般若明十方難問般若者皆名釋提桓因別
 圓中明釋提桓因得首楞嚴三昧內證不同過賢劫
 二千二十四劫作佛號無著世尊云本迹者十住行向
 即三十四地為一等覺為二妙覺為主同棲第一義
 天共服實相甘露即本也居須彌頂迹也觀心解者
 自行十善勸他隨喜此三十善皆空皆假皆中即是
 三十三觀門也名月等三天子是內臣如卿相或云是
 三光天子耳名月是寶吉祥月天子大勢至應作普
 香是明星天子虛空藏應作寶光是寶意日天子觀
 世音應作此即本迹釋也觀解者三觀即三智三智
 即三光從三諦生三智諦即天智即子云四大天王
 者帝釋外臣如武將也居四寶山高半須彌廣二十

四萬里東提頭頹此云持國亦言安民居黃金山
 領三鬼提頭婆富單那南毗留勒又云增長亦云免
 離居瑠璃山領二鬼薛荔多鳩槃荼西毗留博又此
 云非好報亦云惡眼亦云雜語居白銀山領二鬼毒
 龍毗舍闍北毗沙門此云種種聞亦云多聞居水精
 山領二鬼羅刹夜叉各領二鬼不令惱人故稱護世本
 迹者本為常樂我淨四王護持佛法不令外人取其
 枝葉所截破壞常主護東方常無常樹樂王護南
 方樂無樂雙樹我王護西方我無我雙樹淨王護北
 方淨不淨雙樹枝幹論常華論於我果論於樂茂
 葉論淨護此華果常能利益一切眾生故迹為四王
 而護世也觀解者觀四諦智即是四王三諦下除愛
 見二惑即是護八愛見也次切利上有醜摩此翻善
 時大論云妙善去切利三百三十六萬里善時上有兜
 率陀此翻妙足去醜摩如地遠而不列者略耳何者
 下天鉢上天著樂尚知來集況不著不鉢而不來耶
 自在即第五大自在即第六自化五欲他化五欲
 有人言是色界頂大自在在此不應起至彼也本迹者
 此兩天本住自在自在在玉等定迹為兩天目觀心者
 入空是自在觀入中是大自在觀云次列色界天等
 婆此翻忍其土眾生安於十惡不肯出離從人名土
 故稱為忍忍花經云云何名娑婆是諸眾生忍受三
 毒及諸煩惱故名忍土亦名雜雜九道共居云梵者
 此翻離欲除下地繫上外色界故名離欲亦稱高淨
 尸棄者此翻為頂髻又外國喚火為樹提尸棄此王

本修火光定破欲界惑從德名然經釋梵王復舉尸棄似如兩人依釋論正以尸棄為王今經舉位顯名恐目一人耳住禪中間內有覺觀外有言說得主領為王單修禪為梵民加四無量心為王也初禪有梵眾梵輔大梵今舉王攝諸也光明者二禪也此有少光無量光光音三禪有少淨無量淨遍淨四禪有密身亦無挂礙無量密亦受福密果亦廣果無相密亦無想又有五那含不煩不熱善見善現色究竟亦自在即摩醯首羅經文存略不具出但等等此諸天也例有教門本迹觀心自思之次列八龍者難陀名歡喜跋耆喜兄弟常護摩竭提兩澤以時國無饑年瓶沙王年為一會百姓聞皆歡喜從此得名即目連所降者也居海中本迹解者本住歡喜地居海間觀解者三觀即中道生法喜也娑伽羅從居海受名華嚴所稱舊因國得名本住智度大海迹處澹演和修吉此云多頭亦云寶稱居於水中本住普現色身三昧迹亦多頭也觀者入假之觀分別無量法門也云德又如此云現毒亦云多舌或云兩舌本住樂說無礙辯法門迹亦多舌阿那婆達多從池得名此云無熱無熱池長阿含十八云雪山頂有池名阿耨達池中有五柱堂從池為名龍王常處其中閣浮提諸龍有三惠一熱風熱沙著身燒皮肉及骨髓以為苦惱二惡風暴起吹其宮殿失寶飾衣等龍身自現以為苦惱三諸龍娛樂時金翅鳥入宮搏撮始生龍子食之怖懼執惱此池無三惠若鳥起心欲

往即便命終故名無熱惱池也本住清涼常樂我淨迹處涼池觀者三觀妙慧淨五住之煩嘆免三死之熱沙云摩那斯此云大身或大意大力等修羅排海淹喜見城此龍縈身以渴海水本住無邊身法門迹為大體觀者中道正觀其性廣博漚鉢羅此云魚色蓮華池龍依住從池得名本住法華三昧迹居此池觀者三觀即是修因即蓮華也正法念經云龍為諸天保境修羅與兵前與龍鬪故知為天所管也次列四緊那羅亦云具陀羅此云疑神似人而有一角故號人非人天帝法樂神居十寶山身有異相即上奏樂佛時說法諸天弦歌般遮于瑟而頌法門舊云法緊奏四諦妙緊奏十二因緣大緊奏六度持緊摠奏前三今言奏四教法門也本住不可思議不起滅定安禪合掌以千萬偈讚諸法王迹寄弦管歌詠十力觀者觀音聲即空即假即中隨順三諦即是讚佛也四乾闥婆此云嗅香以香為食亦云香陰其身出香此是天帝俗樂之神也樂者幢倒伎也樂音者鼓節弦管也美者幢倒中勝品者美音者弦管中勝者也阿修羅者此云無酒四天下採花醞於大海魚龍業力其味不變願如誓斷故言無酒神亦云不端彌天安師云質諒質諒直信也此神詣曲不與名相稱有二種鬼道攝者居大海邊畜生道攝者居大海底婆稚者此云被縛或云五處被縛或云五惡物繫頸不得脫故云被縛亦有縛為帝釋所縛本能五繫繫魔外道迹為此像耳正法華云最勝觀者

以三觀智縛五住惑入實際中住羅騫狀此云廣肩脚亦云惡陰涌海水者正本云寶錦本住權實二智慈荷衆生故迹為廣肩脚觀者三觀能鼓覆五住生死大海也毗摩質多此云淨心亦云種種疑波海水出聲名毗摩質多即舍脂父也觀佛三昧云光音天生此地地使有欲入海洗不淨墮泥變為卵八千歲生一女千頭少二十四手此女戲于水水精入身八千歲生一男二十四頭千手少一海水波音名為毗摩質多索乾闥婆女生舍脂帝釋其力令其父居七寶殿納為妻後讒其父遂交兵脚波海水手攻喜見帝釋以般若呪力不能為害正本云燕居本者色心本淨迹為此名觀者正觀中道即是淨心羅睺羅此云障持障持日月者也是畜生種身長八萬四千由旬廣千由旬寶珠嚴身觀天女天園林若天下人孝養父母供養沙門者諸天有威力上空兩刀若不爾諸天入宮不出又日放光照其眼不能得見舉手掌障日世人咸言日蝕怪險種種邪說掩月亦如是或作大聲世人言天獸吼儉亂王衰種種邪說怖日月時倍大其身氣呵日月日月光來訴佛佛告羅睺莫吞日月羅睺支節戰動身流白汗即放日月日月力衆生力佛力衆因緣故不能為害昔有婆羅門聰明廣施四千車載食於曠野施有一佛塔惡人所燒即以四千車載水滅火救塔歡喜發願願得大身欲界第一既無正信好鬪愛戰喜施放生光明城作羅睺羅修羅主也正本云吸氣本觀云次列四

法華經文句卷第一 第七法 異字号
 迦樓羅此金翅翅翮金色居四天下大樹上兩翅
 相去三百三十六萬里有言壯子呼為鵬鵬行眾
 鳥莫不亦稱為鳳皇私謂鳳不踐生草噉竹實棲
 乳桐金翅龍云何是類大威德者威勝羣羣又
 威備諸龍也正本云具足大身者大羣輩也大滿者
 龍恒充滿已意也如意者頸有此珠也正本云不可
 動迦樓鳥有神力雄化為天子雌變為天女化已住
 處有寶宮亦有百味而報須食龍胎龍胎不能噉
 三卵能噉二溼能噉三化能噉四觀佛三昧經云正
 音迦樓一日山東噉龍王五百小龍三方亦爾周而
 復始壽八千年臨終失執欲噉龍子龍母噉之不
 得食即噴從金剛山透海穿地輪過不能過風輪風
 彈之從故孔湧到金剛山如是七返還山頂命終肉
 裂火起將燒寶山難陀兩滅之內爛心衝風輪亦
 七返還山上成如意珠龍得之即為王人王亦感此
 珠者也次列人者耆提希母也翻思惟頻婆娑羅此
 翻摸實父也阿闍世者未生怨或呼為婆留支此云
 無指內人將護呼為善見善見之名本也無指之稱
 表迹大經云阿闍名不生世者名怨以不生佛性故
 則煩惱怨生煩惱怨生故不見佛性不生煩惱即見
 佛性又阿闍者名不生世名世法以世八法所不汙故
 故名阿闍世此是本義也普超經云阿闍世從文
 殊懺悔得柔順忍命終入寶陀羅地獄即入即出生
 上方佛去得無生忍彌勒出時復來此界名不動善
 薩後當作佛號淨界如來其迹既爾本豈可量說

法華時預淨淨眾至涅槃時引逆罪者何異迦葉
 於法華受記於涅槃不堪付囑不可迷迹而惑其本
 也觀解者貪愛母無明又害此故稱逆逆即順也行
 於非道通達佛道問佛在人中說法列人眾何少答
 文略不載人實不少云及諸小王轉輪聖王等無
 量義中列四輪王國王國國民士女其眾則廣問
 天人龍鬼皆見佛聞法地獄一道無色一界何意不
 列答此義今當辨夫諸道并沈由戒有持毀見佛不
 見佛由乘有緩急然持戒有麤細故報有優劣持
 乘有小大見佛有權實且略判戒乘各為三品依涅
 槃句開為四句釋之其義則顯一戒乘俱急三戒
 緩乘急三戒急乘緩四戒乘俱緩若通論戒乘一切
 善法一切觀慧皆得稱戒亦皆是乘人天五乘即是其
 義道共等戒悉是通意也今就別判三歸五戒十善
 八齋出家律儀乃至定共能防身口遮惡道果得人
 天報者名之為戒若聞經生解觀智推尋四諦十二
 緣六度生滅無生滅等智能破煩惱運出三界者名
 之為乘故大品云有相之善不動不出無相之善能
 動能出即此義也若戒乘俱急者持下品戒戒急報
 在人中持小乘乘急以人中身於三藏教時見佛聞
 法持中乘乘急以人報身於通教大乘乃至帶方便
 諸大乘經時見佛聞法持上乘乘急以人報身於華
 嚴法華等教及諸教中圓見佛聞法預列為同聞
 眾者是也若持中品戒急報在欲界天持小乘乘
 急以欲界天身於三藏時見佛聞法餘如上說若持上

法華經文句卷第一 第七法 異字号
 品戒急如修禪定報在色無色天等持小乘乘急以
 色無色天身於三藏中見佛聞法餘如上說釋第一
 句竟若戒緩乘急者三品戒皆緩報在三途持小乘
 乘急以三途身於三藏中見佛聞法餘如上說釋第
 二句竟若戒急乘緩者三戒急故受欲界人天及色
 無色天身三乘緩故佛雖出世說三乘法愛著樂報
 耽著五欲不見佛不聞法舍衛三億家及諸不見聞
 者三界著樂諸天等是也釋第三句竟若戒乘俱緩
 者受三途報不見佛不聞法也釋第四句竟此文不
 列地獄者以其戒緩苦重報隔上乘又緩不能於法
 華見佛聞法餘經有列者餘乘急耳又不列無色天
 者上戒急故受天身著定味上乘緩故不能於法華
 見佛聞法餘經有列者有餘乘急耳若得此意二勤
 天龍八部皆識本緣緣急來不來義悉可解廣釋如
 淨名疏又識權者引實本迹義轉明將此勘已觀行
 三世因果朗然可識各禮佛足者總結眾集也爾時
 世尊下訖品名別序文為五一眾集二現瑞三疑念
 四發問五答問光宅通順生起由眾集故現瑞乃至
 由問故答答由於問乃至瑞由眾集此乃翻覆緣起
 鈎鎖相連序於正意竟自未顯直是因緣一釋尚自
 不明況三三四緣了無趣向今明五序序正中四一
 集眾敘人一現瑞敘理一疑念敘行一問答敘教一此
 則因緣釋也約教者此序序正非三藏非通非別乃
 是序於圓正耳約本迹者若以序序壽量中本地
 四一者此義自可知不復記觀心可解云就眾集又

二初眾集威儀次眾集供養法華論自此為威儀如法住四眾者舊云出家在家各二合為四眾此名局意不周今約一眾更開為四謂發起眾當機眾影嚮眾結緣眾發起者權謀智靈知機知時擊揚發動成辦利益如大象躡樹使象子得飽所謂發起令集發起瑞相乃至發起問答等皆名發起眾當機者宿植德本緣合時熟如癰欲潰不起于座間即得道此名當機眾影嚮者古往諸佛法身菩薩隱其圓極匡輔法王如眾星遠月雖無為作而有巨益此名影嚮眾結緣者力無引導擊動之能德非伏物鎮嚴之用而過去根淺覆漏汙雜三慧不生現世雖見佛聞法無四悉檀益但作未來得度因緣此名結緣眾比丘眾既爾餘三眾亦然合十六眾類如大通智勝佛時王子覆講即彼時發起眾聞法得道即彼時當機眾聞法未度而世世相值于人有住聲聞地者即彼時結緣眾彼佛世時尚有四十六眾今佛道同寧得無耶此是圓教十六眾約三教亦例可知本迹可解觀心者研境作觀在名字觀行位中即成結緣眾入相似位即成當機眾入分真位即成發起影嚮眾云圓遠者佛初出世人未知法淨居天下化為人像到已右旋旋已敬禮禮已卻坐聽法因於天敬人以為指此因緣解也圓遠者行旋威儀也表四門機動俱見圓理以圓對偏例有四義即教門解也又佛身周而相好莊嚴四旋瞻仰增念佛定即觀心解也若觀佛色身得見法身即本迹解供養者通

三業皆是供養別論單謹虔禮名恭敬至念專注名尊重發言稱美名讚歎施其依報名供養此中文略具辯應如無量義經廣說天廚天香天鉢器等即是供養大莊嚴菩薩及八萬大士合掌叉手即是恭敬一心瞻仰即是尊重說七言偈即是讚歎論眾集指彼文者彼經眾集說法竟儼然不散即彼座席仍說法華故知三業供養不得有異用彼廣釋此略於義無咎從為諸菩薩說大乘經下訖以佛舍利起七寶塔是現相序瑞師明七瑞此土開六他土摠一光宅此彼各六瑞此六者動則說法度人靜則入定觀理動靜為一雙上天兩花下地六種動上下為一雙大眾內懷歡喜如來外放光明內外為一雙今謂事文起盡如光宅若取名義便易表報之意並自未彰今明智定因果感應為三雙智則指一說多定則諦緣義處因則四位天花果則六處地動感則大乘機發應則圓毫照之此六皆稱瑞相者文云今相如本瑞瑞祇是相耳人情分別以密報為瑞奇異為相何所報妙理玄蹟說之至難人情悠悠不能尊重先以異相駭變常情常情既變而生欲渴故以異釋相以報釋瑞略明六瑞表報十妙感應妙中已說今更道說法瑞表報說法妙智妙入定瑞表報行妙雨花瑞表報位妙地動瑞表報境妙乘妙眾喜瑞表報眷屬妙利益妙放光瑞表報感應妙神通妙是故六種俱名現相序說大乘經者善戒經有七大一法大謂十二部毗佛略也二心大謂求於菩提也三解大謂解

菩薩藏也四淨大謂見道淨心五莊嚴大謂福德智慧也六時大謂三僧祇行也七具足大謂以相好自嚴得菩提也六是因大七是果大因大果合為大乘經也今將十妙義揀經應可解生師云無相空理大乘之本封三來久頓說無三不能取信故說無相為法華序觀師意同若爾般若淨名皆應是序何獨無量義耶彼釋云如此由五時故後教得起更問若爾無量義與諸經皆通途相生非關別序基師云空理無形故云無量序意同前難亦如是印師云無相善有成佛義故言無量又云彼經不說有三無三有異大品非法華所指指者不來秦地謂此經是宋元嘉三年慧表比丘於南海郡朝廷寺遇曇摩耶舍受此本環武當山永明三年始傳於世經既已來豈可送還天竺光宅云無量義以萬善同歸能成佛道法華正明無二無三破三與一為異故即為序若言萬善同歸三何不同歸二三若歸序正不異若言破三破三何不破萬破二破三則無二無三既其破萬是則無序取經互舉意為異者不成異也異意不顯序義亦不成也劉虬注云無相為本無相一法含義不背若含義不背即是有相何謂無相尋諸師各偏一種若言有相之善有成佛義此三藏意耳若言無相之善有成佛義此通教意耳若言含法不背此別教意耳並他經所明皆非序法華意耳若法華論列十七種皆法華之異名無量義者即法華之一名也今申論意佛直說此名而入此定故得

為序大品金光明涅槃皆先唱名於序無妨今經文殊引古佛亦名無量義又云當說大乘經名妙法蓮華此亦序中唱名與論意同也今按彼經釋無量義者從一法生其法者所謂無相無不相名為實相從此實相生無量法所謂二法三道四果今釋此文無相者無生死相也不相者不涅槃相也涅槃亦無故言不相相指中道為實相也二法即頓漸頓謂華嚴頓中一切法也漸謂三藏方等般若一切法也三道即三乘四果即羅漢支佛菩薩佛此等諸法名為無量實相為義處從一義處出無量法得為無量法入一義處作序辭如弄師從一算下諸算除諸算歸一算由下故除下為除序從一派諸收諸歸一開為合序亦復如是如此消釋不違彼經論亦與此經合云復次無量義讚偈明法身百非洞遣應為文六紫金輝普賢觀明常樂我淨四波羅蜜住處前後兩文皆明常豈有中閒壽量而是無常耶他難云序已說常正何所道今反難之涅槃以純陀是序已開常宗正何所道他又例淨名序金剛無為無數而正說不明常法華亦應爾今還反難之純陀序常涅槃正應無常今論序常正當何疑也教菩薩法者無量義處用教菩薩也義處即諦理也下文普令一切眾亦同得此道又云若我遇眾生盡教以佛道即此意焉佛所護念者無量義處是佛自所證得是故如來之所護念下文云佛自住大乘也雖欲開示眾生根鈍久默斯要不務

速說故言護念佛說經已入無量義處三昧者慧定相成非禪不智須先入定非智不禪故先說法即智而定即定而智先後出入無有隔礙疑者云若未說無量義可入斯定說此經已何故入定釋言先入此定後說此經可解說此經竟而更入者是為法華作序耳何者若不先開則後無所合先入開定為合定作序稱為瑞相即此義焉若作次第者先入無量義三昧已應入法華三昧若明文彰顯時眾則知何俟彌勒殷勤文殊斬固故知作序其義轉明身心不動者與所緣之處相應也身之本源湛若虛空心之理性畢竟常寂大通智勝身體及手足寂然安不動其心常憍怕未曾有散亂身若金剛不可動轉心若虛空無有分別無量義處三昧法持於身心故不動也稱為無量者此定寂而常照能知世間從此一法出無量法也若作序義身法體動運今令不動運心法體分別今令不分別序義明矣問瑞相本論奇異說法入定佛之恒儀何得為瑞答說法雖竟時眾不散肅有所待故知前之說法舉眾來集待於後聞此事奇特與眾說異何意非瑞雖入開定意在合定與常入定有異何意非瑞相耶又文殊引古佛六瑞皆有事若昔非瑞相何以證今今古同然豈可以凡情而非之耶天雨花者舊云大小白赤正法華云意花大意花浦嚮花大浦嚮花釋迦十九云天花妙者名曼陀羅又七十九云八百比丘成佛國土常雨五色曼陀羅花舊雨大小白表在家二

眾小大亦表出家二眾表其昔來因而未果今謂此解狹而不當直論四眾收三藏中十六眾尚不盡況復四十八眾是故為狹夫花相密報其因四眾昔來已是因何俟花報若報其果天應雨實何故雨花故云不當言雨花明其昔因非佛因三藏中因是二乘因通中因是共因別中是菩薩因皆非佛因天雨花報其當獲佛因佛因者即四輪因也小白表銅輪習種性開佛知見也大白表銀輪性種性十行示佛知見也小赤表金輪道種性十迴向悟佛知見也大赤表琉璃輪聖種性十地入佛知見也四輪皆同是因是因由中而生故從天而雨由是因位故以花表之但因有趣果之義故而散佛上如此因果誰當感剋祇是此會時眾故言及諸大眾也下文殊釋疑吹大法雲等四句又正說中開示悟入又與大車中遊於四方節即相承旨是位義故知花表因位也問四輪是別位義那得釋圓位耶答名通義圓尚無所失況名別義圓而不得用耶問別義賢聖圓亦有耶答已如多義若言四花俱從天雨表四眾當同成一因如此釋者出三藏義未出通義若言四眾同是菩薩因者此釋出通義未出別義並非佛因皆非法華意也法華意如前說普佛世界地六種動者舊云動三乘人因果決定六執者此破三藏家三乘六執未破通教三乘六執通教約法三人因果同若約人三人因果異此之同異俱被破而舊家破意不破此也別教無三乘名則無六執舊

所不破今明別家因時三法縱橫果時三法亦縱橫
此則須破今釋地六種動表圓家六番破無明無明
磐礴未曾侵毀方將破壞故動地以表之無明若
轉即變為明故普佛世界六種震動也六種表住
行向地等妙六番也優婆塞清淨行經云菩薩生時
動地示此生已盡無復煩惱一切眾生應得道者煩
惱將滅故動即此表也本迹解者如文殊釋疑引古
佛為答密得此意即是識本非謂他佛昔現斯瑞
而我世尊本亦斯瑞非今一反也觀行者動六根也
地相堅固如六根冰執未曾入大乘之道動難動之
地表淨未淨之根東涌西沒者東方青主肝肝主
眼西方白主肺肺主鼻此表眼根功德生鼻根煩
惱互滅鼻根功德生眼中煩惱耳滅餘方涌沒表餘
根生滅亦復如是六動者動起涌震吼覺二中又
有三謂動偏動等偏動直動為動四天下動為偏動
大千動為等偏動餘五亦如是合八種動此即表
淨十八界也次明大衆心喜瑞者衆見雨花地動
知甘露將降欣躍內充表大機當發感於勝應問
喜怒哀人之常情何得為瑞答天花悅眼地動震心
大經云動時能令衆生心動花地是外瑞心喜是內
瑞非常之喜昔雖曾有而不為喜所動而能一心
觀佛何得非瑞若言歡喜動陰心者人天義也若
喜動具諦無漏心者藏通義也若喜動即假心
者別義也喜動實相心者圓義也次明佛放光瑞
即表應機設教破惑除疑白毫具種種功德觀佛

海三昧經云佛初生時牽長五尺若行時長一丈四
尺得佛時長一丈五尺其毫中表俱空如白琉璃筒
內外清淨從初發心中開行種種相狀乃至入涅
槃一切功德皆現毫中毫在二眉之間即表中道常
也其相柔軟表樂卷舒自在表我自即表淨放光
破闇表中道生智慧光照此土表自覺覺他復
次二乘難達三諦不知中道如有二眉而無白毫別
教雖知三諦不能毫中具一切法當知從初至後法
界中事悉現毫內者即表圓教之意復次衆經明
放光不同大品從足下千輻輪相乃至頂髻一各
放六萬億光明如彼廣說大經面門放光此經白毫
放光緣宜不同耳又收光不同有王經云收從背入
欲記過去事收從前入欲記未來事而不見記現在
事私謂背入應記現在事也足入記地獄蹀入記畜
生脚指入記鬼勝入記人左掌入記鐵輪王右掌入
記金輪王及記諸天騰入記聲聞口入記緣覺白毫
入記菩薩內髻入記佛而今經放白毫光而未見收
光之文者略耳又解云放光照現在事收光明將來事
此經正論此土他土諸佛道同故正論放光若解諸佛
道同即開示悟入任運獲記則放光為正收光是傍
故略而不說耳若文六佛放光者三藏義也若尊特
佛與文六佛共放光者通義也若尊特佛獨放光
者別義也若文六佛即毗盧遮那法身放光者圓
義也舊云此土六瑞訖至臆吒天今華文從照東方
萬八千土下即是他土六瑞之文蓋斟酌由人耳舊

云寶照十方照東方者表一乘因果是諸因果之上
萬是數圓表果位滿八千數缺表因果未足若照東
方義已足更照九方復何所表今明東是方始表十
住是位始遊門說法生身菩薩朗然見理入於十
住開佛知見舉初即知中後故云靡不周徧者當知
諸方亦然諸位亦然若就本門說法四方佛集即表
本門說法法身菩薩增道損生四位增長也觀解
萬八千者約十八界論百法界千性相即有一萬八千
此等境界佛慧未開應當開故以數表之耳文
云從阿鼻獄上至有頂即六法界也又見諸佛菩薩
比丘等十界具足故文云靡不周徧即此意也若分
文屬此土第六相若屬他土即是摠相照他土文次
明光照他土六瑞者一見六趣二見諸佛即是上聖下
凡為一雙三聞佛法四見四眾得道即是人法一
雙五見菩薩行行六見佛涅槃即是始終一雙既有
可化眾生即有能化之佛有佛即有說法說法即有
弟子弟子即是行始行始必致終也若此土六瑞摠
報眾生當獲自覺彼土六瑞摠報眾生當獲覺他又
此彼六瑞表此彼諸佛道同從盡覺彼土六趣眾生
下至行菩薩道者是現彼土已與此同從復見諸佛
下至七寶塔者是現此土當與彼同略說竟更廣說
者從又見六趣眾生是現彼佛為五濁故出現於世
此佛亦然二土出世意同也及聞諸佛所說經者是
現彼佛初從無相一法非頓而頓與此土初說華嚴
意同也從并見諸比丘下是現彼佛非漸而漸與此

土佛次說三藏意同也從復見諸菩薩下是彼佛三藏之後說方等般若衆經與此土佛三藏之後意同也從復見諸佛下至起七寶塔是現彼佛般若之後開權顯實收無量法還入一法唱入涅槃息化起塔光照彼土始終究竟炳然在目當知此土從一出無量非頓而頓非漸而漸其事已竟必當收無量法還入一法開權顯實息化歸真與彼土同也復次種種因緣者昔善為因今教為緣又別說者正是三藏之後明共不共般若為因助道戒定慧等為緣約三人即有種種因緣又就共不共人種種因緣種種相貌者共不共各四門二門復有無量相貌五百比丘各說身因即其義也不共四門亦如是故知因緣相貌種別無量皆是彼與此同彼明此相因緣相貌還入一因二緣一相一貌當知此土亦與彼同爾時彌勒作是念訖今當問誰是疑念序文為兩彌勒疑念二大衆疑念彌勒有三念一正念六瑞二念問誰三念文殊文殊念起第二念除唯初念在但成一疑也神變者神內也變外也神名天心即是天然內慧變名變動即是六瑞外彰首楞嚴云佛住不二法能作神通法王法力超蓋一切彌勒不則外變亦不知內慧故興念至此若夫庸人不知術者散人不知定者凡人不知聖者小聖不知身子身子不知菩薩菩薩不知補處補處不知尊極此就極處亦不知也又彌勒值佛植善既多何容不髮髻知應須隱明示閻羅言不知也大衆有兩念一正念六瑞二念問誰若將下偈望

此亦得有三念偈云四衆欣仰瞻仁及我無第三念何事瞻仁而此中無者欲推補處居先也舊解先有三意一是補處二有三念三能發問為此義故大衆闕念也問文殊彌勒德位相亞何故一問一答答夫機有在無位雖本等實主異且聖人承機非問者不能答也又法門有權實權補處須問實者須答又迹有久近近問久答又名有便易彌勒名慧慧為衆生應須問又殊名妙德德應須答此即四種消文意

妙法蓮華經文句卷第二



妙法蓮華經文句卷第三

計四十二節

真

天台智者大師

述

從爾時彌勒欲自決疑下訖偈即是發問序文為二
 長行偈頌長行中經家述自疑他疑發問問中此土
 他土如文何意有偈頌耶龍樹毗婆沙云一隨國土
 天竺有散花貫花之說如此問序後銘也二隨樂欲
 不同有樂散說或樂章句三隨生解不同或於散說
 得解或於章句得解四隨利鈍利者一聞即悟鈍者
 再說方悟又表佛殷勤重說又為聚集前後故有偈
 也偈有六十二行文為兩初五十四行頌上問後八
 行請答就問為兩前四行問此土後五十行問他土
 長行惣問此土六瑞偈中長有香風地淨無說法入
 定觀文謂言盈縮尋義不然說法是慧性定是天
 心由天心慧性能作動地放光舉末即能知本故縮
 非縮也他不見此意謂彌勒不問兩事便不以為瑞
 今友難之若彌勒不問文殊何故而答又問指何處
 為問今指長行惣問是也若更顯其別問祇導師兩
 字是也良以說法入定能導於人既稱導師即是問
 說法入定也是故非縮他云風由檀林故香地加之
 嚴淨盈長兩事人謂非盈風本無香而香為奇特故
 以成瑞夫天花至妙豈有色而無香此表因運至果
 如花有香風花既集地則嚴淨因若趣果果則嚴
 淨金光明云聚集功德莊嚴佛身故以二事顯成四
 花盈非盈也眉閒光下次有五十行頌問他土六瑞
 舊云頌中不問三乘四眾不問佛涅槃今教廢三那

法三句卷第三

第二張

真字

忽問三方說壽量那問滅度於義不便故不問也嗚
 呼不解消文抑經就情今明頌中具問他土六瑞文
 為六初三行問六趣眾生二四行問見彼佛及說法
 三三行問他土四眾次一行半結前開後次三十一
 行半問他土修菩薩行次七行問供養舍利即是問
 佛涅槃也初三行問六趣驗此頌知上文光照東方
 是惣照他土意也此頌頌上惣問六趣眾生是能趣
 之人生死是所趣之處善惡業緣是趣因好醜是趣
 果也從又觀諸佛下第二四行問見彼佛上直見佛
 說法此廣明說法之相謂說頓教逗大根性聖主師
 子即如此土現盧舍那像也演說經法微妙第一者
 即如此土先照高山演華嚴教也教諸菩薩者即如
 此土七處等會無聲聞人也照明佛法開悟眾生者
 即如此土始見佛身入如來慧也若人遭苦下第三
 三行問彼土四眾即是頓說之後次明三藏教也若
 人遭苦者開聲聞乘也此頌具明四諦在文分明云
 若人遭苦而造惡業苦不得盡底下眾生是也若人
 遭苦而造善業苦亦不盡厭下攀上如難陀為欲故
 持戒等是也若人遭苦於外道法中求解脫增見長
 非者苦亦不盡若人遭苦厭集復厭依果感佛說涅
 槃者此人能盡諸苦際也他土亦開此乘也若人有
 福下一行是開中乘也若供養佛少遭苦致惱若供
 佛多雖遭苦而福故云聲聞三生種福支佛百劫種
 福形彼聲聞故言有福志求勝法者聲聞厭苦而修
 行支佛求道故修行深求緣起勝妙之理即是他土
 開中乘也若有佛子下是開六度大乘也真慈悲能

紹佛種故言佛子修於六度故言種種行志求故言無上慧六度中無六蔽如藥中無病故言淨道非畢竟淨也又聲聞苦諦為觀門緣覺集諦為門度菩薩道諦為門故言淨道殊我住下第四有一行半結前開後見聞若斯即是結前如是眾多即是開後我見彼土下第五有三十一行半問他土菩薩種種修行就此為三初一行惣問次十五行次第問次十五行半雜問初惣問可解或有行施下第三有十五行次第問中為六初六行問檀二二行問尸三行問忍四一行問進五二行問禪六三行問慧就問檀有三意初四行問捨財一行問捨身一行問捨命珍寶奴婢貴賤共能施駟馬寶車豪俠者所施妻子等是外身身肉等是內身捨頭目即捨命而不言法施者讓後般若也又約身命財與生死後際等得不壞常住即是法施故不別說也文殊師利見王下第二二行問戒約比丘論持戒者在家施易戒難出家施難戒易故約比丘明戒此中引五王經云或見菩薩下第三二行問忍忍有三種閑林遠谷惡人惡獸忍耐無瞋即生忍自節守志即苦行忍為求佛道即第一義忍又而作比丘即苦行忍獨處閑靜即生忍樂誦經典即第一義忍又見菩薩勇下第四一行問精進者夫深山可畏非險怯者所居勇進者能安之傍若無物思修實相念念不休進求佛道也又見離下第五兩行問禪前二行問修根本禪後二行問修出世上上禪通途皆得有根本之修也離欲者若離欲得五通通教定也又根本本離欲背捨亦修不淨等

離欲別教兼離二乘欲中道又離順道法愛欲深修禪定者發初禪一品此定未深乃至九品傳傳為深又背捨九定八勝十一切入等傳傳為深此定轉變自在能發諸通凡夫但五通二乘具六別教菩薩讓佛分有無漏亦但稱五通也圓教初後皆具六通安禪萬偈下第二一行明上上禪此是別圓之禪靜散不相妨不起滅定現諸威儀如脩羅琴不拊而韻無緣無念有感則形故能安禪諸佛也復見智深下第六三行問般若為二初二行是自行智深者慧窮理本也志固者誓願廣大也此即二種莊嚴能問能持也又見佛子定慧下二兩行是化他也未到慧多無色定多四禪等又背捨慧多九定定多十一切中等又二乘定多菩薩慧多佛則等又空觀定多假觀慧多中觀則等無量喻即是種種方便諸教之中引無量譬類助顯第一義也破魔兵者空觀破四魔假觀次第破六魔中觀圓破六魔一切魔擊鼓者初發心住便成正覺百佛世界作佛圓擊法輪法鼓從又見菩薩寂然冥默下第三有十五行半不復次第隨見而問問上六度自收得萬行何須更問太煩雜耶答上問次第者自漸一途非次第者不定一途既言種種相貌何啻兩途而實是煩耶此次第雜亂兩番六度擬他土開三藏後說方等十二部經辨六度相貌具如此開不異就雜問中文為七意初二行問禪又二前二行問入捨禪即是自行次又見菩薩放光下第二行問入悲禪即是化他菩薩入定放光種種利益具出華嚴思益次又見佛子未嘗下

第二行問精進即是般舟念佛等法門也次又見具戒下第三二行問戒威儀無缺即是初不缺戒淨如寶珠即是第十究竟戒中間可解十戒如玄義中說次又見佛子住忍下第四一行半問忍即生法二忍次又見菩薩離戲下第五兩行更問禪離戲是却掉悔蓋離癡眷屬即除瞋蓋近智者除疑蓋一心除亂是却貪蓋攝念山林除睡蓋次從或見菩薩至飲食下第六五行問檀為三前四行明四事施如是下第二二行結成次或有菩薩說下第七有三行問般若初一行不可說而說般若二行不可觀而觀般若三一行言語道斷心行處滅即是說不可說觀不可觀而論般若也或可用此三番般若成上見他土說方等中六度或可別擬他土說方等後明大品教感譚般若寂滅無二清淨不著此彼同也或可說寂滅法是方等中意觀諸法性猶如虛空是般若意正是歷法作觀法相無三此義實與大品相會若作彼土見法華意者以此妙慧求無上道一行是也但見修妙慧人不見法華妙慧座席若見座席即知此如彼何事須疑但見人不見座闔眾疑問耳或可三番般若與此間般若相同未知此後次何所說是故疑問此兩意從人用之耳上長行文進但舉六意偈頌既廣顯義泠然文殊師利又有菩薩下第六有七行明佛滅後以舍利起塔者正頌上他土佛出五濁從無相一法開漸頓教故有二法三道種種行類相貌不同如上所見也今見他土佛般涅槃佛子慕德為樹墳塔即表無量卷歸入一出無量前相已

表無量歸一正是入於涅槃云何畏妨壽量作起塔
為佛事耶痛哉痛哉就文為六初一行摠標佛滅起
塔次又見佛子造下第二行明塔數次寶塔高妙
下第三行明塔量次一塔下第四行明塔相
次諸天龍神下第五行明供養次文殊下第六兩
行結塔婆此云方墳方墳如此土冢基大灌頂翻為
家也殿堂如此土靈宇崇臺峻階承露于雲長表淨
域歸心上聖耳樹王者即波利質多正供舍利傍嚴
佛國土云從佛放下第二有八行請答為二初三行
舉疑事述請後五行釋伏難初三行為三初一行舉
見此主事白毫為本故先舉及諸事故言種種次諸
佛下第二行舉見他土事諸佛為本即摠攝餘五
也我等下第三行請答第二就釋伏難為二初四
行正釋伏難次一行結請言伏難者文殊內心構難
不肯時答其意有三此瑞希奇不可倉卒輕爾有
判二智眾如海謙光推高三靳固前却生眾渴仰故
以伏難潛而拒之彌勒彰灼釋難意亦有三一瑞大
疑大若不為釋憂兒在懷妨聞正說二眾海乃多機
在仁者三闔眾瞻仁故知注誠殷重所以彰言釋難
請今時答初伏難者因正請生請云佛子文殊願決
眾疑文殊仍此起初伏難汝云眾疑眾未曾疑若疑
應問眾既不疑我何所決彌勒即以第一偈釋云四
眾欣仰瞻仁及我及我欲令我問瞻仁欲得仁答文
殊因此起第二難眾同有疑不易可答待佛出定然
後決疑彌勒即用第二偈釋若有疑在懷憂兒不泰
應以時答復知如來何時起定故言佛子時答決疑

令喜文殊因此起第三難我與仁者同居學地欲測
佛意微共籌量獨令我於理不可彌勒即以第三
偈釋我亦微心下思踟躕雨盈為說妙法為當授記
故言佛坐道場所得妙法為欲說此為當授記文殊
因此起第四難若如汝說即是釋疑何煩我答彌勒
即以第四偈釋安得以此猶豫之心而判大事故言
示諸佛土此非小緣文殊伏難既窮謙光亦止後一
偈結請答也此四伏難光宅受於次師次師受於江
北剎師既是先賢文外巧思今用之從是時文殊師
利語彌勒下訖偈名答問序有長行偈頌長行文
為四一從語彌勒下名惟付答二從善男子我於過
去下名略曾見答三從諸善男子如過去下名廣曾
見答四從今見此瑞與本無異下名分明判答夫以
下測上止可周像上度惟昔儔今不可頓決所以初
從髮鬚次引略見略見未周更引廣見以多證一爾
乃分判惟付答答上此土問略曾見答答上他土問
廣曾見答雙答此土他土問判當答雙判此土他土
問也惟付答為二初標章次正惟付惟者思惟也付
者付量惟今如昔付昔如今然文殊古佛豈應不知
迹示思惟也光宅以初後兩句是法說表因果廣略
中間三句是譬說欲說大法是略開三顯一略開近
顯遠演大法義是廣開三顯一廣開近顯遠大法兩
者譬得記作佛昔因果定執不得作佛是枯涸義
今皆作佛是被兩潤義吹蠶是改三乘之號嚴鼓誠
兵譬破無明今明其法說不用何者迹本兩門由籍
各異迹由籍起彌勒生疑文殊為釋本由籍未起彌

勒何所疑文殊何所釋若於此中已是釋於開近顯
遠之疑者後地裂眾涌彌勒何故更疑更疑則浪疑
浪釋釋後既虛釋前亦謬此大有所妨故不用也今
明彌勒但問迹中此彼二土等瑞文殊以惟付答答
迹中事不關壽量本中事也欲說大法者答說法瑞
雨大法雨答雨花瑞吹大法蠶答大眾心喜瑞擊大
法鼓答地動瑞演大法義答放光瑞欲說大法者惟
昔諸佛說無量義後則開權顯實收無量歸一付於
今佛既說法已亦應開權顯實會無量以歸一者
即大法也兩大法雨者惟昔諸佛天雨四花之後普
入圓因住行向地付於今佛兩花之後皆成佛因住
行向地故言兩大法雨也吹大法蠶者惟昔四眾見
瑞歡喜得未曾有障除機動即改人教行理付今眾
喜亦應障除機動改人教行理所改既深故言吹大
法蠶也擊大法鼓者惟昔地動已後即有六番破無
明賊付於今佛地動已後亦應六番破無明賊故
極妙故言擊大法鼓演大法義者惟昔諸佛放白
毫光後說法華彼此道同付於今佛放光已後廣明
五佛道同既是佛道故言演大法義如是五句悉是
惟昔判今付今類昔會文附義唯少入定一瑞而兩
花動地放光等皆由入定故爾意則兼具無勞疑也
闕此一條故稱略答耳今更別解初一句摠後四句
別摠者大法是也別者雨吹擊演開示悟入是也如
天非小大非赤白而雨赤白之花第一義非開示悟
入見此理時即證開示悟入譬如種子得雨萌開今
聞大法雨潤法性種破無明糠開於十住佛知見也

文選經文卷第三 第六節 真字

譬如吹蠹知是改號今之與先已得十住今從十住聞法更改入十行示佛知見也譬如擊鼓知是誠兵今之與先已在十行今從十行聞法誠入迴向悟佛知見也演之言布橫闊豎深乃是演義今之與先已在十向今從十迴向入於十地入佛知見窮源盡邊深廣備足也惟昔六瑞已後即開示悟入付今瑞後亦應如是橫豎釋惟付答竟從我於過去下第二引略曾見答者初以已智惟付今以略曾小分明於前舉此答他土問也此土五瑞不通他土唯放光一瑞徧照東方略曾見答重答放光故知是答他土之問也今見如昔昔祇如今欲令眾生咸得聞知者即聞思兩慧亦信法兩行收無量歸一改三乘教理六番破無明等諸佛道同開示悟入佛之知見故言一切世間難信之法也如過去下三引廣曾見答更分明於略此廣答此土他土之問彌勒因光橫見東方以爲問文殊引昔豎見而爲答橫豎顯諸佛道同也文爲三初引一佛同次引二萬佛同後引最後一佛同就前一佛又爲三二明時節二標名三說法時節如文有佛號日月標名同者通號與今佛可同別名云何同此當以名別義同爲釋何者是慧月是定定慧是自行德燈明是化他德能仁能定慧能自他又日月燈是三智今佛亦三智隨緣稱別義則不殊故言名同演說法下第三說法同者昔佛先頓後漸與今佛初頓後漸同也演說法初中後善者即是頓教也夫七善之語乃通大小尋文是大乘七善初中後善者即是頓教序正流通名為時節善其義

文選經文卷第三 第七節 真字

深遠即是頓教了義之理二乘不測其邊底故言深遠是名義善其語巧妙即是頓教八音所吐會理直說悅菩薩心即頓教之名爲語善純一無雜不與二乘共即是頓教獨一善具足者具明界內外滿字之法即是頓教圓滿善清淨白無二邊瑕穢即是頓教調柔善師云行善禁行之相者梵即頓教無緣慈善又初中後善解者不同今且依一途若小乘以戒定慧爲三善大乘以初中後心爲三善金光明云前心如來不可思議中心如來種種莊嚴後心如來不可破壞此亦三善之意也文殊引古佛頓教七善與今佛頓說七善同亦與他土初頓說同所以用此爲答者酬上彌勒據光橫問他土佛云聖主師子演說經法微妙第一文殊豎引昔舉此爲答即是初佛說頓法同也爲求聲聞人說應四諦法者即是古佛次頓之後開漸教法同也上問若人遭苦爲說涅槃今引古佛亦開此漸以答斯問也爲求辟支佛說應十二因緣法答上若人有福志求勝法之問也爲諸菩薩說應六波羅蜜答上佛子修種種行之問也皆引古佛開漸教同也廣引曾見佛答他土之問也令得三菩提成一切種智者此明古佛開頓漸後即顯實之說始終究竟此答彌勒見他土佛般涅槃涅槃後起塔之問也若引古佛說法至六波羅蜜者明今佛已與昔同從今得三菩提去明今佛當與昔同次引二萬佛名號說法皆同初引一佛備舉頓漸說法同中舉二萬佛但舉說頓同故言初中後善也後引一佛但舉開漸同所以然者互舉首指前可知而不

文選經文卷第三 第八節 真字

引二萬之前佛者正爲名字說法皆同據義爲便耳姓頗羅隨者此翻捷疾亦云利根亦云滿語也其最後下第三引一佛同文爲三二明曾見事與今已同二明曾見事與今同三明曾見事與今當同曾謂昔之所更已謂謝在過去曾之與已俱謝俱更今取久遠者爲曾小近者謂已取六瑞等爲曾取佛出定去爲當也第一從其最後佛有公子者是曾與已同昔佛公子今佛一子數雖不等並出同居之土土有見思俱示有子有事同一八赴緣別有所表生一子惣表一道清淨生八子表八正道數異義同今取有子義同也又昔佛子出家發大乘意今佛子住小乘果此云何同昔化道已竟顯本事彰故言發大乘意今未發迹猶言羅漢至下文發本即是菩薩其義則同從是時日月燈佛說大乘經下第二明曾與今同昔佛自土六瑞悉與今同次第如文昔佛他土六瑞惣云如今所見則知昔佛他土六瑞亦與今同昔明別序既有現相懷疑二序同而無集眾發問答問三序者義推則有既言說法知必集眾既道懷疑知應有問若問必答例二序兼得三序同也又若迷昔答則不俟文殊費辭既不言答亦不出問其義可解從時有菩薩名曰妙光下第三明曾與當同此文爲六從時有菩薩者是因人同二從爾時日月燈明佛從三昧起者是說法名同三從六十小劫者是時節同四從說是經已於梵魔沙門者是唱滅同五從時有菩薩名曰德藏者是授記同六從便於中夜者明滅後通經同今初云何因人同昔佛定

起因妙光菩薩說經今佛定起因身子聲聞說經此云何同瑞師云因者因託付傳一乘之經非直對告之人也彼佛對告何必是妙光如今對告身子身子未必能有宣通因託宣通其若妙光如今因委其若文殊今佛不歎者往佛何必歎也文殊引往佛歎妙光者正明可因託耳又舊以藥王為所因人者亦可爾但引往證今小不類耳或言因文殊釋疑得起定說經此對不便今明不爾經文自云因妙光正說而作因託流通之解又取藥王為例此乃公抗佛語何關釋經昔因妙光今因身子正是所因人同昔佛八子師於妙光如來起定對告妙光又付託妙光今佛子羅云亦師身子佛從定起亦對告身子迹門竟又付託身子今古屏齋更若為勝此而近棄身子遠取藥王疑者言妙光是菩薩身子是聲聞云何是同昔事已彰譚為菩薩今事未發道是聲聞比及發迹身子是大菩薩非同何謂昔妙光垂迹何必不作聲聞特是文殊巧說方便隱顯耳從是時日月下第二說法名同者如文上彌勒見他上初頓頓後見漸漸後見種種行後無境後見佛涅槃今又殊嘗會見佛初頓頓後漸後云種種行即見法華此彼六瑞之後已說法華法華後即入涅槃此分明定答他土之問也從六十下第三時節同者如下文云五十小劫謂如半日即是同也從日月燈明下第四唱滅同者昔說法華即唱入滅亦如迦葉佛云今佛說寶塔品中明如來不久當入涅槃化道已足唱滅事齊也時有菩薩下第五投記同者昔授德藏菩薩記

今經授聲聞記豈得是同昔事已成故言授菩薩記然正是會三歸一聲聞得記也若說昔授聲聞記者佛從定起更何所論文殊巧譚故不發迹耳若說授菩薩記諸經皆介執教者未驚也云從佛授記已下第六通經同文為五時節即佛滅後也二出其人即妙光也三久近即八十小劫也四所化之眾即八子八百也五結會古今即求名妙德等也就所化之人又為二初八子行成久已得佛八百之一方成今住補處所以引此八子八百者近則釋疑密開壽量釋疑者或謂彌勒補處為大文殊非補處為小小不應答大不應問故舉八百宜應有問妙光昔親對佛先復為師故釋疑非謬密開壽量者八子最小佛號然燈然燈是定光妙光是釋迦九世祖師孫今成佛師祖為弟子師弟無定將密顯生非生滅非滅之意問彌勒昔見諸佛曾聞法華何故疑問答時眾機宜應須扣發耳第四從今見此瑞下名分明判答今昔三瑞既同惟付決定不謬略曾廣曾皆決定也當說大乘決定前說法瑞也名妙法蓮華決定前雨花瑞也教菩薩法決定前眾喜瑞也佛所護念決定前地動瑞也兼摠入定悉在其中有人作已同當同不作今同尋文云今見此瑞與本無異此正語於今云何嘆六瑞作已據此文為今故作三同之釋也頌有四十五行偈不頌上惟付略曾見答於廣曾見中但頌前後不頌中間也初有兩行頌廣曾見中時節名號說法等同也從佛未出家下第二有三十九行偈頌最後佛三同次有四行

頌決定答就第二三同中有三初有一行偈頌曾與已同次第二有十五行半頌曾與今同第三次有二十二行半頌曾與當同從佛說天下第二就今同中又二初十四行頌此彼六瑞第二從爾時四部眾下一行半頌四眾懷疑初又二初有四行偈頌此土六瑞同而長出天鼓自鳴表無問自說也現諸希有事者即摠頌諸瑞也從此光照下第二十行頌他土六瑞同長行但云如今所見是諸佛土其文則略此頌廣也文為五初三行頌見六趣眾同次又見諸如來下第二行兩句頌見佛同次世尊在下第三兩句頌聞佛說頓教七善法同也次一諸佛下第四三行頌見聲聞等三乘即是昔佛開漸教法同也次又見諸菩薩下第五三行頌見菩薩種種因緣即是頌開方等般若教同初三行如文第二一行半釋自然成佛道者方便道則加心修習發具道即是自然任運與理合也約四教可知云問發具自然者何須諸佛說法答如船順流若遇風加掉助疾有所至風喻見佛聞法掉喻修行例如初果任運七生若值佛加修或一生二生得至無學云自然成佛道是報身琉璃是法身本淨金像是應物現形世尊在大眾敷演深法義下第三半行此則將法約人法既深玄當知必運大機開頓教也此頌上純一無雜七善之文二諸佛土聲聞眾下第四三行此即將人約法人既二乘必知開三藏說也即頌上為聲聞人說應四諦等也雖不頌出緣覺兼攝在中行施忍辱等等於四度耳此一行頌上六度大乘

也又見菩薩深入諸禪定下第五兩行頌上見他土菩薩種種因緣信解相貌也略不答上起塔也上不見他土法華相故次此見起塔今答出法華相故起塔入滅事在後答也次爾時四部眾下第二行半追頌昔佛四眾疑念如文從天人所奉尊下二十二行半頌曾與今當同文為六初兩行二句頌因人同次說是法下第二句頌上說法同次滿六十小劫下第三行一句頌時節同約不思議延促劫智也妙光皆悉受持昔佛法也亦如身子受佛付囑也次佛說是法華下第四五行頌上唱滅同即是答上他土入滅之意也就此文有唱滅有囑累囑累如遺教有悲泣如涅槃有慰喻亦如遺教其得度者悉皆得度未度者作得度因緣例如今佛付囑彌勒云次是德藏下第五有一行半頌上授記次佛此夜第六有十二行頌上通經通經又為五初有兩行頌上佛滅後時節四眾得益如新盡火滅者小乘佛以果報身為新智慧為火慧依報身身滅智亡大乘佛以機為新迴應為火眾生機盡應形亦滅倍加精進者應以滅度度者也次是妙光下第二有兩句頌上能弘經之人次八十小劫下第三有兩句頌上行經時節次是諸王下第四有八行頌上所益弟子又為二初三行頌已成弟子次是妙光下第二五行頌當成弟子次彼佛滅下第五有一行頌上結會古今後四偈舊云是結會今物某仰今釋不爾上長行有分明判答此文頌之文為三初我見燈下初有一行頌上當說大乘經次今相如本下第二兩行頌

上教菩薩法次諸求三乘人下第三一行頌上佛所護念在文可解又前彌勒釋四伏難今文殊必定有答此中是文殊斷四伏疑使彌勒其復更問初第一疑因文殊廣引先佛曾說法華故彌勒潛疑欲問諸佛赴緣人時各異古佛雖名法華今佛何必如此文殊即以第一偈斷云我見燈明佛本光瑞如此以是知今佛欲說法華經此斷其疑名之問也彌勒因此又疑自有名同義同自有名同義異此名何所顯召文殊即以第二偈斷云今相如本瑞是諸佛方便今佛放光明助發實相義此是斷其疑體之問彌勒因此又疑實相無相何人會之文殊即以第三偈斷云諸人今當知空掌一心待佛當雨法雨充足求道者此斷其疑宗之問彌勒因此又疑佛雨法雨止洽菩薩亦潤二乘文殊即以第四偈斷云諸求三乘人若有疑悔者佛當為除斷今盡無有餘此即斷其疑用之問彌勒聯翩構疑文殊頻頻為斷既事窮理盡即得之於懷可謂善於問答具二莊嚴光宅但知迷於劍師釋四種伏難使文殊必答顯彌勒之美不見文殊釋四伏疑令彌勒不問抑妙德之能此義出自天台非傳他疏寄語後賢勿過人長也自劍師已後數百年中講法華者溢路頗有見斯意不非長何謂也

釋方便品
 諸於規則善用圓法逗會眾生譬如偏舉指以目偏處是舉偏法以目智宜用法以釋方將用以釋便若惣舉指以目圓處宜將秘以釋方妙以釋便也舉偏法釋方便蓋隨眾生欲非佛本懷如經今離諸著出三界苦是故如來殷勤稱歎方便此義可釋他經非今品意又方便者門也門名能通通於所通方便權略皆是引為真實作門真實得顯功由方便從能顯得名故以門釋方便如經開方便門示真實相此義可釋他經非今品意又方者秘也便者妙也妙達於方即是真秘點內衣裏無價之珠與玉頂上唯一珠無二無別指客作人是長者子亦無三無別如斯之言見秘是妙如經唯我知是相十方佛亦然止不須說我法妙難思故以秘釋方以妙釋便正是今品之意故言方便品也料簡者初番釋者是體外方便化物之權隨他意語次釋亦是體外方便自行化他之權亦是隨自他意語後釋是同體方便即是自行權隨自意語初釋方便非能入非所入次釋方便是能入非所入後釋方便是所入非能入故知名同其義大異世人多不見此意浪釋方便品云問方便與權云何答四句分別自有方便破權權破方便方便修權權修方便方便即權權即方便方便破權者四種皆是秘妙之方便此方便破隨他意權也權破方便者權是同體之權破於體外之方便也相修者亦可解相即者亦可解三句可釋他經第四句今品意也故正法華名善權品權即方便無二無別低頭舉手皆成佛道方便

善權皆真實也廣釋者先出舊解五時權實
二年前照無常事為權照無常理為實指阿毗
曇今謂釋論破無常是對治法皆屬三悉檀云何
有實耶非今所用十二年後般若照假有為權照
假有即空為實釋論亦破此義念想觀已除言語
法皆滅照假有即空者猶是觀想耳非今所用次淨
名思益內靜塵空有二境為實智外變動應用為
權智今謂內鑒外用為二非入不二門非今所用次
法華照三三為權照四一為實今謂三權一向不會
實一實不關三權非今所用次涅槃金剛前無常為
權金剛後常為實今謂道前真知亦是常道後如量
智亦是權此五時權實非今所用乃至半滿四宗所
明權實三智亦非今所用復有人解方便是權爾
實是審實又方便是權巧實是智慧又方便是權
假假三車於門外又方便是權宜宜說三乘故又權
是譬名譬如秤錘前則重卻之則輕處中則平
合於佛智照察稱量如是等釋各取一途權爾權
假約處所權宜約法門權巧秤錘約智能各不包
含義不融妙不可用此釋今品又有人以四種三慧
初一是權一是實次空有二智觀空不證離二乘涉
有無染出凡夫次空有內靜為實外用為權次金
剛前後常無常為權實初二慧今生信次三慧今
生解次三慧今化他後三慧是果此諸三慧凡有三
轉初以有為俗空為真次空有為俗非空非有為真
次空有為二非空非有為不二皆為俗非二
非不二為真教智亦然何故爾為人悉檀故自有人

聞前不悟聞後即悟是故三諦不同又如來常依
三諦說法故三諦有三門又佛教雖多不出三門又
漸引眾生故凡夫計心形是實蓋非實也法性空
乃真耳凡夫即捨有取空故說空有皆是俗非空非
有乃是真或者捨二邊復滯中道故第三遠離二
邊不著中道乃是真此為五乘人初引凡夫生信
出有次引二乘令入中次引菩薩令中偏俱捨又為
學中者謂三假為世三假空為真此但得初意次
非三假空有皆俗非空非有為真今詳彼釋乃是
傍五時顯已意却漸次梯墜之非耳可釋他經非今
品意經云咸令眾生皆得親見何時前後開悟不
同又云正直捨方便那用漸次會於圓妙又初引生
信解化果等何關今經悟入之意耶如天親列十
七名第十三名大巧方便又大乘方便經明方便十
種第九名善巧移三乘令入大乘方便波羅蜜當知
今品乃是如來方便攝一切法如空包色若海納流
豈可以諸師一枝一派釋法界之大都耶今明權實
者先作四句謂一切法皆權一切法皆實一切法亦
權亦實一切法非權非實一切法權者如文云諸法
如是性相體力本末等介爾有言皆是權也一切
法實者如文如來巧說諸法悅可眾心眾心以入
實為悅又諸法從本來常自寂滅相又云如來所
說皆悉到於一切智地又云皆實不虛又大經四句
皆不可說也一切法亦權亦實者如文所謂諸法如
實相是雙明一切亦權亦實例如不淨觀亦實亦
虛一切法非權非實者文云非如非異又云亦復

不行上中下法有為無為實不實法非虛非實如
實相也若一切法皆權何所不破縱令百千種師一
一師作百千種說無不是權如來有所說尚復是
權況復人師寧得非權如前所出悉皆權也若一
切法皆實者何所不破唯此一事實餘三則非真
但一究竟道寧得眾多究竟道耶如前所出諸師
皆破入實寧復保其樞窟耶若一切法亦權亦實
復何所不破一切悉有權有實那得自是一途非
他異解二法中皆有權實不得一向權一向實也
若一切法非權非實復何所不破何復紛紜強生
建立直列名尚自如此遙觀玄覽曠蕩高明為若
此況論旨趣耶今就有權有實句更開十法就十
法中為八番解釋一列十名二生起三解釋四引證
五結十為三種權實六分別三種權實照三種三諦
七約諸經判權實八約本迹判權實一列名者謂
事理教行縛脫因果體用漸頓開合通別悉
檀即是十種名也二生起者從無住本立一切法無
住者理也一切法者事也理事故有教由教故有行
由行故有縛脫由脫故成因果由果故體顯能用故
有漸頓之化由開漸頓故有於開合開合故有通
別之益分別兩益故有四悉檀是為十章次第三
解釋者理是真如具如本淨有佛無佛常不變
易故名理為實事是心意識等起淨不淨業改
動不定故名事為權若非理無以立事非事不能
顯理事有顯理之功是故殷勤稱歎方便理教者
惣前理事皆名為理例如其俗俱稱為諦諸佛體

之而得成聖者正實也欲以己法下被眾生因
 理而設教教即權也非教無以顯理顯理由教是故
 如來稱歎方便云云教行者依教求理則生正行行有
 進趣深淺之殊故行名權也教無進趣深淺之異故
 教名實也非教無以立行非行無以會教會教由
 行是故如來稱歎方便云云縛脫者為行違理則縛
 縛是虛妄故稱權為行順理則生解云云實於理故
 稱實非縛無由求脫得脫由縛如因屍渡海屍有
 濟岸之力故稱歎方便因果者因有進趣暫用故
 名權果有剋終永證故為實無果因無所望無因
 果不自顯是以二觀為方便道斷惑成因得入中
 道解脫之果若非二觀豈契中道果由因剋故稱
 歎方便體用者前方便為因正觀入佳為果住出
 為體用體即實相無有分別用即立一切法差降
 不同如大地一生種種芽非地無以生非生無以顯
 芽流得源推用識體用有顯體之功故稱歎方便
 漸頓者修因證果從體起用俱有漸頓今明起用
 用漸為權用頓為實若非漸引無由入頓從漸得
 實故稱歎方便開合者從頓開漸漸自不合亦不
 合頓故名為權漸令究竟還合於頓故名為實由
 開故合開有合力從開受名故稱歎方便通別益
 者通則半字無常之益別即滿字常住之益然常
 益道長喜生退沒故以化城接引生安隱想厭後息
 化引至寶所若無半益不得會常半有顯滿之功
 故稱歎方便四悉檀者三是世間是故為權第一
 義是出世是故為實非世不得出世由三悉檀得

第一義是故如來稱歎方便當用四句釋十番權
 實三番是他經意一番是此品意云云四引證者此十
 義通大小教且一切法且引今經不如三界見於三
 界三界者是事不如三界見者理也諸法寂滅不
 可言宣是理方便力為五比丘說是教若聞此經
 是善行菩薩道證教行也又汝等所行是善行道
 佛子行道已來世得作佛又種種因緣而求佛道
 但離虛妄名為解脫未得一切解脫盡行諸佛所
 有道法道場得成果云云我以佛眼觀見六道眾生
 始見我身聞我所說即皆信受如來慧除先修習
 學小乘者云云窮子初逃中間客糞後則付財初息
 化城後引寶所種種欲種種性相憶念等此通引
 一部為證今別引一品雖不次第十文具足諸佛智
 慧甚深無量其智慧門難解難入者一切事理境
 智等悉名為實施設詮辯阿含言教悉是智慧
 門此證理教論權實難解難入一切聲聞支佛不
 能知者即是縛脫論權實所以者何佛曾親近至
 名稱普聞即是教行論權實成就甚深至意趣
 難解即是體用論權實吾從成佛已來者成佛
 即是果果必有因即是因果論權實種種因緣譬
 喻至今難諸著即是漸頓論權實所以者何如來
 方便知見皆已具足即是開合論權實諸佛為大
 事因緣故出現於世為令眾生開示悟入佛之知見
 故者是為利益論權實取要言之佛悉成就即是
 三悉檀成就也止不須說即是第一義悉檀是為
 四悉檀論權實所以者何佛悉成就第一希有至

諸法實相即是理所謂諸法如是相者即是事是
 為理事論權實此一段長行明五佛權實佛佛皆
 爾然法華論解諸佛智慧甚深為證甚深有五
 謂義甚深實體甚深內證甚深依止甚深無上甚
 深無上甚深謂證大菩提也名智慧門為說阿含義
 甚深此與理教權實意同論解佛曾親近百千佛
 為修行甚深勇猛精進名稱普聞為增長功德甚
 深此與教行權實意同論解成就甚深未曾有法
 為微妙事甚深意趣難解等為無上甚深入甚
 深此與體同權實意同論解吾從成佛已來為說
 如來功德成就法此與因果權實意同論解無數
 方便者即是教化成就說法成就此與漸頓權實
 意同論解如來方便知見乃至深入無際等是自
 身成就不可思議境界勝餘一切菩薩此是明利也論
 解能種種分別悅可眾心等是言語成就此是益
 也與利益權實意同論解取要言之止不須說等
 為可化眾生成就此與四悉檀分別可化不可化意
 同論解唯佛與佛乃能究竟盡為無量福成就諸佛
 能知謂如來法身之體不變故覺能自證成就佛
 隨順眾生說一切諸法相等此與理事權實意同
 彼論解佛經今疏真符二聖可謂與修多羅優波
 提合皆合也五結權實者此十種通四教合四十權
 實若三藏中自證十法名自行權實說已十法利
 益眾生名化他權實化他之十皆合為權自行之
 十皆合為實名為自他權實餘三教十法束為三
 種權實亦如是又當教各以事理教行縛脫因果

四種為自行權實各以理教開合三種是化他權實各以體用漸頓通別悉種四種為自他權實其名雖同其義各異也別結者三教若通若別實分皆是他權實隨他意語故圓教若通若別實分皆自行權實隨自意語故化他之三皆名為權自行皆名為實次結成四句隨他意語者即一切法權隨自意語者即一切法實雙取即一切法亦權亦實雙非即一切法非權非實次結成三番釋品者若自行自意者此文稱道場所得法大經云修道得故攝大乘稱如理如量智皆是圓教自行權實隨自意語佛雖能於此不可說法方便能說而眾生不堪若發軫單說此法取眾生者即不能得也故言不可說不可說也復置此事以自行權實共別教權實共取眾生者大機利者直得鈍者曲得小機利鈍俱不得蓋華嚴意也復置此事單用三藏權實取眾生者大機利鈍者密得顯不得小機利鈍者但保於證取亦不得蓋三藏意也復置是事合用四種權實共取眾生者大機利鈍者曲直俱得小機利鈍者保證俱不得蓋方等意也復置是事捨三藏權實用三種權實共取眾生者大機利鈍俱得小機利鈍保證俱不得蓋般若意也復置是事捨三種權實用圓教自行權實取眾生者大小機利鈍俱得蓋法華意也如來智慧靡所不達明照時宜用與可不可故釋品云方者諸方法也便者善巧用也巧用方法取眾生得是故殷勤稱歎方便復次如來自證權實俱不可說愍念眾生說自證之權為門於物非且眾生不

能得入故自證亦不可說說別權實為門利者得入鈍者不入於物非且別權實亦不可說說三藏權實為門利者密入鈍者亦不入於物非且亦不可說說三種化他權實為門利者得入鈍者亦不入於物非且亦不可說說二種化他權實為門於利者得入鈍者亦不入於物非且宜捨三種化他權實但說自行之權於利者鈍者俱得入從始至終以方便為門是故如來稱歎方便釋品云方便為入實之門即此意也前一番明如來能知方便能用方便此一審明行者能隨順方便復次如來自證修道所得於一切方便即是真實而此真實不可得說雖能說之眾生不能即實以方便力帶不即說一即利者能即鈍不能即又純說一不即利者密即鈍者不即又帶三不即說一即利者能即鈍者不即又帶二不即說一即利者能即鈍者不即又廢三不即純說一切即利鈍者俱能即於方便得見真實上兩意用方便從方便此一意即方便即真實真實即圓因圓因即自行之方便如此自行方便今始證入上釋品云方便者即是真實從自行方便得名故言方便品六分別照諦者前既通別當分結束權實今還約此智照義則易見若通以十種明自行二智者即照隨智三諦也通用十法逗緣者即照隨情三諦也若東四為二者即照隨情智三諦也若當分照諦者事理教行縛脫因果悉是自證即照隨智三諦也理教開合此兩屬化他即照隨情三諦也體用漸頓通別悉種四通自他即照隨情智三諦也三教照諦進此可解又三

藏三十種二智是化他二智皆照隨情三諦若通別六十種是自他二智即照隨情智三諦也通教或時與前三藏共為隨情三諦若圓教三十種權實是自行二智照隨智三諦又三教若通若別皆是逗緣悉是化他二智照隨情三諦圓教若通若別皆是自行二智即照隨智三諦若東三教之實為權東圓教之權為實即自他二智照隨情智三諦也七約諸經者華嚴論教但是滿字論時但是乳論法是一自行一化他若對人但是菩薩二乘聲聞生身菩薩亦未能發自行之權隨智之實若依今經文未曾向人說如此事約三藏者若論教唯是半字若論法是一種化他若論時即是酪若依今文住立門外著弊垢衣執除糞器二乘人耳約方等教若論教對半論滿若論時並酪明蘇若論法有三種化他一種自行若依今文心相體信入出無難約般若若論教帶半論滿若依時挾生而執若依法則有二種化他一種自行若依今文出入取與皆使今知約法華論教發半論滿若論時純是醍醐若論法唯有自行若依今文開權顯實此實我子我之所生我實是父付以家業授記作佛前教不說者今皆發之正直捨方便但說無上道故是自行之權故言方便品自餘或是自他二智或化他二智復次華嚴對二菩薩說一自他不擬二乘不聞不解三藏對二乘說一化他不擬菩薩故無自行方等具對小大對二乘說兩化他對菩薩說一自他般若亦對三說一自二他對二乘說一他對菩薩說一自他法華普對機執者但明一自

不復論他文菩薩聞是法疑網皆已除千二百
 羅漢悉亦當作佛一切眾生悉入自行之方便故言
 方便品云云八本迹者如來本地久已證得一切權實
 名為自行中間垂迹亦作兼帶等說今日垂迹寂滅
 道場帶別化他說自行次說一化他次說三次說二
 次說廢三等皆名化他權實東本權名實東迹實
 名權即是自他權實也結此則有四句一切實一切
 權一切亦權亦實一切非權非實云云身子本證一切
 權實即自行迹在鹿苑單受化他在方等受二被
 三折在般若帶二轉一至法華廢三悟一皆是化他
 權實東本權為實東迹實為權即自他權實亦
 是四句云云若從佛迹說亦是化他之權實亦稱方便
 品若從引入圓因自行亦是方便品若從身子迹權
 亦是方便品若從身子迹入實亦是方便品為此諸
 義故稱方便品也從此品下訖分別功德品十九行
 偈或至偈後現在四信弟子文盡名為正說分若作
 兩正說從此下訖授學無學人記品是迹門正說今
 且逐近就迹門正說更為兩一從此下是略開三顯
 一二從告舍利弗汝已殷勤下是廣開三顯一略更
 為二初從爾時世尊下是略開三顯一二從爾時大
 衆下是動執生疑略開三顯一有長行偈頌長行為
 二寄言歎二智二絕言歎二智若不措言則無能
 知者雖復稱揚言不能盡諸佛二智如前說云云寄言
 為二一明諸佛權實二明釋迦權實諸佛道同是故
 俱歎上光照他土彌勒橫問文殊引古大眾證聞正
 表於此故發軔定起即明諸佛道同也就歎諸佛文

為三雙歎二雙釋三雙結就雙歎中先經家提起
 次正歎爾時者當爾之時也佛常在定何故言起此
 有所示往古諸佛說此經時必前入無量義即入法
 華今佛亦爾此示世界悉檀哀從定起履歷法緣三
 俱審諦說必不課增長物信此示為人悉檀哀從定
 起佛寂而常照尚須入定方乃說法況復散心妄有
 所說此是對治悉檀哀從定起入定緣理安心實相
 出定令心安實相此是第一義悉檀哀從定起安
 此四法故言安詳而起也告舍利弗者小乘中智慧
 第一將欲因其破小智顯大智廢會開覆凡十種如
 玄義中說此乃經家提起之文法華論云佛入甚深
 三昧正念不動如實智觀從三昧而起現如來得自
 在力故如來入定無能驚怖故論與合義相應第義
 悉檀出過世間故無能驚怖四悉檀無障礙故得
 自在云云加趺坐者古往微塵恒沙諸佛及弟子盡行
 此法故又加趺起惡覺尚生他敬心況入深境界而
 不適悅天人耶又非世受用法不與外道共能破魔
 軍煩惱故又能生三種菩提道故私謂此是四悉檀
 意也問餘經云繫念在前者云何又背色想生死
 煩惱境界在後故觀寂滅涅槃所緣在前故應作四
 解云云問云何在面答凡人於面起欲能生荷樂然後
 偏身又九處流穢面有七孔以不淨治欲故繫緣在
 面其云云又六識在面心多上緣表一切賢聖尚空與空
 相應故繫緣在面其云云又若觀於面則能分別六識為
 分別故故繫緣在面其云云又身有六分頭面為勝表諸
 法中實相第一第一法故繫緣在面其云云就雙歎二智

先歎實次歎權實者諸佛智慧也非三種化他權
 實故言諸佛顯自行之實故言智慧此智慧體即
 一心三智甚深無量者即稱歎之辭也明佛實智豎
 徹如理之底故言甚深橫窮法界之邊故言無量無
 量甚深深高橫廣廣如根深則條茂源遠則流長
 實智既然權智例爾云云其智慧門即是歎權智也
 蓋是自行道前方便有進趣之力故名為門從門
 入到道中道中稱實道前謂權也難解難入者歎
 權之辭也不謀而了無方大用七種方便不能測度
 十住始解十地為入舉初與後中間難示難悟可
 知而別舉聲聞緣覺所不能知者執重故別破之耳
 法身本意元以自行權實擬之無機逃走故言不知
 華嚴頓照聲聞聲聞故言不知方等彈斥保住草
 庵故言不知般若轉教無心怖取一殮之意故言不
 知今大機啟發放光動地彼此今古諸佛道同由懷
 疑惑故言不知利根菩薩節節能知鈍同二乘是
 亦不知也門者光宅取二乘方便為今經智慧門此
 須與棄若爾即是得門云何如來破言不知不知
 者則非門也與者此是最淺之能永不識所云云今解
 自有才便智慧為門得入佛智慧如璣珞云二觀
 為方便道得入中道第一義諦亦是三教各有四
 門為方便得入中道光宅之解於二觀中祇是一觀
 於十二門祇是一門云云又方便智慧為門得入方便
 智即是三教各各四門齊教入證也自有佛智為門
 得入佛智慧如上說圓因稱方便品即是自行觀智
 為門即是今經所歎其智慧門圓教四門即其一

也自有實為門入方便智雙照二諦即其義也如此釋者曲當開闢何如光宅區區一種耶若依論以阿含為門此須開拓諸教準觀可知從所以者何下光宅云歎釋迦意云推文意是雙釋諸佛二智也佛曾親近至盡行道法是釋諸佛實智良由外值佛多稟承至要故實智甚深良由內行純厚盡行道法故實智無量無量則釋橫廣其深則釋豎高也勇猛精進名稱普聞是釋諸佛權智其智慧門難解難入良由勇猛精進能入難入之門既入門已澤被無疆物欽勝德故名普聞亦可分句勇猛精進能入法門即釋權智深名稱普聞即釋權智廣觀權文無深廣之語例實智此義則成從成就甚深下雙結諸佛二智稱理究竟故言成就到彼岸底故言甚深此結成實智也稱機過會故言隨宜非七方便所知故言難解此結成權智也隨情則賢理故言難解了義故意顯故言易知攝大乘云了義經依文判義不了義經依義判文即斯義也有時解成就甚深未曾有法結自行權實隨宜所說意趣難解結他權實從吾從成佛已來者是歎釋迦權實舊云釋迦權實各各歎謂吾從成佛下是歎權所以者何是釋權如來知見廣大下是歎實從無量無礙下是釋實從如來能種種分別下是結歎實是舊料揀前後有三意合歎諸佛二智者明二智體同開歎釋迦二智者明二智功用有異二明垂迹之本故諸佛先歎實明顯本之能故釋迦先歎權三諸佛顯自行先須得實釋迦明化他先

以權引實法家而互現出沒者將明體圓不可偏存存則失言也今謂不爾但依文次第於義易解不須曲辯又汝云諸佛道同云何異解如入善讚孝順而打擲父母云就釋迦文亦為三初雙歎次雙釋後雙結吾從成佛已來歎實智若實智不圓佛道不成既云成佛一切成即是歎實智也種種因緣下是歎權智四十餘年以三種化他權實逗會眾生故言種種因緣也譬論者小乘中以芭蕉水沫為譬大乘中以乾城鏡幻等譬依諸論者以小乘譬乳大乘譬醍醐也廣演者能於一法出無量義也無數方便者即七種方便也引導眾生令離諸著者說散十善離三途著說淨十善離欲界著說三藏離見思著說菩薩法離涅槃著說佛法離順道法愛著從所以者何是雙釋二智也如來半句即是釋實智從真如實相中來而得成佛道故名如來即釋成實智也方便即是釋權智由於方便善巧故能種種因緣知見波羅蜜者即是雙舉權實知見也一切種智名實知佛眼名實見道種智名權知法眼名權見悉到事理邊故悉名波羅蜜皆已具足者權實悉究竟也若不作雙釋之意那忍言皆已者者雙釋意顯也從如來知見廣大深遠即是雙結釋迦二智也如來知見如前說廣大深遠明豎如此實智非橫非豎寄言往歎論其橫豎照無限極如函大蓋大也無量無礙下即是結權智也自行之權道前方便約諸法門故知是結權智明矣實智無若干也光宅以此釋實智非但光宅不識實智梁代皆

不知其無礙慧無若干也無量即佛地四等也無疑即佛地四辯也能於一辭一義旋出無量樂說不窮比於別通菩薩如甲主方地力即十力畏即四無所畏禪盡禪之實相定即首楞嚴定三昧即玉三昧深入無際者結成豎深成就一切未曾有法結成橫廣從舍利弗如來能種種分別下舊將結成前權實今用起後將欲絕言更舉權實為絕歎之由文為二初舉絕歎之由次指絕言之境鄭重者表殷勤也如來能善分別巧說諸法者即舉權也言辭柔輒悅可眾心者舉實也何以得知上見他土說頓云其聲清淨出柔輒音下身子領解云聞佛柔輒音深遠甚微妙據前後兩文知是舉實智也前歎中前實後權今何意前權後實明前欲寄言故從實而舒權今欲絕言須卷權歸實耳從取要言之是指實境要者其過于實也無量無邊未曾有法是指權境又舉要是創指之端無量無邊是指權未曾有法是指實言此三法佛悉成就修道得故此那可說若單明一事不應言悉既雙指權實其意明矣止者下第二即絕言歎也印師云欲因止生其疑請之心也觀師云實法難知故先抑止驚其常情今明此法深寂言語道斷體不可說故止而歎之設慈悲為說聞不能解傷其善根是故止也從所以者何下是釋止歎之意意為兩一就佛是最上人成就修得最上法故不可說次明其深境界不可思議故不可說就佛成就下明上人權實橫滿不可說從唯佛與佛下明上人權實豎深不可說成就

對不成就乃至難解對不難解即是橫明成就修道得故故不可說唯佛與佛乃能究盡者初中分獲未盡其源如十四月光用未普獨佛與佛究竟邊底如十五日之月體無不圓光無不徧如此豎深修得故故不可說從諸法實相下即是甚深境界不可思議故不可說光宅云初一句標二智章諸法標權智境三三非一故言諸法三法之中其教最顯教必逗機仍有其人故知三三是權也實相者是實智境一理非虛故言實相四一之中偏舉一理理是本故故是實也中有九句還釋上兩章耳前五句釋權章如是相者三乘言教攬而可別也如是性者三乘教性分不可移易也如是體者三乘之教言章句各各有體菩薩教以六度為體云如是力者三乘教用訓導之力也如是作者三乘教被前人有造作也廣實智境略不牒章實境有四一以四廣其一理如是因者境生真解為因萬善望果也如是緣者境發實智為緣以因所望處為果果起酬因為報後二句雙結初句結權本即舉相末即舉作次句結實究竟即結因等即結報也北地師云三乘法皆有相性果報本末也瑤師云如是相性此釋智慧照用三乘萌具為相必爾成三為性發心為體隨心所堪為力力有所造為作行招果為因因者語其己分所由為緣緣者語其外力遂剋為果酬因為報相為本報為末終同一致為究竟等也如是者其事不差也暢師但約佛上作相者十力各有相貌也性者從根各有所習所習不改謂之為性是

性力境也體者根性不同所欲亦異言其心用縛著故以體為名此欲力境也力者定別名也神通變動非定不運鎮心靜亂非定不寂故力為禪定境也作者業即業力境也因者道為因能至涅槃即至處道力境也緣者緣宿命力境也果者據今因所召果在未來是天眼力境也報者據今報以望往因即漏盡力境也故語報是漏盡也本者是相末是報總而望之都是處非處力境也上來諸釋非不一途然於理不通於文不允文不允者經云諸法何法不收豈止三乘耶理不通者經云實相何所不在而在因果體若實獨在於佛佛則不權權獨在三乘三乘則永無實若三乘但為五則權法不足復全無實若四句但在佛佛全無權實亦不足義不涉於凡夫則諸法之文便是無用實相不徧實相外則更有法如此等過故皆不用也釋論三十一明二法各有九種一各有體二各有法如眼耳雖同四大造而眼有見用耳無見功如火以熱為法而不能潤也三各有力如火以燒為力水以潤為力四各有因五各有緣六各有果七各有性八各有有限礙九各有開通方便達磨鬱鬱多將此九種會法華中十如各有法者即是法華中如是作各有限礙者即是法華中如是相各有果者即是法華中如是果如是報也各有開通方便者即是法華中如是本末究竟等餘者名同可解今明此境為二初一句略標權實章如文次十句廣釋權實相今作四番釋一約十法界二約佛法界三約離合四約位經云諸法故

用十法界釋也經云佛所成就第一希有之法故用佛法界釋也經云止止不須說我法妙難思故用離合釋也經云唯佛與佛乃能究盡故用位釋也約十法界者謂六道四聖是為十法也法雖無量數不出十二界中雖復多派不出十如如地獄界當地自具相性本末亦具畜生界相性本末乃至具佛法界相性本末無有缺減故毗曇毗婆沙第七云地獄道成就他化天法即是其例餘九法界亦如是當知一界皆有九界十如若照自位九界十如皆名為權照其自位佛界十如名為實一中具無量無量中具一所以名不可思議若照六道三聖五如為權若照佛界四如為實當分歷歷此則可說可示何俟止絕言歎也所以一中無量凡夫雖具絕理情迷三乘雖具捨離求脫菩薩雖具照則不周名不了了如來洞覽橫豎具足唯獨自明了餘人所不見不可宣示止絕言其在此耳上玄義中已說今不具記云二約佛法界釋者佛界非相非不相而名如是相相萬善緣因故下文云眾寶莊校即其義也佛界非性非不性而名如是性指智慧了因故下文云有大白牛也佛界非體非不體而名如是體指實相正因故下文云其重高廣也佛界非力非不力而名為力指菩提道心慈善根力等故下文云又於其上張設憶蓋也佛界非作非不作而名如是作指任運無功用道故下文云其疾如風也佛界非因非不因而名如是因指四十一位故下文乘是寶乘遊於四方也佛界非緣非不緣而名如是緣指

一切助菩提道故下文又多僕從而侍衛之佛界非果非不果而名如是果指妙覺朗然圓因所剋故下文直至道場也佛界非報非不報而名如是報指大般涅槃故下文得無量無漏清淨之果報也佛界非本非末而言本末本即佛相末即佛報是自行權也佛界非等而非等而言究竟等指於實相故標章云實相也是自行之實也即實而權故言本末即權而實故言為等此是如來自行權實最為無上無上相乃至無上果報橫廣豎深而無有上故標章云諸法實相也例亦應言諸法實性實體實力乃至應言實究竟等但略舉一而蔽諸耳如來徧照橫豎悉周如觀掌果祇為凡夫如雙目二乘如眇目菩薩夜視濛朧不曉不可得說止止絕言其意在此耳三約離合者若佛心中所觀十界十如皆無上相乃至無上果報唯是一佛法界如海摠萬流若千車共二轍此即自行權實若隨他意則有九法界十如相性等即是化他權實化他雖復有實皆東為權自行雖復有權皆束為實此即自行化他權實隨他則開隨自則合橫豎周照開合自在雖開無量無量而一雖合為二而無量雖無量一而非一非無量雖非一非無量而一而無量唯佛與佛乃能究竟凡夫則誹謗不信二乘則迷悶不受菩薩則塵垢未明為此義故止絕言云四約位者如是相者一切眾生皆有實相本自有之乃是如來藏之相也如是性即是性德智慧第一義空也如是體即是中道法性之理也是為三德通十法界位位皆有若研此三

德入於十位則名如是力如是作入四十一地名如是因如是緣若至佛地名如是果如是報初三名本後三名末初後同是三德故言究竟等初位三德通惡通善通賢通聖通小通大通始通極雖在惡而不沈雖在善而不升雖在賢而不下雖在聖而不高雖在小而不窄雖在大而不寬雖在始而非新雖在極而非故故是不可思議不可得說止止絕言耳復次三德究竟等者十界相性權實開合差別若干以平等大慧如實觀之究竟皆等若迷此境即有六界相性名為世諦若解此境即有二乘相性名為真諦達此非迷非解即有菩薩佛界性相中道第一義諦若以此慧等於俗諦俗諦非迷非悟真諦非解非非解非迷非悟但名平等若雙照者權即是實實即是權雖二而不二亦名究竟等也又權實不二之境七種方便不能以不二智等不二之境唯有諸佛以不二智等不二之境故言究竟等又今大乘機動不明九界性相直說一切性相悉入佛界性相昔教不說謂昔不與今等今教說之知昔與今等故言究竟等初約惑解等次約人等後約教等說此甚廣記者不能委悉耳若就絕言絕思明不可思議釋論七十九云不可思議名不決定出一切心數法出一切言語道不能行不能到故名不可思議若就譬喻明不可思議如釋論十四不以敗壞色得越平等道觀色不異乃能等於大乘如明與暗共合而汝不見謂明暗異欲知其義如彼月光又日出時暗不向十方暗常在無所歸趨明亦如是與暗共合生死與道合道即是

生死佛之所盡已盡所度已度皆不可思議諸經諸論此例甚多若就事中不可思議者如阿含經明四不可思議謂眾生世界龍佛眾生從何處來向何處去為底而生為成而死世界為有邊無邊為可斷不可斷為天龍人鬼誰所造耶阿含云一士夫於王舍城拘締羅池側思惟世間邊無邊見四兵入藕絲孔自驚我狂耶世無此狂問佛佛言非狂是脩羅為諸天所逐退入藕絲孔藏此乃世間思惟非涅槃道無義饒益無法饒益無行饒益龍雨為從龍口耳眼鼻舌出耶實不從爾許出但從其念出念善念惡皆能出由前本行今得是力須彌腹有天名大力亦能作雨又經出五道各一不可思議地獄有斷續畜生能飛鬼能變少為多人能令火燒新天能自然致果報皆是果報法事不可思議云此是約因緣事釋不可思議況甚深境界寧非不可思議耶偈有二十一行為兩初十七行半頌長行後三行半略開三顯一動執生疑前又二初四行頌等言歎後十三行半頌絕言歎夫偈頌長行互有廣略者今義多顯首長行二佛權實各歎表化緣異故頌中二佛合歎示二智理同故初等言中又二初兩行合頌二佛二智後二行合頌二佛釋歎結歎等也初又二今初一句世雄者頌上諸佛智慧也不可量者頌上甚深無量此頌諸佛實智也次三句頌上諸佛權智此有三異一上舉人又標法故云諸佛智慧今頌但頌人將人以美法故云世雄二者上開歎今合歎以法別故須開以人德故須合三者上云一切二乘不知今言一切眾生類

不知佛力下後二行頌歎釋迦二智也佛者頌吾從成佛也正頌實智力無畏等頌諸功德是頌權智餘法者即指化他之權是實智之餘助耳正頌上種種因緣云本從下後二行合頌二佛釋歎結歎之意也本從無數佛具足行諸道頌上諸佛釋歎佛曾親近百千諸佛盡行道法之文也甚深微妙法頌上結歎實成就甚深未曾有法也難見難可了頌上結歎權意趣難解也於無量億劫行此諸道已頌上釋釋迦知見波羅蜜皆已得具足上二句舉因具足次下一句舉果具足我已悉知見一句頌上結釋迦二智如來知見廣大之文也或時用四偈合頌上二佛權實文為六初世雄一句總領二佛二智二諸天及世人三句頌揀人三佛力下一行頌釋迦中釋權實四本從下一行頌諸佛釋權實五於無量下半行頌上行因六道場得成下二句頌上得果從如是大果報去第二有十三行半頌上絕言也文為五初半行如是大果報即頌不思議境但舉初後中間略可知義字兼頌究竟等也大與種種如玄義中說我及十方佛下第二半行追頌取要言之佛悉成就也不可示下第三半行追頌上止不須說也實相非方所故不可示非言語道故言辭相寂滅從諸餘眾生類下第四頌舉不知之人故上長行明無有知者故止而不說頌中十行半頌出不知之人文為八初半偈揀不入者即七方便也除諸下第二句揀能入者即圓教十信故言信力堅固者也長行明究竟佛知頌中明初信知互舉耳諸佛子下第三有一行半揀二乘不知假使

滿下第四有一行舉身子不知正使滿下第五一行半舉諸大弟子辟支佛下第六三行舉支佛新發意下第七三行半舉發心菩薩不入發心語通或可六度菩薩三僧祇未斷惑名為發心或指上人天中自攝得六度而發心之語別擬通別等發心也不退菩薩下第八有一行揀不退菩薩亦不知也通教不退斷界內惑是故不知別理別教地前亦有證位不退行不退等亦所不知也次又告舍利弗無漏下第五一行半頌上難解法佛能知實相境無漏不思議者頌上結要舉權實所止之境也甚深微妙法一句頌上第一希有難解之法我今已具得三句頌上唯佛與佛乃能究盡也明諸佛道同同皆究竟故云唯我知是相十方佛亦然釋不思議者如如意珠無毫釐之有能兩眾寶實相不生能生般若也無漏不思議一行半為本生出四種解釋已如上說從無漏半句為十法界釋作本十法界十如收諸凡聖理性無漏失也收三諦無漏失權實智無漏失約不思議為開合釋作本即權而實即實而權故不可思議也約甚深微妙法為佛法界釋作本此可知約唯我知是相為約位釋作本此亦可知從舍利弗當知諸佛語無異下略開三顯一動執生疑就開顯為二初明諸佛顯實次明釋迦開三互明一邊耳諸佛語無異者此論諸佛化道是同次兩句勸信後兩句正顯實世尊法久後要當說其實即顯真動昔之執生今之疑將非魔作佛正由聞此語也佛既如實語勸信何事翻疑為防因疑起謗者故須勸信耳從告諸聲聞眾下

明釋迦開三文為三初一行正明開三將明二乘之非故言速得涅槃者又解我今脫苦縛速得涅槃即擬六度菩薩乘何以知之修六度行即免四趣縛未能入滅度三僧祇百劫乃得涅槃速之言遠乃及耳又六度行前度他故言我今脫苦縛後取無漏故言速得涅槃此義推之知是六度乘也又以數推之下句云佛以方便力示以三乘教若不指此將何為三不應重數三乘為三乘也次半行正斥三乘皆是虛偽次兩句出立三之意是權引離諸苦故非為其實但是方便門耳從爾時大眾下是騰疑致請由問三偽一真故執動疑生文為三一敘疑二正請決敘疑又二經家敘三正疑先敘千二百疑次敘四眾上斥三乘皆是方便敘疑但在二乘者以其執重疑深偏舉若至下除疑中即云求佛諸菩薩大數有八萬亦皆有疑故知三乘僉疑偏舉三乘耳從各作是念下是正疑又為二疑佛二智二疑已所得從何故殷勤稱歎方便即是揀疑權實二智從而作是言佛所得法甚深者是疑實智有所言說意趣難知下是疑權智以聞諸佛語無異要當說其實從此生疑何者佛昔說三乘智慧同證不差但餘習有盡不盡耳今忽稱歎如來二智非我所及是故疑佛二智也從佛說一解脫義我等亦得此法下此是自疑所得三乘聖道是言其出要我修此理亦到涅槃而今忽言皆是方便未知何者其實故言不知是義所趣此從上斥三為偽而生是疑爾時舍利下第二正請文有三請二止就前為三止瑤師龍師云初止為理深難

解初請為自他求決次止為驚疑不信次請為久
殖必解後止為必諍憤惡後請為利根得益今師或
時云佛豫知三周得益前後不俱故三抑俟其三請
也就初請為二長行二偈頌長行為二陳疑三陳
請陳疑疑二智陳請已請眾請頌中有十一行偈文
為六初二句頌疑實智自說得下第二三行頌疑權
智無漏諸下第三有三行明三乘四眾有疑上句明
羅漢後三行明緣覺中間稱及求涅槃者即是明六
度菩薩何以得知上云速得涅槃者此中稱及及者
此菩薩自求涅槃又以及他故異二乘知是菩薩也
於諸下第四有一行半明身子疑佛口所生下第五
有一行明佛子疑諸天龍下第六二行惣明同疑請
也夫偈頌長行可以意推如其非頌即是長出於義
非急者不能煩文分擘故略耳從爾時佛告下是二
止更陳疑為請悉如文云
妙法蓮華經文句卷第三

趙城縣廣勝寺



妙法蓮華經文句卷第五

計廿八章

具

天台智者大師述

從我始坐道場下第二十七行半頌施方便化就此
 為二初有六行半明念用大乘擬不得次尋念下第
 二十一行明念同諸佛用三乘化稱宜可得就初念
 用大化又為三初一行半明用大擬宜次眾生下第
 二二三行明眾生無機次我即下第三三行明念息天
 化也始坐道場者至理無時假時化物為化之初故
 言始也事釋者初在此處修治得道故言道場坐此
 樹下得三菩提故名道樹感樹恩故觀察念地德故
 經行道成蹊澤之時欲以大法擬宜眾生也觀心釋
 者樹即十二因緣之大樹也深觀緣起自成菩提欲
 以無漏法林樹蔭益眾生故言觀樹經行者大乘三
 十七品是行道法自以道品履一切地得成佛道欲
 以此法化度眾生是故起行樹地無有分別豈須報
 恩未曾有經云祇以通化傳法名報恩耳過去因果
 經云佛成道初一七日思惟我法妙無能受者二七
 日思眾生上中下根三七日思惟誰應先聞法即至
 波羅末為五人說四諦陳如得法眼淨頓鞞拔提十
 力迦葉摩訶男拘利未得道佛重說四諦四人得法
 眼淨佛又說五陰無常苦空非我五人得阿羅漢佛
 為佛寶四諦為法寶五人及佛是六阿羅漢即是僧
 寶小雲疏云初三七日時已是說法華下文宿王華
 智佛在七寶菩提樹下說法華經當知今佛在菩提
 樹亦說法華而鈍根眾生不堪允同諸佛開三教化

妙法蓮華經文句卷第五

第五

具

後於王城說一乘耳若推智者意是則先在菩提樹
 下說於佛慧後在餘處說佛慧例如今佛先說華嚴
 後說法華故文云始見我身聞我所說入如來慧除
 先修習學小乘者而今亦令入如來慧與此義同也
 五比丘者諸女聽仙人說法惡生王瞋割兩脣耳鼻
 等血變為乳惡生王者拘鄰是仙人者佛是佛誓令
 得甘露今初聞法音也問何故初為五人轉法輪答
 人先見諦故人是現見故人為證故佛所行事業與
 人同故諸天從人中得善利故入中有四眾故輪王
 出世聲至他化自在憍陳如得道聲至梵天佛得道
 聲至首陀會何故爾善善業名譽業稱讚父母師長
 業有上中下故爾也若使有頂有耳識者佛聲亦至
 彼輪王行十善善生欲天欲天喜我眷屬增多故陳
 如離欲故徹梵佛最勝至尼吒云若依大乘佛得道
 聲偏至百億尼吒又偏十方無量無邊世界尼吒云
 初轉法輪處菩提樹處初初利下處大神變處此四
 處諸佛皆定餘處不定又除轉法輪一處其三處決
 定三七日者舊云思理教等又云勸誡等瑤師云事
 之至深至聖猶思而後行一七思佛智微妙二七思
 眾生根性不同三七思法藥萬品即舉偈證之我所
 得智慧微妙最第一眾生諸根鈍云何而可度今明
 佛在法身之地寂而常照恒以佛眼洞覽無遺豈始
 至道場淹留三七方思此事言三七者明有所表也
 表佛初欲三周說法故假言三七耳初七思法說次
 七思辭說後七思因緣說皆無機不得是故息大施
 小也此偏就圓教大乘為釋耳若通途約大乘釋者

初七思惟欲說圓教大乘次七思惟欲說別教後七思惟欲說通教大乘皆無機不得是故息大說三藏三乘為方便之化也觀心釋者初欲觀中道中道妙難觀不得次欲觀即假即假觀分別智難生不得後欲觀即空即空巧度又不得方觀方便折法小觀也從眾生諸根鈍下第二三行明無機又為三初半行明鄭重次如斯下第二半行明不堪聞爾時梵王者下第三有二行明諸梵雖請說大佛知無機所以不說我即自思惟下第三有二行明念欲息化又二初一行半明無機強說聞則有損後半行正明息化從尋念過去佛下第二有十一行頌上於一佛乘方便說三也就此為二初十行正明化得後一行釋疑就前十行有四初一行明三乘擬宜次作是思下第二六行半明有機次思惟是下第三一行半明施化次是名下第四一行明受行尋念者念彼雖無大機不容永捨要以為方便而誘濟之非都不知開三欲引同諸佛故云尋念也作是思惟下第二六行半明有小機此又為二初四行半明諸佛歎後二行明釋迦酬順上欲大化於彼無機故諸佛不歎今欲說小曲會根緣則始終得度所以佛歎也就初佛歎為五初三句釋迦自敘諸佛現佛現者由念佛方便力故現現由擬法會機二義故佛現善哉下第二一行一句明諸佛正歎釋迦能隱實設權故云善哉為一施三引入佛慧即是第一導師得是無上法者即是得實智微妙第一也而用方便力者隨諸一切佛隱實用權也我等亦皆得下第三一行明諸佛亦隱實用權如

文從少智樂小法下第四一行雙釋二義為眾生少智不堪聞大所以隱實而復樂小所以施權雖復說三下第五半行雙結二義雖復說三終為顯實也舍利弗當知下第二有二行明釋迦酬順既聞諸佛歎對曰南無南無此云敬從又二初一行發言酬順後一行念順物機從思惟是事下第三一行半正明施教也諸法寂滅相不可以言宣下即是前說中道無性佛種之理此理非數又不可說今以方便作三乘說又非生非滅而以方便作生滅說又偏真之理亦非示說以方便故作四門說初為五人說無常有門也是名轉法輪下第四一行明受行悟入也轉佛心中化他之法度入他心名轉法輪陳如初得見諦即斷見惑分證滅諦亦是分得有餘涅槃涅槃之音起自於此由此得成無學便有羅漢之名能說三乘法者名佛所說三乘即法見諦羅漢等名僧三寶於是現世間從久遠劫來下第二一行是釋疑疑師云佛初未能鑒機尋念諸佛始知根性即釋云非我不知用於方便特欲引同故念諸佛非始念方知從久遠劫來見其樂小已為讚示今盡眾苦所以聞小即得解脫也疑弟子云云何眾生一世暫聞即證羅漢即釋云從久遠劫來為其讚示稱於本智故速得道舊云此偈懸指壽量義本明論秘密意或當如此明顯露意是則不然何者將明壽量彌勒尚自不知云何此中一偈懸指今以釋疑消文從我見佛下第二三有六行頌上顯實文具四初我見佛下二行頌人二三乘行人皆是佛子上文兼有其意也我即

作是念下第二一行頌理一為說佛慧即是上一切種智佛知見也舍利弗當知下第三二行頌教一但說無上道即教一也菩薩聞是法下第四一行頌行一悉亦當作佛故是行一也更就此文為四意初二行明大乘機發亦云索果次兩行一句明佛歡喜眾生得大乘益故次三句正明顯實次一行受行悟入也明由機發故索果索果由於機發此應有四句自有鄭除機未發如諸羅漢在三藏時以樂小故濁郭華中諸凡夫人等雖未斷結以大根利故機發自有郭即除機即發如說無量義時證二乘果即於此座大機即發自有郭未除大機未發即五千等是也志求佛道者即是索大非求小果也索有三意一大機有感果之義機中論索二情中密求為得為不得即此意三發言索即是殷勤三請也昔教之中已有二求但未發言至於今日具此三索問昔出宅索三是機情索者文云如先所許此乃求三何關求一答出外不見必有異途將許三以求異意耳亦得是索一也咸以恭敬心皆來至我所者云云取小慕大大機感佛故云至佛所今明非但機至佛所亦乃身到如無量義中四眾圍繞合掌恭敬心欲聞具足道也嘗從諸佛聞方便所說法者此中初味調伏受行三藏六度通別等三教方便由此調熟故使郭除機發而求大也從我即作是念下二行一句明郭除佛喜佛為佛慧故出昔郭重無機不得即說佛慧中開雖郭除又未得說今機發正是說時昔眾生根鈍智小恐

法華經文句卷第五

第六法

真字

其謗法憤惡故未是說時今根立志大聞必信解故
 佛歡喜無畏者不畏執小謗大起罪憤惡故言無畏
 於菩薩中下三句正顯實也五乘是曲而非直通別
 偏傍而非正今皆捨彼偏曲但說正直一道也菩薩
 聞是法下一行明受行悟入六度通二菩薩初聞略
 說動舊執致新疑今悉已除非獨菩薩二乘亦爾而
 云聲聞皆當作佛者昔教不說二乘作佛今行與授
 記授記豈獨二乘除疑豈獨菩薩互存則兩備問菩
 薩何疑答三藏說三僧祇未斷惑一斷即入真通教
 說菩薩斷正留習習盡即成佛初聞略說悉云方便
 昔真昔成竟知安在又三乘同學一道何意有別今
 聞法華掃蕩諸疑無復遺芥從如三世諸佛下第四
 五行半頌上歎法希有非正為下不虛辭本就此為
 二初一行頌上如是妙法妙法者權實也如三世者
 引同諸佛用權權是引物之儀式也說無分別法引
 同諸佛顯實實則言語道斷豈存儀式又權實本無
 分別為鈍根小智分別權實今還悟入一三不二即
 知佛說三一無分別也諸佛皆爾何獨我耶諸佛與
 出世下四行半頌上時乃說之上亦舉曇花頌中還
 說諸佛與出世兩句久久懸遠時有佛出此舉人難
 正使出於世兩句此舉法難如今佛出世四十餘年
 始顯真實無量無數劫兩句此舉聞法難如五千
 之流梵音盈耳越席而去聞豈不難乎能聽是法者
 兩句舉信受者難普眾唯身子前達中下雖聽猶未
 能了舉曇花譬上四難但合聞者難餘例可解從汝
 等勿有疑下第五二行半頌上不虛又二初一行半

法華經文句卷第五

第七法

真字

勿於可信人生疑次汝等舍利下一行勿於可信法
 起疑法王者夫為人王言則不二佛為法王豈容虛
 說夫方便可是權假真實寧應是妄聞法王說法勿
 生疑也舊從汝等舍利弗下七行不頌敦信但是釋
 迦章中勸信弘經之意耳其文為兩初五行半令弘
 經使其行因次二行半略為受記初一行今其某果
 行因必須弘經四十餘年蘊在佛心他無知者名為
 秘一乘直道摠攝萬途故言要也以五濁惡世下一
 行釋秘要明鄭重之人終不能解故使如來秘不妄
 宣當來世下二行明弘經體初一行明不善人勿為
 說後明善人當為說舍利弗去一行半雙結二義初
 行結秘要明此法如是先以萬億方便然後乃示真
 實後半行結弘經體其不習學不能曉了此正結不
 善者勿為說也兼對習學者則能曉了此乃可為說
 也汝等既已知下一行半略為授記上明三句論其
 有解中一句明其無惑下半偈明其得記既有解無
 惑正應歡喜作佛此中受記開下身子等得記作本
 此中弘經開下命身子流通作本也舊意如此今明
 從五濁下第六行頌上揀眾敦信上幸有此文近
 而不頌耶又二初三行頌揀眾次三行頌敦信五濁
 者一行頌上揀非佛弟子何者若樂諸欲是行魔業
 故須揀之上文著涅槃尚非佛弟子此文著生死那
 是佛弟子互揀非耳終不求佛道者頌上揀增上慢
 上慢者未得上法謂得上法是故其人不求佛道也
 當來世惡人一行頌上如來滅後解義者是人難得
 也有慚愧清淨一行頌上若遇餘佛便得決了次三

法華經文句卷第五

第八法

真字

行頌上敦信若不信此法無有是處初一行半敦信
 於權次一行半敦信於實實權無疑自知作佛云
 釋譬喻品
 先惣釋譬者比況也喻者曉訓也託比比彼奇淺訓
 深前廣明五佛長行偈頌上根利智圓聞獲悟中下
 之流抱迷未遣大悲不已巧智無邊更動樹訓風舉
 扇喻月使其悟解故言譬喻別釋者以世法比出世
 法因於曾有聞未曾有踊躍歡喜如經世間父子譬
 出世師弟又以世生法比出世生法使蒙佛音教不
 失大乘如經父知諸子先心各有所好珍玩之具又
 以世滅比出世滅雖得無漏聞亦除憂惱如經我為
 其父應拔其苦難令免燒煮又以世不生不滅比出
 世不生不滅令其安住實智中我定當作佛如經乘
 是寶乘直至道場當知佛以二音說於譬喻巧令中
 下得四悉檀益故言譬喻品也約教解者佛意本讚
 佛乘為物不堪尋念先佛大悲方便趣於鹿苑稱讚
 三車二乘以下中自濟恩不及人菩薩駕牛運他出
 火故名摩訶薩此三藏教中譬喻也又三人同畏燒
 者聲聞如鹿野直去不迴緣覺如鹿母並馳並顧菩薩
 如大象身杆刀箭全羣而出涅槃云兔馬此通教中
 譬喻也又三乘發心近緣理淺智慧弱斷惑不能
 盡邊到底非波羅蜜菩薩發心及遠理深智強斷別
 惑窮源盡性大品云二乘如螢火菩薩如日光此別
 教中譬喻也又始見我身聞我所說即皆信受入如
 來慧如斯之人易可化度不令如來生於疲苦如華
 嚴中即事而真不須譬喻為未入者四十餘年更以

異方便助顯第一義今日王城決定說大乘普令一切開示悟入佛之智慧不令一人獨得滅度如今始如始如今無二無異上根利智聞即能解不令如來生於疲苦亦不須辭喻祇為中下動執生疑踟躕岐道故須今日大車辭喻而得利益是名圓教中辭喻也本迹觀心例可解不復記云法說有五段經文其一始竟四猶未了此品應在諸天說偈之後火宅辭喻之前出經者調卷置領解之初耳又人云發起中根置第二卷初如六瑞問答為法說作序領解得記為辭說作序此人情耳置法說之後中根可不悟耶此領解段領其所聞述其所解長行領與解合說偈中領與解各陳故言領解段也文有二一經家敘二身子自陳敘為二謂內解外儀內解在心名喜喜動於形名踊躍從妙人聞妙法得妙解若值一幸尚復欣抃況三喜具足寧不踊躍文云今從世尊聞此法音心懷踊躍內外和合致此歡喜即世界釋也又改小學大棄貧事草庵受富豪華業文云今日乃知真是佛子是故歡喜此為人釋也又憂悔雙遣疑難並除內外妨礙廓然大朗文云我已得漏盡聞亦除憂惱是故歡喜此對治釋也又佛子所應得者皆已得之文云安住實智中我定當作佛此第一義釋也約教者夫歡喜喜於入位而阿羅漢出三界籠礙破四住子果對害不感逢利不欣合言歡喜決非世間喜也若苦忍明發若究竟無學先已得之今不應重喜若三人同以無言說道體析雖異證空一致一致之喜久已得之亦不重喜若二空觀為方便道假觀

蕩二乘之隘陋空觀蕩凡夫之喧湫過二邊惡得大歡喜依圓悟初發心住名歡喜住初行亦名歡喜行初地亦名歡喜地身子既是上根利智必是超入之歡喜設不超入亦名歡喜此皆約教釋也本迹釋者身子久成佛號金龍陀迹助釋迹為右面智慧弟子始從外道拔邪歸正示乳味歡喜利益凡夫次示酪味歡喜利益賢聖次示生蘇熟蘇歡喜利益菩薩今作醍醐入佛知見歡喜利益學佛道者如此等歡喜皆迹所為也觀心解不復記云敘外儀者即起合掌名身領解昔權實為二如掌不合今解權即實如二掌合向佛者昔權非佛因實非佛果今解權即實成大圓因必趣果故言合掌向佛瞻仰尊顏者表其解實實即佛境非方便法瞻仰尊顏無餘思念表開佛知見意解於實亦即解權身領於權亦解於實互舉邊白佛下口領解也即是身子自陳敘為二初長行二偈須初文為三標三喜章三釋三結成今從世尊標我身見佛身故名身喜聞此法音係於佛口聞而歡喜故言口喜得未曾有是我意解佛意故名喜喜是為標章也次所以者何下第二釋者提昔之失顯今之得從所以者何說無量知見明昔不見佛為失昔佛為菩薩授記我不豫斯事見佛義遠既不見佛故無身喜聞如是法者若日照高山時密有聞義顯如響如啞不得道聞如是法也祇是方等教中聞大乘實慧與今不殊故言聞如是法也受記者亦是方等中與菩薩記二乘不豫斯事其自感傷思益淨名中間裏大折小內疑而外鄙名為感傷失一切知見者失佛眼之見失

佛智之知也從世尊說非世尊也明昔不聞法失良以身心山林心執小道則不聞法故無口喜我嘗獨處者思過之所也同入法性者正出其過執所入之一理疑於三教之能門一理既同而我失知見三教既異而菩薩受剎受剎則如來有偏所以成過今迷此失故言悔過是我等答者由我迷權何關理教由我感實何關佛偏追述昔非知謝如來是為引過自歸也從所以者何說每自剋責明意無解之失良以不待說所因則無實解又不識方便故無權解無故故無意喜昔失既彰今得自顯不待說所因者自責不解實也不解方便者自責不解權也所因二義一不受待對於前二不停待於後初照高山明三諦之惠是得佛因此以待對於我而我不受失之於前諸佛法久後要富說真實我不停待於此兩盈開忽忽取小不解實權如文而今從佛下結成三喜先結後成從佛是結身喜也聞法結口喜也斷諸疑悔是結意喜乃知真是佛子近佛義成也從佛口生結口成也從法化生是結意成如此消文盡釋理彰也更用四悉檀消文今從世尊下是世尊歡喜從所以者何提昔失顯今得是為人喜從世尊我從昔來對治喜也從今日乃知下是第一義喜也更約喜心明四悉心喜動悅常未曾有喜動覺觀復動于形云偈有二十五行半為三初一行頌標三喜舉我聞兼得佛也從昔來下第二十二行頌釋三喜又為三今初一行半頌見佛喜長行明失知見頌中明不失大乘上論失論遠頌論近論得互現耳我處於山谷

妙法蓮華經文句卷第五 第十張

頁字號

下第二十一行頌上不聞法又為二初九行頌上身體故不聞次我本著邪見下第二兩行頌上入法性故不聞邪見是凡人著入法性是二乘著俱不聞法我嘗於日夜者生死為夜涅槃為日為生死中有涅槃為生死外有耶若得悟時二疑雙遣又生死涅槃俱為夜此疑得除名為日出時二疑雙遣又世人二種一草創學大二習小入大稱其事相直入者劣例如從阿毗曇中入者勝菩薩亦應爾於華嚴中入者化道應弱五味洗汰入者勝從而今乃自覺下第三有九行半頌上心得妙解喜上明不待所因不解方便頌中明得所因又解方便聞當作佛是所因聞五佛道同解魔非魔是解方便互顯一邊五佛章即是領文也從聞佛柔軟音下第三行半頌上結成如文爾時佛告舍利弗吾今下是第三述成段上身子自陳得悟今如來述解非虛文有三昔曾教大二中志取小三還為說大所以引昔曾教述其見佛之緣若中志取小述其憂悔聞法之緣還為說大述其悟解不虛述成上三意也十住毗婆沙云身無上謂相好受持無上謂自利他具足無上謂命見戒智慧無上謂四無礙不思議無上謂六波羅蜜解脫無上能壞二鄣行無上謂聖行梵行又身無上名大丈夫受持無上名大慈悲具足無上名到彼岸智無上名一切智不思議無上名阿羅訶解脫無上名大涅槃行無上名三藐三佛陀菩薩瓔珞十三云道當清淨穢濁非道道當一心多想非道道當知足多欲非道道當恭敬憍慢非道道當檢意放逸非道道當

妙法蓮華經文句卷第五 第十張

頁字號

顯曜自隱非道道當連屬無行非道道當覺悟愚惑非道道當教化矜恪非道道近善友習惡非道如是等種種明無上道今經以圓通為無上道若偏若次皆他經所論長夜隨我受學者昔雖大化未破無明惑闇心中隨佛受學了因雖遠猶尚不滅況今真悟寧虛故舉曾教述見佛不謬也我以方便生我法中者此義兩牽若昔以大化今生大解此屬初意若令免惡道權以小引此是第二意從我昔教汝志願佛道汝今悉忘自有中途廢大習小名中途悉忘若而今便自謂已得滅度即是而今悉忘由汝忘大願即習小致有憂悔而得聞法不虛也我今還欲令汝憶念本願即是述其得解不虛先施權教成其中途小善後顯真實遂其本願大心也從汝於未來下是大段第四投記段前自陳佛印竟是故與記若得大解自自得佛何俟須記記有四意一昔未記二乘而今須記二中下未悟以記勉勵之三令聞者結緣四滿其本願是故記也有長行偈頌長行為十時節二行因三得果釋十號甚多且記一種無虛妄名如來良福田名應供知法界名正徧知具三明明行足不還來名善逝知衆生國土名世間解無與等名無上士調他心名丈夫為衆生眼名天人師知三聚名為佛壞波旬名婆伽婆四國土五說法六劫名七衆教八壽量九補處十法住久近悉如文大論四十八云舍利弗正法三十二小劫者三災飢病刀滅衆生者名小劫又直是時節名小劫如說法華經六十小劫亦是時節數耳非三災滅外物為小劫也偈有十

妙法蓮華經文句卷第五 第十張

頁字號

一行半為二初十行頌上九意略不頌補處長有供養舍利後一行半結歡初一行超頌得果次供養下第二行追頌行因次過無量下第三半行超頌劫名次世界名下第四一行半頌國淨次彼國下第五一行半頌菩薩衆數次如是等下第六半行頌說法次佛為王子下第七二行頌壽量次佛滅度之下第八一行半頌法住久近次舍利廣下第九半行供養舍利後華光佛下第二一行半結歡宜應自欣慶者成初入歡喜位之解也初住能百佛世界作佛行地倍是第五四衆領解有長行偈頌初總敘衆喜次陳供養作是言下正領解初領開權今乃復轉下領顯實也偈有六行半為二初二行頌上開權顯實後四行半自述得解隨喜迴向也我等亦如是者如身子之領解如身子被迷成如身子之得記也問迦葉善吉諸大聲聞尚未得解四衆何人而先獲悟答四衆天人亦具三品上根同身子中下可知又解身子迦葉並是權行中下未開故迦葉滿願示同不解淨名云衆生未愈菩薩亦未愈云從爾時舍利弗白佛下第二大段為中根譬說文有四品此一品正是譬喻開三顯一信解明中根得解藥草如來述成投記與決此四番皆約譬說下四段皆約因緣陳如明繫珠緣而領解阿難引空王緣而獲記云又例法說應有中根四衆歡喜而今無者一謂經家存略二例前後可知後文在法師品中云譬說文為二一請二答請為三一自述無疑二述同輩有感三普為四衆自述如文同輩是同行懷舊故須為請四衆是化境今

新運大悲則普為請佛常教化下執昔三教也而今於世尊前下執昔理也音說三究竟今又說一為真寶子植致迷故言皆懷疑惑有人云身子新舊兩疑千二百止有新疑今謂上根疑少中下疑多云何倒解善哉世尊下為四眾普請也因緣者前三後一之因緣也爾時佛告舍利下第二佛答文為三一發起二譬論三勸信發起為二抑二引抑令憤勇引令速進我先不言下指上明摧皆為菩提指上顯實皆為化菩薩者若權若實皆入佛道無住涅槃上已明言云何執教迷闇不解如此責謂是抑文也然舍利弗今當下是引接安慰前斥既切恐鄙對首沈今許其譬喻更明此義若能解者猶稱智也二譬喻說長行偈頌長行開譬合譬開譬不同已如上說今為二一揔二別揔譬釋釋迦章中今我亦如是兩行偈略頌開摧顯實也別譬釋釋迦章中我以佛眼觀見四十一行半偈廣頌開摧顯實六意也揔譬有六一長者二舍宅三二門四五百人五火起六三十子長者譬於我我即釋迦一化之主也火宅譬上處所安隱對上三界不安隱也一門譬上宣示佛道門也五百人譬上眾生也火起譬上對不安隱法五濁八苦也三十子譬上知眾生性欲三乘行人也長者譬為三一名行二位號三德業名如賓行如主行有親疎名有近遠故舉處所以顯名行也封疆為國最遠宰治為邑居中聚落是鄰間最近長者名行徧此三處近不見其細陋遠但挹其高風口無擇言身無擇行意無擇法名行相稱真實大人內合如來三業隨

智慧行稱機施化名稱普聞德周法界也舊以十方虛空慈悲所被處名國三千為邑一四天下為聚落又大千為國中千為邑小千為聚落皆不用大論六十云柔順忍為聚落無生忍三菩提為城因果共為譬今經直用果德為譬實報土為國有餘土為邑同居土為聚落從本垂迹攝迹反本名行相稱無實主之異彪炳洋溢徧三土也三標位號為三一世長者二出世長者三觀心長者世備十德一姓貴二位高三大富四威猛五智深六年者七行淨八禮備九上歎十下歸姓則三皇五帝之裔左貂右插之家位則輔弼丞相鹽梅阿衡富則銅陵金谷豐饒侈靡威則嚴霜隆重不肅而成智則智如武庫權奇超拔年則蒼蒼稜稜物儀所伏行則白珪無點所行如言禮則節度序世所式瞻上則一人所敬下則四海所歸十德具焉名大長者出世長者佛從三世具如實際中生功成道著十號無極法財萬德悉皆具滿十力雄猛降魔制外一心三智無不通達早成正覺久遠若斯三業隨智運動無失具佛威儀心大如海十方種覺所共稱譽七種方便而來依止是名出世佛大長者三觀心者觀心之智從實相出生在佛家種性真正三惑不起雖未發真是著如來衣稱寂滅忍三諦含藏一切功德正觀之慧降伏愛見中道雙照權實並明久積善根能修此觀此觀出於七方便上此觀觀心性名上定則三業無過歷緣對境威儀無失能如此觀是深信解相諸佛皆歡喜歡美持法者天龍八部恭敬供養下文云佛子住是地即是佛受

用經行及坐卧既稱此人為佛豈不名觀心長者今以十德帖經義足而闕一文國邑聚落有大長者三處稱譽為大豈非姓貴長者豈非位高義遠豈非耆老財富無量豈非豐足多有田宅即分略周瞻豈非智深多有僮僕豈非勢大其家廣大豈非德行師之唯一門豈非禮節訓人一路多諸人眾即下人所歸但闕上人所敬一文今以大字兼之大人所知故稱大也從其年衰邁下三歎德業德有內外內則智略外則財年高博達今古譬佛智德襄邁根志純孰譬佛斷德財富譬外德無量揔釋萬德也田宅別譬也田能養命譬禪定資般若宅可棲身譬實境為智所託略則十八空門廣則無量空門若論福德無行而不修若論智慧無境而不照故云多有田宅也僮僕者給侍使人譬方便知見已具足和光六道曲順萬機即實智之僮僕也二其家廣大者家宅譬上安隱對不安隱不安隱譬三界也眾生元元皆宅三界如來應化統而家之故言廣大也三唯有一門者譬上種種法門宣示於佛道道場觀音實相理不異慧亦宜一出無異路故言一門光宅雲云日三界雖曠九十雖多論於出要唯是佛教故言一門今明若單理為門理無通塞何門之謂單教為門得經者眾何意不出今取理為教所詮文云以佛教門出三界苦得涅槃證門又二宅門車門宅者生死也門者出要路也此方便教之詮也車者大乘法也門者圓教之詮也若宅門是車門初三車救子亦應即是等賜大車若所出門非所入門驗車宅異也四五百人者

妙法蓮華經文句卷第五 第十八張 冥字號

辭上衆生即五道也五堂閣下辭上安隱對不安隱
 法五濁也先出所燒之宅相辭六道果報次明能燒
 之火辭八苦五濁堂辭欲界閣辭色無色界牆辭辭
 四大頹落辭滅損傾危辭遷變柱根辭命梁棟辭意
 識腐敗辭危殆不久欲令易解作觀釋之堂辭身之
 下分閣辭頭等上分牆辭辭皮肉積落辭老朽柱根
 辭兩足腐敗辭無常梁棟辭骨骨傾危辭大期周郵
 屈曲辭大小腸又云辭心云周而大明能燒之火八
 苦偏在四大四生故言周而皆無常故云俱時欬
 然辭本無今有本無此苦無明故有六長者諸子下
 三十子辭上知衆生性欲曾習佛法天性相關則子
 義性欲有異若十是菩薩子二十三十是二乘子此
 機俱得出宅故名爲子無此機是五百人或者支佛
 出沒不同或小乘攝或中乘攝皆言十者悉有十智
 之性故云內有智性但無如實智性耳上二偈先頌
 實後頌權今總辭中先實後權云從長者見是火火
 下是第二別辭也別更爲四初長者見火辭辭上佛
 見五濁四行偈爲本二捨机用車辭辭上釋迦爲五
 濁寢大施小始坐道場十七行半偈爲本三等賜諸
 子大車辭辭上釋迦示真實相我見佛子等志求佛
 道者六行偈爲本四長者無虛妄辭辭上我爲諸法
 王三行半偈爲本就初見火其文有四其意但三一
 明能見二明所見三明驚怖四廣前所見但成三意
 長者見標出能見辭上我以佛眼觀見也是大火從
 四面起者標出所見辭上所見六道衆生也即大驚
 怖辭上爲是衆生故而起大悲心也而諸子等於火

妙法蓮華經文句卷第五 第十九張 冥字號

宅內下廣第三所見之火也還是釋成驚怖之義身
 受心法即宅之四邊從此四邊起淨樂等四倒八苦
 之火衆苦皆集若知身不淨苦無常即煩惱大滅舊
 有三解一云四大爲四面六識並託其中二即四生
 三云四倒依下文以生老病死爲四邊也即大驚怖
 者念其退大善故驚憂其將起重惡故怖驚即對慧
 念其無樂怖即對悲憂其有苦我雖能於此所燒之
 門安隱得出者即是釋成驚怖慈悲之義雖是未盡
 之辭明佛以智慧力能尋正教見所詮諦不爲五濁
 八苦所危故名安四倒暴風所不能動故名隱蕭然
 累外故名得出而衆生不爾爲火所燒如來慈悲猶
 爲憂火所熾故言雖也經言所燒之門者今問教爲
 門者此教爲燒爲不燒教云教門不燒佛教爲門能
 通所燒之人所通之人被燒名能通門名燒如門內
 人死名門爲衰門實不衰又問若爾教是常住非有
 爲法若不爾何故不燒今解不爾夫門有件有空非
 件無以標門非空無以通致件可空燼空不可燒教
 有能詮所詮若非詮辭無以爲教若非所詮何以得
 出詮辭可是無常所詮非復無常得教下所詮故名
 安隱得出能詮磨滅故言所燒之門不從所燒之門
 何由安隱得出籍於言教契於所詮大經云因無常
 故而果是常如此釋者如經於所燒之門也若小乘
 無常教門此從所燒門出若大乘常住教門文字即
 解脫者此教即理體達燒無燒而安隱得出若就如
 來權智即是從所燒門出若就實智體於所燒安隱
 得出故先作衣械八案出之不得後以無常出之即

妙法蓮華經文句卷第五 第二十張 冥字號

此意也樂著嬉戲者見名嬉著夢名戲又耽酒四見
 名嬉唐喪其功名戲著夢亦爾耽酒五塵名嬉空無
 所獲名戲空生徒死而無狀離如彼見戲不覺不知
 者都不言有火名不覺不解火是熱法名不知既不
 知火熱不畏傷身名不覺不慮斷命故不怖衆生全
 不覺五陰八苦不知四倒三毒既不識感云何憂慮
 感侵法身傷於慧命如是不覺於苦不知於集不驚
 傷道不怖失滅以不聞四諦教則無聞慧名不覺不
 得思慧名不知不得見解名不覺不得思惟解名不
 知見諦即驚悟思惟即狀怖又不覺現在苦不知未
 來苦故下文云現受衆苦後受地獄等苦即此義遍
 身者五識也心者意識心王也身爲八苦所逼而心
 不狀惱也亦云曾種大乘功德是法身智慧爲體體
 爲四倒所逼而不知不覺心不狀患者不狀無常之
 苦不患煩惱之集也無求出意者不修道求滅也今
 謂火宅本辭五濁嬉辭見濁戲辭煩惱不覺不知
 不驚不怖辭衆生濁火來逼身苦痛切已辭命瀕心
 不狀患無求出意辭劫濁此與五濁相當云從是長
 者作是思惟下是第二捨机用車辭辭上寢大施小
 上六行半明大擬不得後十一行用小擬得上不得
 有三思大擬宜二無機三息化今辭爲二初用勸門
 擬宜二用誠門擬宜就勸誠各三一擬宜二不受三
 放捨勸門三者一從長者作是思惟身手有力下辭
 上念用大化於三七日中思惟如此事二從復更思
 惟下明子不受辭上無機衆生諸根鈍云何而可度
 三從或當墮落爲火所燒下即是放捨善誘辭上無

機息化我寧不說法疾入於涅槃也長者作是思惟
下辭上三七日思惟也身手等者引下合辭云但以
神力及智慧方以釋此辭身辭神通荷負手辭智慧
提拔依三昧斷德則有神通依智慧智德則有說法
智斷之力能成法身此之智斷還從勸誡兩門入勸
即為人悉檀誠即對治悉檀此二悉檀為第一義悉
檀而作方便如來初欲勸門擬宜眾生令眾善奉行
成就十力無畏一切種智而眾生不堪次欲以誠門
擬宜今諸惡莫作證大涅槃眾生不堪無機息化故
知念用大乘祇是勸誡兩悉檀神通智斷耳故上文
云定慧力莊嚴以此度眾生即其義也前數長者其
年衰邁即辭智斷智斷即是身手力也衣祴八案者
三藏法師云衣祴是外國盛花之器貢上貴人用此
貯之舊云衣祴辭大乘因八案辭大乘果初擬大乘
因果是則無機也舊又云此物辭大乘戒定慧初七
思惟所得法此如用衣祴二七思惟眾生根緣如用
凡三七思惟樹地恩如用案云此義出阿含經今取
合辭文若我但以神力及智慧力讚如來知見力無
所畏者眾生不能以此得度神力即是身慧力即是
手如前說知見辭衣祴無畏辭八力辭案如來以
神通發動此三法以智慧宣說此三法無機息化衣
祴八案等略中廣之異耳略說名如來知見知即一
切種智見即佛眼名略義玄辭如衣祴一足而多含
處中說即名四無所畏用對四諦如凡於法小廣於
物小安隱或作廣說名為十力橫豎該括如案多足
則無傾覆也於法則廣物則大安於三七日中思惟

欲作如此廣略佛法而眾生不堪故言衣祴八案也
復更思惟下第二明子不受辭上無機唯有一門而
復狹小門義如上說今更明通別別者一謂一理一
道清淨門謂正教通於所通小謂不容斷常七方便
等教理寬博則非狹小眾生不能以此理教自通將
談無機故言狹小耳通者理純無雜故言一即理能
通故言門微妙難知故言狹小教者十方諦求更無
餘乘唯一佛乘故言一此教能通故言門此教微妙
凡夫不知出處是不知權不知入處是不知實三乘
因聞少知出要永不知入菩薩雖自知出亦不知入
奪七方便皆不知入上文云若我讚佛乘眾生沒
在苦不能以教自通將談無機故言狹小行者圓因
自行行大直道無留難故故名為一善行菩薩道直
至道場故名為門妙行難行方便無機故言狹小耳
舊解人天小善故云幼稚無大乘善名未有所識今
明二萬佛所教無上道大乘善根微弱名幼稚若聞
大乘能生謗毀名未有所識也戀著戲處者前明善
弱此明惡強即是因時深著見變果時深著依正欲
界著六塵色界著禪味無色界著定上文云眾生諸
根鈍著樂癡所盲不堪聞大乘也或當墮落為火所
燒指此二句名放捨善誘也墮落有二一者幼稚憶
本戲處故墮落二都無識執物不堅故墮落墮著五
欲墮在三途二者善弱無識誘毀大乘墮落三途也
從為說怖畏下第二對治門三者一擬且對治誠怖
令出對治之相如大品中說四念是摩河衍以不可
得故異於小乘也既著戲處故說怖事令得免五濁

火燒五陰舍宜應捨離若久住者必斷善根故云無
令為火之所燒害從父雖憐愍下即是子不受誡也
不驚不畏者不生聞思如上說不識八苦五濁能燒
善根如不知火不識陰界入法是諸苦器如不識舍
不知喪失法身之由如不知何者為失從但東西走
戲視父而已指此二句為放捨苦言也皆背明向闇
如東西生死往還速疾如馳走於中起見愛如戲也
雖用大擬不從大教故言視父而已從長者即作是
念此舍已為大火所燒下即是第二用車辭辭上尋
念過去佛所行方便力十一行偈上文有四今辭亦
四二者擬宜三車辭辭上尋念過去佛亦作三乘化
也二者父知先心所好辭辭上作是思惟時十方佛
皆現三者歎三車辭辭上正施三乘思惟是事已即
趣波羅捺也四者適子所願辭辭上受行悟入是名
轉法輪也大乘法功為父命眾生大善為子命夫善
若盡即子命斷子命斷則化功亦廢即父命斷前言
苦痛切已猶是未死今云必為所焚即有死義也上
文於所燒之門安隱得出今云若不時出必為所燒
此義云何前得出者即是法身出今言若不時出即
是應身同疾眾生有善與應身時出眾生善斷不與
應身時出即是俱為所焚也今欲應身擬宜令其時
出也從我今當設方便欲設權也從知子先心下第
二明有得度之機也其昔曾習小是知先心性欲不
同是知各有所好又知眾生昔曾習大習大未濃是
為大弱狀老病死故以小接是為小強如身子六心
中退本曾習大名知先心中厭老死名各有所好從

妙法蓮華經文句卷第五 第十四

而告之。言下第三是歎三車希有。譬譬上正轉法輪也。此即為三謂勸示證玩好希有。下即是勸轉如此種種。下即是示轉。汝等於此火宅。宜速出來。皆當與汝。即是證轉也。從爾時諸子聞父所說。下第四適子所願。譬譬上受行悟入。前偈本略。今譬事廣。廣明修因。至果依六句解釋。一適願者。機教相稱。此即聞慧也。勇銳者。即是思惠。思心動慮。思惠方便也。互相推排者。推四具理。排伏見惑。邪正未使。名為互相排。修慧屬煖頂位也。競者。競取勝理也。此是忍法位。競取勝理。初觀三十二諦。競趣真道。後縮觀趣苦法。忍也。共者是世第一法。位同觀一諦。與苦法忍四觀不別也。馳走者。入見道十五心。速疾見理。譬譬上便有涅槃音見道之中。分得涅槃也。爭出者。思惟道也。爭出三界。成無學果。斷思惟盡。方出火宅。即譬上偈。及以阿羅漢法。僧差別名也。觀心解者。中道正觀。直觀實相。心法相稱。名適所願。境無邊。故觀亦無邊。名勇境。研心利名。銳心境。相研名。互相推排。心王心數。緣境速疾。名競。馳走。徧歷一切陰界入等。無非實相。名為出火宅也。是時長者見諸子等。下是別譬。中第三等。賜諸子大車。譬譬上顯真實。相此文為四。一父見子。免難歡喜。譬譬上我。即作是念。所以出於世。至今我喜。無畏兩行。一句偈。為本。二諸子索車。譬譬上大。乘機發。我見佛子等。志求佛道者。咸以恭敬心。皆來至我。所兩行。偈為本。三等。賜諸子大車。譬譬上於諸菩薩。中正直捨方便。但說無上道。三句為本。四諸子得車。歡喜。譬譬上菩薩。聞是法疑網。皆已除。一偈

妙法蓮華經文句卷第五 第十五

為本。上法說中。先明機發。次說郭除。佛喜。無畏。合譬中。先明免難。後明索車。若具足論。應作四句。有先郭除。後機發。如四大聲聞等。於三藏中。郭除。大品末法。華初。大機始發。二郭未除。大乘機發。如華嚴中。及法華中。諸凡夫。眾得入佛慧者。餘兩句。如上說。若大機先動。後郭除。如方便品。所說。若先郭除。後機動。如今所說。機動。郭除。互現。共成一意也。又方便品。明佛喜。無畏。此中。諸子歡喜。以子喜。故其父亦喜。此亦互現。共成一意也。就免難。中具二義。謂免難。歡喜。若子未免難。父則憂念。若得離火。心即泰然。故免難。歡喜。得為一譬。以子歡喜。其父亦喜。得譬佛喜也。四衢道中者。舊云。四濁。郭除。如四達路。更得一濁。除。如露地。坐今。不爾。五濁。直明。垢郭之法。未論。治道。不應。譬衢道。衢道。正譬。四諦。四諦。觀異名。為四衢。四諦。同會。見諦。如交路。頭見。或雖。除思。惟。猶。在不。名。露地。三界。思盡。名。露地。住。果。不。進。故。云。而。坐。不。為。見。思。所。局。故。云。泰。然。生。滅。度。安。隱。想。故。言。歡。喜。也。各。白。父。言。下。第。二。是。索。車。譬。文。云。願。賜。我。等。三。種。寶。車。文。無。索。字。義。者。依。此。請。解。明。索。車。耳。有。人。云。二。乘。索。車。菩。薩。不。索。作。十。難。難。之。一。云。二。乘。出。三。界。外。至。許。車。處。索。車。索。菩。薩。未。至。許。處。那。忽。索。車。二。云。大。乘。經。無。菩。薩。索。小。乘。果。故。知。不。索。三。云。所。化。菩。薩。從。初。發。心。終。至。補。處。皆。是。凡。夫。不。出。三。界。義。則。無。索。能。化。菩。薩。三。三。心。見。傾。思。未。盡。三。四。心。便。是。佛。佛。從。誰。索。四。二。乘。果。在。正。使。門。外。佛。果。在。習。氣。無。知。門。外。二。乘。斷。正。使。盡。不。見。車。是。故。索。菩。薩。未。斷。習。與。無。知。那。忽。索。五。明。二。是。方

妙法蓮華經文句卷第五 第十六

便可言索。文云。唯此事實。餘二則非。具以此推之。但二索。一不索。六從。大品。已。來。至。法。華。已。前。佛。因。佛。果。皆。是。方。便。者。付。窮。子。財。此。之。珍。寶。皆。應。是。方。便。若。付。財。是。具。實。則。大。品。等。明。佛。乘。已。是。具。實。那。忽。更。索。七。方。便。品。偈。敘。昔。說。小。是。方。便。不。敘。大。是。方。便。當。知。佛。子。大。乘。非。方。便。那。忽。有。索。八。若。三。人。索。者。何。無。領。解。領。解。無。故。故。知。不。索。也。九。合。賜。車。文。云。見。諸。眾。生。出。三。界。苦。得。涅。槃。樂。故。賜。以。大。乘。菩。薩。不。證。涅。槃。那。忽。索。十。諸。子。安。坐。故。就。父。索。二。乘。果。滿。不。修。行。故。安。坐。可。得。有。索。菩。薩。行。未。息。無。安。坐。義。那。忽。索。私。以。想。別。駁。之。索。是。求。請。之。別。名。在。意。名。求。索。在。口。名。請。索。在。身。名。乞。索。如。矇。者。求。知。如。飢。者。請。食。如。迷。者。問。道。凡。居。不。達。之。地。何。有。不。索。之。理。由。索。故。許。與。許。與。故。歡。喜。今。文。具。有。請。與。歡。喜。法。說。中。千。二。百。人。身。子。為。首。殷。勤。三。請。菩。薩。眾。中。彌。勒。為。首。佛。口。所。生。子。大。數。有。八。萬。合。掌。以。敬。心。欲。聞。具。足。道。辭。說。之。初。身。子。為。中。根。人。請。又。想。為。四。眾。請。傍。為。下。根。請。文。云。善。哉。世。尊。願。為。四。眾。說。其。因。緣。法。說。許。云。汝。已。殷。勤。三。請。豈。得。不。說。譬。說。許。云。當。以。譬。喻。更。明。此。義。因。緣。許。云。我。及。汝。等。宿。在。因。緣。吾。今。當。說。法。說。竟。身。子。歡。喜。譬。說。竟。迦。葉。等。歡。喜。宿。世。說。竟。樓。那。歡。喜。又。合。譬。文。云。今。諸。子。等。日。夜。劫。數。常。得。遊。戲。與。諸。菩。薩。乘。是。寶。乘。直。至。道。場。以。喜。故。知。與。與。故。知。請。三。周。三。義。明。文。炳。然。何。故。偏。言。二。索。一。不。索。別。駁。其。一。齊。三。藏。明。菩。薩。不。斷。惑。依。法。華。有。四。句。謂。郭。除。大。機。動。郭。未。除。大。機。動。機。動。則。知。索。其。二。云。大。乘。經。無。菩。薩。索。小。乘。果。大。品。云

三乘之人同以無言說道斷煩惱入涅槃斷煩惱入涅槃同何故不索其三云三十三心名菩薩三十四斷思盡即成佛佛從誰索此猶三藏義見耶未除大機尚動況三十三心而當不動動即知索其四菩薩未斷習氣無知不應索斷盡佛從誰索此三乘通教義具縛郭存尚大機動况殘習無知耶其五唯此一事實實即是真那忽復索被會絕待之唯一外更無法昔待二之唯二外更有法一名同而體異聞執瓦礫魚目謂夜光月形愚而智惑云其六般若已來法華已上與付財法同不應有索汝不聞共不共般若若不須索共者不應不索云其七方便品初昔說小是方便不敘昔說大是方便大非方便是故不索者汝不聞壽量品中我少出家得三菩提乃至中間若小若大若己若他皆我方便諸佛亦然寧得不索其八若菩薩索菩薩應領解領解既無故知不索汝不聞法說竟天龍四眾皆領解其非菩薩謂是何耶又法師品中三乘皆與記若不領解那忽與記其九出三界苦得安隱樂乃賜乃索菩薩未出未證是故不索猶是三藏義耳其十諸子安坐爾乃賜車二乘行息名安坐菩薩行不息非安坐那忽索車猶是前義耳自有行息索行未息索又菩薩行行即是乘乘乘由索得何謂不索觀其詭累三藏故設此十難管見一斑都非大體今當為爾分別說之自有不斷惑不索車三藏菩薩是自有斷惑索車通教菩薩是自有亦斷惑亦不斷惑亦索亦不索別教菩薩是自有非斷惑非不斷惑非索非不索圓教菩薩

是又歷五味乳味兩意一亦斷亦不斷亦索亦不索二非斷非不斷非索非不索酪味一意不斷不索生蘇酪四意熟蘇但三意醍醐一意宏綱大統其義如此於二句一一意復各四句謂郭除機動郭未除機動郭亦除亦未除機動郭非除非不除機動斯宗不見執一非三深可悲愍世人執車數不同說車體不同或言初說三車後會二歸一或言初說有三後會三歸一或言初說有四後會三歸一所以出經勿信人語此文引昔佛為聲聞說應四諦法為緣覺人說應十二因緣法為菩薩人說應六波羅蜜法今佛說三數亦如此華嚴第八云下劣狀沒者為示聲聞道根鈍學因緣為說緣覺道根利有慈悲為說菩薩道無上樂大事說無量佛法三十六又云三解脫法出聲聞乘無諍法出緣覺乘六度四攝出大乘知一切法出佛乘又第凡地說聲聞乘相支佛乘相菩薩乘相如來乘相地論釋第二地觀十不善集墮三途十善集生天上十善與四諦觀智合成聲聞又上十善與不從他聞觀智合成緣覺又上十善與具足清淨觀智合成菩薩地又上十善與一切種一切佛法合成佛瓔珞第十三云十方佛說三乘一乘中又開三合九乘九乘悉會入平等大慧聖說如此不能融通互相是非非法毀人過其大焉今約教分別之若說三乘法門異而真諦同者三藏教也若說三乘法門同真諦皆同者通教也若說三乘三三九乘若說四乘淺深階級各各不同而同入平等大慧者別教也若說三乘九乘四乘一皆與平等大慧相應

無二無異者圓教也又歷五味分別乳味但明菩薩乘佛乘酪味但明異三乘生蘇味備明三乘四乘九乘各各分齊不相濫熟蘇味唯除異三乘餘如生蘇也醍醐中純說佛乘無復餘乘也若識此意異說無妨若不知者祇增諍論耳世人明佛乘乘體有異宅取佛果究竟盡無生二智為車體遠出五百由旬之外對昔為高具舍萬德對昔為廣莊嚴取因惣萬行為體上求為高下化為廣者不取功德功德與凡夫共唯取智慧為體舊夏取福慧共為體云乘是三車以無漏根力覺道禪定解脫三昧而自娛樂豈但智慧耶又師但取有解為體空解無動故不取盡無生智即有解也又一小乘取空慧為車體云我等長夜修習空法大乘亦以實慧方便為車體車體解有有有運動故也私謂諸師釋佛乘之體而競指且度何異眾盲觸象諍其尾牙依天台智者明諸法實相正是車體一切眾寶莊校皆莊嚴且耳至賜車文中當點出舊解小車者小果也果有有為無為功德正取有為以譬車運運入無餘也有為果中具無福慧以慧為正福屬且度其慧有十而八智通因果盡無生智唯是果位乃取二智以譬車果以是義故車在門外若依小品云是乘從三界出到薩婆若中住若未出時已乘是乘爭出火宅何故復言車在門外若先在外乘何而出然但乘通因果三十七品斷見思惑皆是因乘盡無生智皆名果乘要因乘斷除惑盡方得果乘盡無生智故言車在門外但果正因傍就果為言車在門外若內因斷結運義名乘

妙法蓮華經文句卷第五 第三張 真字

外果不運何得名乘然果無斷惑之運要以盡無生智入無餘涅槃方是好運也若乘因到果何意方更索車舊云機索情索機索者可解情索者佛說盡無生教羅漢證此果已用神通天眼試觀未來猶見變易生死浩然自疑所得盡無生證若實無生云何見有如其浩然昔非究竟情中從佛索先所許是為情索若尋經文無此語若推索義義不應然文無可解推者下文云自於所得生滅度想既以天眼見有生死何故復起滅度之想此則自相矛盾又佛滅後羅漢不值餘佛不能決了既自以天眼照見生死何須見佛而決了耶又初禪天眼尚不見二禪況見變易亦與攝大乘乖也又羅漢得無漏業用天眼見變易未來生死果報者即時人修五戒十善應自見其未來果報當知界外果報豈是天眼所見耶不用此判情索也今言情索者昔日依教謂盡無生能入無餘而於方等中見菩薩不思議間淨名彈斥若我所得是實大士不應挫折若我非實佛不應說真故云茫然不知所云至大品中領知大法聞此樂大心起方欲進修大乘而不能知得與不得此等皆是情中已索大乘之義故身子領解提昔疑情見諸菩薩授記作佛不豫斯事嗚呼自責欲以問世尊為失為不失即是指昔方等已有情索也今加口索者因聞方便品初偈略聞佛說並是方便即復執今方便疑昔未極故云我今不知是義所趣動宿疑情故發言三請索求昔日所說之實機在大乘情求昔實又情求大乘口問昔實六度通教例爾從舍利弗爾時下三

妙法蓮華經文句卷第五 第三張 真字

等賜大車有兩章兩廣兩釋一等子二等車以子等故則心等譬一切眾生等有佛性佛性同故等是子也第二車等者以法等故無非佛法譬一切法皆摩訶衍摩訶衍同故等是大車而言各賜者各隨本習四諦六度無量諸法各於舊習開示真實寶貴不同故言各皆摩訶衍故言大車其車高下廣狹為二廣敘車體次釋有車之由敘車體中先敘高廣次明白牛後明儼從假名車有高廣相譬如來知見深遠橫周法界之邊際豎徹三諦之源底故言高廣也眾寶莊校者譬萬行修飾也周而欄楯者譬慈持持萬善遮眾惡四面懸鈴者譬四辨下化也張設憶蓋者譬四無量眾德之中慈悲最高普覆一切也珍琦雜寶而嚴飾之者真實萬善嚴此慈悲大經云慈若具足十力無畏名如來慈慈中行布施等云寶繩交絡者譬四弘誓堅固大慈心也垂諸花纓者譬四攝神通等悅動眾生也亦譬七覺妙髮也重敷綉者譬觀練薰修一切諸禪重沓柔軟也安置丹枕者車若駕運隨所到處須此支昂譬即動而靜即靜而動若車內枕者休息身首譬一行三昧息一切智一切行也丹即赤光譬無分別法也駕以白牛者譬無漏般若能導諦緣度一切萬行到薩婆若白是色本即與本淨無漏相應體具萬德如膚充煩惱不殊如色潔又四念處為白牛四正勤中二世善滿如膚充二世惡盡如色潔四如意足稱行者心如形體殊好筋骨五根住立能生義也力譬五力摧伏幹用義也行步平正以譬定慧均等又譬七覺調平其疾如風者八正

妙法蓮華經文句卷第五 第三張 真字

道中行速疾到薩婆若僕從者譬方便波羅蜜能屈曲隨人給侍使令眾魔外道二乘小行皆隨方便智用故淨名云皆吾侍也又果地神通運役隨意即僕從也次所以者何下釋有車之由者由財富藏溢譬果地福慧圓滿名財富無量虛藏充溢行藏理藏一切法趣檀尸忍等是趣不過者是約行為如來藏一切法趣陰入界根塵等是趣不過即是約理明如來藏自行此行理名充化他名溢實智滿名充權智用名溢入中道名充雙照故名溢非但藏多又皆充溢何法不是摩訶衍故大乘無量也而作是念下即是廣明心等文為二廣心等二釋廣心等者財富無量是子無偏是故心等若富而非子是子而貧則不得等入七寶大車其數無量若教若行皆摩訶衍即財多也各各與之不宜差別者不移本習而示真實如身子於智慧開佛知見具一切佛法目連於禪定開佛知見具一切佛法餘人例爾又方等般若念處正勤根力覺道種種異名皆開示實相歷一切法亦復如是故言無量也所以者何以我下是釋兩等初釋財多尚周一國況復諸子辭大圓因徧該善惡況佛知見耶次釋子等者非子尚充況是子耶譬佛無緣者尚度況有緣子耶尋文可解從是時諸子各乘大車下第四通願歡喜辭上受行悟入本求羊鹿水牛期出分段今得白牛盡於變易過本所望豈不歡喜從於意云何下第四不虛辭法王不妄一問二答三迷歎問如文舍利弗言下第二答為二免難不虛亦名以重奪輕不虛二不乖本心不虛亦云過

本望不虛各為三謂標章解釋結標免難如文何以故下第二釋者命重身輕全身免火已得大寶濟于重命豈應有虛結免八苦之火全五分之身已是大寶況二萬佛所大乘慧命圓因成就佛知見開寧是虛妄次世尊若是下第二不乖本心初標不乖本心章本知無三意令不誘不誘者已不乖本心釋云本知無小意令不毀墮惡既無毀因不墮惡果不與小車不乖本意結云自知財富無量欲饒益其子與一大車過本所望是故不虛結前章云方便救濟似解斷德神通之力結後章云財富無量似解智德辯說之力前是子等故不虛後是財等故不虛佛告舍利下第三歎述有二善哉者述其二不虛也問佛何不自說不虛答佛許三與一自說為難身子說不虛取信為易舍利弗如來亦復下第二合譬光宅開十譬但合七不合三七中正合五兼第五第八不合第七第九故知十譬繫而不會合合意別二譬總中有六今文皆合小不次第今初第一合上第一上長者名行位號德業合云如來亦復如是先合位號如來無量德號略舉十義如上說一切世間將處所以定名行上云國邑聚落合直云一切世間通指同居有餘自體皆是妙色妙心果報之處如來徧應三處即一切世間合上國邑聚落也於諸怖畏下合上歎內外德內是年高衰邁識達則多譬如來智斷於諸怖畏無明永盡合上衰邁顯斷德也成就無量知見合其年高顯智德也力無畏等合上外德財富無量也神力者深修禪定能得神通合上田也智慧力智必

照境如身之託處合上宅也具足方便波羅蜜合上諸僕從也從大慈大悲下第二合上第四慈悲是施化之本一切是五道恒為慈悲所被合上五百人也而生三界火宅下第三合上第二其家也為度眾生下第四合上第六眾生有緣親者前度合上三十子也生老病死等下第五合上第五欸然火起譬也教化今得三菩提下第六合上第三教能詮理尋理起行即得菩提故知教理共用合上唯有一門譬也若講說今前後可解一須提方便品譬本來勸誅之後去例爾從見諸眾生下第二合別譬別譬有四合第一見火譬譬有三意其文有四合亦四但譬中驚怖在前諸子戀著戲處在後合中不覺不驚在前拔苦與樂在後互現辯其不定耳今以一見字第一合上第一能見之眼即是如來寂照智眼能見也諸眾生為生老下第二合上第二所見之火從四面起此中明八苦為火四苦如文貪著追求不得苦後受地獄天上人間是五陰苦愛離怨會如文此之八苦從四面起也從眾生沒在其中下第三合上第四所見火譬諸子不覺不知等也不觀苦集故不厭不觀道滅故不求解脫雖遭大苦不以為患合上心不厭患無求出意也從佛見此已便作是念下第四合上第三起驚怖我雖能於此所燒之門安隱得出音也應拔其苦難者即大悲之力與無量樂者即大慈之力也從如來復作是念下合第二捨凡用車譬上譬有勸誡今但合勸不合誡法說中亦勸善不明誠惡故勸修為正誠惡是傍亦是勸善即誠惡

誠惡即勸善今合勸善即知合誠惡也上勸文有三謂擬宜無機息化擬宜有身手衣械等但以神力者合上神力及智慧力者合上手力也讚如來知見合衣械也力無所畏合凡案也若佛初出即用此擬眾生不能以此得度也所以者何下釋不得度合上第二子不受勸譬正由五濁重未免生死等火大乘微妙不能得入故言何由能解佛之智慧此一句即合上唯有一門而復狹小故不能解智不解智慧者即是行為閉意也如彼長者雖復身手有力而不用之合上第三放捨善誘無機息化或當墮落為火所燒也此文無放捨語譬及譬本息化意甚分明也息化文為二先牒前後三譬次正合息化牒前三譬正帖合息化牒後兩譬傍成息化也雖復身手有力而不用之此牒前身手救子不得譬以合息化如來亦廣大化也但以殷勤下牒施三之譬也就然後各與下牒第三等賜大車譬也如來亦復如是下十六字正合第三息化也從但以智慧方便下合用車救得譬上文有四此中亦四但以智慧下合第一擬宜三車也為說三乘下合上第二知子先心也而作是言下合上第三歎三車希有上有勸示證合亦具合但不次第第一合上第二波等其得樂住三界下是示其盡無生處也三界是示苦諦勿貪羸弊乃至生愛等示其集諦速出三界示其滅道滅道即是示其三界外有智斷三乘之果故今速出三界當得三乘三乘正取道滅為體也我今為汝保任此事終不虛者是第二合上第三必與證得不虛也復作是言汝

妙法蓮華經文句卷第五

第卅六張

頁字

等當知下第三合上第一歎希有如此三乘是諸佛方便引物儀式故眾聖所稱得無生智為自在得盡智為無繫我生已盡不受後有名無所依所作已辦梵行已立名無所求也從若有眾生內有智性下合第四適子所願辭上有真似等四位今合亦四但上摠今別三乘各為四皆引上辭來帖合也內有智性者宿習三乘樂欲成三乘智性故佛施三乘之教也內有智乃至從佛聞法信受合上聞父所說玩好之物通其願故合上聞慧也殷勤合上心各勇銳思慧也精進合上第二推排推是推理排是排惡惡去故精理明故進合上修慧也欲速出下合上第三競共馳走也是名聲聞乘合上第四爭出火宅三乘修行皆有此四而辟支佛求自然慧者辟支是法行人從他聞法少自推義多故取辟鹿鹿不依人自然者從十二緣門入此門本自有之非佛天人所作名自然慧不從他聞復名自然慧也菩薩稱一切智者不同二乘乃是佛智菩薩望此修因即是大乘兼運之意也如彼長者見諸子等安隱得出下合第三等賜大車辭上文有四一免難二索車三等賜四歡喜今略不合第二第四也但合免難義兼索車人合等賜義兼歡喜今雙牒免難賜車二辭然後雙合三辭如彼長者下牒免難自惟財富下牒等賜如來亦復如是下合免難門有三義入義出義別義若三界為宅五陰為舍由迷色心而入色心即是入宅生死之門若作出者是乘從三界出即是稟佛通教下所詮為門若別義者即是稟別教下所詮為門也今言佛教門

妙法蓮華經文句卷第五

第卅七張

頁字

者正是藏通二教教下之理共為門得出三界而免難也如來爾時便作是念下今等賜也上等賜先列二章門二廣說三釋出今合關略文小不次第如來爾時便作是念我有無量智慧力下第合上第四釋有車之由上云財富無量庫藏充溢也是諸眾生皆是我子下第二合上第五廣等心上云我財物無極不應以下劣小車也不令人獨得滅度皆以如來滅度而滅度之豈非合等心義是諸眾生脫三界下第三合上第一等心章門上云各賜諸子等也諸佛禪定解脫等下第四合上第二標車章門皆是一相一種下第五合上第三正廣大車通合上高廣乃至獲從等一相是實相即法身一種是種智般若能生淨妙之樂樂即無苦名為解脫三德高廣具足莊嚴收羅眾德名摩訶衍合上大車辭也如彼長者以三車下合第四不虛辭上答有二一全身命二不乖本心各有三別今但合不乖本心兼得全身何者佛意本為除其五濁五濁既盡大善自全上不乖心有三標次釋三況今但合釋合況也初牒三車誘引後與大車辭次合如來初說三乘誘導然後但以大乘此合解釋不乖本心上云先作是意我以方便令子得出也何以故下合上第三況出不虛即是長者自知財富無量欲饒益諸子故許三與一非是虛也此釋小異於前前意為今諸子得出意不在三既出不與亦非虛妄今明如來出世本欲說大但為小智樂著三界故以方便誘引既已得出還與大乘即稱本心故言能與眾生大乘之法但不盡能受也若華

妙法蓮華經文句卷第五

第卅八張

頁字

嚴中能受即為與天不俟開一為三不能受者以方便力於一佛乘分別說三三由眾生非佛本意故用此釋成不乖本心不虛也

妙法蓮華經文句卷第五